


54718/B



Ex libris Titius Lancia

Ex libris Titius Lancia

Ex libris Titius Lancia

P. C.

5 1 5
1 8

H. Hallera exifimata 1797 3





*Wefferum signasse sat est, abscedite vates,
Non capiunt maius nomina tanta decus.*
G. THOMASIVS

JOH. JACOBI WEPFERI

*Diversor. S. R. J. Elect. &
Princip. Archiatri*

**HISTORIÆ
APOPLECTICORUM,**

*Observationibus & Scholiis Anatomicis &
Medicis quamplurimis Elaboratæ
& Illustratæ.*

Una cum Epistola JOHANNIS OTT, de
Scriptis HOLDERI de Elementis Sermo-
nis, & MÖRLANDI de Stentorophonia.

Accesserunt huic Editioni

A L I O R U M

CELEBRIUM MEDICORUM

*Observationes Historiæque variæ
circa Apoplexiam.*

Ut &

BERNARDI HUETE,

Cons. Urb. Zwoll.

CURATIO MANIÆ

certa & sæpius instituta.



AMSTELÆDAMI,

Apud JANSONIO-WAESBERGIOS.

MDCCXXIV.

R. C.



AD VIROS

MAGNIFICOS, NOBILISSIMOS
& AMPLISSIMOS.

D_N. LEONHARDUM MEI-
ERUM.

D_N. MATTHÆUM SCHA-
LICHUUM, Consules.

D_N. JOH. CONRADUM
NEUKUM, Proconsulem.

D_N. JOHANNEM MÆDE-
RUM.

D_N. JOH. JACOBUM STO-
KARUM à Neuforn, Quæ-
stores.

Cæterosque Inclytæ Reipublicæ Schaff-
husianæ Senatores prudentissimos,
spectatissimos,

Dominos suos

Omni honoris cultu venerandos.



NTE decennium, VIRI
MAGNIFICI & AM-
PLISSIMI, & quod
excurrit, me Civium vef-
trorum valetudini præesse voluistis,
ac Poliatrium nuncupastis. Ab illo
tempore pro virili operam dedi, ut
demandatam provinciam bene admi-
nistrarem. Nec contentus iis fui quæ
apud exteros, tum è vivis, tum ex
mutis præceptoribus, quin etiam
rerum medicarum usu didiceram.
Cum enim hoc seculum præ mul-
tis, ob inventa quædam, mirabilem
corporis nostri structuram & ele-
gantissimam œconomiam, sapientis-
simi Opificis opus, illustrantia, im-
primis felix esset, nolui novus te-
mere credere, aut pertinaciter ve-
tera defendere, ratus tritum illud
quorundam, malle se cum veteri-
bus errare, quam cum recentiori-
bus veritatem fateri, nec sapientis,
nec prudentis, nec pii medici esse.
Itaque quoties occasio dabatur ac
per superstites licebat, cadavera hu-
ma-

mana aperui & qua potui diligentia in morborum reconditos recessus inquisivi. Quod autem nova & antihac minus consueta molientibus evenit, id & ego expertus fui: quidam enim ex vulgo morbi sævitia enectos, non demum post mortem excrucandos clamitarunt. Alii, qui cum vulgo desipere nolunt & sibi quantivis pretii videntur, cadavera humana non ita laceranda & dilanianda existimarunt, cum sepeliendi ritus, tum apud omnes gentes, tum apud Christianos, jam à primitivæ ecclesiæ temporibus, semper sacrosanctus habitus fuerit, atque corpus, quod sedes erat imaginis divinæ & templum Spiritus sancti, honorificentius tractare deceat. Quorum priores & sensus communis ineptiarum redarguit, & merito irideret Diogenes Cynicus, philosophus ethnicus. Hic cum se inhumatum projici jussisset, amici & discipuli ipsum reprehenderunt, atque à feris cadaver discerptum iri objecerunt:

runt : quibus respondit , bacillum
prope me ponite , quo volucres abi-
gam. At qui poteris ? inquiunt illi ;
non enim senties. Quid igitur fera-
rum , ait , laniatus oberit , nihil sen-
tienti ? Hos vero vulgo vix meliores
existimo & tantum non tacite λειψα-
νολατρεία favere vereor. Equidem
cadavera humana sepeliendi mos ve-
tustissimus est , quem mortalibus &
cadaverum intolerabilis foetor & ali-
qua erga demortuos pietas semper
suasit. Antiquitas tamen rituum splen-
dore & magnifica sepulchrorum struc-
tura , detestandam luxuriam ostenta-
vit (id Mausoleis , Pyramidibus , La-
byrinthis & similibus testantibus)
quæ abominandam gentilium super-
stitionem peperit. Nunc aliis mori-
bus vivitur , & qui apud nos , divina
gratia , ritus celebrantur , nonnisi
gloriosam corporis resurrectionem in
memoriam nobis revocant. Hos non
profanat corporum Anatome , cum
frustula non feris objiciantur , sed
terræ , ut integra , communi nostræ
ma-

matri, tradantur : non secus ac Josepho, pio & sapientissimo Ægyptiorum principi, ac paterni nominis observantissimo, non vitio dabatur, quod patrem suum Jacobum, patriarcham emortuum, medicis condendum tradiderit. Nam evisceratum fuisse, nemo ignorat, nisi quem latet conditura magnatibus, etiam Christianis, adhuc solennis : aut cui nunquam mumiam Ægyptiacam videndi facultas facta fuit. Imo Anatomici luculentiore honore hoc divinæ imaginis hospitium & SP. S. domicilium prosequuntur, dum artificiosa sectione quascunque corporis nostri partes in apricum proferunt, & in illis, τὰ μεγαλεῖα τῆς Θεῆς, (hoc est ineffabilem Dei sapientiam & immensam bonitatem) admirantur : unaque opera discunt, qua ratione vivorum sanitas, (præstantissimum inter omnia, quæ homini in hoc mundo bona obtingere possunt) conservanda, aut amissa reparanda sit. Hanc felicitatem universo Generi humano invidere videntur.

dentur illi, qui, nescio qua religione ducti, Cadavera qualiacunque integre sepelienda malitiose contendunt, ipsimet vermium esca futuri: & quantum in ipsis est, prohibent, ut quidam, qui vivi nauci fuerunt, mortui quoque nihil profint. Fœdus sit labor & turpe cuiquam videatur, manus sanie & cruore madescere: at hæc turpitudine pauxillo aquæ ablui potest. Turpior & damnosior rerum anatomicarum ignorantia est, quæ imperitis Medicis & Cheirurgis ignominiam parit, quam nec Rhenus, nec Oceanus eluere poterit. Laudandum igitur potius studium hoc erit atque juvandum ab iis, qui imperant. Quod cum à VOBIS, MAGNIFICI & AMPLISSIMI DOMINI, laudatissimo exemplo semper præstitum fuerit, & nuper admodum, publico Senatus consulto, pro lubitu in Nosodochio & Xenotrophio, cadavera secandi nobis potestatem feceritis, gratitudinis ergo, quidquid est hujus opellæ, Vobis demisse offero,

fero, ac devote rogo, ut porro studia mea promoveatis, quo ulterius vestrae expectationi & meae conscientiae satisfacere possim. Valete & vivite feliciter.

Scribebam Scaphusii
2. Febr. 1658.

*Vestr.
Magn. & Ampli.
Domin.*

addictissimus Civis & Poliater

JOH. JACOBUS WEPFER,
Med. Doct.

BENEVOLO LECTORI

salutem.

VEnas Lacteas, Circulationem sanguinis, Ductus chylicos, Vasa Lymphatica, atque alia hujus sæculi inventa, non exiguas in Pathologia turbas excitaſſe, norunt illi, qui Veterum dogmatibus innutriti, nova quoque addidicerunt. Nam cum de plurimarum partium uſu & actionibus neceſſario aliter quam hætenus ſentiendum ſit, non pauca immutanda, emendanda, aut aliter explicanda erunt. Quibus tamen difficulter aſſenſus conciliatur, apud eos maxime, qui à puero aliis & diverſis opinionibus imbuti fuerunt. Quod cum nonniſi à ſolidis & firmis argumentis & ipſo ſenſuum teſtimonio impetrari poſſit, poſtquam ante aliquot annos ſanguinis motum agnoviſſem, plurima humana cadavera, tum apud exteros, tum hic in Patria, & ſolus, & comitibus ac hujus utiliſſimi laboris ſociis, Viris Clariffimis & Doctiſſimis D.D. CHRISTOPHORO HARDERO, FRIDERICO LUCIO SCRETA & EMANUELE HURTERO, Collegis meis plurimum colendis, aperui, atque ita, aliquot annorum intervallo, plures hiſtorias, apoplexia, lethargo, mania, ulcere gulæ

gulæ in asperam arteriam pervio, pleuritide, phthisi, palpitatione cordis, febribus hecticis, hydrope pectoris, empyemate, ventriculi distensione maxima, cum tunicarum incredibili tenuitate, ejus ulcere, dysenteria, ileo, intestinorum vulnere, hydrope ascite & anasarca, magno liene, renum ulcere, mesenterii apostemate, calculo vesicæ, ejus ruptura, hydrope uteri, difficili partu, suffocatione ab utero, herniæ intestinalis sectione, aliove morborum genere enectorum collegi. Hac vice quatuor, apoplexia mortuorum, historias publicæ lucis, speciminis loco, facio. Addidi exercitationem de loco in apoplexia affecto, incidenter causarum ejus proximarum facta mentione, in qua provirili, ad leges circularis sanguinis motus, omnia accommodavi. Si rem tetigero, erit de quo mihi gratulari potero: sin aberravero, lubens aliorum candidam censuram perferam, atque si ulteriore talium sectione errorem agnovero, ipsemet mea damnabo & publico scripto, si licuerit, corrigam. Has quas trado historias, si **BENEVOLO LECTORI** placere intellexero, & cæteras, brevi explanatione junctas, cum propitio Numine, suo tempore, publici juris faciam. Inter quas primum locum merebitur historia puellæ sine cerebro, in vicino nobis

bis pago, natæ, cujus visendi & dissecandi
copiam mihi fecit Cl. Dominus D. HUR-
TERUS, in qua consideratione medica
dignissima notavi. Magni Lienis historiam,
à nobis, ante aliquot annos, observatam,
meditatur Cl. D. D. FRIDERICUS LU-
CIUS SCRETA, in cujus recensione &
illustratione lectu jucunda & scitu necessa-
ria, pro eruditione, qua præstat, quam
plurima proferet. Sint, qui tales observa-
tiones flocci faciant, sint, qui calamum
contra eas publice stringant: non tamen vel
alios, vel me ab hoc studio, ob innumera
quæ adferunt commoda, deterrebunt. Po-
tius Exc. D. THOMAS BARTHOLI-
NUS, in defens. dub. de Lact. Thorac.
contra Riolan. c. 2. audiendus videtur, ita
enim ille: „ Optarem certe plures in urbe Pa-
„ risiensi BALLONIOS, qui in civitate fre-
„ quentissima & Nosocomiis instructissima,
„ debita diligentia, per dierum seriem, con-
„ signassent, & raros morborum eventus, &
„ remediorum successus, & observata in mor-
„ bitorum cadaverum dissectione. Hujusmo-
„ di diaria & observationes centum Anthro-
„ pologiis præferrem & quovis ære redime-
„ rem. Ibidem Parisienses Medicos, ad hanc
operam invitat, quos optime de publico
merituros, nec unquam arrogantia dam-
natum iri, spondet. Atque hæc Cl. D.
BAR-

BARTHOLINI amica invitatio, non parum animi mihi ad harum Observationum editionem addidit, cujus scriptis & jucundissimo colloquio, dum Patavii eram, me plurimum in his adjutum fuisse, ingenuè fateor. Ad invidum verò quod attinet, si forte in his pagellis aliquid invidia dignum reperiatur, ut in propria viscera sævire desinat, amice moneo. Momo meliorem mentem precor, simulque rogo, ut his, in hoc scribendi genere, meliora substituat, sic me non parvo scriptionis continuandæ fastidio sublevabit, & publico, ut reor, non parum proderit. Typographica errata B. L. æquo animo corrigat, quorum indicem per negotia hac vice addere non licuit. Interea, dum meliora sequantur, valeat, & si e re ipsius fuerit, faveat.

I N

LAUDEM AC HONOREM

Cl. Domini Authoris.

COmpar tentat opus magnus
WEPFERUS in arte

Luminibus, Medici Lumen &
ipse chori.

Nam cultrum & calamum Medi-
cos convertit in usus,

Nactus & hæc famæ est orga-
na digna suæ.

Amica mente & manu

JOH. CONRADI BROTBECQUII,
Philosophiæ & Medicinæ Doctoris,
Ejusdemque & Physicæ Professoris
publici in Illustri Academia Tubin-
genfi.

IN-



HISTORIÆ APOPLECTICORUM.

I.

JOHANN-JACOBUS REITER Kenzingâ - Brisgojus, ætatis circiter 45. annorum; habitu corporis gracili, capillis flavis & crispis præditus, ingenio pollens; honestis parentibus, Patre scilicet Consule prognatus; à puero literis operam dedit, ac lautè victitare potuisset, nisi miseranda & Germaniam universam devastantia obstitissent fata: quæ cum & patriam communi calamitati involvissent, varia passus, imprimis truculentam famis tyrannidem gravissimè anno 1634. expertus est, quæ malesuada ipsum coegit, etiam iis vesci, quæ natura, ceu venenum, aliàs horrere solet. Hinc post multa discrimina & varios casus Rheinovium appulit, ubi aliquot annis Ludimoderatorem egit: Tandem à

REVERENDISSIMO & AMPLISSIMO DOMINO D. BERNHARDO à FREIBURG, celeberrimi ejusdem Monasterii Præfule optimè merito, Domino meo plurimis nominibus colendo, intra Monasterium adscitus fuit, ubi Cubicularii munere aliquot annis fideliter functus est. Parcius semper, quamdiu ipsum novi, comedit, indulfit verò plus poculis, adeo tamen ut non nimium Baccho litaret. Ad iram paulo pronior, non tamen rixarum amans, nec lites ex litibus ferens. Aliquoties, in hoc Monasterio vivens, podagra excruciatu fuit, quæ primis annis in pedum articulos sævit, sequentibus tamen nec reliquis articulis pepercit: Dum hoc morbo luctabatur, nihil ægrius tulit, quam si podagræ nomine insignitus ille fuit. Ab anno verò & quod excurret, ante obitum nunquam ejus consuetam sævitiam sensit, siue id medicamento-
rum clanculum usurpatorum culpâ, siue naturæ imbecillitate non potentis morbi causam amplius ad articulos, ceu ignobiliora loca protrudere, factum sit. Hinc circa id temporis tussis molestissima diu vexabatur, adeo ut phthisicum crederent, quæ podagræ suppressæ tribuebatur. Verum idoneis à me propinatis remediis, tussis cessavit & satis commode per integrum fere annum valuit, si herniam intestinalem excipias, quam
tussis

APOPLECTICORUM. 3

tussis violentia effecit. Anno 1655. 7. d. Novembr. quinto die à plenilunio, mane sanus salvusque, quantum omnibus constitit, REVERENDISSIMO D. PRÆSULI sacra peragenti adstitit, quibus peractis in conclave suum se consueto more contulit: cum forte fortuna famulorum quidam ipsum convenire voluisset, reperiit ipsum humi prostratum, ad vociferationes furdum, ad concussiones & corporis vellicationes, instar trunci, stupidum; accurritur, infunditur aqua antiapoplectica, atque alia, iis quæ ad manum erant, tentantur, sed omnia frustra. Accersor & ego: cum post bihorium adventassem, vidi illum ex pallore livescentem, sensibus omnibus & motu animali orbatum, sola respiratione, primùm satis ordinata, excepta; & nisi respirantem vidissem, primo intuitu leipothymia vel omnino syncope affectum dixissem, adeo exsanguis facies erat ac livebant extrema, & cum naribus ad tactum perfrigebant. Pulsus primò validus, magnus, celer, mox debilior, minor & crebrior, respiratio quoque laboriosior, mox inæqualis evasit, ac sæpe penitus cessatura videbatur. Nullum genus congruorum remediorum omisi, venam in debili tamen & brevi exspiraturo tundere non ausus fui. Hora decima antemeridiana motu quodam corpus concutiebatur, plurimumque

A 2 sputi

sputi albi, viscidi, lenti ex ore emanabat, nihil verò cruoris: hinc magis magisque vires labascere, ac extrema amplius frigefieri cœperunt: Hora prima pomeridiana ejusdem diei vivere desiit. Statim ac morbo correptus fuit, plurimum fæcum nigrarum per alvum excrevit, quod vino cuidam chalybeato tribui, de quo tum temporis, nescio ex cujus Empirici consilio, aut quem ob finem, singulis mane & vesperi cyathum epotare solebat. Indulgentiâ REVERENDISSIMI D. PRÆSULIS antea memorati Patroni literarum omniumque bonarum artium summi, caput aperui: remoto cranio ac discissa dura menynge plurimum cruoris profluxit ex spatio, quod inter eam & tenuem menyn gem satis capax est, copiose p. n. undique & undique eò effusum; neque enim solum circa basin cerebri cruor stagnavit, sed & ad verticem usque & ad anteriora & posteriora pertigit, quin etiam intra anfractus quotquot fere cerebri sunt, se insinuavit. Ventriculis detectis reperii & illos omnes cruore adimpletos; nec quarto quidem excepto, quorum laterales, probe basin quasi laceri, ac si nimio cruore distenti rimas egissent. Cruoris extravasati quantitatem duarum librarum pondus superasse haud difficulter divinare potui. Toto cerebro, ventriculis & superficie a nimio & grumoso

APOPLECTICORUM. 5

moso sanguine contaminatis, ulterius nihil observare, nec vel ruptam venam aut arteriamprehendere valui. Hoc tamen certum est, nullam causam violentam externam, sive ictum, sive casum, tantæ rupturæ vasorum sanguiferorum authorem, præcessisse, cum derasis capillis & ablata cute, ne minimum quidem contusionis alicujus vestigium apparuit.

II.

Barbara Zuberin septuagenariæ vicinior, totum ferè vitæ cursum in famulatio consumpsit, ac jam senex desponsata, utcunque vitam toleravit. Vidua in Nosodochium recepta fuit: Habitu corporis erat mediocri, & quantum mihi constat, non multum morbis conflictabatur, nisi quod ab aliquot annis visus ipsi imminui cœperit, quo quandoque tantum non penitus privabatur, quem tamen brevi, citra fere medicam opem, aliqua ex parte, recuperabat, protinus recrudescente malo: nunquam autem cœca omnino evasit. In utroque oculo manifesta suffusionis exordia conspici poterant. Jam ab aliquot mensibus apoplexiæ prodromi in ea ab astantibus animadversi sunt, dum subinde lingua titubavit, mox tamen hoc loquelæ vitio cessante. Anno 1657. 29. Januar. 10.

a Plenilunio die, hora 3. pomeridiana, dum ut rebantur, sana cum sociis fila trahebat, subito sermonis usum perdidit atque inclinare corpus visa est: mox ab ancillis in lectum ducta fuit, incessu illo observatum est adhuc dextri lateris pedem illam movisse, manum ad caput sustulisse atque verba quædam, sed haud intelligibilia, protulisse: statim tamen omnem sensum & motum animale amisit, permanentibus respiratione (quæ tamen paulo post cum stertore fiebat) pulsu & faciei colore rubicundo. Remedia pauca adhibita, cum nihil amplius primo insultu deglutire valuerit. Eodem die, horâ sextâ pomeridiana exspiravit. Altero die post meridiem cum CL. Dn. D. HARDERO, collega meo honoratissimo & harum rerum studiosissimo, caput aperui: olla ablata, orbiculatim duram menyngem mediam discidi, corpus falciforme a crista galli liberavi, ac laterales sinus dissecai: hinc reclinato ad latus cerebro, omnia nervorum paria, arterias carotides prope infundibulum, infundibulum ipsum, arterias vertebrales, ubi in occipite emergunt, ac denique medullam oblongatam, in ipso orificio magno occipitis, abscidi, atque ita cerebrum undique ab omnibus vinculis liberum, totum extraxi, quo penitus subiticasus proximam causam perscrutari valerem.

Exempto

Exemto cerebro, duram meningem ei adhuc incumbentem levavi: apparuit pars dextra cerebri superior ac posterior, inferior, non tamen ad basin usque, & anterior frontem versus tota sanguine suffusa: Cerebrum ibidem molle erat & humor quidam in eo fluctuans manifestè attactu deprehendi poterat: in eximendo hoc in latere rimam egit, ex qua prominuit grumus sanguinis nigerrimus, nucis myristicæ magnitudine: digito immisso sensim cultello rimam dilatavi: inveni cavitationem amplam ad frontem ferè antrorsum, sursum ad corpus ferè falciforme & sinum tertium, posteriora versus ultra cerebri dimidium, ac deorsum etiam ultra dimidium dilatatam. Longitudo hujus cavitatis, seu antri præternaturalis octo, latitudo quatuor, & profunditas duas cum semisse uncias superavit. Continuit grumum sanguinis ovum gallinaceum æquantem, præter alios minores grumos & fluitantem sanguinem, pondere unciarum circiter octo, vel integræ fere libræ. Ventriculum lateralem primo intuitu opinati sumus: verum accuratius inquirendo invenimus cavitationem hanc non esse ventriculum, vel ejus portionem aliquam, sed peculiarem & p. n. à sanguine extra vasa effuso formatam: & quidem ex rupto ramo aliquo, sobole insignis rami arteriæ carotidis anterioris, qui post-

quam nervos opticos transcendit, in parte anteriore & laterali cerebri notabilem anfractum ingreditur, ac non procul ab exortu in plurimos ramos scinditur, inter omnes cerebri anfractus medios incedentes, quandoque eorum superficiem scandentes, mox descensuri ac ulterius per medios anfractus sursum ad corpus falciforme ferè in minutissimos subdivisi furculos, ambulaturi: horum etiam non pauci nec uno in loco manifestè cerebri substantiam subeunt: Et quidem hujus arteriæ ramos unum vel plures hoc in loco ruptos fuisse, clarè & sine dubio cognoscere potuimus, nam dum illius progressum in eo latere investigavimus, primum ramum ejusque furculos, tum in principio, tum in cuncto reliquo incessu, vacuum omnino sanguine invenimus, secus ac se habebant arteriæ cæteræ omnes, tum & posteriores in hoc latere & anteriores quædam non ab hoc ramo profectæ. Præterea ubicunque incedebat hæc anterior lateralis arteria, ejusque rami, grumi sanguinis obviam facti sunt, sæpe pertinaciter arteriis adhærentes, idque tam latè & altè, quàm hæ arteriæ disperguntur. Ruptâ itaque unâ atque alterâ harum arteriarum, & sanguine intra anfractum profundiorē effuso, novî semper sanguinis appulsu, ut unda impellitur undâ, magis magisque spatium anfractus dila-

dilatatum fuit, atque dum ab irruente sanguine perpetuo pulsu, humilior anfractuum superficies depressa, aliorum interstitium tenerum, gracile, molle & sanguinis impetui cedens perruptum fuit, in hanc amplitudinem facilè excrevit, non secus ac in aneurismate fit, nisi quod citius in cerebro talis cavitas a sanguine irruente, quam in quavis alia parte, ob ejus mollitiem, conficiatur. Superficies anfractuum superius integra permanfit, id cavente pia matre, eos colligando & quasi uniendo: nec basis hujus cavitatis perrupta fuit, tecto seu fornice ventriculi dextri magis medullosa & tenaciore existente, quam anfractuum interstitium, quod flaccidius est, ex cortice cerebri, ut vocat CL. BARTHOLINUS, confectum. In toto spatio illo, quod inter duram & piam matrem est, nullus humor ullibi, nec etiam in basi vel occipite occurrit. Ventriculus dexter undique integer fuit: vix tantum seri subcruenti continuit, quantum dimidium nucis juglandis putamen caperet: in posteriore & ima ejus parte plexui choroideo hydatis parva adhæsit. Sinister omnino vacuus fuit: in plexus choroidei medio ibidem calculum gypseum, candidum, asperum & inæqualem, seminis lupini magnitudine invenimus, alios, in utraque plexus parte, seminis milii

& majore magnitudine hinc inde dispersos vidimus. In tertio ventriculo grumulum sanguinis fabæ magnitudine reperimus. Glandula pinealis non accurate præerat canali, è tertio in quartum ventriculum aperto, forsan quod ob tumoris hujus, seu aneurismatis cerebri magnitudinem sursum aliquantulum, cum quarto sinu, rapta fuerit. In principio hujus canalis parietes ejus paululum sero subruento tangebantur. Verum quartus ventriculus mundissimus erat, nec vel minimam in eo labem animadvertimus. Omnes quatuor crassæ meningis sinus vacui erant a pituitosis corporibus, nec ullo in alio vase cerebri ea vidimus. In sinistro cerebri latere ne minimum quidem ἐγχύµωρα apparuit, nec quicquam sanguinis grumosi vel alterius rei p. n. vestigium occurrit. Adeo ut hoc ἀνεύρισμα ad apoplexiam fortissimam producendam suffecerit. Carotis interna utrinque ad latera glandulæ pituitariæ incedens, tum ante, tum post perforationem duræ matris, laminâ osseâ & tenerâ incrustabatur.

III.

Anna Waltherin è pago Löninga, sex circiter stadiis ab urbe nostra distante, oriunda, sexagenariâ major. Habitu corporis medio-

APOPLECTICORUM. 11

mediocriter carnoſo prædita. Vitam a prima infantia vixit ruſticam, pauperculæque omnes operæ ruſticæ ſubcundæ erant, etiam graviffimæ, quæ in vineis colendis, ab utroque ſexu eò loci peraguntur; aliquot prolium mater fuit: hinc ſenior facta ad obſtetricis munus peragendum ordinata eſt. Crebro ſanguinem, tam Venæſectione, quam ſcarificatione, malo noſtrorum more, profudit. Solent enim noſtrates, ruricolæ imprimis, ter quaterve in anno Venæſectiones uſurpare, & qualibet vice duas, quandoque tres, non raro quatuor venas pertundendas curant; emittunt ſæpè binas ſanguinis libras; nulla cura eſt vel temperamenti, vel ſexus, vel ætatis: Videntur quandoque gravidæ, quæ bis terve geſtationis tempore ſanguinem V. S. effundunt, nec etiam partui vicinæ a V. S. ſibi temperant, perſuaſæ ſalubrius tum puerperium agi. Vidi ſenes octuagenarios hoc remedii genus expertos: nec ſanguine fuſo ſolliciti admodum ſunt, qua ratione inanitæ venæ præſtantiore ſanguine replendæ ſint, frequenter enim ſtatim ac Vena ſecta & cibo & potu nimio corpus infarciunt; videres ſæpius ex urbe noſtra domum properantes titubare, nec pedes veſtigia ſervare: & ſæpe ſæpius vel altero die ad conſuetam victus rationem & ſolitos labores redire: alios errores taceo.

An

An verò & quibus morbis afflicta fuerit foemina hæc toto vitæ curriculo, ab astantibus intelligere non potui, præter quam quod jam vetulæ incessus difficilior fuerit. Anno 1655. decimo tertio Julii, sexto die à plenilunio, circa vesperam domo, ad vicina pago dumeta, sarmenta collectura, egressa est. Ea nocte à suis desiderata & quaesita, sed non inventa fuit. Sequenti die juxta sepem in temporis sinistri medio leviuscule vulnerata & mortua reperta est. Tertio die cum inopinatus casus ad REV. D. Ludov. SPLEISSIUM vigilantissimum pagi pastorem delatus esset, vilo in tempore vulnerare, operæ pretium esse dixit me accersendi, ad indagandum, num ex hoc vulnerare, forte violenta aliqua manu illato, an verò vi morbi alicujus latentis occubuerit? quo postmodum AMPLISSIMUS MAGISTRATUS noster de tota re certior fieri posset. Detracta itaque cute, in tempore sinistro inveni vulnus vix cutim transiisse & temporalem musculum parum in superficie attigisse: Ablato musculo temporali os ad sensum integrum erat. Hinc cranium sustuli, adjutus præcipuè fratris charissimi JOHANNIS, Medicinæ studiosi, operâ. Dissectâ durâ matre neque ferum neque sanguis in spatio, quod inter utramque est, occurrit. Neque vel minima

ma-

macula in interiore parte ossis temporis, vel in dura matre contigua, eo in latere ubi vulnus accepit, apparuit. Adeo ut mortis repentinæ causam vulnere huic tribuere nullatenus potuerim. Mox elevato & non nihil reclinato cerebro, omnia sanguine suffusa comparuerunt: quæ ut rectius viderem, nervos dextri lateris abscidi: Hinc accuratius conspexi totam basin cerebri, quaquaversum cruore subductam, effuso illo intra piam matrem & substantiam cerebri. Suggillatio hæc diffundebatur antrorsum ultra nervos opticos, retrorsum usque ad foramen sacrum sub medulla oblongata, & ad latus ejus utrumque in ambobus cerebri lateribus, etiam intra anfractus longè lateque spectari poterat, maximè verò ἐγ-
 χύµωµα in dextro latere, parte scil. vulnere opposita ultra dimidium cerebri intra gyrorum hiatus & per superficiem eorum emicuit. Circa orificium magnum in occipite, intra duram & piam matrem, etiam aliquid sanguinis grumosi inveni. Omnes ventriculi sero flavescente stagnabant, cui innatabat grumus sanguinis in tertio ventriculo fabæ magnitudine. Aliquot hydatides parvulas plexui choroideo adnatas vidi: glandulæ hujus plexus manifestè turgidulæ & duræ erant. Cor in dextro ventriculo replebatur copioso & grumoso sanguine, nec sinister

ab eo vacuus erat. Pulmones aëre distenti, totam pectoris cavitatem occupabant, ut videri potuisset potius inspirationem ultimum vitæ actum, quam expirationem fuisse. In cæteris partibus imi & medii ventris nihil notatu dignum deprehendi.

IV.

Jacob Keutinger Viterdinga, ditionis Perillustri & Generosi D. BARONIS HORNSTEINII, oriundus, quinquaginta circiter annos habens, temperie totius ad calidam & siccam vergens, coloris fusci: habitu corporis utcunque carnosus erat, capilli nigri & crispi, rari, dimidiumque caput, juniore adhuc, calvitie turpabat: ad iram vehementiorem proclivis. Pauper victum & amictum duris laboribus, præcipuè viticultura acquisivit. Multum ipsi usum cum Baccho fuisse & non rarò sicca labore pectora fervido maduisse mero, Gutta rosacea, quæ faciem foedabat, fidem fecit. Quibus morbis toto vitæ tempore afflictus fuerit, ut de homine ignoto impossibile, ita hoc loco id referre supervacuum existimo. Quantum mihi constat, ab aliquot mensibus sæva cardialgia excruciabatur, ob quam & mea opera usus est, quæ purgantibus & stomachum roborantibus cessavit, brevi tamen

APOPLECTICORUM. 15

men ob pravam victus rationem, fame & pauperie etiam noxia imperante, rediit: hinc ope mea non contentus etiam carnificem consuluit, (nam & hoc genus hominum his in oris medicinam facere consuevit: & nulla non mortalium καρκινώματα sacra hæc invadere audent) & haud obscurè intelligere potui, illum nec à benedictionibus, ut vulgo loquuntur, rectius ab incantamentis, abstinuisse, ad quæ fæx plebis, ceu ad sacram anchoram, non rarò confugere solet, adeo ut nefanda impietas vix satis dissuaderi possit. Aliquot septimanis ante obitum crudelissima cephalalgia totum caput, frontem præcipuè & occiput afflixit, à qua ipsi nec mora nec requies; fastidivit omnia medicamenta: Extrinsecus quædam muliercularum suasu applicita fuerunt. Præ dolore quandoque amens erat, ut quicquid vel diceret vel faceret non rarò nesciret, Tribus septimanis ante mortem cæcus omnino evasit, nullo vitio extrinsecus in utroque oculo apparente, vera scil. gutta serena excæcatus. Doloris quidem sævitia in capite aliquantum tunc temporis remisit, at remansit quædam anxietas, ob quam corpus hinc inde jactitabat, nec, procul dubio mente æger, causam hujus volutionis perlectum revelare valuit. Medicamenta plurima adhibita, sed serò, ideoque sine successu.

cessu. Quatuordecim diebus ante fatalem diem, lectum permingere cœpit; paucis diebus post, hanc calamitatem nova excepit, Paralyfis sc. pedis dextri, quam secuta paulo post & sinistri. Quatriduo ante obitum Apoplexia forti tactus fuit; jacuit sine omni sensu & motu animali, nulloque ingenio excitari potuit. Totis his ultimis diebus largiter sudavit: per integrum diem cum stertore respiravit. Quamdiu decubuit ἀπύρετος erat. 11. Febr. & 11. à plenilunio anni 1656. vitam cum morte commutavit. Altero die cranium aperui, faucia dura meningē profluxit serum pallidum spicei coloris, cum impetu quodam, non secus ac mediana vena brachii secta sanguinis erumpit, & quidem tanta copia, ut cyathi aliquot unciarum capaces, eo impleri potuissent. Hoc serum maxima ex parte colligebatur in spatio, quod inter duram & piam matrem est, quod mihi amplius & capacius esse videbatur, quam naturaliter existere solet, fero præ nimia copia, duram matrem undiquaque, ubi nullum obstaculum inhibebat, expandente, ac cerebrum cerebellumque deprimente. Quinetiam feri plurimum intra piam matrem ac cerebrum & cerebellum continebatur, unde tota cerebri & cerebelli superficies, tam gyri, quam, divulsis gyris, anfractus, ceu gelatinâ qua-

quaquaversum obfiti videbantur, qua cul-
tello læsâ serum exstillavit sincerum, simi-
le fere illi, quod inter duram & piam ma-
trem cumulatam fuit. Imo ipsam substan-
tiam cerebri & cerebelli plurimum feri im-
bibisse, clarissime cognoscere potui, nam
summo opere utrumque flaccidum & molle
erat, ut, instar fere pultis, etiam leviculo
attactu dissolverentur, ita tamen, ut non
diffunderet, prout vetulæ apud Cl. Platerum
contigit, cui pultis formâ cerebrum ema-
navit: nam citra attactum, & figuram, &
terminos antiquos cerebrum & cerebellum,
ablata quoque pia matre, aliquo modo ser-
vabant. Tota cerebri externa facies pallida,
vasaque sanguiduca tantum non omnia ex-
sanguia erant: ablata portione cerebri, ra-
ræ sanguineæ maculæ pullularunt. In omni-
bus etiam ventriculis serum redundavit;
mucum nullum vidi orificium seu canalem
è tertio in quartum ventriculum patulum,
obturantem; Verum presso cerebello, plu-
rimum feri in tertium ventriculum regur-
gitavit. Plexus Choroideus totus erat luri-
dus & sanguine fere privatus, quàm pluri-
mis nodulis varicosis subduriusculis prædi-
tus. Abscissa medulla oblongata prope ori-
ficiū magnum, elevatisque cerebro, &
cerebello, non nihil declivi posito capite,
plurimum feri ex ostio illo profiliit, ut non

dubitarim, totam quoque fistulam sacram eo repletam fuisse. Adeo ut non vererer, morbum hunc hydropem cerebri & ὕδρω-κεφάλῃ quandam speciem appellitare. In reliquorum viscerum conditionem lubenter quoque inquisivissem, sed nec prece nec pretio quicquam à defuncti uxore & affinibus impetrare valui, ac potestatem mihi caput aperiundi factam fuisse, pro magno beneficio reputare debui; Ex superstitione enim quadam, plus quam ethnica plurimi nostratium opinantur, cadavera humana injuriâ quadam affici, si studio alios ægros juvandi, secentur, brevi vermium esca alias futura.

EXERCITATIO MEDICA

D E

L O C O A F F E C T O

I N

A P O P L E X I A.

SI cujuspiam affectus corpus nostrum affligentis accuratior cognitio, quæ omnium judicio causa cognita obtinetur, inquisitionem meretur, præ multis Apoplexia est. Sive enim subitum insultum omnes actiones uno quasi ictu prostermentem, ac letho dantem, sive nonnunquam inexpectatam è tanto malo integram evasione, vel talem saltem ægrorum refocillationem, quæ meliora pollicetur, spectemus; atque attendamus Clarissimorum Medicorum de proxima mali causa & affecto loco disceptationes, non potest non quemlibet præclarissimæ artis clientem sollicitum de eorundem indagatione reddere. Nullum enim dubium, his cognitis, feliciorum curationem fore & plures è mortis faucibus eripi posse, cum is demum vere Medicum agat, qui rerum potuit cognoscere causas. Ego hac consideratione aliquid audebo, occasione quatuor harum historiarum: diligentior observatio procul dubio alia docebit, vel, quod spero, aliis ansam dabit, idem saxum mecum versandi, & plenius deficientia doctiore calamo exprimendi ac publicæ luci commodandi.

20 EXERCIT. DE LOCO AFF.

Quotquot, jam ab aliquot seculis, morbos corporis humani nobis scripto tradiderunt, plerique in Apoplexia Obstructionem ventriculorum cerebri, a pituita crassa & viscida prognatam, causabantur. Occasionem huic opinioni dedisse videtur, tum subita morbi invasio & non raro festina ejus cessatio, quam nonnisi à conformationis vitio fieri posse putabant; tum ignotus sanguinis Circularis Motus, qui nostri seculi præclarissimum omninò, sagacissimi *D. Harvæi* inventum est, tum denique *Galenî* autoritas, cui pridem quam plurimi nimium, quam ex re veritatis erat, studebant, adeò ut piaculum duceretur, ab ejus sensu vel latum unguem discedere. *Galenus* enim passim ventriculorum cerebri, a frigido crasso humore oppletionem, causam, juxta alias, statuit, omnium autem clarissime *l. 3. de Loc. Aff. c. 7.* cujus verba apponam: *Ἡ ἀποπληξία διὰ τῶν ἐξ αἰφνης γένεσιν, ἐνδείκνυται ψυχρὸν χυμὸν, ἢ παχὺν, ἢ γλισχρὸν αἰθρώως πληρῶντα τὰς κυριώτερας τῶν καὶ τὸν ἐγκέφαλον κοιλίων, ὃ καὶ δυσκρασίαν ὅλης τῆς ἐσίας αὐτῆς γίνεσθαι.* *Apoplexia*, propter subitam generationem, indicat, (sc. sui causam esse) humorem frigidum, aut crassum, aut viscidum, confertim principes cerebri ventriculos implentem; non verò ab intemperie totius ejus substantiæ fieri, &c.

Eadem fere repetit in *Comment. Aph. 42 s. 2. Hipp.* Prætereo locum, qui vulgo etiam allegari solet ex *l. 2. de caus. symptom. c. 7.* cum textus Græcus parum patronis obstructionis faveat; Ait enim ibidem, medicamenta fatuitatem & oblivionem inducentia, refrigerandi virtute prædita, qualia etiam sint Apoplectica: Epileptica vero, sc. symptomata, fieri oppletis cerebri ventriculis.

Galenum magna cohors veterum & recentiorum sequitur *Aeginet. de Re Med. l. 3. c. 18. Aët. Te-*
trabi-

*erabibl. l. 2. serm. 2. c. 27. Inter Arabes Avicenn-
Fen. I. Tert. Tr. 5. c. 11. Ex recentioribus quam
plurimi hæc Galeni vestigia premunt: Ex vastissi-
mo numero nomino Donatum ab Altomar. de Med.
corp. mal. c. 19. Qui solam angustiam ventricu-
lorum cerebri causam Apoplexiæ putat, sive ab
obstructione, sive à constipatione, sive à com-
pressionem existat, Massar. Pract. l. 1. c. 13. Solam
obstructionem admittit, cum intemperie frigida &
humida frequentissime, si non semper, conjun-
ctam. Mercurialis de cognos. & cur. Corporis hum.
Affect. l. 1. c. 19. etiam Apoplexiam oriri dicit,
a morbo in via, occlusionem sc. ventriculorum &
cavernarum cerebri: quid vero per cavernas in-
telligat, an diversum quid a ventriculis? an vero
anfractus extra cerebrum? an poros & meatus
occultos, spirituum animalium vias? non expri-
mit. Cæteros omitto, ne magno idem sentien-
tium cumulo, lectorem tædio afficiam.*

Præter dicta, hanc, de Angustia ventriculo-
rum cerebri in Apoplexiâ sententiam, fovit fictus
eorum usus, qui credebatur esse, vel spiritus ani-
males gignendi, vel alibi generatos, ceu promos
condos, in se recipiendi, & quaquaversum per ner-
vos distribuendi. Ambiguum tamen est, parens
ne, an Proles hujus opinionis fuerit. *Galenus*,
ut alii jam animadverterunt, non sibi de usu ven-
triculorum cerebri ubique constat: Sequaces au-
tem ejus nihil præter nobiles hosce usus crepue-
runt, & adhuc aliquàm multi crepant. Eviluit
equidem, postquam in cerebri sectione *Varolia-*
na Methodus adhiberi cœpit, & jam pridem præ-
clarissimi Medici, *Platerus*, *Baubin*, *Spiegelius*
aliique præstantes hos usus ipsis denegarunt, imo
excrementorum receptacula constituerunt. Im-
primis vero usus istos ventriculorum cerebri feli-

22 EXERCIT. DE LOCO AFF.

citer expugnavit Celeberrimus *D. Casper Hoffmannus* b. m. l. 2. c. 64. *Instit. Med.* ut & in *Comment. l. 8. de usu part. Gal. atque in Animadvers. in Montan. & Erasf. c. 14. ubi par. 70. p. m. 239.* sua tam solida esse asserit, ut nec Herculem timeat. *Kiper. Antropol. c. 10. par. 54. p. m. 214.* miratur quomodo adhuc hodie ausint quidam defendere, ventriculos illos spirituum animalium generationi dicatos esse, cum videlicet tota eorum strues ad excrementorum collectionem & expulsionem comparata sit. Deploratæ causæ remedium afferre conatus est *Cl. Job. Riolanus Fil. Anatomicus celeberrimus in Encheirid. Anatom. l. 4. c. 2. Edit. Paris. pag. 339.:* & quia nemo solidissimo *D. Hoffmanno* contradicere ausus est, prius se contrarium demonstraturum, mox argumenta confidenter & arroganter de se sentientis *Cl. Hoffmanni* examinaturum pollicetur. Cum, ex sua opinione, novum hoc dogma totam cerebri Pathologiam perturbet. Quæ qualia & quanta sint dispiciemus, atque illum *κατα' π'ίδα* insequemur, ipsius authoris ubique verbis appositis: quæ ita se habent:

Spiritus animalis conflatur ex vitali.

Verum est hoc, neque ab ullo sanæ mentis negabitur, nisi quispiam omnes spiritus humani corporis in dubium vocaverit; (quibus non caret Medicina.) Imo tanta eorum est necessitas, ut, si per momentum fere iis cerebrum defraudetur, statim actiones animalis debilitentur, ac tandem penitus deficient; quod egregie leipothymia & syncope edocent, quibus ingruentibus, oculis viridia nigraque obversantur, aures tinniunt, & quandoque omnia in gyrum rapi videntur, mox
omnis

omnis sensus & motus perit, instarque trunci jacent ægri, adeo ut sæpe syncope cardiaca correpti, vix ab Apoplecticis, nisi à cautis & peritis discerni possint, atque nonnunquam illi pro his, monitore *Cl. Hoffmanno l. c. in Animadv.* existimati fuerint: quales etiam, prægressa diuturna cordis palpitatione, ab illa extinctos vidi.

Hoc tamen addendum puto, non solum spiritus & substantiam *ἀσπύδι* ad veram officinam spirituum animalium affluere, sed etiam sanguinem ipsum, caloris influentis *πρωτον δεικτικον*, per arterias afferri, ut suo loco amplius dicetur. Quamvis nuperrime Clariss. *Thomas Bartholinus cent. 3. obs. 15.* observarit, Janum aucupem, hominem nefarium, corde exsecto, caput expedite movisse, torvoque vultu adstantes intuitum fuisse, atque ita animales actiones peregissee, non amplius sanguine vitali ad cerebrum è corde per consuetas vias ruente; Imo alium, eodem ex *Verulamio* referente, tria aut quatuor precum verba, avulso corde, protulisse; victimas etiam ad aras corde ablato clamasse, *Gal.* teste: Nihilominus tamen haud diu hæ actiones perstitere, sed dicto citius evanuerunt. Alia ratio est anguillarum, serpentum, ranarum & hujus generis animalium aliorum, quæ sæpe diu post evulsa corda, actiones animales exercent, quod magno suo malo Pharmacopæus Patavinus *Mokop* expertus est, qui dum manum vasi indiderat, in quod viperarum capita, quæ ante horas duodecim circiter abscidit, immiserat, à vegeto quodam bestię hujus detruncatæ capite digitus morfu petitus fuit, unde, neglecto ictu, summos statim cruciatus expertus est, qui, juxta alia symptomata hos morsus comitantia, ipsi lethum attulerunt: magnam quoque & vindicem amputati lucii capitis sævitiam nonnulli senserunt.

24 EXERCIT. DE LOCO AFF.

runt. Alia enim conditio est insiti & influentis horum animalium caloris, locati videlicet in humore & parenchymate lento magis ac viscidiorè & proinde minus dissipationi ac difflationi obnoxio; Hominum certe partes tanto temporis spatio calore influente defraudatæ, vel millies emorentur.

Continuo deducitur magna quantitate per arterias carotides ad basin cerebri.

Verum non solus spiritus vitalis, sed cum sanguine, qualis per omnes arterias in corde restauratus fertur: neque enim discrimen est inter sanguinem qui sursum, & illum qui ad inferna detru-
ditur, ut quidam putant, *αὐτοψία* teste: & qualis selectus fieri posset? cum solo pulsu per majores arterias excutiatur, nullaque à partibus tractio fiat, nec ob moram vel tantillam, inter unum & alterum pulsum intercedentem, vel aliqualis & intellectu perceptibilis secretio contingere possit. Dein non solum per carotides, sed & vertebrales sanguis arteriosus ad basin cerebri deducitur, ut alibi fatetur etiam *Cl. Riolan.* & inferius explanabo.

Ubi rami, scilicet carotides, coeuntes & intertexti, Rete mirabile arteriosum constituunt.

Magna contentio est inter Anatomicos de Reti mirabili *Galen*i: studiose quam plurimi in illud inquisiverunt, non tamen quale ille nobis scripto reliquit, in homine invenerunt: In brutis equidem repertum undiquaque descriptioni *Galen*i congruens. *Galenus* enim *l. 9. c. 4. de usu Part.* collocat illud sub dura matre, ibidem, ubi glandula

dula pituitaria est, (paulo enim ante sub finem c. 3. glandulam hanc extra duram matrem existere manifestum esse dixerat) quam dicit orbiculatim complecti, retro longissime pertingere, & toti propemodum basi subiectum esse. Deinde eleganter describit, nimirum non simplex esse, sed ac si plura retia alia aliis accumulentur, ita tamen, ut media inter se connexa sint, nec sejungi & integra divelli possint. Tertio ex maxima portione arteriarum à corde ad caput tendentium conflari dicit, exiguis propaginibus collo, faciei & capitis partibus externis impertitis: Præterea generationis modum eleganter tradit, quem memorabilem & maxime ad institutum facientem totum exscribam, Τὸ ἄλλο πᾶν ὄρθιον ἐξ ἀρχῆς ἐγένετο, διὰ τε τῆς θώρακος, καὶ τῆς τραχείας πρὸς τὴν κεφαλὴν ἀναφερόμενον, ὑπεδέξατο μὲν εὐρυθῶς ἡ ταύτης μοῖρα τῆς κεννίης, καὶ διατρηθεῖσα παρέπεμψεν ἀλύπως εἰς τὴν κεφαλὴν. ὑπεδέχετο δὲ καὶ ἡ μὲνινγξ ἡ παχιὰ, καὶ κατ' εὐθὺ τ' ἐκείνων ἱερῆς ἥδη διετέτρητο καὶ δόκησις ὡς ἐκ τέτων ἀπάντων ἐπαίγεσθαι πρὸς τὸν ἐγκέφαλον αὐτὰς, ἀλλ' ἐκ ἄρ' οὕτως εἶχεν. ὑπερβάσσει γὰρ τὸ κράνιον ἐν τῇ μεταξὺ χώρῃ, τέττα γε καὶ τ' παχίας μὲνίσγξ, πρῶτα μὲν ἐσχίσθησαν εἰς πολλάς πάνυ σμικρὰς καὶ λεπτὰς ἀρτηρίας. ἐξῆς δὲ τὸ μὲν τιπρῶς τῆς κεφαλῆς, τὸ δ' ὀπίσω, τὸ δ' εἰς ἀριστερά, τὸ δ' εἰς δεξιὰ, δι' ἀκλήλων φερόμεναί τε καὶ περιτρεκόμεναι, πάλιν ἑτέραν δόκησιν ἐναντίαν παρέσχον, ὡς ἐπελάθοντο τ' ἐπὶ ἐγκέφαλον ὁδὸν. ἀλλ' ἐκ ἄρ' οὕτως ἥδη αἱ αὖτις γὰρ ἐκ τῶν πολλῶν ἐκείνων ἀρτηριῶν, ὥσπερ ἐκ ριζῶν εἰς πρέμνα τ' συναγωγῆς γνηθείσης, ἐξέφυ ζεύγος ἀρτηριῶν ἕτερον, ἴσου τῷ κατ' ἀρχὰς ἀνιόντι, καὶ οὕτως ἥδη ἀπὸ τῶν τ' παχίας μὲνίσγξ τρημάτων, εἰς τ' ἐγκέφαλον ἔδω. Reliquum omne rectum ab initio est, per thoracem & collum ad caput sursum tendens: exceptit quidem benigne, quæ ibi pars cranii, & perforata non difficulter ad interna capitis transmisit.

26 EXERCIT. DE LOCO AFF.

Recepit autem & dura mater, & è regione eorum impetui patuit: & opinio erat propter hæc omnia tendere illas ad cerebrum; verum non hoc ita se habebat: Nam prætergressa cranium in medio ejus & duræ matris primum quidem diremptæ sunt in multas parvas omnino & tenues arterias, deinde verò aliæ ad anteriora capitis, aliæ ad posteriora, aliæ sinistrorsum, aliæ dextrorsum invicem ductæ & complicatæ aliam contrariam opinionem præ se ferebant, ac si viæ ad cerebrum oblitæ fuissent. Sed neque etiam hoc verum erat: Rursus enim ex multis illis arteriis veluti ex radicibus in truncos, coadunatione facta, alia conjugatio arteriarum exoritur, æqualis ei, quæ ab initio sursum ferebatur: Atque ita jam per duræ matris foramina cerebrum ingreditur.

His manifeste *Galenus* innuit, Arteriæ carotidis potiorem partem ad cranium delatam, antequam per duram matrem cerebrum ingrediatur, in rete mirabile dirimi atque introitum denuo in truncum coalescere. Denique usum hujus retis tradit, qui sit spiritus vitales eo usque remorari, donec sufficienter confectus & præparatus sit ad spiritus animalis productionem: ac tum statim non solum ventriculis illabi, sed & cerebro communicari: Non secus ac in corpore variciformi sanguis arteriosus & venosus morasnectere cogitur, donec idoneus sit ad seminis naturam induendam. Et hæc sunt, quæ *Galenus* de reti mirabili omnium clarissime hoc loco sentire videtur. Quanti vero hæc *Galenus* de reti mirabili sententia apud Anatomicos fiat, omnium libri pleni sunt: in brutis plerisque, maxime in quadrupedibus illud existere, pauci negant. An vero in homine tale reperiatur? ambigitur valde: Quidam enim manifeste inveniri affirmant: quidam obscu-
rè

rè & tantum ejus quædam lineamenta & rudimenta apparere afferunt : nonnulli illi plexum choroideum substituunt ; sunt & quidam, qui novum & diverso, ab hoc *Galenico*, loco situm excogitarunt. Omnium opiniones recensere longum nimis, nec hujus loci foret : Cui volupe est adeat *Clariss. D. Casp. Baubin Theatr. Anatom. l. 3. c. 15.* Et *Cl. Guern. Rolfinkii dissert. Anat. l. 6. c. 34. & seq.* ubi diligenter plurimæ diversorum Authorum sententiæ in apicum producuntur.

Videamus potius quid *Cl. Riolanus* de reti mirabili sentiat : Hoc ille pluribus in locis operis *Anatomici, Parisiis 1649.* recusi, ultro etiam in homine admittit, prout *l. c. Galenus* descripsit, Nam *Anthropolog. l. 4. c. 2. p. 261.* ait : *Contineri in circuitu sellæ sphenoidis ex arteriis carotidibus contextum* : addit hanc admirabilem arteriarum texturam in homine æqualiter amplam, ut in brutis animantibus : evidenter conspici in verso cerebro, *Veroliana* sectione observata ; ac præterea discissa ac revulsa dura meninge, quæ circumdat sellam equinam, tum enim fossulas inveniri innumeris arteriis refertas, quæ retis mirabilis naturam præ se ferant : ita ut de *ἰσάρις* ejus non sit dubitandum. In *Anat. Laurent. Examine p. 679.* Revera existere dicit, & à peritissimis & oculatissimis *Anatomicis* observari, seque solere illud demonstrare. In *Examine Theatr. Anat. Cl. D. D. Bauhini* displicet ipsi descriptio, & quod majus & manifestius in vitulorum & bovm capitibus conspici dixerat. In *Examine Anat. Spigelii p. 755.* Non amplius in capitibus bubulis & vitulinis quam in homine esse refert. In *Exam. Cl. Veslingii p. 826.* dubitantem *D. Veslingium* fere objurgat, cum plexus iste manifestus sit, & vere mirabilis deprehendatur, utrinque

28 EXERCIT. DE LOCO AFF.

que circa sellam sphenoidis expansus & diligenter observandus & considerandus in arte Medica. Similia fere de situ & modo inventionis retis mirabilis in Encheirid. l. 4. c. 2. p. 331. p. 333. & p. 334. tradit : Ibid. addit componi illud ex arteriis carotidibus & vertebralibus.

Alterius retis mirabilis mentionem facit *Anthropograph. l. c. p. 262.* quod propago est plexus choroidei, qui anteriores ventriculos tam superiores quam inferiores perreptat, differt tamen à vero, quod illud ex arteriis tantum compositum sit, hoc vero ex venis formatum existat. Utriusque tamen, vel alterutrius continuationem insufflato spiritu persequendam & perlustrandam suadet. Non tamen hoc est rete illud mirabile, de quo hoc loco loquitur, & de quo contentio est. Receptum enim rete mirabile spirituum animalium materiam proximam, spiritus scilicet vitales præparare & suo tempore præparatos ad ventriculos transmittere debet, ut *Cl. Riolanus*, tum hic, tum alibi fatetur; maxime in *Exam. Anat. Laurent. p. 679.* clare asserit. *In illo plexu venularum & arteriolarum spiritum animale conflare non posse, cum ex solo spiritu arteriarum perficiatur, ex plexu mirabili proceduntium.*

Utcunque autem *Cl. Riolanus de ἐνέργει* hujus retis mirabilis non dubitandum censeat, plurima tamen sunt non parvi ponderis atque momenti argumenta, quæ non solum quemvis dubium de *Riolani* opinione reddere possunt, imo hoc rete penitus abesse in humano capite fidem facient, modo oculis propriis fidem adhibere velit, quam præ centum in humano cerebello prognatis ratiunculis merentur: ac eorum testimonium vel mille argutiis præferendum, quæ non alium ob finem plerumque excogitantur, ne ea quæ à
puero

puero didicisti, senex dediscere, pudore præpeditus, cogaris.

Primum non parum mihi *Cl. Riolani*, asserendo retis mirabilis existentiam, auctoritatem suspectam reddit, quod reti mirabili humano æqualem magnitudinem & amplitudinem non uno in loco tribuit, cum eo, quod in brutorum animalium capitibus reperiri solet. Si vero ita feres habet, quæ factum est, ut rerum Anatomicarum peritissimi atque Anatomix, sæculorum barbarorum vitio, penè emortuæ instauratores strenui, illud in humano capite invenire nequiverint? Tacebo *Vesalium*, *Fallopium* & in *Patayina Academia* Professore *Anatomicum Clarissimum ac Excellentissimum D. Veslingium* p. m. quondam præceptorem meum multis nominibus honorandum, atque alios celebres hac in arte viros. Unicum *Jacobum Berengarium Carpum*, qui renascentibus literis vixit, allegabo. *Comment. 35. pag. 469.* ubi ait, se multum laborasse in cognoscendo loco retis mirabilis & plusquam centena capita humana quasi propter hoc solum secuisse, & tamen adhuc in eo esse confusum. Hinc ibidem aliud substituit: *Paulo post verò suam mentem de Galeni mirabili reti his exprimit. Opinio mea est hæc, quod si datur ibi Rete, secundum positionem prædictam Galeni, totaliter concludendum est Galenum errasse, quia dicit Galenus, quod arteriæ, postquam ascensæ sunt supra os basilare immediate dividuntur ad minima & faciunt Rete, deinde dicit, quod ex ramis omnibus retis iterum efficiuntur duo rami arteriarum, qui perforant duram matrem, & ascendunt ad cerebrum, & hoc non est verum: quia ego pluries supra duram matrem intromisi stylum parvum in præductos ramos magnos, qui sunt juxta nervos opticos ascen-*

30 EXERCIT. DE LOCO AFF.

ascendentes, & inveni stylum directe penetrare inferius per tales arterias, absque aliquo obstaculo, usque ad intra substantiam ossis basilaris; & si arteria prædictæ essent supra os basilare irretitæ & divisæ ad minima, sicut dicit Galenus, stylus non potuisset penetrare inferius in substantiam ossis, per ipsas arterias, quia invenisset rete pro obstaculo. Ex isto signo ego teneo quod ibidem non sit rete mirabile. Sed credo quod prædictæ arteriæ ascendentes, quæ dividuntur ad minima in pia matre, sint sufficientes pro subtiliatione Spiritus vitalis, qui postea transit subtiliatus per substantiam cerebri, & ibidem digeritur; & à substantia cerebri transit ad ventres ejus, ubi ultimæ postea digeritur. Et sic puto, Galenum magis imaginatum fuisse rete mirabile, quam quod unquam bene viderit illud. Et credo, quod alii omnes post Galenum ponant rete mirabile per opinionem ipsius Galeni, magis quam per sensum. Concludit, se tamen hæc cum reverentia Galeni dicere.

Imo etiam Cl. Thomas Bartholin. *Anat. Re-form.* l. 3. c. 6. qui aliàs obscurius illud admittit, abesse meminit. Præterea si tam manifestum, tam magnum, tamque amplum rete mirabile, ut pluries deprædicat Cl. Riolanus, in homine reperitur, ac in brutis animantibus, etiam bove non excepto, cur tot ingeniis, tot artificiis ac laboribus scrutandum est in homine? Cum in bove, a quolibet, qui vix mediocriter in Anatomicis versatus est, & vel semel Galenicam Retis mirabilis descriptionem perlegit, ad latus ephippii, discissa dura matre, citra difficultatemprehendi possit. Nicolaus enim Massa in libro *introductorio Anat.* cap. 39. p. m. 89. b. & 90, (ad quem nos Cl. Riolan. *Anthropogr.* loc. cit. ceu eleganter modum investigandi docentem
able-

ablegat) inanitis arteriis candelas apponendas, & ocularia adhibenda dicit; vel, ut paulo inferius loquitur, *optimum adminiculum erit, si in excoriatione collivenas jugulares, tam manifestas, quam occultas & arterias carotides ligaveris filo, prius sanguine & spiritibus ad superiora deductis.* Et ex prudenti *Sylvii* consilio, ut *Riolano* placet, arteriæ carotides inflandæ sunt, & conspicietur recte cum flatu subsultare. At tanto apparatu & tantis laboribus in bovino reti inquirendo non opus est, cum remota dura matre, ad latera ephippii statim in conspectum veniat, quocunque demum mortis genere bos occubuerit.

Memini me non semel, injectâ aquâ omnis tincturæ experte in carotidem, rete hoc omni sanguinis purpura spoliassè, nihilominus amplitudine & magnitudine conspicuum reperiissè: cum in homine apud *Massam*, quando sunt inanitæ arteriæ spiritu rubeo, fere insensibile sit, si modo de hominis reti mirabili loquatur, quod tamen *Cl. Rioli* l. c. eleganter ratione & ἀποδείξει illum demonstrasse dicit; in genere enim tantum de existentia retis mirabilis ibidem disserit, in specie verò & figillatim de hominis reti, ne verbum quidem addit; ut taceam rationes illius ἀποδεικτικὰς, ceu hoc nomine indignas. Insuper de retis mirabilis ὑπάρξει in homine omnino quemvis dubium reddet ipse *Cl. Riolanus*, quod ille tantus assertor nullam vel definitionem, vel plenius rete explicantem descriptionem suppeditet; & quæ à doctissimis Anatomicis prolata sunt, consueto more tantum exhibilet. In Examine enim Theatri Anat. *Cl. Baubini* p. 714. adnotat. Rete illud mirabile, scribit *Baubinns*, non simplex esse, sed ejusmodi, ut si rularia piscatorum retia plura alia aliis cumulata superinjicias, cui hoc inest

32 EXERCIT. DE LOCO AFF.

eximium, quod alternæ replicationes, alternis replicationibus sint connexæ, ita ut ex ipsis sejunctis nihil omnino capere queas, cum omnia serie continua inter se sint connexa. Non intelligo, inquit Riolanus ad hæc, istam novam descriptionem retis, quæ mihi videtur valde mirabilis, si eo modo confirmata (forte conformata) nec tamen unquam similem observavi.

Quid de *Cl. Riolo* hac in parte sentiendum sit, ignoro. Prædictis enim in locis admirabile hoc Rete, æquè in hominibus ac in brutis manifestum, evidens, amplum & magnum reperi, à peritissimis & oculatissimis Anatomicis ostensum, semet illud demonstrare solitum fuisse, diligenterque in arte Medica considerandum & observandum esse sæpius inculcat. Nec est, ut quispiam existimet diversum Rete à *Galenico* illum intellexisse, nam ex iisdem arteriis, eodem in loco, illud cum *Galeno*, ejusque sequacibus ponit, eodemque modo investigandum monet, & prudenter fecisse illos, qui illud contra *Vesalium* asseruerunt, affirmat. Nihilominus tamen displicet ipsi *Cl. Bauhini* descriptio, quam novam & valde mirabilem vocat, nec unquam similem à se observatam dicit. Qua fronte hæc *Riol.* effutiat, nescio: non enim credam illum ignorasse totam hanc descriptionem ex *Gal. l. 9. c. 4. de Usu part.* verbotenus desumptam esse (v. & *l. de Us. parv. c. 2, p. 227. b. conferatur Bauhin. l. c. cum Gal. textu Græco & vers. Lat. Nicol. Rhagini*) cum in *Galen*i lectione versatissimus sit, & nihil non ubique pro eo audeat, imo nonnunquam, ut *Galen*i auctoritatem factam tectam servet, non raro naturæ & veritativim faciat, ut Viri docti *Riolo* jam ostenderunt, ac propediem amplius ostensuri sunt. Ve-

rum potius à *Riolani* petulanti cavillandi libidine hæc profecta, nullus dubito, ob quam nemini parcit, omnes, maxime Germanos, malitiose fugillat, & præ Thraſonica ambitione, cæteros Anatomicos sibi poſt habet, ut magno ipſius merito in *Riolanum ἀνάνευον* animadverſit *Cl. D. D. J. Caſp. Bauhinus*, *Magni Bauhini Filius*, & paternarum virtutum feliciffimus hæres, in *Præfat. Imaginibus Theat. Anat.* præfixa. Certè *Cl. Riolanus* his cavillis fidem ſuis, de reti mirabili (tam humano, quam brutorum) obſervationibus apud bonos & cautos quosque derogabit: quàm enim egregie deſcriptio hæc *Galeni*, bovis reti admirabili congruat pridem æterna memoria digniffimus *Veſalius* indicavit, & quilibet facile intelliget, qui huic ſcrutando in bove operam dabit. Rectius *Cl. Riolanus* feciſſet, ſi in hac ſua demonſtratione definiſſet, quinam rami arterioſi coëuntes & intertexti, hoc arterioſum rete conſtituerent? An ejuſdem carotidis rami, primum in varios ramos diſciſſi, poſtmodum miro artificio, ut *Galenus* loquitur, iterum coëuntes & complicati? An verò oppoſiti lateris? Anne quoque vertebralium arteriarum rami concurrentes? Sic enim non parvo tædio Lectores ſublevaſſet, & quid de ſuo, hac in re, ſenſu, concludendum foret, clarè docuiſſet, & majorem gratiam apud bonos quosque iniſſet, quàm innoxios, & pridem defunctos injurioſo calamo pungens eſt reportaturus.

Verum enim vero nec *Cl. Riolanus*, nec quipiam alius in homine rete mirabile arterioſum, cujuſcunque molis & figuræ ſit, ſub dura matre, ad latera offis ſphenoides, ex ramis arteriæ carotidis internæ diremtis & rurfus contextis, vel inveniet, vel monſtrabit. Ad partis enim viſibiliſ

34 EXERCIT. DE LOCO AFF.

lis & palpabilis existentiam demonstrandam, firmissimum testimonium nonnisi ab oculis & dextra artificis manu petitur: imo solis his fides debetur: Si quid secus fiat, Chimææ finguntur & non entibus pulcherrima artium oneratur, vel, si mavis, deturpatur, quibus alias nimium quam prodest, ob quorundam proterviā, abundat. Itaque si industria & cauta manu in rete putatitium inquisiveris, invenies utrinque Arteriam carotidem internam integram, non divisam, juxta latera Ehippii, & glandulæ pituitariæ incedere, atque integram ad latera duram matrem perforare, & tum demum in varios ramos dirimi, atque vivifico suo nectare varias cerebri partes irrorare, duram vero matrem nec guttulā quidem reficere. Hoc non semel, vel unico in capite observavi, sed toties, quoties rete hoc decantatissimum in homine scrutatus sum, quod sæpius à me factum est, & nuper admodum *Cl. Dn. D. Hardero, Collegæ meo plurimum honorando, rerum Anatomicarum amantiſſimo* monstravi, qui mecum doluit, tot hoc commento delusos fuisse, atque adhuc deludi, imo enti rationis merito pulcherrimos usus turpiter affingi.

Duplici autem ratione hunc arteriæ progressum investigavi: Primum casu, discissa dura matre ad latera ehippii in illum incidi, antequam apud *Carpum* quicquam horum legissem, dura namque meninge ibidem divisā, instar vesiculæ occurrit arteria, itaque stylum in eam, eo locò, ubi duram matrem perforavit, intrusi, ac statim hanc esse arteriam intellexi, & qua potui diligentia ab Ehippio & glandula pituitaria ad canalem osseum usque persecutus sum. Aliis vicibus arteriam carotidem usque ad processum styloformem secutus sum, hic eam incurvam esse, & sub osse
petro-


petroso per canalem osseum oblique anteriora versus pergentem deprehendi : itaque qua potui industria & dexteritate, remota carne & membranis, ossei canalis imam partem scalpro excidi, unciae fere longitudine (nam tanta fere longitudine undique osse septa est) cavendo diligenter ne uspiam arteriam læderem : ex canali elapfa, sursum paululum versus posteriorem apophysin ephippii ascendit, mox iterum incurva ad latera ephippii & glandulæ pituitariæ descendit, statimque iterum ascendit, sinui profundo & conspicuo sub apophysi ephippii anteriore immersa & affixa, sursum reditura ac duram meningem ad latera infundibuli perforatura. Toto hoc ductu integra & indiscissa permanet, nec vel alicujus momenti ramulum ab ea dispersum ad vicinas partes observavi. Quantum hic arteriæ carotidis internæ progressus distet à *Galenico* retis mirabilis generandi modo supra allegato, æquius Lector, collata utriusque historia, judicet.

Arteria hæc juxta finem canalis ossei inferius & superius, ubi duram matrem transitura erat utrinque abscissa & extracta, adeo sinuosa est, ut literam majorem. S. Latinam inversam, sed supinam referat, quam adjecta figura cælo exprimendam curavi.

Notandum autem est, hac figura arteriæ carotidis faciem exprimi, quatenus ex sua sede aliquantum remota est, atque ejus latera, fibrarum beneficio alias connexa & conjunctiora, non nihil segregata sunt, quo ejus sinuosus & tortuosus incessus eò melius conspici posset. Dum enim ejus partes viciniore, & quasi conglomeratæ adhuc sunt,

36 EXERCIT. DE LOCO AFF.

Vesicæ alicujus ad later Ephippii sitæ speciem præ se ferunt , ac nucem moscatam magnitudine superant , totumque spatium sub dura matre hoc in loco implent.



A. Est portio carotidis internæ, sub sinu ἀποφύσις fellæ æquinæ anterioris, incedens, mox duram matrem perforatura. Incurva est propter eandem ἀπόφυσιν; appropinquans autem duræ matri eamque perforans , iterum surrigitur & aliquantulum erecta, jam superata dura matre, antequam dividatur, permanet. Απόφυσις hæc anterior in quibusdam cadaveribus fellæ lateri anteriori & superiori ossea, vel mediante cartilagine accrescit, ut portioni huic arteriosæ per foramen ovale, seu, si mavis, circum osseum transeundum sit, antequam duræ matris eam partem attingat, ubi ab arteria perforanda est. Foramen hoc, seu potius ἡμίκυκλον hunc osseum in aliquot calvariis vidi : frequenter tamen abest: forsitan portione ejus tenera coctura, vel alias ob causas, consumpta.

B. Est

B. Est ima arteriæ carotidis pars, ventricosior & amplior, quàm in egressu ex canali osseo, & prope ingressum ad cerebrum conspicitur.

C. Ejus portio posteriori ephippii ἀποφύσει annexa, ubi posteriora versus aliquantulum inflectitur, mox deorsum descensura.

D. Ipsissima carotis interna ex ductu osseo sub petroso osse emergens, quæ aliquotusque recta incedit, moxque ad posteriorem ἀπόφυσιν ascendit.

Sed missa hæc faciamus: Videamus reliqua, quæ *Cl. Riolanus* affert, ad demonstrandum ventriculos esse officinas spirituum animalium. Pergit itaque:

A quo, sc. Reti mirabili, innumeri furculi derivantur in crassam meningem, ut ascendat sanguis quoquo versum ad illos sanguiductus, sive canales ipsius duræ meningis, quam palpitare solam credo, & vidi in fracturis cranii, rupta ista meninge, cerebrum immobile.

Cùm hætenus ostensum sit, rete mirabile in homine non ens ac purum putum figmentum esse, nullæ etiam arteriæ ad duram matrem ab illo derivabuntur. Plurimæ equidem arteriæ per duram matrem disperguntur, imo hætenus vasa totius duræ matris tantum arterias esse observavi: verum nec etiam in brutis à reti mirabili tot oriuntur, ut clare videtur, & ratio confirmat,

38 EXERCIT. DE LOCO AFF.

quæ enim proportio innumerorum ramorum arterioforum duræ matris ad rete mirabile? Quomodo omnes retis mirabilis ramuli iterum in unum truncum, paulo ante ingressum ad cerebrum coire poterunt, illumque æqualem illi, qualis ante divisionem erat? Prout docet *Galen. loc. c. de Usu part.* & experientia id in brutis confirmat.

Nec in homine à carotide interna, toto illo ductu qui est à processu styliformi ad eum locum ubi duram matrem perforat, ullum ramum accipit. Sunt autem rami arteriosi duræ matris, vel anteriores, vel posteriores, quorum illi juxta ossa temporum intra cranii utramque laminam aliquousque incedunt, atque ibidem è peculiari foramine ex cranio emergunt ac duræ matri extrinsecus uniuntur, & in varios ramos diremti antrorsum ac retrorsum disperguntur; Hi verò in basis cranii parte non procul à futura lambdoidea emergunt, ac duræ matri extrinsecus affixæ antrorsum & retrorsum per eam feruntur, atque non uno in loco anteriores & posteriores in externa duræ meningis parte juxta tempora coalescunt. Harum arteriarum causa sulci facti sunt, qui in cranio intus conspiciuntur, & numerum fere & magnitudinem arteriarum duræ matris exæquant. Ideo prudenter *Cl. Highmorus disquis. Anat. l. 3. p. 1. c. 5. p. 207.* monet, diligenter à Chirurgis animadvertendum esse, ne hîc terebram nimis imprimant, & vasa hæc violent. Videntur autem anteriores & posteriores arteriæ, soboles esse arteriæ carotidis externæ, quæ faciei, oculis, faucibus & posticæ capitis parti prospicit, ut & vertebralis, cùm arteria carotis interna à processu styliformi ad usque suam insertionem prope infundibulum, nullum insignem ramum emittat.

Ab arteriis verò vel vertebralibus vel carotidibus, postquam duram matrem perforarunt, ipsi vel minimum furculum communicari, neque ego, neque fortassis alius vidit. Arteriarum harum per duram meningem dispersarum sanguinem ad sinus ejus, maximè ad tertium sinum ferri, nullus dubito, cum id evidens sit: sed non omnis ad sinus istos transit; nam plurimus etiam sanguis per poros cranio insculptos, & per futuras elabitur, ut inserviat cranii, & partium externarum nutritioni & si superfluous sit, ut per venas ad cor recurrat. Ideoque solertissimus *Fallop. Observ. Anat. p. m. 126.* Venas à dura matre per futuras & foramina propria ad exteriora propagatas, ansam errandi quibusdam Anatomicis præbuisse dicit, quoniam crediderunt junctas cum exterioribus, exteriores esse, & per foramina illa ad duram membranam ingredi. Venas quidem vocat vasa duræ membranæ, quas tamen revera arterias esse comperii, non solum ex eorum consistentia, ortu & progressu, sed etiam ab injecto liquore luteo in carotidem, ante divisionem in ramum externum & internum, quem vasa hæc promptissime & celerrime susceperunt.

Præterea *Cl. Riolanus* modum indicare debuisset, quæ scilicet sanguis per arterias duræ matris ad sanguiductus seu canales ejus perveniret, cum *Fallop. l. c. p. 135. b.* dicat nullam arteriam ad sinus duræ membranæ pervenire, ita sensibus manifestum esse, ut ne verbum quidem de ea re dici debeat. Verum non hoc ita sensibus manifestum esse, suo loco amplius indicabo: Interim quo modo sanguis arteriarum duræ matris ad sinum tertium imprimis perferatur, ostendam, cum hoc in loco clarissime id videatur; Utrin-

40 EXERCIT. DE LOCO AFF.

que arteriæ hæ ad latera & antèrius scandunt ver-
sus corpus falciforme , cùm adhuc parum ab il-
lo distant, pollicis scilicet latitudine, tum ante-
rius, tum in vertice aliquot in locis duram ma-
trem perforant, ac vasis à sinibus duræ matris
profectis, quæ revera venæ sunt, uniuntur, at-
que in illos sanguinem eructant, qui postmodum
ad sinus manat. Itaque libenter ego omnesque
qui sanguinis motui, etiam in cerebro circulato,
Cl. Riolo largimur, arterias duræ matris san-
guinem suum quoquoeversum in sanguiductus seu
canales ejus effundere. Sed quid inde lucri ad
ventriculos redundabit? quomodo hanc ob cau-
sam eos veras spirituum animalium officinas esse
probabit? Nam omnis sanguis ad sinus hosce de-
latus, per jugulares ad cor regreditur, & natu-
raliter, ne guttula quidem sanguinis ex iis in ce-
rebrum vel ventriculos destillat, & si qua id fiat,
id cum maximo animalis damno, & tantum non
interitu fieret, ut suo loco amplius declarabitur.
Ob arterias innumeras per duram membranam
dispersas *Cl. Riolanus* credit, illam solam pal-
pitare, ac vidit ea rupta cerebrum immobile ex-
stitisse. Consentio *Cl. Riolo*. duram matrem ob
tot arterias pulsare, cum præter arterias, nulla
alia vasa sanguifera in ea, exceptis sinibus, obser-
varim, quamvis *Exc. D. Highmorus l. c.* Venas
arteriarum socias in eo agnoscat.

Verum & mihi adhuc ambigere licebit, annon
quoque sola dura meninge rupta, palpitatio quæ-
dam ac si cerebri motus quidam esset, à diligen-
ti observatore animadverti possit. Tenuis enim
meninx si non majoribus, certè copiosioribus
arteriis, præ crassa ditata est: quod manifeste
videbit, quisquis carotidis internæ & vertebra-
lis ramos per omnes & singulos anfractus inde-
fesso

fesso studio à prima eorum origine indagabit. Cerebrum verò ab arteriis moveri, utcunque plurimis præditum sit, atque insignes ejus basi substernantur, affirmare non ausim, considerata pulsus arteriarum impotentia, ad tantam molem, qualis cerebri est in homine, elevandam.

Sed prævidit procul dubio *Cl. Riolan.* hoc commentum, (de sanguine nempe sinuum ad ventriculos transportando) sanguinis circulatione inventa, apud hujus gnaros locum non inventurum, itaque ut ventriculorum authoritatem integram tueatur, alia via rem aggreditur, & sequentia, suo arbitrio forte robustiora, subtextit:

Cum igitur ventriculi anteriores in basi cerebri sint adaperiti, & amplitudine sua æquales cavitatibus supernis eorundem ventriculorum, atque reti mirabili sint proximi, ab eo spiritus hauriunt ventriculi, vel exhalantes ab eo plèxu spiritus, cujus arteriæ sunt tenerrimæ, deducuntur intra ventriculos anteriores, moxque per tertium ventriculum, qui canalis vicem gerit, diriguntur continuo ductu in quartum ventriculum, cisternam spirituum, ut in subiectos nervos & cavitatem spinalis medullæ distribuantur.

Noyum hoc argumentum prima fronte non cum antecedente cohærere videtur, siquidem prius *Cl. Riol.* dixerat spiritus vitales è reti mirabili per innumeros furculos quaqua versum ad sinus duræ matris ferri, nulla finis mentione facta, quod in demonstratione hac necessum fuisset: nunc vero manifeste spiritus vitales à reti

42 EXERCIT. DE LOCO AFF.

mirabili ventriculis per earum aperturam in basi cerebri communicari affirmat. At penitus *Cl. Riol.* mente & instituto perpenſo, innuere, videtur, ſpiritus vitales mediate per ſinus ſuperne, & immediate inferne à reti mirabili ventriculos accipere; ut ſemet etiam clarius paulo poſt explicabit. Ut verò & hujus argumenti vim aſſequamur, primum diſpiciendum erit, quænam conditio ſit hujus apertionis anteriorum ventriculorum in baſi cerebri? quàm prope ſint ventriculi reti mirabili? Denique an ſpiritus vitales per hanc aperturam ad ventriculos è reti mirabili perveniant?

Primum quod attinet, notum jam in vulgus eſt, ventriculos anteriores, vel (ut *Clariff. D. Thom. Barthol. Anat. reform. l. 3. c. 6.* rectius appellandos cenſet) laterales ampliores eſſe, quam pridem demonſtrari in Theatris ſolebant, nam poſtica parte valde ampli ſunt, & ut *Cl. Riol.* hoc loco loquitur, amplitudine ſua æquales cavitatibus ſupernis eorundem ventriculorum, & fere ad baſin pertingunt, ac ibidem ad latera antrorſum aliquouſque pergunt, ut ob rotundam eorum faciem ab accuratiſſimo *Anatomico D. Francisco Sylvio* primum detectam, commode ſoleis equinis quilibet horum ventriculorum conferri poſſit, id eodem *Cl. D. Bartholino l. c.* memorante. Per hanc poſticam ventriculorum partem ala plexus choroidei deſcendit: & ubi antrorſum vergere occipiunt, prope baſin adaperiti ſunt & hiant, adeò ut elevato eò loci cerebro, prope externam & imam ſuperficiem thalamorum opti-
corum plexus Choroidei portiuncula extrema ex hiatu illo prominere aliquantulum videatur; unde etiam *Cl. D. Bartholino ibid.* conſentiente, facilis exitus humori è ventriculis extra cerebrum
ad

ad spatium, quod inter crassam & tenuem meningem est, & consequenter ad spinalem medullam, seu fistulam sacram, ut vocant, patet. Foramen seu potius hiatus iste, in cadaveribus connivet labiis supernis cerebri & infernis thalami optici, vel potius originis anterioris medullæ contiguus: multò autem amplius in viventibus ea hîscere, non admodum probabile est, utcunque enim cerebrum vivum, spiritibus turgidum, levius sit, tanto tamen pondere prædictum permanet, ut hoc in loco thalamis opticis, seu anteriori medullæ origini incumbens, non facile, ab halitu imprimis, elevari possit. Quin etiam hiatus istos maximam partem occupat plexus choroidei extrema portio, eosque tantum non obstruit. Addo & hoc, me non raro cerebri incumbentem partem, hoc in loco, cum medulloso subjecto corpore, fibrillis tenuissimis, sed facile solubilibus connexam invenisse, unde labia hujus hiatus magis conniverunt. Cui volupe est pleniorum horum ventriculorum descriptionem nosse, adeat *Cl. D. Bartholini l. c.* & *Cl. D. Veslingium c. 4 Synt. Anat.*

Hanc posticam & antrorsum porrectam ventriculorum partem, ubi adaperti sunt, reti mirabili proximam dicit *Cl. Riolanus*. Quod si hoc *κτ̃ λ̃ξ̃ιν* intelligi vult, falsum est, nam reti mirabili iis propiora sunt dura mater, infundibulum, medulla globosa, cortex cerebri vestitus pia matre, seu paries exterior & ima ventriculorum ad basin descendens; hiatus verò ventriculorum in paulo elatiori sede est, qui invenitur elevato, & tantum non avulso parum cerebro à subjecto medulloso corpore. At forte ventriculos hos in basi cerebri adapertos vicinos reti mirabili innuere voluit. Igitur dispiciendum erit, an hac
ratio-

44 EXERCIT. DE LOCO AFF.

ratione ad ventriculos laterales à reti mirabili commodi aliquid redundet. Nodus iste solutu facilis est in homine, cum non entis nulla accidentia sint: negato reti quæcunque ipsi utilitates adscribentur, nullæ & evanidæ erunt. De cuius nullitate cum supra abunde dictum, nihil amplius addo. *Αυτοψία* apud incredulos litem deciderat aut erudiat pertinaces.

Ac ne in brutis quidem spiritus vitales à ventriculis anterioribus in basi cerebri, è vicino reti mirabili, vel hauriuntur, vel exhalantes, ut *Cl. Riolan.* opinatur, eò deducuntur. Utcunque etiam in plerisque bestiis hoc rete mirabile reperiatur, ac omnium clarissime in bove, ut pridem *Vesalius* monuit, videatur, non tamen eum ob finem factum est, quem plurimi ipsi attribuant, & quem passim *Cl. Riolan.* in suis operibus deprædicat. Quomodo enim & qua vi ventriculi spiritus vitales è reti mirabili haurient? Non certè calore, cum, eodem cum toto cerebro, temperamento frigido gaudeant, & quicquid caloris possident, id mutuò à sanguine arterioso accipiant; atque ita frigidiores erunt sanguine arterioso in reti fluctuante: Imo multis cerebri partibus frigidiores existunt, universus enim cortex cerebri & cerebelli & majoribus & copiosioribus arteriis præ ventriculis ditatus est, adeo ut paucae & minimæ, quæ ventriculis insunt, earum respectu dici possint: si itaque calori aliquid in hauriendo tribuendum foret, potius id cortici deferendum esset. Occulta & magnetica facultas in demonstratione, quam hic pollicetur, locum non habet, nec enim dubium per magis dubium demonstrabitur. Quo præterea instrumento ventriculi haurient? aut per quas vias haustos & suscitatos spiritus ad se trahent? Crassior enim est

est dura meninx in basi, quam ut spiritibus, à quacunque etiam vi excitatis & attractis transitum concedat. Nec per infundibulum alliciuntur, ut sequentia *Cl. Rolani* indignant, quæ enim messis spirituum animalium expectanda foret. si per cloacam cerebri publicam eorum materiæ transeundum esset? Neque etiam per duo foramina duræ matriæ ad latera infundibuli attrahuntur, vel, ut clarius cum *Galeno* è supra citato loco loquar, per truncos illos intrabunt, qui utrinque ex retis mirabilis denuo unitis & conjunctis ramulis, prope duram matrem nascuntur, ac æquales sunt truncis arteriæ carotidis internæ, dum integri erant, nondum in tot ramos, ad rete mirabile constituendum, divisi: quisquis enim truncorum horum, postquam duram matrem perforarunt, distributionem consideraverit, inveniet, eorum ramos aliorum tendere, nec vel centesimam eorum partem ventriculis impertiri: & certe si tum harum carotidum, tum vertebralium arteriarum *αἰμάδορις* in basi cerebri diligenter observata fuisset, pridem fictum hoc ventriculorum officium, omni patrocinio destitutum, evluisset; de hac autem arteriarum distributione suo loco fusius agam: nunc ad alia transeo.

Vel existimat *Cl. Riolanus*, (si forte hæc attractio exhibeatur) exhalantes ab illo plexu spiritus vitales, cujus arteriæ sunt tenerrimæ, intra ventriculos anteriores cerebri recipi. An verò aliquid absurdius, vel principi Anatomicorum (nec enim repudiat honorificum istum titulum *Cl. Riolan.* ut ipsemet fatetur in *Epist. ad Cl. D. Simonem Paulli præfixâ Tab. Anat. German. Casserii*) indignius affirmari potuerit unquam, ambigo. Certe si Germanorum cuipiam, tale

tale quid excidisset, in tanta rerum Anatomica-
rum luce, egregie *Cl. Riolano* vapulasset.

Primum enim utcunque tenerrimæ sint arte-
riolæ hæ (quamvis in bovino reti crassæ satis &
densæ existant) ægre tamen spiritus vitales, quo-
rum promi condi sunt, exhalare patientur. Sed
exhalent è reti mirabili, at quorsum tendent?
Non transibunt duram matrem, quæ *Cl. etiam
Riolano teste libr. 4. c. 2. Anthropogr.* crassior est
reliquis membranis corporis; imo potius per pa-
tentiora loca ad palatum prorumpent, ubi obsta-
cula non tam densa, ad canaliculos, per quos
tertius ventriculus expurgari solet: vel spiritus
vitales circa duram matrem ibidem collecti, non
secus ac halitus objectu alembici in aquam con-
crescunt, condensabuntur, ac ceu serum ad fau-
ces destillabunt, unde male misellis bestiis erit,
quæ spiritibus vitalibus orbæ, sensu omni ac
motu animali destituentur, ac *Cl. Riol.* asser-
tionis suæ merito, cogetur ire pedes. Verum
perrumpant & hunc obicem, superent duram
matrem, perveniant intra spatium inter utram-
que meningem existens, quid inde lucri ad ven-
triculos? quid spiritus hos vitales, ceu indivi-
duum vagum, in ordinem coget? quid ad hian-
tes in basi ventriculos deducet? nonne, ceu cor-
pus leve & vaporosum fursum scandent? nonne
ceus corpus fluidum, nullisque, ut siccum, cir-
circumscriptum terminis, ubicunque via patebit,
diffundentur? Nec enim ea apertionis ventricu-
lorum in basi conditio est, ut exhalantes prom-
te excipere possit, nec ita hiscunt, ut non ma-
xima exhalantium portio apertum hiatum præ-
terire, ac aliorum ruere valeat: itaque ista of-
ficina spirituum necessaria materia defraudabi-
tur.

Per infundibulum autem intrare nec ipse *Cl. Riolan.* asserere ausus est, hinc prius per adaper-
 tos in basi cerebri anteriores ventriculos intrare,
 & sublimes factos ad tertium descendere, atque
 inde ad quartum abire, in sequentibus dicit.
 Multo minus credam, *Cl. Riolanum* existimare
 spiritus vitales, ex tenerrimis retis mirabilis ar-
 teriis egresfos, denuo intra illas recipi, ac per
 truncum, ex arteriis unitis, paulo ante perfora-
 tionem duræ matris in basi, natum, ad ventri-
 culos progredi; supervacua enim & inutilis
 foret hæc spirituum exhalatio. Et posito, spiri-
 tus arterias, ex quibus elapsi sunt, iterum in-
 trare, minima tamen eorum pars ad ventriculos
 perveniret, ut clarius patebit, ubi arteriarum ca-
 rotidum & vertebralium distributionem dabo. Sed
 non absque causa quæreret aliquis, quemnam
 ergo ob finem plexus iste verè mirus in brutis
 factus esset? Si quid in re obscura divinare licet,
 ad remorandum sanguinis impetum constructum
 dicerem, cum enim arteria carotis ferè recta ad
 fellam & duram matrem ascendat, cerebrum-
 que in brutis respectu hominis longe minus sit,
 facile à sanguine arterioso perpetuo pulsu affluen-
 te, ceu torrente inundari ac obrui posset: Ita-
 que ut impetus ipsius frangeretur ac affluxus ali-
 quo modo retardaretur, natura arterias has ca-
 rotides internas in tot ramos diremit mireque
 intricavit ac denuo univit: Non vero ut spiri-
 tus vitales in hoc plexu præpararentur ac subti-
 liores redderentur, ut vulgo creditur, & ut *Cl. Riol.*
 passim in suis scriptis opinatur cum vulgo.
 Si enim verum esset, ut plerunque creditur,
 mores & ingenium temperamentum sequi; Asi-
 ni in Gallia hominibus sapientiores & prudentio-
 res existerent, & præ hominibus illis mira a-
 gili-

48 EXERCIT. DE LOCO AFF.

gilitate, atque magis compositis gestticationibus officiosissimum, & ad quæque paratissimum animum seu testarentur, seu mentirentur: atque ita lepidius fucatæ venerationis complementa absolverent. Nec sine causa *Bodin. Theatr. nat. l. 3.* excanduisset contra *Aristotelem*, negantem in Gallia asinos reperiri; cum tamen in tota fere Gallia, ac potissimum in agris Andium, patria Bodini, & Avernorum robusti sint; undemuli prægrandes & robustissimi nascantur. Addidisset tantus patriorum asinorum admirator, si usus iste retis mirabilis ipsi constitisset, subtilissimos &c. ibidem generari.

Cum itaque nullum sit in homine rete mirabile: nec in brutis ventriculi anteriores adaperti, ex tenerrimis arteriis retis mirabilis sub dura matre in basi cerebri collocati, spiritus vitales, vel hauriant, vel exhalantes in suam cavitatem recipiant, quæ in hoc paragrafo sequuntur, nullo ulteriore examine indigebunt, sed sua sponte, ceu falsa & fundamento destituta corruent. Quamvis & ea, si probe expendantur probabilitate careant: & quidem prima fronte haud credibile videtur spiritus animales (nam, ut ex sequentibus *Cl. Riol.* patet, statim ac ventriculos subeunt tales fiunt) ascendere, descendere in tertium, & oblique in quartum ventriculum agi, citra inquinamentum, aut spirituum jacturam, quoniam ventriculus tertius in palatum apertus, & sentina totius cerebri est, quod hic obiter dico, cum id pluribus infra probandum sit.

Præterea si continuo ductu è tertio in quartum ventriculum, ceu cisternam, spiritus diriguntur, quamobrem *παραγίον* seu glandula pinealis principio canalis illius apposita est? quam *Cl. Riolan. Anthropogr. l. 4. c. 2. p. 259.* fatetur tanquam

quam valvulam esse, quæ claudat & aperiat canalem. Non autem existimo *Cl. Riolanum* cum *Nobilis. Cartesio* & *Regio Philof. Nat. l. 4. cap. 15.* glandulam hanc Regiam rationis sedem agnoscere, quæ pro lubitu & cum electione quadam, orificium canalis, cui præest, claudat & aperiat non enim admodum illum horum opinionibus favere, manifestum est ex *ejus libr. de Circul. sang. cap. 9. & 12.* ubi Philosophiam hanc Mechanicam, novam & Hollandicam vocat: neque etiam facile quispiam probabit, huic glandulæ insitam motus vim inesse, ut irritata ab externo objecto fores has pandat, vel occludat. Veritati magis consonum est, glandulæ hujus conditionem similem in valvulis existere, quæ egressum facile admittunt, ingressum aut remorantur, aut plane impediunt; vel ut clarius dicam, cum manifestis indiciis nobis non constet glandulam hanc se ab insita facultate movere posse, egressum ex quarto ventriculo in tertium facile concedere, ingressum autem ad quartum prohibere existimo; si qua igitur materia in quarto sit, illam levi opera in tertium & ad infundibulum expelli permittet; ad quartum vero ex tertio nihil quicquam secundum naturam, & absque violenta & p. n. pertinet.

Neque etiam probabile videtur, spiritus animales ex reliquis ventriculis, si omnino in illis generarentur, hunc scopulum superare posse, quoniam spiritus animales magna quantitate, perpetuo & valido satis motu, è supernis partibus ventriculorum anteriorum versus inferiora ad quartum ventriculum moveri debent, hinc fieri non potest quin magis impingatur conarion, seu pinealis glandula, præfixa, ex *Riol.* mente, orificio canalis, illudque obturet, cum illa lateat

50 EXERCIT. DE LOCO AFF.

sub membranoso principio plexus choroidei, ubi finus quartus bifurcatur, quod genus corporum à quolibet ventulo instar veli expanditur & propellitur. Nam spiritus animales perpetuo & valide moveri, tum perpetuus eorum influxus in omnes nervos, maxime in vigilantibus necessarius, tum assiduus affluxus spirituum vitalium, qui singulis pulsibus fit, evincunt. E supernis autem deorsum moveri hic *Cl. Riolan.* asserit.

Postquam ergo *Cl. Riolanus* hætenus spiritus animales in ventriculis generari ex sua opinione demonstravit, nunc qua ratione è ventriculis distribuantur ostendere satagit: Itaque subjungit:

At nervorum septem conjugationes propagantur ab illis eminentiis quatuor, quarum duæ majores formant clauduntque latera ventriculorum anteriorum: Aliæ duæ constituunt latera quarti ventriculi, cujus tectum partesque anticas & posticas efformat duplex scolicoidis apophysis.

Hæc etsi suo modo tanquam vera concedi possint, atque omnes nervi originem suam ab his eminentiis primo intuitu habere videantur: seu, ut *Cl. Bartholin. l. 3. c. 3. & libell. 3. c. 1.* loquitur, medulla oblongata omnium nervorum principium sit. Si tamen accuratius inquiratur, manifestum evadet, primam omnium nervorum originem esse medullosum, candidamque substantiam, tam cerebri, quam cerebelli, quæ longe lateque diffusa est, nec eminentiarum harum terminis circumscribitur. Quod etiam *Excellentissimus D. Thom. Bartholin. Anat. Reform. l. 3. c. 6. p. 333.* observavit: *Spinalis, inquit, medullæ radices duæ satis alte, in cerebri substantiam penetran*

IN APOPLEXIA. 51

netrant; harum superiori & anticæ, maxime qua introrsum spectat, parti continuatum cerebrum (& albicantem & cineritiam partem nomine cerebri comprehendendo) quaquaversum, extrorsum imprimis & retrorsum se expandit, ac sensim demissa, sua extrema introrsum, sursumque intorquet, ac contrahit, donec tandem attenuatum spinalis medullæ radicem aliquanto inferius, quam ubi ab ea exortum erat, undique pene limbo complectitur: sicque laterales format ventriculos. In anteriore autem & interiore parte ascendens, ab utraque radice albicans substantia, unumque corpus, callosum dictum, conficiens, retrofertur; ac utriusque radice medium interstitium, quod tertius ventriculus est, ac in ipsum patentia lateralium ventriculorum ostia à se formata tegens, fornicem constituit; ac posteriori simulque interiori utriusque ventriculi limbi parti continuatur. Videatur etiam Varolius apud Schenk. l. 1. de origine spinalis medullæ.

Atque ut credam spinalis medullæ radices, tam anteriores in cerebro, quam posteriores in cerebello, à substantia cerebri solidiori & candida oriri, persuadent eadem cum medulla oblongata consistentia, idem color & cum omnibus quatuor radicibus continuatio. Unde merito *Cl. Casp. Bartholin. l. 3. c. 3. Anat.* substantiam intus reconditam, duriorē & compactiorem *medullam* vocavit, ceu veram & primam oblongatæ & spinalis medullæ, earumque radicum originem, ac consequenter omnium nervorum principium. Quod propterea moneo, ut constet, etsi in ventriculis generarentur spiritus animales, non tamen ad omnes nervos perventuros, cum extrema omnium radicem nervosarum in cerebro & cerebello non in ventriculos desinant, sed & alibi finiantur.

52 EXERCIT. DE LOCO AFF.

Præterea in hoc paragrapho advertendum est, *Cl. Riolanum* vel invitum & forte etiam nescium pertrahi in partes *Varolii* & *Spigelii*, quorum ille apud *Schenk. l. 1. de ventriculis cerebri* arbitratum tertium & quartum ventriculum, tam mereri nomen ventriculi, quam spatii, quæ inter varias intestinorum convolutiones extra intestina, vel cuicunque spatio inter corpora se mutuo contingentia formato, debetur. Imo utrumque non ex intentione naturæ, sed accidentaliter, ex mutuo concurrentium corporum contactu, spatio aliquo in medio necessario resultante, oriri: neque tertium in cerebro, nec quartum in cerebello, vel medulla, sed extra illa existere monstrat, quod quam egregie præstet ipsius loco cit. consulatur: Hic vero *l. 10. c. 8. de Fabr. corp. human.* eodem fere modo, ut *Cl. Riolanus* hoc loco, de generatione quarti ventriculi scribit, sc. fieri ob concursum processuum vermiciformium & unionem duorum truncorum, sc. radicum spinalis medullæ ex cerebello emergentium, vel utrorumque funiculorum spinalis medullæ sub cerebello coëuntium.

Quæ vero *Cl. Spigelius* sub finem capitis addit *ex necessitate fabricæ horum corporum, non finis alicujus gratia, qui quidem cerebri actioni inserviat, conditum videri*, concoquere non potest, unde *Cl. Riolan. in Animadv. Spigel. p. 755.* vellicans hunc locum, miratur *Spigelium* tam male sentire de isto ventriculo, quem præstantiorem aliis, & cisternam, scilicet spirituum, cum peritioribus Anatomicis demonstravit: Ubi vero & quibus fundamentis id factum sit, hætenus videmus, & ulterius dispiciendum erit. Transeo enim ad reliqua, quæ in hac demonstratione supersunt.

Eminentia ista, pergit Cl. Rioli. quatuor sunt spongiosae, excipiuntque spiritus, qui continuo tramite excurrunt in subiectos nervos & spinalem medullam, per quartum ventriculum.

Cum Cl. Rioli paragrapho proxime praegresso, omnes nervos à quatuor eminentiis oriri asseruisset; nunc eas quoque spongiosas esse affirmat; scilicet ut eò felicius spirituum animalium distributionem à ventriculis in nervos demonstrare posset: Non enim ignoravit hanc spirituum ex illis *Ἀέδοσι* admodum controversam esse & non minimam causam existere, ob quam praecleari Anatomici ventriculis spirituum animalium *γένεσιν* derogarunt. Quod quam vere dicat, inquirendum erit. Spongiosum est, quodcunque intra se cavernulas & poros habet, atque ob hæc inania & vacua spatiola aliud corpus, quod non ejusdem cum ipso naturæ est, recipere potest. Opponitur ipsi densum & solidum. Discrimen horum non solum in *ἰσσεολογία* crebro occurrit, ob quod quædam spongiosa, quædam solida & densa appellantur, sed & inter parenchymata observatur. Unde cordis & renum parenchyma solidius & compactius dicitur, præ spongioso parenchymate pulmonum & lienis. Deinde quædam spongiosa vocantur, quæ intus cavernosa, porosaque sunt, quamvis superficies integra sit: quædam vero talia appellantur, quorum & superficies & profunditas cavernulis, poris, & plurimis foraminulis prædita sunt, quæ etiam quam proxime ad spongiarum marinarum figuram accedunt, ac nomen hoc merito ab illis mutuuntur. Ex horum ultimorum numero Eminentias has esse necessum est, si spiritus animales in ven-

54 EXERCIT. DE LOCO AFF.

triculis genitos recipere & quasi imbibere atque ad nervos mittere debent. Verùm Eminentiarum harum superficiem non porosam esse, vel inde constat, quia tenuis meninx non solum universum cerebrum externe complexu arctissimo circumdat, sed & interiores cavitates & ventriculos, quarto non excepto, obvolvit & obducit, ut contra *Vesalium* & *Valverdam* ipse *Cl. Rioli. Anthrop. l. 3. c. 2.* statuit: quod in cerebri parte exteriori non negabit fieri, non tantum ut medulla cerebri firma contineatur, verum etiam ne spiritus animales, (quos non diffitetur per totam cerebri substantiam diffundi, nec ambitu ventriculorum coërceri) intra spatium duræ & piæ matris exhalent atque ita pereant; & ob hos ipsius usus concedet, utcunque tenuis sit, poris tamen & foraminulis destitutam esse. Quod si tenuis meninx extrinsecus hæc præstet; atque hanc dispositionem à natura nacta sit, quis internæ ventriculos ac has eminentias succingenti membranæ eam denegabit? cum fatente *Cl. Riolo* ipsius propago sit, atque etiam figura eminentiarum perpetuo eadem maneat, ac talis reperiatur, maximam partem nonnisi hujus membranæ beneficio. Verum objiceret *Cl. Riolan.* ejusdem membranæ varia officia esse posse, ac pro eorum & locorum diversitate, eandem varias dispositiones accipere, ac proinde tenuem meningem extrinsecus integram esse, nec perforari, nisi ubi arteriis ingressum, ac venis, nervis & excrementorum ductibus exitus viam pandit, pertusam inveniri: In ventriculis vero porosam esse & foraminulis scaterere, ut spiritus, intra suam cavitatem natos, eminentiæ suscipere possent. Verum & hoc commentum, propter fictum ventriculorum officium
magna

magna probatione indiget : atque ipsi illud *Cl. D. Thomæ Bartholin.* quarti ventriculi adhuc patroni, regero, quod *l. 3. c. 6. Anat. reform.* extat : scilicet poros, quos multos in ventriculis cerebri agnoscit *Cl. Reginus*, oculos Anatomicorum fugere : Nec certe *Cl. Riolan.* vel alius quispiam tam infrunitæ & impudentis audaciæ erit, qui se illos vidisse gloriari possit. Quod si vero tam exigui esse dicantur, ut eos visu assequi nemo possit, ac forte microscopio videndi sint, quantis incommodis ? quotque periculis vita humana exposita erit ? cum pori tam exigui facillime obstrui & obturari, à quovis etiam humore queant, atque sensus nunc in hac nunc in illa parte peribunt, vel si omnium eminentiarum superficies humore aliquo illinatur, apoplexia oborietur. Imo nulla ætas, nullus sexus, nullo unquam tempore à sensus & motus læsionibus immunes forent, si verum esset, ventriculos excrementorum receptacula esse, ut nonnulli gravissimi & doctissimi Authores statuunt, atque rationibus & experientia demonstrarunt, quod commodiori loco quoque ostenditur.

Et certe si nulla superessent argumenta ad eludendum commentum hoc (ventriculos sc. generare, & per eminentias quatuor spongiosas spiritus animales distribuere) sufficeret unica historia Hydrocephali apud *Vesalium de Fabric. corp. Human. l. 1. c. 5.* quam memorabilem, ac rem de ventriculorum putatitia nobilitate præciare illustrantem, totam exscribam. *Augustæ Vindelicorum puellæ bienni caput in mensibus plus minus septem ita increverat, ut nullum viri unquam viderim, quod non mole illi cederet. Fuitque is affectus, quem veteres hydrocephalum vocarunt, ab aqua quæ in capite asservatur, sensimque colligitur.*

56 EXERCIT. DE LOCO AFF.

Quaquam ea non inter calvariam & exterius ipsam succingentem membranam, aut cutem (ubi aliàs aquam reperiri, medicorum libri docent) huic puellæ fuerit collecta: verum in ipsius cerebri cavitate, adeoque in dextro & sinistro illius ventriculis: quorum cavitas amplitudoque ita increverat, ipsumque cerebrum ita extensum fuerat, ut novem fere aquæ libras, aut tres Augustanas vini mensuras (ita me ament superi) continuerint. Ad hæc ut cerebrum in capitis vertice, membranæ quasi modo, erat tenue, & quodammodo continuum cum sua tenui membrana corpus; ita quoque calvaria fuit prorsus membranæ, tantaque duntaxat sede ossea, quanta calvariæ puellæ erat amplitudo, priusquam caput extra modum incretaceret: ea fere ratione, qua in nuper natis pueris, frontis os, & verticis ossa constare cernimus, ubi illa alioquin mutuo sunt contermina, & in admodum pueris, insigni intervallo amplitudineque visuntur membranæ. Cerebellum interim, cerebrique universa basis, secundum naturam habebant, uti & nervorum productiones; dein nullis prorsus sedibus, quam in cerebri ventriculis adeo atque dixi adauctis, aquam reperi, & puella ad mortem usque sensibus omnibus integre est usa: & quoties caput, quum illam paucis ante mortem diebus conspexi, ab astantibus movebatur, & nonnihil, quantumvis etiam leviter, erigebatur, gravis illico tussis puellæ molesta fuit, cum difficili respiratione, & totius faciei miro rubore, sanguinisque suffusione, & lachrymarum proventu. Reliquo corpore mediocriter habuit: etsi laxis infirmisque, sed non resolutis tamen fuerit articulis, neque præsententi etiam insigni macie, aut etiam seroso in membris tumore, aut morbi comitialis, aut tremoris alicujus notis. Jecur cum paulo post mortem spectaretur, subpallidum & nonnihil naturali alias jecore

contractius duriusque occurrit : liene interim maximo & molli conspicuo , perinde ac si jecoris vices aliquandiu obivisset : adeo ut cum præsentibus Medicis nihil æque admiratus fuerim , ac tantam aquæ vim in cerebri ventriculis absque majoribus symptomatibus tam diu fuisse collectam. Et hæc ex Vesalio.

Cl. Riolanus in consideratione medica ad hoc caput Enchiridii , agnoscit etiam cerebrum tumorem aquosum pati , vel in ambitu , vel intra ventriculos : Ea tamen lege , si in ambitu ὑδροκέφαλος fuerit , ut tandem serum delabens sensim intra ventriculos , accersat comatosum affectum , indeque Apoplexiam . Verum quam aliena sint hæc ab hujus historiæ veritate , quilibet judicare poterit , qui ipsam attente legerit . Nec forte hæc *Cl. Riolani* opinio in plumis ὑδροκεφαλοις , maxime qui pueris obveniunt , ut frequentius solent , locum habebit . Istam historiam quod attinet , facile quilibet intelliget , serum non ex ambitu sensim intra ventriculos delapsum esse , sed in ventriculis collectum fuisse , ac ad tantam copiam tractu temporis accrevisse , ut ipse *Vesalius* opinatur , nam nonnisi in ventriculis serum ab ipso repertum fuit : ni forte quispiam rivos fluere ac amnes stagnare putaverit , postquam pridem fontes exaruerunt . Nec alias verisimile est , serum in ambitu contentum paulatim intra ventriculos delapsum fuisse , cum cerebri substantia tenacissima fuerit , quæ , quo minus sero intra suam cavitationem contento exitum concederet , potius in membraneam tenuitatem in hac puella extensa fuit ; ac citius alibi exitum quæisivisset , quam ut foris ineumbens in ventriculos transfudasset , maxime si vera essent , quæ *Cl. Riol. in Animadv. Theatr. Anat. Cl. Baubini* tradit. p. m. 711. Lau-

58 EXERCIT. DE LOCO AFF.

do plurimum (præter morem) callosum corpus, pituita ex cerebri superioribus partibus defluxum excipere, & in anteriora derivare. Sic enim nullus humor excrementitius in cavitates cerebri destillat, sed lateraliter in anteriora decurrit; propterea crederem duplicem humorem excrementitium in cerebro gigni, alium supra callosum corpus ex illo cortice cineritio super imposito, qui per nares expurgatur, alium medullaris substantiæ solidioris, qui ex ventriculis defluit in choanam, & per palatum expurgatur, alioquin si tota pituitosa materia, quæ per nares ubertim profluit in coryza, maneret ab ipsis ventriculis, non posset non offendere ventriculos anteriores cerebri. Quæ vero quanti facienda sint, consulatur doctissimus liber de osse cribiformi ac sensu & organo odoratus Excell. D. Conradi Victoris Schneideri nuper excusus, omnia enim hic expendere ἄρονον foret.

Præterea aqua intra ventriculos copiosissimè collecta nullius sensus abolitionem, nullam paralyfin, nullum tremorem, nec Epilepsiam, multò minus coma aut apoplexiam (ut credidisset, Cl. Riolanus) produxit; ut abunde ex historia patet, quod tamen necessario accidere debuisset, si vera forent, non solum quæ de hydrocephalo hic pronunciat, sed & quæ de ventriculis, tum hic, tum alibi comminiscitur. Nec enim spiritus vitales ventriculos cerebri in basi, adaperptos alias, intrare potuissent, utpote procul dubio clausos; nam aqua efluxisset, nec solum in ventriculis, sed etiam in aliis sedibus reperta fuisset, à quibus tamen omnibus intra cranium, teste Vesalio, prorsus exulavit.

Nec, licet ventriculos spiritus isti intrassent, animales ex illis producti fuissent, quis enim non crederet tenues istos spiritus à tanta aquæ vi non solum

solum crassescere, verum penitus suffocari & corrumpi? maxime si cum *Cl. Rioli Anthr. l. 4. c. 2.* sentiamus cerebrum ideo album esse, ut spiritus animales reddantur lucidi & perspicui, qui in obscuro & opaco loco, *ratione coloris alterius* minus clari & turbidi fuissent: si enim nudi coloris tanta vis est, quid serum poterit, si spiritibus vitalibus permisceatur? Unde etiam in eodem cap. refert. *si quæ producuntur aquosa excrementa intra ventriculos cerebri, aut aliunde derivantur, confestim per choanam descendant ad basin cerebri, vel defluunt in partes inferiores anteriorum ventriculorum, (ubi adaperiti sunt) quæ ad basin cerebri excurrunt:* adeo metuit suis spiritibus animalibus. Sed posito generatos fuisse spiritus animales copiosos, lucidos & omnino præstantissimos, quomodo verò distribui potuisset? Anteriorum enim eminentiarum foraminula, utpote exigua & visum fugientia, serum opplevisset; si vero processus vermiformis & glandula pinealis viam ad quartum ventriculum sero pandisset, illud in eum, qua data porta irruisset, & derepente puellam jugulasset, ut *Cl. Rioli l. c.* loquitur, nec per septem menses parentibus trisite, Medicis admirable spectaculum extitisset.

Similem fere historiam refert Amplissimus & Excell. *D. Tulpius l. 1. obs. med. c. 24.* de puero quinquenni integrè mentis munia obeunte, qui, ut conjicio, intra ventriculos quinque aquæ libras continuit, nam sequacem cerebri medullam adeo fuisse distentam scribit, ut instar alicujus crassioris membranæ, adhæresceret undique arcuatæ dissolutorum ossium circumferentiæ, quod nonnisi sero ventriculis incluso fieri potuisset.

At forte *Cl. Rioli* favebit hydrocephalus ille, quem

60 EXERCIT. DE LOCO AFF.

quem describit *Celeberrimus Guil. Fabrit. Hild. c. 1. obs. 10.* nam puer ille actionibus animalibus, quæ à cerebro prodeunt, ingenio puta, loquela, visu, auditu & cæteris plane destitutus fuit: ac tandem in soporem lethargicum incidit, & paulo post obiit. Sed si rem recta ratione reputemus, omniaque diligenter, quæ *Cl. Fabrit.* in hac historia narrat, perpendamus, non adeo ea *Cl. Riolanum* tueri comperiemus. Puellus enim iste triginta mensibus, quibus à septimo ætatis mense cum hoc morbo conflictari cæpit, edebat, bibebat, excernebat, & dormiebat tanquam sanus, addo & respirabat; nec negat illum se voluntarie movisse, quamvis ægrè, crebrius autem præter voluntatem: ad quas actiones omnes perpetuum spirituum animalium influxum, tanto temporis decursu, summopere necessariū fuisse, quis abnuet? quorum tamen & generatio & influxus omnino impossibilis exstitisset, si *Cl. Riol.* demonstratio admittenda esset. Nam serum in ventriculis potius sensim ad tantam copiam accrevisse, quam vel affatim, vel paulatim ex ambitu in cavitatem ventriculorum pervenisse, eadem probant, quæ superius ad historiam *Vesalii* retuli; præterea quidnam serum 18. librarum pondō, in cavitatem ventriculorum trudisset? gravitas connata aquæ non suffecisset, obstante tenacitate substantiæ cerebri & præ matris, quæ æque ac in puella Augustana, imo amplius distendebantur, nec meatus ullus, per quem intrarit in cavitatem abindustrio *D. Fabrit.* inventus fuit, quamvis diligenter in illum inquisiverit, qui tamen non latuisset, si serum omne demum sub vitæ finem, lethargicum soporem facturum, ventriculos intrasset: nec apparuerunt pristini hospitii ulla vestigia, quæ tamen tantillo temporis,

ris, paucis scilicet diebus ante mortem, non ita oblitterata fuissent (cum fere triginta mensibus perduravit morbus) ut non, vel aliqua tantum, in conspectum venissent: & ipse *Cl. Fabrit. c. 3. obs. 17.* haud obscure significat, serum in hydrocephalis sensim in ventriculis cumulari, dum non secandos, cum *Arantio*, sed relinquendos esse monet, quod aqua in ventriculis contineatur; & quamobrem Cheirurgis sectionem dissuassisset, si serum tum demum ventriculos invadere credidisset, cum jam coma, lethargum aut apoplexiam produxisset? Nec Cheirurgus ille, cujus ibidem meminit, juvenis quidem, sed tamen ingeniosus, si horum quicquam adfuisset, tam temere sectionem ausus fuisset. Non autem mirum est, hunc puerum pauciores actiones animales quam Vesalii puellam, obivisse, nam altero plus aquæ ventriculi continuerunt, ac propterea etiam non solum ventriculi, sed & substantia cerebri in sacculum quasi exstensa fuit, ac gyri & circumvolutiones ejus evanuerunt, quin etiam tertius ventriculus cum anterioribus confusus, in unam cavitatem, tantæ aquæ quantitati parem, abiit.

Cur autem tandem Lethargico sopore obierit *Excellentiss. M. Aurel. Severinus de recond. abscess. natura l. 4. c. 9. paragr. 2.* ubi aliquot problemata à *Cl. Fabritio* neglecta, enodat, causam tradit, dum dicit: *In lethargum incidit non incongrue, sopientibus nimirum aquis, quæ stagnantes tricesimo jam mense sulphuream anathymiasin & narcosin inducere debuerunt. Mature è lethargo decessit, quod & Veteranus minatus videri potuit, lethalter jam pressis omnibus cerebri ventriculis.* Vel nimia aquæ copia arterias carotides & vertebrales, ac finis ubi cum jugularibus coalescunt, premendo,

62 EXERCIT. DE LOCO AFF.

mendo, & sanguinis affluxum & refluxum prohibendo, lethargicum soporem attulit. Anne vero 30. mensibus stagnans aqua putruerit? non dixerim, cum vix febre unquam laboraverit, nec foetoris ullius mentio ab ipso fiat. Annon etiam medicamenta, quæ multa & varia, ut scribit *c. 3. obs. 17.* adhibita fuerunt, Embrochæ scilicet, fomenta, linimenta, & hujus generis alia ad discutendam aquam comparata, lethargum ac mortem accelerarint? Cum ille Juvenis, cujus mentionem *ib. obs. 19.* facit à 3. ad 18 ætatis annum vixerit, parentibus pauperculis sumptus in medicamenta facere nequeuntibus.

Non vero lethargi causa fuit materia viscida, pauca quantitate in quarto ventriculo inventa, quæ ex *Cl. Riolan.* mente apoplexiam attulisset, nam & hunc ventriculum ab his excrementis haud immunem fuisse, etiam in iis, qui non lethargo vel apoplexia, sed alio morbo mortui fuerunt, alibi dicendum erit. Idem *Cl. Fabric. l. cit.* in Filia Slotani, præceptoris sui, post tertium ætatis annum obortum Hydrocephalum, sedem suam in ventriculis habuisse refert. Et forte non à veritate procul aberraret, si quis in Hydrocephalis *Excell. D. Thom. Bartholin. Hist. Anat. c. 1. hist. 28. Lotich. obs. Med. l. 2. c. 1. obs. 7. & Fabric. Hild. c. 3. obs. 19.* aquam in ventriculis contentam fuisse diceret, nec rationes deessent, quibus conjectura verisimilis reddi posset: nisi sufficeret, sectione, in Hydrocephalo mortuis, aquam in ventriculis repertam fuisse, qui nihilominus animales quasdam actiones, si non omnes, dum vivebant, peragere potuerunt: & fortassis crebriores sunt hujus generis hydrocephali, quam qui alibi collecta aqua, fiunt.

Hydrocephalus certe Parisiensis, cujus *Cl. Fabric.*

brit. c. 3. obs. 18. meminit, atque causæ suæ sedem extra ventriculos habuit, artificiosus fuit, cujus arfitices parentes, quæstus causa, exstiterunt, qui & tantum facinus capitis poena expiarent. Non ñego tamen etiam extra ventriculos aquam colligi, & quasdam Hydrocephali species generari, ad tantam verò molem pervenire, tantoque tempore perdurare, qualis in dictis locis describitur, est de quo summopere dubito. Credat qui velit, non ego.

Verè admirabiles sunt Hydrocephali, quos memorat *Ampliss. D. Tulp. obs. Med. l. 1. c. 25.* in quibus liquor hæsit vel in dextro, vel in sinistro ventriculo, ac bis vidit ultra duas aquæ libras in alterutro ventriculorum tam strictè uni isti parti inclusas, ut altera esset plane illæsa ac integra. Ego bis in brutis simile quidpiam observavi. Anno 1650. mense Octobri, cum juvenca in pascuis crebrius vertigine corriperetur, mactata fuit. Caput forte fortuna, in quo mali causa latuit, obtinui. Quo aperto ac cerebro denudato, sinistrum latus sub sincipite tumidius & mollius cum præstantissimo Chæirurgo nostro Joh. Thoma Forero reperi, quod cum durius attrectassem, profiliit aqua limpidissima, faciemque mihi conspurcavit: Tumor subsidit; divulso cerebro ad corpus usque callosum, ventriculum sinistrum aperui, inveni Vesicam tenerrimam totam anteriorem ejus partem occupantem, quam citra ulteriorem lacerationem integram extraxi, superantem ovum gallinaceum magnitudine. In ventriculo, tum verticem versus superius, & infra, asperitas leviuscula, ubi vesica annata erat, apparuit, ac si feminibus papaveris albi aspersus fuisset. Ventriculus iste sinister duplo major erat dextro in anteriore parte: superior ejus pars & lateralis

tem-

64 EXERCIT. DE LOCO AFF.

tempora versus. propter extensionem, tenuis & vix cultelli dorsum crassitie æquavit : cætera omnia in cerebro sana erant.

Hac præterita hyeme, qua plura brutorum cerebra secui, in bovini cerebri dextro ventriculo similem, sed paulo minorem vesicam, itidem in anteriore parte undique accretam inveni, in cujus fundo mucus instar sedimenti crassioris atque candidi lapilli, instar cretæ friabiles, subsiderant : etiam citra lacerationem medullæ cerebri totam extraxi. Retulit mihi *peritissimus Cheirurgus D. Philippus Oenilinus, nunc Cancellarius in Monasterio Wettingensi*, frequentem esse morbum boum apud Subsylvanos in Helvetia, se vertigine proidentem, ac bubulcos esse, qui ipsi medeantur, hac ratione; primum malleolo cranium post cornua pulsant, ubi ex sono, aliud vacuum spatium, ac ordinarie sunt in craniis bubulis, percipiunt, statim in pulsato loco perterebrant, ac foramini pennam indunt, attracto spiritu vesicas hujusmodi extrahunt : si in superficie existat, prompte suctioni cedit, si autem profundior & cerebro immersa sit, successu eos frustrari dixit, ac proinde semper lanius huic operæ adstat, ut, si de animalis valetudine desperetur, ipse curationis telam absolvat. Exempla curatorum se vidisse adseveravit.

Non dubito in duobus *ἡμιυδροκεφάλοις Cl. D. Tulpii* aquæ descensum ad tertium, ac ascensum ad oppositum ventriculum, si non integra vesica, saltem membrana quadam, ceu pariete intergerino, prohibitum fuisse.

Deinde ambæ hæ in brutis inventæ vesicæ, ex membrana ventriculos succingente enatæ, instar hydatidum aliarum partium, argumento mihi sunt, non adeo tenues esse, ut vulgo creditur, vel tam porosas

porofas & fpongiofas effe , ut *Cl. Riolanus* exiftimat , alias vel millies à tanta aquæ copia ruptæ fuiffent : nec unquam ad hanc molem creviffent.

Sequitur præterea in hac *Cl. Riolani* demonstratione :

Atque nemo negare poteft nervos cerebri , effe propagines iftarum quatuor eminentiarum : ficque interpretanda eft hæc propositio ; Omnes nervos corporis & cerebri enafci à fpinali medulla , intra vel extra cerebrum.

Cum ad hunc paragraphum jam fuperius refponfum fit , non neceffarium eft ea repetere , atque ea concedi poffunt , modo non negetur ultimas nervorum radices etiam ultra eminentias has tendere , ac , quoufque in cerebro & cerebello medullaris fubftantia confpicitur ; exporrigi.

Concludit tandem *Cl. Riolanus* fuam demonstrationem.

Non diffiteor etiam fpiritus diffundi per totam fubftantiam cerebri , nec ambitu ventriculorum coerceri ; fed ipfos ventriculos affirmo veras effe officinas fpiritus animalis , qui diftribuitur feptem conjugationibus nervorum , atque fpinali medullæ.

Non exiftimo quempiam effe , qui cerebro & cerebello fpiritus animales , vel instrumentum fimile ad fensus & motus animales neceffarium (apud eos , qui nullos fpiritus agnofcunt) dene-

66 EXERCIT. DE LOCO AFF.

get, cum in iis aliquas, si non omnes actiones animales peragi, plerique concedant. Controversia tantum de loco generationis spirituum animalium est, quem ventriculos (maxime anteriores, nam quartus ipsi cisterna spirituum animalium alibi est) esse hactenus *Cl. Riolanus* se demonstraturum pollicitus est. Hinc magna sui suorumque argumentorum fiducia hunc demonstrationis suæ finem fecit:

Ipsos ventriculos affirmo veras officinas spiritus animalis, &c.

Verum non sufficit affirmasse, si fidem sibi haberi velit, nam nisi aliis rationibus suam opinionem fulciat, facile hæc ipsius demonstratio sua sponte corruet, quæ enim hactenus attulit, nihil minus quam ἀπόδειξιν sapiunt, ut plurimis jam dictum est. Firmius & certius me conclusurum confidam, ventriculos plane non esse spirituum animalium officinas, cum in eorum cavitatem spiritus vitales non magis effundantur, quam in cavitatem vel vesicæ, vel ventriculi, vel intestinorum, vel totius abdominis, vel pectoris, vel denique aliam quamcunque, cujus internam superficiem arteriæ integræ perreptant; cumque, quantumvis generarentur in ventriculis spiritus, distribui per omnes nervos ex illis nequeant, ut hactenus pluribus ostensum fuit: Imo constabit ex sequentibus, ventriculos potius esse excrementorum receptacula quam spirituum officinas.

Sed satis superque *Cl. Riolani* demonstrationem expensam arbitror; quibus telis *Cl. D. Hoffmanni* sententiam contra ventriculos prolatam expugnet, dispiciendum nunc erit.

Exc.

Exc. Hoffmannus igitur *Animadv. in Com. Montan. & Thom. Erastum de morb. c. 14. paragr. 68.* primum adoritur ventriculorum officium hac ratione :

Ibi fit spiritus, ubi actio. At vero in corpore fit. Corpus enim agit, non accidens.

Cl. Riolanus ad hoc argumentum respondet :

Varias actiones fieri a partibus, in quibus non generantur spiritus.

Verum enimvero non credendum, *Cl. Hoffmannum* insignem Peripateticum artisque *ἀνδριανῆς* peritissimum tam absurdum fuisse, ut putarit, ubi actio fit, in partibus totius corporis, ibi spiritus generari. Ex cæteris enim ipsius doctissimis scriptis facile constabit benevolo lectori, quas actiones spirituum animalium generationem ita inferentes, intelligat. Inprimis id manifestum evadit ex *l. 2. Instit. Med. c. 64. paragr. 17.* ubi, postquam ventriculorum fictitium usum explorat, concludit, jam Arabum sententiam, tres facultates principes in ventriculis collocantem, corruere, imo meras nugas esse; at facultates has actiones in toto cerebro peragere. Itaque mens *Cl. Hoffmanni* hoc in loco erit; ubicunque actiones principum facultatum fiunt, ibi spiritus generabuntur. Cum enim quædam harum facultatum in perpetuo actu sint, omnesque reliquæ actiones animales, motus scilicet & sensus externi, ita ab illis dependeant, ut nisi objecta sensuum externorum agnoscant, aut motum impellent, eorum organa, vel cessent, vel saltem in opere cessare putentur, ut vel ex somno naturali videre est; cumque ad sensum communem,

phantasiam & memoriam quoties agunt, magna spirituum copia, perpetuusque proventus necessario requiratur, haud inepte conclusit; Ibi fieri spiritus, non quoslibet, sed animales, ubi hæ facultates actiones suas exercent; imprimis si commodior locus, qui spiritus sufficientes & prompte largiri possit, desit, prout ex sequentibus amplius & clarius patebit. Atque has actiones in corpore cerebri sc. & cerebelli fieri *Clar. Hoffmannus* subsumit, addita ratione, corpus agere, non accidens, seu figuram aut externam superficiem medullofi corporis cerebri & cerebelli, ob quam ventriculi sunt, quod sunt, ut ipse *Cl. Riolanus* fatetur, tum quoties ventriculos describit, tum in ipsa sua demonstratione paulo ante proposita, dum expresse dicit, duas majores eminentias anteriores ventriculos formare, eorumque latera claudere: alias duas constituere latera quarti ventriculi, cujus tectum partesque anticas & posticas efforment duplex scolicoides apophysis. Negat autem *Cl. Riolanus* omnes actiones in corpore cerebri fieri; at non addit, quænam ibi non peragantur: quod facile ipsi concessisset *Cl. Hoffmannus*, qui nec ipse, nec forte quispiam alius omnes actiones in cerebri corpore fieri statuet. Si vero de actionibus sensuum internorum ipsi sermo sit, primum negationis suæ fundamenta afferre, ac *Cl. Hoffmanni* additam rationem refellere debuisset, quod ne verbulo quidem præstitit, quod quidem ad rem præsentem fecisset. Nec enim res hæc adeo plana est, omnisque controversiæ expers, ut *Cl. Riolano* neganti, actiones facultatum principum in cerebri parenchymate, cui simile in corpore non est, fieri, statim assentiendum sit. Quanti vero faciendi sint, qui negant principes
actio-

actiones in cerebro fieri, audiat elegantissimum suum Fernelium *Physiolog.* l. 5. c. 8. ubi scribit, *Eos ab antiqua celebrique philosophia defecisse, qui vim illam ad fingendum aptam cerebri parte priorē, memoriam posteriore collocarunt. Nam utraque totius est cerebri, in cujus toto corpore fusa est princeps sentiendi anima, & c. 10. loc. cit. Haud dissimulanter adeunda est, sed funditus evertenda juniorum prope omnium absurda & futilis opinio, quæ memoriam cerebri ventriculo postremo, phantasiam vero, id est, cogitandi fingendique vim prioribus collocavit. Hæc ex Arabum factione primum orta, nullis rationibus stabilita, partim ficta pueriliter, partim effutita temere, ita demum iactationem habuit in populo. Et sub finem hujus capituli: Si Aristotelis & Peripateticorum rationibus illi non cedunt, audiant saltem universam Græcorum Medicorum familiam, qui omnes ad unum iisdem principiis informati, læsa memoria non occipiti, sed toti cerebro remedia adhibere jubent: id ratum habentes, partem animæ *ἡσυχίαν*, quæcunque ea sit, hanc eandem & recordari & impressiones conservare. Fernelium sequuntur Clariss. & de re medica optime meritis D. Sennertus *Instit.* l. 1. c. 6. & c. 13. Valles. *Controvers. Med.* l. 2. c. 23. Cl. Horst. *nobil. Exercit.* l. 2. *Exerc.* 8. q. 3. Laurent. *Hist. Anat.* l. 10. q. 1. 2. & 3. Jul. Cæs. Claudinus *de sede facultatum principum, parte quæst.* 3 & 4. & plures alii, qui, etsi in loco citato præcipuè Arabes refutent eorumque sequaces, collocantes principes facultates diversas distinctis sedibus, quæ sint distincti cerebri ventriculi, tamen omnes simul quoque, tum authoritate Galeni, tum rationibus probant, facultates has actiones suas in cerebri substantia peragere, cui similis in toto corpore non reperiatur.*

70 EXERCIT. DE LOCO AFF.

tur. Omnium rationes afferre superfluum foret :
consulantur loca citata.

Si itaque *Cl. Riolanus* de victo *Cl. Hoffmanno*
Pæana intonare velit, non pro imperio vel affir-
mandum, vel negandum quicquam ipsi erit,
neque tanti Herois victor citra pugnam reputa-
bitur.

Præterea contra Syllogismum *Cl. Hoffmanni*
sequentia subnectit.

Deinde non est opus alia elaboratione,
quam transitu per cerebrum : Ut enim san-
guis venosus transeundo per ventriculos
cordis momento redditur vitalis, ita spiri-
tus animales excurrentes per medium cere-
brum usque ad quartum ventriculum ani-
malitatem acquirunt. Nam si necessum fo-
ret in substantia cerebri elaborari spiritum
animalem, de sua subtilitate multum a-
mitteret, quia cerebrum frigidum & hu-
midum.

Verum non video qua ratione hæc argumen-
tum *Cl. Hoffmanni* feriant : utcunque enim non
generentur spiritus animales in substantia cere-
bri, ex sua opinione, non diffitetur tamen spi-
ritus sc. animales per totam substantiam cerebri
diffundi, nec ambitu ventriculorum coerceri.
Quantum conjicere possum, tangunt ea additam
huic argumento rationem, *Corpus agit, non ac-
cidens*, Cum enim accidens illud, ut supra di-
ctum, nihil nisi figura & externa superficies me-
dullofæ substantiæ cerebri, intus in cavitate ven-
triculorum conspicua, sit, ejusque, ceu quanti-
tatis, nulla virtus existat, *Cl. Riolanus* his illa-
tioni

tioni huic tacite sibi occurrendum duxit : Itaque statuit ad spirituum animalium productionem non opus alia elaboratione esse , quam transitu per cerebrum : hocque illustrat exemplo sanguinis venosi , quem opinatur in momento , transiendo ventriculos cordis , vitalem reddi.

Verum miror illum citra graviorem causam , vel hoc non cogitantem , deserto *Galeno* , in castra *Aristotelicorum* profugere , qui alibi aliàs ultrò fatetur , cum Medicus sit , se libenter ab *Aristotele* discedere. Si enim spiritus vitales (nam mendum Typographicum ex antecedentibus & consequentibus in meo exemplo hic deprehendo) solo transitu per ventriculos cerebri (eos enim transire in demonstratione supra scripsit) animalitatem , citra ulteriorem elaborationem , acquirunt , quodnam discrimen spirituum vitalium & animalium erit ? Nullum certe nisi accidentale , atque hæc spirituum animalium elaboratio , ceu momentanea , non nisi levis alteratio , non generatio erit , quod pro *Aristotele* , *Zarabella lib. de partit. Anim. c. 9. aliique Aristotelis* affectu contra *Galenum* & plerosque Medicos , strenue asserunt. Quæ elaboratio , vel mutatio spirituum vitalium ex solo transitu per ventriculos expectari possit , dum ob brevem in ventriculis moram (nam in perpetuo fluxu sunt spiritus animales) superficiem tantum corporis medullofi lambunt ? Et posito spiritus vitales in hoc transitu aliquid à parietibus ventriculorum pati , atque ab eorum frigidity illorum calorem remitti , solum minus calidi evadent , non tamen speciem mutabunt : Vel accipiant nobis ignotum aliquem characterem ab occulta qualitate , ceu à magne-
te acus nautica , nihilo minus alteratio , non generatio erit. Neque alia mutatio spirituum vita-

72 EXERCIT. DE LOCO AFF.

lium toto hoc itinere excogitabitur à *Cl. Riolano*, cum cerebrum frigidum paulo post referet, quod spiritus vitales per ventriculos oberrantes, nec calefaciet, nec attenuabit, utpote fervidos & ruper admodum è caloris foco profectos. Atque ita *Aristotelici de Galeno* & Medicis merito, præcone *Cl. Riolano*, triumphabunt: idque majore applausu, si spiritus vitales nullibi, ad dictam animalitatem induendam, præparari intelligent: nam supra dictum, rete mirabile *Galen*i in homine fabulam esse: Arteriarum verò divisio illa, quæ in basi cerebri cernitur, & à quibusdam recte mirabile dicitur, ut *Cl. Veslingius Syntag. Anat. c. 14. fig. 3. l. p. p. p.* refert, non magis spiritus vitales præparat, quam arteriæ quævis sanguinem præparare solent, quæ in manibus, pedibus, alibive in ramulos ideo dirimuntur, ut promptius omnibus & singulis partibus vivificum succum suppeditent. Quæ omnia ægerrimè ferent Medici, omnino aliud discrimen spirituum vitalium atque animalium, quam accidentale saltem, agnoscentes. Videatur hac de re *Cl. D. Sennert. Instit. Medic. l. 1. c. 6. & Pract. l. 1. p. 2. c. 33. quæst. 2. & Exc. D. Rolfink. dissert. Anat. l. 4. ad c. 26.* ubi copiose de hac controversia variorum, & propria ejus sententia traditur.

Elaborationem autem hanc spiritus animalis momentaneam *Cl. Riolanus* probare conatur exemplo sanguinis venosi, quem, transeundo ventriculos cordis, opinatur in momento reddi vitalem; Verum utrumque membrum comparisonis hujus falsum est. *Πρότερον* quod attinet, audacter dico nullum sanguinem in momento à corde vitalem reddi; & ne quispiam existimet me sophistam agere, ac momenti vocabulo ludere,

dere, nec vel mille momentis in corde talem fieri existimo. Nam primus sanguis vitalis, qui in conceptu & primordiis foetus conspicitur, antequam cor & punctum saliens efformetur, existit, unde merito ipsi soli privilegium debetur, ut particula prima genitalis & animata statuatur, ut *Vir incomparabilis Guil. Harvejus de Gener. Animal. Exerc. 51. αὐροψία* & rationibus luculenter probat, cujus auctoritatem nemo repro-
 babit nisi aut delicatulus sit, & torpidus innocuas manus viventium bestiarum sanguine contaminare vereatur, aut cui invidiæ stimulis ægrotent viscera. Multo minus ille sanguis plurimis momentis à corde vitalis efficietur, cui chylus, per novum ductum, *Cl. Pecqueti* industria inventum, aut per vasa lactifera ad venam cavam descendentem allatus, permiscetur. Quis enim spondebit, vel affirmare audebit, sanguinem hunc chylo infectum, momento illo temporis, quo in corde perdurat (qualibet enim systole totus fere è cordis thalamis ejicitur, ut illi qui S. C. admittunt, excepto *Cl. Rioli* probant ac ipsa *αὐροψία* testatur) vitalitatem, ut ita loquar, talem acquirere? qualem sc. vulgus Medicorum describit, indeque discrimen inter arteriosum & venosum maximum fingit: unde ille splendidior, subtilior, fervidior ac spirituosior, hic contrario se modo habens, crassior scilicet, obscurior, minusque spirituosus & fervidus traditur. Eoque minus vero consentaneum est, sanguinem chylo permixtum, tam brevi tempore, dicta ratione, vitalem reddi, postquam jam innotuit, ne guttulam quidem chyli ad hepar ferri, ut ibi sanguinis rudimenta accipiat, sed omnem ad venam cavam & paulo post ad Cor transportari, ut *Exc. D. Thom. Bartholinus in libris de Lacteis*

74 EXERCIT. DE LOCO AFF.

Thoracicus & Vasis Lymphaticis; Itemque in defensione horum vasorum adversus Cl. Rioli. erudito orbi demonstravit, ut plura hoc loco de hac re scribere velle, esset lucem in meridie accendere. Nec ille sanguis venosus, qui forte chyli expers est (quod vel in fœtu, vel in lucem editis quandoque contingere credemus) momentum numero vitalis evadit. Cum enim Cor omnem suum calorem actualem à sanguine mutuet, utique neque calorem, neque alias vitalitatis creditæ notas accipiet, juxta vulgatum canonem logicum: Propter quod unumquodque tale est, illud magis tale est. Privetur enim Cor sanguine, protinus vires ejus collabentur, ac actualis ipsius calor evanescet. Præterea ad quamvis alterationem etiam mora requiritur, ut agentis virtus rite in patiens influere possit, at quanta sanguinis mora & perduratio in thalamis cordis est? non longior certe, quam momentum illud quietis est, quod inter cordis diastolen & systolen existit. Et re vera si probe omnia ac sollicita mente explorentur, inveniemus, cor nonnisi connatum sanguini calorem conservare, non vero illum ipsi tribuere, dum sc. sanguinem per venas reducem., ac ex longo itinere fessum ac languidum, insita virtute denuo propellit, motum, caloris nutrimum, instaurat, ac ut alacrior per solitas vias properet, novos stimulos addit. De qua re, si plura desideres, videsis ingeniosissimam dissertationem *de Corde Jacobi de Bek.*

Ἀπόδοσις quod spectat, jam supra ostensum est, neque à reti mirabili, neque ex arteriis carotidibus & vertebralibus quicquam spirituum vitalium in ventriculorum cavitatem effundi: Etsi enim paucae & exiguae arteriolæ in basi ventriculos

los cerebri ibidem adapertos intrent, spirituum tamen vel minimam ἀπορον in vacuum spatium ventriculorum exonerari, nemo probare poterit, cum earum furculi, vel plexui choroideo, vel substantiæ cerebri, vel denique sinui quarto, venisque magnis ab eo profectis manifeste inferantur: & si qua exhalare ex illis concederetur, perirent, nulliusque usus forent, utpote qui ab excrementis, quæ nemo, imprimis tertio ventriculo, denegabit, suffocarentur.

Sed *Cl. Riolanus* veretur spiritus animales multum de sua subtilitate amissuros, si in substantia cerebri generarentur, eo quod frigidum & humidum sit. At quid spiritibus animalibus in ventriculis accidet? Non dicam nunc excrementorum receptacula esse: at non negabit *Cl. Riolanus* ventriculos accidens cerebri esse, & vim productricem spiritus animales non in vacuo eorum spatio oberrare, sed in superficie medullofi corporis, cavum ventriculorum spectante, residere, indeque ad spiritus vitales emanare, ipsosque animalitate imbuere. Cum itaque cerebrum frigidum & humidum sit, utique etiam ventriculorum superficies, ceu ejus portio, talis erit, ac proinde inepta ad tale opus absolvendum. Imo si rectius rem ipsam æstimemus, cortex & medulla cerebri ac cerebelli calidiora erunt, utpote quæ multo copiosiore sanguine per arterias allato irrigantur, ut oculi testantur, & ubi arterias cerebri recensabo, patebit.

Ventriculos autem paucæ & exiles arteriæ intrant, nec eorum commodis inserviunt, sed vel parenchyma intrant, vel plexui choroideo junguntur, vel ad sinum quartum abeunt, ut ignaviorem sanguinem ad sinus laterales & venas jugulares propellant ac reditum ejus ad Cor maturent.

76 EXERCIT. DE LOCO AFF.

turent. Quæ autem vasa sanguifera in superficie eminentiarum majorum conspicua sunt, venæ sunt, quæ ex arteriis per parenchyma dispersis sanguinem accipiunt, ac ad sinum quartum revehant. Et quoties animo revolve magnitudinem & numerum arteriarum, quæ partim substantiam ejus subeunt, partim superficiem perreptant, immerito cerebrum, tanquam frigidum traduci, si non insiti, saltem influentis & arteriosi sanguinis (ut quidem loquuntur) ratione, existimo: nullum enim viscus in toto corpore est, si Cor, pulmones & uterus in gravidis excipias, quod cerebrum arteriarum copia & mole non superet, nec quidem hepate excepto, quod tamen ab omnibus calidum creditur.

Quam vero ridiculum sit, partis temperiem ex colore, consistentia & similibus conjicere, (præter id quod similibus qualitatibus sensibilibus prædita, sæpe diversissimarum virium esse deprehenduntur) præclare *Magnus Vesalius in Epistola de Rad. Chinæ contra Galenum* demonstravit.

Denique si spiritibus animalibus tantum periculum à frigido & humido cerebro imminet; quid illis fiet, qui per medullam spinalem, quæ ejusdem cum cerebro temperamenti est, distribuendi sunt? Quos tamen subtilissimos esse debere, nemo renuet, qui considerabit promptissimos requiri ad imperium voluntatis, quocunque & modo & tempore exequendum.

Secundum *Cl. Hoffmanni* argumentum contra ventriculos, quæ spirituum animalium officina creduntur, est:

Spiritus si agere debet, oportet sub imperio animæ maneat, in vasis inquam. Postquam enim in æquor illud ventriculorum egres-

egressus est, quid cogit illum iterum in angustias illas nervorum? de natura enim ipsius est, diffundere se.

Ut autem cuilibet constet quam dextre *Cl. Riolanus* hoc argumentum petat, quæ ei opposuit verbotenus describam.

Si diffunditur spiritus in totam molem, vere mollem ac ceream, quomodo potest redire in nervos, cum nulla vasa sint excurrentia per substantiam cerebri? Stigmata illa cruenta, quibus conspersa est, sunt puncta sanguinis superne deorsum stillantis, ex arteriolis intercurrentibus anfractuosam cerebri substantiam, magna Naturæ providentia, cum non possit sanguis penetrare & transire per mediam cerebri substantiam, divexit illum per canaliculos duræ meningis usque ad sanguiductus, inde prolabitur in partes inferiores, & per torcular, sive venam illam magnam, quæ constituit plexum choroidem, defluit in ventriculos. Probabilius esset in plexu choroidæ, qui diffunditur per omnes cavitates cerebri usque ad basin, assignare sedem & officinam spirituum. Sed Hoffmannæ, demonstra mihi viam, per quam spiritus animales ex vitalibus producti, diffundantur in cerebri substantiam, inde refluant in nervos.

78 EXERCIT. DE LOCO AFF.

Ex paulo prægressis constat, *Cl. Riolanum* non diffiteri spiritus animales per totam substantiam cerebri diffundi; inferius fatebitur spiritus vitales quoquoeversum toti cerebro suppeditari, & merito etiam; quî enim nobilissimum viscus his destitutum viveret? Quæstio igitur primum sententiæ *Cl. Hoffmanni* opposita erit, si omnino concederetur, spiritus animales diffusos esse per cerebri substantiam mollem verè ac ceream, qua ratione ad nervos redire posset, cum nulla sint vasa excurrentia per eam? Vasa autem hæc erunt vel nervi, spiritus intra substantiam cerebri genitam recepturi, ac ad destinata loca transportaturi; vel arteriæ, materiam, scilicet spiritus vitales, parenchymati juxta alia suggesturæ. Fatendum equidem est, nullos nervos, id est, corpora rotunda, oblonga & teretia, membrana vestita, per cerebri substantiam excurrere: E contra nemo etiam inficias ibit, præcipuam nervorum substantiam, spirituum animalium *πρωτον δεκτικόν* medullam esse, & cum medullosa cerebri & cerebelli corpore ita continuam existere, ut si qua illa solveretur, nervi prorsus inutiles ac ad inserviendum, vel sensui, vel motui inepti forent: imo, ut supra dictum, omnes nervi originem suam primam non ab eminentiis solum, sed à toto medullosa corpore repetunt; cum eorum substantia princeps nullibi ab illo, vel minimo sepimento distinguatur. Itaque si spiritus animales per medullosam substantiam diffundantur, facile nervis ipsi unitis, impertiri poterunt, utpote tanta affinitate junctis & cerebri ac cerebelli medullosam substantiam in omnibus, nisi quod duriusculi magis sint, referentibus.

Quod si concederem, nullas arterias per substantiam cerebri excurrere, in quo probando *Cl.*

Rio-

Riolanus hoc loco imprimis occupatus est, nihilominus argumentum *Cl. Hoffmanni* integrum & inoffensum persisteret, atque ita Elenchi ignorantem commisisset. Nam, etiam hoc admisso, spiritus animales, extra animæ imperium, ventriculorum æquor ingressi fluctuarent, & cum de natura eorum sit se diffundere, sine duce oberrarent, nec esset quod illos in angustias nervorum pelleret: etiam cerebro spirituum animalium materia, spiritus vitales, deessent, nam, ipso etiam *Cl. Rialano* teste, spiritus cum sanguine quoquoque in totam cerebri substantiam, ex arteriis anfractus intercurrentibus, destillant. Spiritus autem animales in substantia cerebri sub animæ potestate manere, nemo renuet, cum vivens pars sit. Atque ita his omissis, ceu hunc non pertinentibus, ad alia properare possem: Verum cum ea quæ hoc loco attexit, veritati minus consentanea existimem, eaque veræ circulationi sanguinis in capite adversa sint, illa quoque expendenda erunt, ut historiæ istæ Apoplecticorum eo melius intelligi queant.

Non nuper admodum sanguifera vasa substantiæ cerebri adempta fuerunt: pridem *Aristoteles*, his eam spoliavit, *Hist. Anim. l. 1. c. 16.* namque Ἀναίμῳ δ' ὁ ἐγκέφαλῳ ἅπασι, καὶ ἐδεμίαν ἔχον ἐν αὐτῷ φλέβα & *l. 3. c. 3.* sub finem postquam venarum, quo nomine etiam arteriæ ipsi veniunt, distributionem per universum corpus recensuit, subjungit, Αὐτὸς δ' ὁ ἐγκέφαλῳ ἀναίμῳ πάντων ἐστὶ, καὶ ὅτε μικρὸν, ὅτε μέγα φλέβιον δὲ ποτελευτὰ εἰς αὐτὸν. Ipsum cerebrum omnibus, scilicet animalibus ex sanguine est, & neque parvum neque magnum vas sc. sanguiducum definit in ipsum. Agnoscit autem ea in meningibus, utpote omnium sensibus obvia. *Aristotelem* plures alii sequuntur, Philo-

80 EXERCIT. DE LOCO AFF.

Iosophi, imprimis, *Vesalius Fabric. hum. corp. l. 3. c. 14.* Ante omnia monendum censet, nullam prorsus venam aut arteriam in cerebri substantiam ad eum modum intexi, quo pulmonibus, lieni, jecori & plerisque etiam musculis ejusmodi vasa implicari novimus: Nam vasa cerebri membranis duntaxat contenta, passim cerebro accumbunt, vixque ullibi, ipsius substantiæ adnascuntur. Et l. 7. c. 4. *Anfractus* ad cerebri substantiæ enutritionem procreatos esse, à Galeno in *Examine Erasistrateæ* opinionis de anfractuum usu, additum oportuit: Cerebri namque substantiæ circa omnem membranosarum fibrarum plexum continua, neutiquam adeo firma fuerat, ut per illam arteriæ venæque, ut in reliquis corporis partibus, digeri possent.

His adstipulatur *Cl. Riolanus* tum hoc in loco, tum alibi, quamvis ipsi non usque adeo *Aristotelica* aliàs placeant, & non raro *Vesalio* iniquior sit. Omnia enim tentanda ipsi erant, ut ventriculorum officium salvum tueretur: Tanta vis est præconceptarum opinionum! Imprimis ad *Epist. de sanguinis motu Cl. Joh. Walæi*, commentarium quasi horum in *Encheirideo* occurrentium scripsit, postquam enim *Cl. Walæi* sententiam de vasorum distributione & circulationem sanguinis veram per ea explosit, suam super ea re opinionem oppositurum pollicetur, quam per experimenta in mortuis se verissimam demonstrare posse gloriatur. Cum cerebrum hominis amplissimum indigeat multo sanguine & copiosis spiritibus, tum ad sui nutritionem tum ad generationem spiritus animalis, quem universo corpori impertire debet ad sensum & motum, dubitare licet de Circulatione sanguinis per cerebrum, propter fluxus & ambages viarum in plexu retiformi, & progressus sanguinis ad verticem & fastigium cerebri.

Cer-

Certum est, magnam sanguinis copiam cerebro sup-
 peditari à corde vicino, celeriterque deduci brevi
 & rectissima via ad basim cerebri, per carotides
 arterias patentes & amplas, ibi mirabili artificio
 invicem coeunt, & decussatim intertextas, ut
 dextræ sinistrorsum, sinistrae dextrorsum ferantur.
 Dein perreptare numerosa sobole ramorum, undi-
 quaque sparsorum, superficiem duræ meningis, do-
 nec pervenerint ad sinum, sive canalem longitudi-
 nalem, in duplicatura meningis formatum & ex-
 sculptum, ubi deponunt suum sanguinem arterio-
 sum: Ab eo sinu innumeri ramuli seu rivuli deprom-
 untur, qui sparsi per anfractus exteriores cerebri,
 roris instar, destillant sanguinem arteriosum super-
 ne deorsum, per substantiam medullarem & mol-
 lem cerebri; etiam ab illo plexu retiformi derivan-
 tur arteriæ, quæ in spinalem medullam superio-
 rem feruntur. In dorso & lumbis recipit ab aortæ
 trunco arterias: si id scivisset Walæus, recursum
 istius sanguinis per lumbares venas & intercostales
 azygi invenisset & vidisset. Quando regurgitat
 sanguis in canalibus lateralibus duræ meningis, qui
 sunt portiones, vel potius continuationes longitudi-
 nalis, decurrit in jugulares internas, quæ sunt
 istis canalibus coaptatæ, ut per truncum venæ ca-
 væ redeat ad cor. Porro, vena magna à Galeno,
 in cerebro constituta, propago est tenuis meningis,
 quæ, canalem efformat, qui pro quarto sinu habe-
 tur, reperitur in concursu trium canalium inter
 cerebrum & cerebellum intra ventriculos cerebri
 deductus & expansus usque ad basim, nutrit par-
 tes illas internas cerebri, sanguinemque & spiritus
 suos inde depromit. Et paulo post: Deducitur,
 scilicet spiritus vitalis, per illam magnam venam
 in ventriculos, quamvis cerebrum parte inferiore
 spiritus quoque habeat à plexu retiformi, qui in ner-

82 EXERCIT. DE LOCO AFF.

vorum septem paria diffunditur, & in spinalem medullam, qui per omnes corporis nervos celerim: instar flammæ radiantis distribuitur. Et Anthopogr. l. 4. c. 2. ait: Quia non erat tutum venas per mediam & mollem cerebri substantiam ascendere & divagari, naturam canales seu sinus condidisse, ne pondere cerebri venis compressis sanguinis commeatus interciperetur: & paulo post, ubi Aristotelem excusat & benigne interpretatur, dicit illum agnovisse vasa sanguifera in ambitu cerebri & meningum, quæ irrigent externam superficiem, ut, roris instar, sanguis destillet ad nutritionem. In Animadv. in Anat. Cl. Baubin. p. 711. eadem repetit, quamvis Anatomico paulo indignius loquatur. Non est verisimile, inquit, venas per cerebri medullam mollem ac ceream deferri & transire, potius sanguis roris modo destillat in subjacentes partes, quod compressa cerebri medulla cognoscet.

Sed quam verè Cl. Riolanus hæc omnia asserat, diligenter inquirendum est, si enim à credulo admittantur, non in spernendos errores illum præcipitabunt. Non equidem dixerim magna vasa per substantiam cerebri excurrere, nec quisquam, qui vel semel cerebrum secuit, id adseverabit, qualia aliàs epar, lienem, renes, pulmones, aliave viscera subire conspiciuntur. Illud tamen Cl. Riolano non concedam, Naturam non potuisse vasa etiam majora per substantiam ejus deducere, si è re cerebri fuisset; neque enim materia, neque calor, naturæ præcipuus minister, defuissent, cum cerebrum proximum sit bullæ salienti in Embryone.

Deinde si substantiam ceream ac mollem, si firmam ac membraneis fibris destitutam, aut ejus pondus attendam, nihil horum naturam, vasa

vasa majora per substantiam cerebri traducturam impedire, vel sanguinis motum per vasa talia remorari potuisset, Quam facile enim natura potuit per colliquamentum, ut *Cl. Harvejus* vocat, prima rudimenta vasorum ducere, tam facile etiam per cerebri substantiam derivasset; notum namque est in Embryone primis formationis diebus illam instar limpidissimæ aquæ existere. Neque si cerebrum in primordio formationis cereum & tenacius largirer, id Naturæ vasorum majorum traductionem molienti restitisset: cum enim ossa, quæ primis formationis diebus, verius tum cerea nuncupanda, transitum concedant, quidni & cerebrum longe minori resistendi vi praeditum? Nec firma & fibris destituta substantia, ut *Vesalius* putat, in culpa est, quo minus majora vasa per cerebrum divagentur, suffecisset vasa tunicis suis dotata esse, quarum beneficio æque atque alibi mandato munere fungi potuissent, ubi citra adjumentum externarum partium, id, quod ab hisce vasis postulatur, præstant. Neque propterea sanguinis motus retardatus fuisset, cum cunctabundus, quamdiu animal vivit, à perpetuo novi sanguinis impulsu, nisi aliud obstat, non magna opera propellatur. Nec à pondere cerebri tantum periculum extimescendum fuisset: si enim illud in sanguinis motu inhibendo aliquid valeret, arteriæ illæ plurimæ in basi cerebri inutiles & superflue forent; cum tota cerebri moles ipsis incumbat; atque miserrima conditio hominum esset, quibus os sublimè datum est, cælumque tueri: quoties enim caput erigerent, privarentur saluberrimo & summe necessario spirituum vitalium & benefici caloris influxu, non sine gravissimo damno, & tantum non mortis periculo. Etsi minutissima vasa sanguifera per

84 EXERCIT. DE LOCO AFF.

substantiam cerebri mollem, ceream, firmam ac ponderosam excurrere possunt, quamobrem majora & firmiora non valuissent?

Vasa enim sanguiduca parva per cerebri substantiam traduci æque veterum ac recentiorum auctoritate demonstrari potest. *Hippocrates* enim passim in suis scriptis, id quoque referente *Cl. Riolo*, vasa cerebri substantiam permeare tradit, imprimis *lib. 2. de morb.* sæpius eorum mentionem facit, & quoties fere cerebri morborum meminit. *Galenus* tum alibi, tum de *Administr. Anat. l. 9. c. 2.* per cerebrum & cerebellum venas disseminari scribit, quæ priusquam cerebri corpus subeant, ex membranæ venis elabentes manifeste conspici possunt, nisi divellantur. Sunt equidem Anatomici, qui vasa cerebrum permeare ex hoc loco probari posse negant: utcunque locus clarus sit, cum sequentia aliam verborum significationem polliceri videantur: Indeque asserunt vasa potius cerebro attendi, atque in membrana contexta ei accumbere, quam per ipsum disseminari; quoniam per cerebrum ullæ nec venæ, nec arteriæ diductæ appareant.

Verum *Fallopium*, qui hæc ipsa quoque memorat in aureo Observationum suarum opusculo, quod *Cl. Riolanus* divinum vocat, atque studioso Anatomix assidue legendum ac evolvendum suadet, pag. 134. b. nobis scripto reliquit. *Hoc*, scilicet nulla vasa substantiam cerebri ingredi, ego haud confirmare possum, quoniam & venulas & arteriolas capillares plurimas per candidissimam ipsius substantiam disseminatas video atque conspicuas in Theatro Anatomico, aliquot jam sunt anni, quibus auditoribus meis quotannis ostendo.

Fallopium plurimi sequuntur, *Exc. Bauhin. Theatr. Anat. l. 3. c. 8. & 10.* qui, quamvis non
tutum

tutum censuerit majorum vasorum transitum per cerebrum, agnoscit tamen minora ejus substantiam permeare: *Cl. Spiegel. Fabr. corp. human.* idem affirmat *l. 10. c. 3.* ubi ex hoc fundamento cerebrum inflammari posse putat. Præterea ex recentioribus adhuc viri doctissimi rerumque Anatomicarum peritissimi assentiuntur, ut *Higbmorus disquis. Anat. l. 3. p. 1. c. 5. 6. & c. 9. Antonides van der Linden Physiolog. c. 8. paragr. 144. Thomas Bartholin. Anat. reform. l. 3. c. 3.* qui ambo modum inveniendi hæc vasa tradunt, ut & *Kyper. Anthropol. cap. 10. paragr. 51.* Imo ipse *Cl. Riolanus Anthropol. l. 4. c. 2.* de ipsis testimonium perhibere videtur, dum dicit.

E tertio canali innumeræ venulæ prodeunt per anfractus exteriores cerebri diffusæ, atque penitiorem cerebri medullam penetrantes, ut ex cruentis stigmatis cognoscas, quæ medullâ inter digitos elisâ conspiciuntur. Et quare non fecisset? cum nullum industrium sectatorem latere possint.

Utcunque autem *Vesalius* vasa hæc capillaria copiose per substantiam cerebri dispersa, in Examine observationum Fallopiarum explodere annitatur, operam tamen perdere videtur, ut quilibet haud difficulter assequetur, qui citra præjudicium ea leget, quæ *Fallopio* opponit p. m. 96. *Propter quaedam tamen rubra fortassis puncta, quæ in laqueo suspensis, & interdum à phrenitide mortuis in dissecta cerebri substantia videntur, hanc meam sententiam turbas, & perinde ac si substantia illa manifestissimis venis undecunque scateret, rem modo proponis. Ego sane (qui venularum anteriorum cerebri ventriculorum superficiei obtensarum, & rubrorum aliquando occur-*

rentium punctorum, non sum in mea historia oblitus) acutis & obtusis cultris, posteaquam membrana exquisitissime essent undique ablatae, cerebri substantiam non semel secui, & coctam & crudam manibus effregi, verum illa notatu digna vasorum per ipsum series, quam modo inducis, mihi nunquam fuit conspecta. Verum si *Vesalius* accurate inquisivisset, idque iis legibus, quas tradiderunt *Cl. Viri Thom. Bartholinus, Highmorus, van der Linden, Kyperus & alii*, vix eum fugere potuissent. Sed ullam operam à *Vesalio* indagationi horum capillarium vasorum impensam fuisse, ambigo: si enim vel levissimum studium adhibuisset, non ipsi excidisset in laqueo suspensis, & interdum in phrenitide mortuis fortassis rubra puncta fuisse visa, aut aliquando occurrisset; quasi vero non semper, sed aliquando, rara & non crebra in qualibet substantia cerebri conspiciantur? Et quo magis ipsum latuerint, fortasse non minimum momentum attulit sinistra tenuis meningis ablatio, quæ si dextrè peracta fuisset, monente *Galeno* loco paulo superius citato, venas è membrana elabentes manifeste conspiciari potuisset, nisi divulgasset. Quæ ut credam, me confirmat Epilogus hujus Examinis, ubi fatetur *Madrillii*, quo in loco tum temporis, quo hæc scripsit, vixerat, nullam ad dissectionem aggrediendam occasionem incidere, ut ne calvariam quidem commode nanscisci possit. Quanti verò *Aristoteles* faciendus sit hac in re, tum ipsa verba, quomodocunque torqueantur, tum quæ in antecedentibus & sequentibus de vasorum distributione statuit, innuent.

Atque ita apparet firmumque & stabile manet, vasa per substantiam cerebri excurrere, eaque plurima sed parva & capillaria; non quod

Naturæ vel vires, vel materia defuissent majora per illam traducendi, aut quod aliquid Naturæ traductionem molituræ, obstaculo esse potuisset, aut quod periculum inde sanguinis perpetuo motui creatum fuisset, si, tum totius, tum cerebri œconomix, majorum vasorum transitus utilis extitisset. Sed sapientissima Natura hic prudenter illud observavit, quod in toto reliquo corpore singulisque partibus præstare solet, videlicet, ubi ex sanguine aliquid generandum, aut ubi pars ab eo nutrienda est, aut ubi excrementa & particulæ ejus heterogeneæ segregandæ sunt, vasa ac canales sanguinem ad statum locum deducentes, in minuta capillamenta quasi dirimit, ne pleno gurgite ad partem irruens facultatem ejus, vel in opere turbet, vel penitus obruat. Unde doctissimus *D. Highmor. disquis. Anatom. corp. hum. l. 3. p. 1. c. 6.* *In cæteris partibus corporis humani nullas penè particulas per vasa majora, ubi sanguis præceps fertur, nutrirî videmus: sed ex illis vasis majoribus, alia ducuntur capillaria penè infinita; per quæ sanguis lente serpit, & protruditur, unde particule corporis satis feliciter cognatas sibi attrahunt atomos.* Id quod vel maxime in cerebri vasorum *Algodor* necessarium erat, cum sanguine per arterias alato, non solum cerebrum, nutriendum, sed & spiritus animales ex illo, ad totius salutem, producendi sint.

Quomodo vero cerebrum amplissimum, multique alimenti tum ad sui nutritionem, tum ad spirituum animalium productionem sanguinem, juxta *Cl. Riolanum*, accipiat, jam supra intelleximus; nimirum sanguinem superne deorsum stillare ex arterioliis anfractus intercurrentibus, illum autem sursum vehi per canaliculos, seu

88 EXERCIT. DE LOCO AFF.

arterias duræ matris, ad sanguiductus: inde prolabi ad partes inferiores, defluere per torcular, seu venam magnam ad plexum choroidem in ventriculos: vel ut clarius se explicat *in notis ad Epist. C. Wal.* à reti mirabili numerosam sobolem ramorum arteriosorum, undequaque per duram matrem spargi, qui sanguinem suum deponant in sinum tertium: ab eo sinu depromi innumeros rivulos qui sparsi per exteriores anfractus cerebri, roris instar, destillent sanguinem arteriosum superne deorsum: præterea per torcular, venam magnam *Galenii*, seu sinum quartum (nam hæc *Cl. Riolo* his in locis sunt synonyma, quamvis alibi ab ipso aliisque Anatomicis diversa sint) sanguinem & spiritus ad ventriculos deduci; quæ etiam supra in demonstratione sua meminit.

Roris modo sanguinem ad substantiam cerebri destillare, tum in *Animadv. ad Cl. Baubini Anat.* tum in excusatione *Aristotelis*, illum credere jam dictum est. Verum nulla afficerem injuria *Cl. Riolo*, si ipsi ea regererem, quæ in *Animadv. Cl. Baubini* p. 711. in viro optime de studiosa Juventute merito, usum figuramque sinus tertii, nondum sanguinis circulatione notâ, describente cavillatur; Tot scilicet esse in his *Cl. Riolo*, errores, quot verba.

Primum enim quid absurdius, quam ex accumbentibus cerebro venis & arteriis sanguinem extra vasa constitutum, ad imam ejus substantiam penetrare, ac per totam ipsius molem quoquoersum ferri? Anne sanguis intra anfractus stagnans, ex vasis, forte perforatis & rimosis, pondere suo, perpetua lege ac ordinata serie & distantia ad basin permeabit? An vero eousque pelletur, cum sanguinis pulsus in minutioribus arte-

arterioliſ ad extrema uſque perdurare ſoleat? Nam ubicunq; ſecetur cerebrum, puncta rubra, etiam ad baſin uſque, conſpiciuntur, quorū neceſſum erit, ut ſanguinis roſ pertingat. Verum ſive pondere eò delabatur, ſive pulſu quoquo verſum irruat; non niſi graviffima damna & perpetuò animalis interitus exſpectandus eſſet: ſanguis enim ſuperne deorſum ſtillans, ac extra vaſa in ſubſtantiam cerebri elapſus in vaſa regredi nullatenus poſſet, & continuo novi ſanguinis appulſu per arteriolas anfractus exteriores intercurrentes, ſummopere cumlaretur, unde certiffimam animalis ſuffocationem ac mortem ſuboriri neceſſum foret: Aut ſanguis extra vaſa, in ſubſtantiam cerebri profuſus, quietus, nec motu ventilatus, putreſceret, ac cerebrum accenderet; unde namque inflammatio, quam à ſanguine extravafato, aut intra vaſa immobili? hinc perpetuo delirandum foret: quod delirus credat. Videantur effectus inflammati cerebri apud Sallium Diverſum de Affect. partic. c. i.

Inſuper ipſa puncta rubra argumento ſunt, ſanguinem in ſubſtantiam cerebri effuſum vaſis coerceri, abſciſſa enim cerebri portione, ſanguis ſe expandit, punctumque, quod primum exiguum erat, diffunditur atque amplius redditur. Quin etiam ipſe *Cl. Rioli. Anthropogr. l. 4. c. 2.* rei abſurditatem prævidiſſe videtur, dum, ut jam monui, non ſolum venulas à ſinu tertio profectas, penitiorẽ cerebri ſubſtantiam penetrare agnoſcit, ſed etiam roris modo ſanguinem in ſubſtantiam cerebri ſtillare negat: Sicque erroris reprehensor & author fit.

Deinde quæ de ortu, progreſſu ac diſtributione arteriarum per cerebrum & meninges tradi-

dit; prorsus erronea ac falsa sunt: nam nec arteriæ duræ meningis à reti mirabili *Galen*i in homine, quod nullum in eo existere supra ostendi, nec ab illo reti, cujus apud *Exc. D. Veslingium* mentio fit, oriuntur: nec vel minima arteriarum per anfractus cerebri excurrentium, a sinu tertio proficiscitur, nec sanguis à tertio sinu per torcular, & quartum sinum ad plexum choroidem & ventriculos defluit. Et vereor, ut hic vera sint, quæ *Exc. D. Thom. Bartholin. in defens. Vascor. Lymphat. & Lact. p. 164.* ex doctissimo *Plempio*, ipsi exprobrat: Scilicet *Riolanus* manus operi non admovent, & gloriam inventionis aliis invidens, ut aliquid ipse invenisse videretur, avia rationum secutus, fingere multa mavult, & orbi imponere, quam verum sensu comperire illudque confiteri.

Quamdiu ab authoritate Scriptorum Anatomicorum pependi, dubius, quoad arterias per cerebrum dispersas, hæsi; magisque ambiguum me reddidit multitudo, tum diversa de iis sentientium, tum impossibilitatem venas & arterias discernendi causantium, atque de veritate desperassem, nisi mihi constitisset Circulationem sanguinis æque in cerebro, atque in aliis partibus, necessario locum habere, qua in re me plurimum confirmavit doctissima commentatio *Exc. D. Marq. Slegelii c. 10.* atque ad diligentius scrutinium impulit. Itaque crebrius repetitis sectionibus hanc, quam hic opportune subjiciam, vasorum distributionem, inveni, eamque sufficientem credam, ad monstrandum falsa esse, quæ in citatis locis *Cl. Riolanus* scripsit: si quis mihi fidem adhibendam, præ hoc celeberrimo Anatomico, non autumet, ipse sectionem, sed dili-

gen-

gentem atque meo ordine observato, audeat, & nullus dubitabo eum mihi assensurum. Non quod gloriam inventionis mihi soli vindicem, novi enim horum, quæ propositurus sum, vestigia, apud clarissimos hujus seculi Anatomicos comparere, scilicet apud *Exc. Viros, Veslingium, Thom. Bartholinum, Highmorum, Spigelium*, & forte etiam apud alios; certo tamen asserere ausim, non omnia, neque hoc ordine occursura, cum vasorum per cerebrum distributio minus nota & perspicua, hætenus aliquomodo obscuram sanguinis circulationem in cerebro reddiderit, quod *Cl. D. Slegelius supra c. 1.* haud diffitetur.

In homine igitur ollam, cranio orbiculatim ferrâ dissecto, non secus ac ordinarie in capitis apertione in Theatris Anatomicis hætenus fieri consuevit, aufero: neque enim peculiaris illa, ac operosior *Cl. Riolani* in notis ad *Epist. Walæi* p. 615. vel alia quæcunque demum sit, ad inveniendos ortus & progressus harum arteriarum adeo necessaria est, cum etiam hoc modo à cauto sectore, omnia, quæ desiderabit, reperiri possint. Alia quidem ratione procedendum est in bovino cranio referando, non vasorum culpa, cum æque patula sint cranio ablato, sed propter ipsum cranium crassum & cavernosum, quod scalpro, ad interiorem & duræ meningi proximam laminam usque auferendum est, hinc ipsa lamina

92 EXERCIT. DE LOCO AFF.

mina ferra & vectibus frustillatim, cavendo diligentissimè adhærentis meningis lacerationem, tollenda est.

Remota olla, arterias per duram matrem extrinsecus oberrantes (nam ubi piæ matri contigua est, & intrinsecus, nullæ arteriæ per ipsam dispersæ conspiciuntur, nisi ubi in vertice & circa frontem ac circa laterales sinus illam externæ perforant) contem-
plor. Mox orbiculatim duram meningem, eo modo quo cranium, incido, ac cerebrum in alterutrum latus inclino, atque ut integrum è calvaria eximere possim, ab omnibus vinculis libero, & hac de causa omnia nervorum paria, arterias vertebrales, ubi ex peculiari foramine in occipite emergunt, arterias carotides prope infundibulum, infundibulum ipsum, corpus fal-ciforme prope cristam galli vocatam ἀπὸ φουσιν, processus mammillares, ac denique spinalem medullam in ipso orificio magno calvariæ abscindo & cerebrum undique liberum totum eximo.

Hinc ambas carotidas in collo denudo, ac usque ad processum styloformem persequor, ubi quælibet carotidum internarum, carnalem osseum sub osse petroso intrat, ibique omnia impedimenta removeo, ut totus ille canalis ac arteriæ dictæ progressus
pa-

pateat & in apricum veniat: Canalis imam partem quasi abrado, simulque carotidem internam, tum ejus lateribus, tum ephippio fibris accretam, ut supra jam dixi, ad duram usque meningem, ubi eam perforat, segreco. Vel intus, detracta circa os petrosum dura matre, canalis ossei supremam laminam, quæ hoc loco tenuis est, effringo, ac undique libero carotidem ephippio accumbentem, attractaque in collo carotide ex canali extraho. Tota hac via, à processu scilicet styloformi, usque dum perforarit crassam meningem, integra manet, nullumque, quem equidem hætenus observarim, ramum de se, toto hoc itinere, spargit, nam inflata flatum retinet, si in alterutro extremorum ligetur, nec in extractione saucia facta sit, ac secundum longitudinem, eâ divisâ, si Soli opponatur, foraminula nulla conspiciuntur, qualia alias in Hyperico videntur, sed densa est.

Ab hac igitur carotide interna, juxta latera ephippii & infundibuli, sub dura matre incedente (quæ in homine illud ipsum est, quod in brutis quibusdam animantibus rete mirabile existere solet) nulli rami arteriosi, seu canaliculi exsurgent, qui, juxta Cl. Riolanum, per duram meningem dispergendi essent. Nec ab ea, postquam du-
ram

94 EXERCIT. DE LOCO AFF.

ram matrem transiit vel minimus ramulus illi conceditur, cum intrinsece nulla per ejus superficiem eminula incedat arteria, ut jam supra monui.

Qui autem extrinsecus videntur canaliculi, ut eos appellat Cl. Riolanus, sunt meræ arteriæ, aliunde, & à carotide externâ potius oriundæ: Si enim ab interna ortum ducerent, hoc oculos fugere non posset, insignis enim ramus esse deberet, utpote qui cæterarum per totam duram meningem disperfarum arteriarum origo reputandus foret, cum plurimæ eæque conspicuæ sint arteriæ, quæ per eam forinsecus excurrunt, ut vel ex solis fulcis cranio insculptis judicari potest, qui non nisi arteriarum duræ meningis causa omnino facti sunt. Præterea non semel aquam croco tinctam in carotidem, ante divisionem externam & internam, injeci, ac promte arteriæ duræ matris eâ tinctæ & repletæ fuerunt, nihil crocei fere in carotide interna comparente, nam prope processum styli-formem, canalem osseum subitura, incurvatur.

Verum sollicita inquisitio mihi scrupulum omnem sustulit ac me veram originem arteriarum per meningem crassam disperfarum docuit: quæ neminem quoque latebit, si modo operæ parcere nolit, nec manibus

timeat. Insignes enim arteriæ sunt, utrinque una, quæ cranium subeunt ac ad hanc meningem tendunt. In osse cuneiformi, Veterum πολυμόφρω, in edito colliculo, ubi os hoc, cum osse temporum jungitur, prope sinum recipiendo capiti ossis maxillæ inferioris destinatum, foramen est, quod Cl. D. Bauhino Theatr. Anat. l. 3. c. 7. est tertium in ossis cuneiformis externa facie basique calvariæ occurrens, secundo, per quod nervi tertii & quarti paris egrediuntur, proximum; sed hoc multo minus & orbiculare est, non tamen perfecte rotundum, at potius ovale. Hoc foramen Cl. Bauhinus quidem venæ jugularis internæ gratia, quæ per duram matrem dispergenda esset, factum existimavit: at revera arteriæ sunt, quæ foramina hæc transeunt: nam cum arteriæ carotidis trunco, à quo & vere internæ per canalem osseum ad interiora cerebri abituræ oriuntur, continuæ sunt, ac tum in ipso foramine, tum reliquo progressu, tunica venis densiore & crassiore arterias se esse clare testantur. Rectà autem arteriæ hæc utroque in latere foramina hæc permaneant, ac ad latus ossis petrosi, eo in loco intus emergunt, quem Cl. Thom. Barth. Anat. reform. l. 4. c. 10. Fig. I. lit. M. signavit. Non procul in ingressu & egressu è cranio à carotide inter-

98 EXERCIT. DE LOCO AFF.

na distant, quod forte quospiam fefellit, ut crederent has arterias à reti mirabili oriundas esse: at distinguuntur osseo intervallo, sed vix tertiam unciae partem æquantē crassitie, ut manifestum sit, his duræ matris arteriis nihil commune esse cum arteriis internis, aut reti mirabili Galeni. Postquam autem emerferunt ex foramine utroque, statim dirimuntur utrinque in ramum anteriorem & posteriorem, quæ omnes in plurimos furculos subdividuntur, sursumque verticem versus properant: in progressu autem suo, ubi foraminula in sulcis videntur, etiam cranio ramulos largiuntur: sulci vero, qui in ossibus syncipitis & temporum conspiciuntur, propter has arterias facti, eorum vestigia sunt, cranio, in fœtu adhuc molliore & cereo, pulsui arteriarum cedente, quem non parvum & debilem, sed robustum credo, cum arteriæ hæ rectà à carotidis trunco, nullibi remoratae, sursum scandant; ad quorum productionem etiam facit, quod arteriæ omnes per duram matrem diffusæ ultra ejus superficiem emineant, unde illa cranium spectans etiam inæqualis: intus vero penitus glabra est. Ascendentium vero arteriarum furculi anteriores & posteriores non paucis in locis uniuntur, qui tamen paulo post iterum dividuntur in minutiores. Non procul

cul à futura sagittali & corpore falciformi, vix digiti transversa distantia, plurimis in locis duram matrem perforant, ac cum vasis meningis uniuntur, quem ob finem, paulo post dicendum erit.

Præter has arterias, aliæ duæ utrinque in parte anteriore cranii, ex osse frontis, prope tempora & supra oculorum tabulato superiore emergunt, quæ anteriorem duram matrem irrigant, ac prope corpus falciforme eam perforant, & cum piæ matris vasis quoque miscentur, quin etiam cranio furculos, ibi ubi foraminula in fronte sunt, largiuntur, non pauci coronalem futuram permeare videntur.

Nunc videamus arterias tenuis meningis & cerebri; Exempto igitur cerebro, vertebrales & carotides filo robusto ligo, quo possim illas eò melius levare ac earum divisionem & distributionem accuratius perspicere.

Arterias carotides quod attinet, postquam illæ integræ è canali osseo elapsæ ac ad latera ephippii & glandulæ pituitariæ, mire sinuosæ & incurvæ incedentes duram matrem ibidem perforarunt, aliquousque eâ perforatâ integræ adhuc permanent, prominent enim aliquantulum supra duram meningem, hinc dirimuntur in ramum anteriorem & posteriorem, non vero in ex-

teriolem & interiolem, cum nullus ramus harum arteriarum in capite humano ad exteriora amplius emittatur. Anterior ramus, superato nervo optico, statim ad notabilem & profundum anfractum cerebri ibidem, insignis magnitudinis & ad molem pennæ gallinacæ accedentem arteriam mittit: quæ, ut tum ipsa, tum ab ea profecti rami & furculi accuratius conspici possint, tenuis meninx, quæ anfractuum summitates in tota cerebri superficie colligat & suo modo eam planam reddit, vel digitis, vel cultello divellenda est: Hac enim ratione arteria ista & ejus propagines intra anfractuum & gyrorum hiatus, in eorum profundo, sursum tertium sinum versus pergentes, ut plurimum liberæ, & non nisi per furculos, piæ matri intertexendos, ac ad cerebri substantiam abituros, annexæ egregie conspiciuntur, atque abruptis his furculis, ceu fibris quibusdam attolli & extrahi possunt: & quo minus arteriæ cerebri hæcenus agnitæ fuerint, quidamque non exigui nominis Anatomici scribere ausi sint, venas & arterias cerebri discerni non posse, hujus divulsionis neglectum præcipuam causam dicere haud erubescō; nam si hæc adhibeatur, non solum manifestum discrimen inter arterias majusculas anfractuum & vasa à sinu tertio profecta (quæ
venæ

venæ sunt consistentiâ & usu) invenietur, verum etiam earum continuïtas cum arteria vertebrali & carotide deprehendetur. Ab hac ergo arteria omnibus anfractibus lateralibus (nullus enim anfractuum fere est, in cujus fundo non arteria sursum repat, ut credam, vel potissimum securioris transitus arteriarum causa factos esse) in parte anteriore rami impertiuntur, qui maximam partem per profundum eorum serpunt, quandoque eos scandunt, mox in convallem alterius & vicini descensuri. Dum hac ratione intra anfractus incedunt, tenui meningi (nam hæc non solum anfractuum summitates connectit, sed insuper eorum ima undiquaque succingit & vestit) minutiores furculos largiuntur, qui partim ejus substantiæ intertexuntur quibus alia vasa, ejusdem magnitudinis eodemque modo in minuta quasi filamenta divisa, & è tertio sinu oriunda occurrunt, & jucundo spectaculo conjunguntur, partim piam matrem penetrant, atque cerebri substantiæ se immergunt, quo non raris intervallis, sed plurimis in locis fit, quod aliquoties vidi; & nuper admodum egregie in victoris cujusdam septuagenarii, phthisi demortui cerebro; cum enim cerebrum, alia contemplaturus, triduo servassem, facili negotio tenuem meningem à cerebro segregare po-

tui, ac avellendo illam, observavi filamenta plurima, vasis tenuis meningis continua, cerebri substantiam ingredi, quibus abruptis rimulæ quædam, ac si extremo lancettæ, ut vocant, apice inflictæ fuissent, in superficie cerebri conspicuæ restiterunt.

Quo autem magis sinui tertio appropinquant arteriæ intra anfractus liberius incidentes, eo minutiores ob crebras subdivisiones fiunt, immediate vero ipsas sinum tertium ingredi nondum animadverti, tantum minimorum furculorum ascendentium extrema, minutioribus furculis descendentibus jungi, pluries vidi.

Reliqua pars anterioris rami arteriosi in basi cerebri antrosum magis, cristam galli versus, progreditur: ac ubi cerebrum in duas partes ibi diremptum, dexter ramus sinistro conjungitur: in quibusdam ramos utrosque stylo immisso unitos cognovi, qui tamen paulo post iterum sejunguntur ac contigui solum ad cristam galli pergunt, cui annectuntur, & in bove per illam ramulum ad exteriora transmittunt: Dum ita anteriora versus properant, tum interstitii cerebri, tum frontem spectantibus anfractibus unum alterumque ramum imperitiunt, qui subdivisi omnibus illis anfractibus prospiciunt, ac tenui meningi & cerebro,

bro, ut antea memoratus, ramulos, eadem prorsus ratione, suppeditant.

Rami hi duo dexter & sinister cristæ galli annexi, contrarium iter instituunt ac reflexi ibidem, intra interstitium cerebri posteriora versus, super corpore calloso incedunt; nam revera arteriæ sunt vasa, quæ hic videntur, non venæ, ut quidam putarunt, utpote cum carotide continua, & crassiore tunica, quam capitis internæ venæ prædicta. Tota hac via etiam hæ arteriæ liberæ incedunt, nisi ubi per emissos ramulos vicinis partibus cohærent. Non procul a crista galli dividitur quilibet ramus in sublimiorem & profundiorē, qui omnibus anfractibus, in utroque interstitii latere, quam plurimos ramulos præbent, quidam etiam manifestè hoc loco ad latus cerebri, & in fundo corpus callosum intrant, adeo ut, tracto ramo, ex cerebro notabiles arteriolas evellere potuerim, præter arteriolas illas, quæ è dictis ramulis piæ matri intertexuntur, ac capillamentorum forma ab eo se cerebro immergunt. Quin etiam ad corpus falciforme ramulos utrinque mittunt. Residuum vero harum arteriarum ad finem quartum abit eique inseritur manifeste. Observavi quoque ultra finem quartum extremos ramulos per cerebelli superficiem dispersos fuisse.

Posterior carotidis ramus in utroque latere primum ramum emittit, qui ventriculos in basi cerebri, ubi adaperiti sunt, intrat, & juxta latera plexus choroidei, sub limbo incedit, ac ei non nisi filamenta & capillares arterias subministrat; sub limbo autem in cerebrum, toto illo incessu, furculos dispergit; quod superest sinui quarto & anfractibus circa finum quartum communicatur.

Deinde alius ramus ab illo proficiscitur, ac post crura fornicis incedens, anfractus illos, qui ibidem sunt, ingreditur, varieque per illos, aliarum arteriarum more fertur; quin etiam ramulos ad finum quartum utrinque & ad glandulam pinealem transmittit.

Posterior ramus postquam spatium unciae circiter emensus est, cum vertebrali iterum bifurcato unitur, continuusque ductus, ut stylo immisso cognoscitur, evadit. A posteriore hoc ramo undique, & undique per membranulam telæ aranearum similimam, cerebri eburneam hic medullam vestientem, capillares arteriolæ innumeræ disseminantur, à qua in medullam ibidem & basin thalamorum opticorum ingens numerus filamentorum arteriosorum transit, quod clare videbis, si tenuissimam hanc membranulam, haud illubenter abscedentem,

tem, avellas, tunc enim, abruptis fibris arteriosis, conspicias quam plurimas rimulas ceu cultelli acie inflictas, candissimamque medullæ superficiem mire variegatam, purpureisque sanguinis maculis exornatam. Et hoc arteriarum seminium forte quidam rete mirabile putarunt: quod tamen non magis rete mirabile nuncupandum arbitror, quam piam matrem anfractus cerebri investientem, cui ubique etiam arteriolæ interferuntur, indeque in cerebri substantiam illabuntur. Unde recte Carpus loco supra citato dixisse videtur, Arterias, quæ ad minima in pia matre dividuntur, sufficientes esse, pro subtiliatione spiritus vitalis, qui postea transit subtiliatus per substantiam cerebri & ibidem digeritur.

Arterias vertebrales quod attinet, emergunt illæ ex foramine proximo, magno illo orificio, per quod spinalis medulla descendit. Incedunt illæ ad latera oblongatæ medullæ, quibus plurimos ramulos præbent, qui illa undique amplectuntur, quorum propagines etiam medullam eo loci penetrant, secus ac Cl. Hoffmannus putavit, nam pressâ medullâ non solum puncta sanguinea resultant, & vasorum ramificationes, ut ita loquar, in ea vidi; iis etiam alterius generis ramuli occurrunt, qui su-

perfluum sanguinem imbibunt ac ad laterales sinus deducunt, hætenus falso arteriosi crediti à quibusdam. Ubi fere ad locum illum perveniunt, unde sextum par nervorum exoritur, dexter & sinister ramus uniuntur, unicumque canalem constituunt, unitique manent toto illo tractu medulloso, seu quam longum est hoc medullosum corpus, ex quatuor cruribus & principiis medullæ spinalis compositum: cujus delineatio videatur apud Cl. Vesling. syntag. Anat. c. 14. Fig. 3. quamvis in cæteris, quæ dicta sunt, & adhuc dicenda supersunt, non omnia exprimat, quæ de arteriis his depingenda fuissent. Ab his vertebralibus ramis tum antequam in unum ductum coalescunt, tum postea plures ramulos ad cerebellum mittunt; quorum distributionis & communicationis eadem est ratio, quæ arteriarum in cerebri anfractibus, qui desinunt in imam & posteriorem cerebelli partem.

Paulo antequam canalis iste, ex arteriis vertebralibus unitis genitus, iterum bifurcetur, utrinque insignem ramum ad cerebelli partem anteriorem mittit, qui in alios subdivisus, totam cerebelli faciem anteriorem involvit quasi, ejusque meningem & medullam vivifico succo & spiritibus irrigat. Postquam duarum unciarum fere longitu-

gitudine arteriæ vertebrales unitæ manserunt, iterum in duos ramos dirimuntur: ab utroque ramo, quolibet in latere, ramuli ad sinum quartum jam bifurcatum & plexum choroideum ablegantur. Hinc cuiuslibet ramo, canalis vertebralis iterum divisus, paulo ulterius progressus carotidis posterioris ramus, de quo jam supra mentio facta est, unitur, qui in unum ductum coaliti, omnibus anfractibus posterioribus cerebri ramulos impertiunt, eodem prorsus modo, prout anterior notabilis ramus insignem anfractum subiens, diffundendo se in omnes anteriores anfractus, ac tenui meningi cerebroque ramusculos præbendo, distribui solet.

Etsi ex his haud obscure intelligi possit, cui officio ac usui crassæ meningis sinus destinati sint, atque ex istis ipsis probari queat, sanguinis circulationem in cerebro non magis ambiguam, aut tardiore quam in aliis corporis partibus existere; tamen ut hæc clarius pateant, obiter quædam de sinibus eorumque rivis proponam.

Nemini non Anatomicorum notum est, sinus sanguinis quoque receptacula esse, unde autem & per quas vias ad illos perveniat, est de quo ambigitur. Postquam circularis sanguinis motus innotuit, per jugulares venas, ne guttulam quidem sanguinis in illos effundi creditum est, & quidem non sine ratione, cum valvulæ in iis existentes, ligatura, cæteræque rationes, quæ sanguinem per venas ad cor, per arterias à corde propelli probant, id suadeant, nec hoc *Cl.*

Riolanus alibi abnuit. Per canaliculos arteriosos crassæ meningis sanguinem copiosum ad tertium sinum, seu longitudinalem deferri, haud negandum est, nam dum hi corpus falciforme versus ascendunt, prius quam ipsi appropinquent, ab ima fronte ad verticem plurimis in locis illam perforant sinumque versus tendunt, quidam etiam ejus ramuli circa futuram sagittalem immediate per falciforme corpus diffunduntur. An verò immediate vel mediantibus furculis à sinu oriundis, ut creditur vulgo, sanguinem suum in tertium sinum effundant, dicere difficile est, adeo enim vasa sanguifera intricata & sinui propiora implicata sunt, ut ægre discerni queant, remque obscuriorem reddit, quod vasa sinum ingressura intuituro, ramuli duram matrem perforantes abscindendi sint, unde forsan *Fallopiz* negavit ulla arterias ad sinus pertingere. Verum parum interest, mediatene an immediate in sinum tertium effundatur, modo constet canaliculos se in eum exonerare, quod manifeste comperi, liquore croceo per carotidem injecto, qui prompte per canaliculos hos ad corpus usque falciforme ferebatur, ac discisso sinu in ejus cavo, à me repertus fuit. Non autem omnis sanguis, qui per hos canales duræ meningis fluit, sinui tertio illabitur, non enim minima ejus pars per futuras & cranio insculpta foraminula cranium subit, & non paucis in locis transit, ut quoque accuratissimi Anatomici observarunt. Cum nuper cranium aperturus, pericranium abrasissem, ex foraminulo ovali sanguinis aliquot uncix emanarunt, qui dubio procul non nisi in his canaliculis continebatur. Et forte diuturni capitis dolores, qui in iis, quibus futuræ & pori cranii oblitterati sunt, alias vaporibus adscribuntur,

re-

rectius sanguinis commeatui intercepto deferentur.

Non tamen omnis sanguis, qui intra sinum hunc reconditur, per canaliculos duræ matris irrui. Jam enim indigitatum est, canales hos nec à reti mirabili, quod nullum est in homine, nec à carotide interna, sive ante perforationem duræ matris, sive ea jam ab illa perforata oriri, nec à vertebralibus arteriis illos proficisci, sed aliunde à carotide ejusque propaginibus ortum ducere: quod quam verum sit, nolo argumentorum acervo id demonstrare: qui hac in rehæsitat, industria sectione periculum faciat.

Cum itaque carotides internæ & vertebrales arteriæ integræ duram matrem penetrent, eæque amplæ sint, multique sanguinis capaces, haud immerito quærendum esset, quorsum sanguinem copiosissimum veherent? si non ad sinus, imprimis tertium perferrent? nam ab utriusque generis arteriis non nisi paucus, respectu totius molis, ad quartum sinum, nihil ad laterales transmittitur. An in arteriis his, ceu in lacu stagnabit? Anne tantum vicinas medullofas partes reficiet? quorsum inclinare videtur *Cl. Riolanus*, qui in medullam spinalem superiorem à reti mirabili arterias derivari, *in not. ad Ep. Wal. l. cit.* scribit. An vero intra cavitatem ventriculorum omnis excernetur? Quæ omnia affirmare, vel unum ex his, cum absurdissimum foret, necessario sanguis ulterius perget nec intra has angustias perstabit. Cum enim sanguinis motus per arterias, quamdiu animal vivum est & viæ expeditæ sunt, perpetuus sit, & quo ampliores eo plus sanguinis per eas traducatur, non nisi copiosus in cavum capitis invehetur, sique nullus ad cor redeundi locus sit, brevi ingenti quantitate.

110 EXERCIT. DE LOCO AFF.

tate cumulabitur, qui gravissimorum malorum author erit. Nullibi enim nisi per jugulares venas sanguis à nutritione & spirituum animalium nutritione superfluous, ad cor ex carotidibus & vertebralibus reduci potest, cum nullæ aliæ venæ intus reperiantur. Unde haud inconcinne *Exc. D. Slegelius Comment. de sanguinis motu c. 10.* scripsit, & si omnium vasorum in cerebro ductus & conjunctiões nondum evidentes sint & res ulteriore & accurata inquisitione indigeat: neque enim quæ ipse, quæve *Cl. Riolanus* observavit, pro absolutis habenda; nihilominus non tam ingentem hinc oriri difficultatem, neque si omnia non satis innotescant, propterea de sanguinis refluxu ex capite dubitandum esse. Et paulo post hujus rei rationem reddit, referendo. Certum esse, in tertio sinu duræ meningis quam plurima esse foramina vasorum quorundam, quæ in eum inserantur: certum item esse, sanguinem in illum ingredi & egredi: oportere igitur vasa esse, quæ inferant sanguinem, & alia quæ efferant: atque inferentia cum arteriis, efferentia cum venis communicare: Concludit tandem, sanguinem in sinus ingredi extra dubium ponendum esse, sive immediate per arterias, sive mediantibus venis id fiat; cujus cum exitum noscamus, non se videre, quare necesse sit, rem adeo difficilem sibi imaginari. Ex quibus omnibus patet, non solum per canaliculos duræ matris sanguinem ad sinum tertium, sed & aliunde ex arteriis vertebralibus & carotidibus necessario derivandum fore, utcunque viæ ignotæ essent; nam hoc in loco *Cl. D. Slegelium* non de canaliculis duræ matris loqui, nullus dubito, cum accuratissimus Anatomicus fuerit, quem canaliculorum insertio prope sinum tertium nullatenus, utpote manifestissima, latere potuit, neque

que per experimentum supra dictum, sanguinem suum in ipsum fundere, ignoravit: sed de vertebralibus & carotidibus, quarum progressus obscurior hætenus, ob rationes, ut arbitror, supra allatas, fuit.

Verum si forte refractarius quispiam superfit, qui rationibus dictis acquiescere nolit, jam nobis tela parata erunt, quibus pertinaciter præconceptæ opinioni adhærentem expugnare poterimus: Nempe inventa vera arteriarum carotidum & vertebraliū distributione, quicquid de circulationis sanguineæ ambiguitate & tarditate in cerebro, de ventriculorum nobili officio, de retis mirabilis existentia in homine, ac denique de arteriolarum à tertio sinu per anfractus descensu ineptissime hætenus fictum, & false commentatum fuit, ceu inane somnium evanescet, suæque sponte corruet. Nam si ea lege, ut supra indicavi, sectio administretur, eademque in inquirendo methodus observetur, oculis usurpare manifeste licebit, arteriarum carotidum & vertebraliū ramos intra anfractus magno numero & decenti ordine sursum ferri, ac sinus tertii descendentiū rivorum propagines illis occurrere, horumque radículas cum illorum ramusculis amice jungi, idque non alium ob finem, quam ut descendentes rivuli redundantem a nutritione cerebri & spirituum animalium generatione sanguinem exsorbeant, atque ad sinum tertium perferant, unde, ceu per planam patulamque viam sanguis ad sinus laterales atque annexas jugulares venas prompte ad cor ruere potest, ubi novis viribus instructus, denuo quoquoeversum, brevi rediturus, propellitur, eadem prorsus necessitatis vi coactus, qua sanguis ad sui conservationem perpetuo motu indiget.

Hanc

Hanc arteriarum & venarum distributionem suo modo etiam *Galenus* agnovit: nam *l. 9. de Usu part. c. 4.* postquam egregie de retis mirabilis structura in brutis, bobus potissimum (horum enim *lib. 9. Administr. Anat. c. 1.* sumenda & aperienda capita suadet, nempe quæ in magnis civitatibus semper obvia sint & comparatu facilia) conspicuâ & usu differuisset, subjicit: *Ὁλον ἐγκεφάλου ὑπὸ τέτων καὶ ἀρτηριῶν διαπλέκεται*, πολυειδῶς σχισθεῖσων, καὶ πολλαὶ τῶ ἀποσχιδῶν εἰς τὰς κοιλίας αὐτῆς τελευτῶσιν, ὥσπερ ἐν καὶ τῇ ἐν τῇ κορυφῇ κατισταῖν φλεβῶν. ἐξ ἐναντίων μὲν γὰρ τόπων ἐμβάλλουσι ταῖς ἀρτηρίαις, εἰς ἅπαντα δὲ ὡς αὐτὰς αὐτῆς τὰ μέρη διανέμονται, τὰ γε ἄλλα, καὶ κατ' αὐτὰς τὰς κοιλίας &c. Totum cerebrum etiam ab his arteriis multifariam divisum, intertextum est, & multæ divisionum, scilicet arteriarum, in ejus ventriculos desinunt, sicuti & venarum ex vertice descendendum: Ex oppositis enim locis occurrunt arteriis; in omnes autem ipsius scil. cerebri, partes similiter distribuuntur, atque adeo in ipsos etiam ventriculos. Et *cap. toto seq. 5. l. c. de Us. part.* totus est occupatus in admiranda prædicandaque τῆς Δημιουργῆς providentia & industria, quod, cum in toto reliquo corpore arteriæ & venæ, unctæ & focia incedant, in cerebro non solum in diversis locis, verum μᾶλλον δὲ ἐναντίων πάντῃ potius omnino contrariis incedentes ordinantur. Atque ex his evidenter apparet *Galenum* manifestum inter arteriarum & venarum progressum in cerebro discrimen facere, has descendere, illas ascendere, atque ex oppositis locis sibi invicem occurrere. Hanc *Galenus* vasorum horum ἐναντίου seu occursum *Exc. D. Rolfink. dissert. Anatom. l. 5. c. 37.* eleganter explicat, scilicet procedere sibi invicem obviam, more illorum, qui in platea

montosa sibi occurrunt, & ascendentes descendentibus veniunt obviam. Venosi rivi à vertice descendunt, arteriæ carotides ascendunt, inque mutuo illo occurſu præſtant ſibi invicem officia, quæ alias in toto corpore faciunt per ἀνατομώσεις omnibus notas.

Alieniſſima igitur à Galeni mente eſt Cl. Riolani ſententia, ſeu opinio, qua non uno in loco ſtatueret audent, arteriolas intra anfractus excurrentes à ſinubus, imprimis longitudinali deſcendere. Memorat equidem Galenus & quidem aliquoties, vaſa è ſinubus deſcendere, verum nullo modo arteriæ ſunt, ſed potius venas eſſe patebit.

Nam de *Adminiſtr. Anat.* l. 9. c. 1. ſinus craſſæ meningis venas vocat, ubi de tertio ſinu loquens, τὸ γὰρ ἂν ἄλλο τις ἢ φλέβα καλέσει τὸ τοιοῦτον ἀγγεῖον, ἐν ᾧ φαίνεται περιεχόμενον αἷμα. Quid enim aliud, quam venam appellaveris tale vaſ, in quo contentus apparet ſanguis? quod mox illuſtrat, nam in vivo ſanguis, in demortuo animali grumus reperitur: alibi ut in *ſeq. cap.* & *lib. 9. c. 4.* & *6. de Uſ. part.* eos cerebro nutrimentum largiri putat, eo ſcilicet modo, quo partibus alimentum non niſi per venas, S. C. ignarus advehi credidit: Eſſi enim tunicam venarum non habere ſinus fateatur, & cum jugulares venæ laterales ſinus attigerint, ſubſiſtant, craſſaque meninx tantummodo duplicetur, internaſque ejus pars fiſtulæ inodo, ad ſanguinem recipiendum, ſinuetur, nec internam ſuperficiem præ tenui & aranearum ſimili membrana, ut Nic. Maſſa putavit, veſtiant, neque earum tunicæ intra ſinus ſe recondant, ut præclare Cl. D. Rolſink. diſſert. *Anatom.* l. 5. c. 35. Galenum vindicat, dum receptionem circa applicationem, non circa progreſ-

sum intelligendam esse, & venas eos non ingredi, sed ad illos terminari docet; Nihilominus sinus venarum nomine spoliandos non censuit, cum quod alibi venæ præstant, idem hic sinus præstent. Nec necessum fuit, ut venæ totam internam ejus superficiem succingerent, non enim venarum officium est sanguificare (quod superiori seculo ipsis magno conatu quidam, etiam docti Viri, tribuerunt) aut aliud beneficium in sanguinem locare, quam illum, ne, ceu corpus humidum, diffuat, coercere, atque canalis solum, sanguinis ad cor refluvi vicem gerere. Præterea licet quoad tunicam sinus non dicat venas existere, iis tamen similes esse ait, sub finem c. 1. l. cit. ubi jubet Torcular dissectare, a grumis mundare ac ejus superficiem internam intueri, ὅπως ὁμοιοτάτη τῇ γε τῆς οὐσίας ἰδέαι ταῖς φλέβιν εἰσὶν, εἰ καὶ μὴ τῇ λεπτύτητι: *quomodo similima speciei substantiæ venarum sint, etsi non tenuitate.*

Ab his igitur finibus, venis similimis, veluti ab arce quadam, omnibus subjectis partibus ὀχετοὺς seu rivos, quorum numerum nemo dixerit, l. 9. de Ufu part. c. 6. mitti nonnullos etiam ad cerebellum derivari scribit. Et lib. 9. Administr. Anatom. c. 2. ὀχετοὺς, id est, rivos & ductus istos φλέβας vocat: dum ab utraque parte τῶν λωῶν (λωῆ autem nomen apud Galenum, nunc torcular proprie dictum, nunc finum tertium quandoque quartum quoque significat, ut jam plures observarunt) φλέβας seu venas orientes spectari, nonnullas quidem admodum tenues, quasdam verò ampliores, dicit: Ibidemque refert, ex tertio sinu venas frequentes omnino per totam longitudinem, in utramque cerebri partem sinistram & dextram, distribui, ac detracta dura matre, omnes

omnes venarum processus, in tres totius cerebri partes, disseminatos videri; nonnullas quidem venas tam superficiarias esse, ut ipsarum rami in conspectum prodeant, quidam vero altius penetrent, quos colliget tenuis meninx: Similia alibi occurrunt.

Et si vero sint, qui *ὀφθαλμικοὶ* rivos & ductus istos improprie venas appellari opinentur, cum à crassa meninge oriantur; non tamen hoc sufficere puto, ut ipsis venarum nomen denegandum sit, cum officii & tunicæ ratione, quæ simplex & tenuissima est, hoc mereantur: imo si rem ipsam confiteri velimus, nihil minus quam à crassa meninge ortum ducunt, earum enim exordium procul dubio erit ipsis commune cum omnibus venis totius corporis, quæ incipiunt, ubi arteriarum extrema desinunt, nam in primordio formationis ea primum parantur, quæ primum usui alicui inserviunt, reliqua prout magis vel minus necessaria sunt, tardius aut citius succrescunt: Et si hi ductus venarum nomine privandi, eadem fors manebit venas minutiores Epatis, Lienis, renum, mesenterii, imo universarum capillarium, & si quæ majores sint in toto corpore. Non equidem ignoro disceptationes, quæ aguntur inter *Galenicos* & *Peripateticos* de venarum origine, ubi prima creditur illa esse, unde venæ amplitudine maximæ emergunt: mihi vero origo venarum hoc in loco est, ubi primum delineari incipiunt.

Evidenter rivos istos, seu venas sinuum hoc anno d. 19. Jan. in *Jacobo Knoll*. adolescente 7. annorum mihi videre contigit. Laboravit ille à puero calculo vesicæ, à cujus cruciatibus, accedente renum supuratione, macie confectus, viribusque penitus exhaustus, è vita excessit. Cum juxta alia inum

ventrem scrutando, ac duplicis vesicæ speciem contemplando (cujus historiam suo tempore, Deo volente, plenius tradam) venam cavam dissecuisssem, corpora alba, pituitosa, seu fibrosa, cavitatem earum fere implentia reperi, qualia in diu decubuis, & à morbis Chronicis sublatis sæpius vidi; statim cogitavi talia quoque sinus cerebri occupatura, cum quod uni majorum vasorum obtingat, alterum ab eo raro immune existat: ac ut ardentius in illa inquirerem, me monuit *Cl. Nymanus de apoplexia*, quem tunc præ manibus habebam. Aperui itaque sinum tertium, in alterutro laterum, occurrit corpus, sive pituitosum, sive fibrosum, certe non adiposum (prout quidam hæc corpora nominare solent) candidum, lentum, tenax, crassitie fere digiti minoris, circa torcular maxime, & tantum non totam cavitatem implens. In cavitate hac tenacius erat, quam in vena cava descendente, ubi levissime attractum rumpebatur, fecus ac alias de his pituitosis corporibus observavi. Sinus solito ampliores, tum propter hæc corpora, tum ut remeanti ad sinus sanguini spatium superesset. Hoc corpus prope torcular, ubi crassissimum erat, dividebatur in tres ramos in sinus laterales & quartum desinentes: qui in sinus laterales descendebant longi erant, & aliquotque jugulares venas penetrantes, procul dubio profundius protensi, nam facile abruptos fuisse cognoscere potui, utpote in extremitate densos adhuc & inæquales; qui sinui quarto immergebatur, extractus bifurcatus erat, prout ante glandulam pinealem iste sinus dividisolet. Quin etiam per foramina sinus tertii, quotquot sunt quoquo versus ramos hoc corpus

pus spargebat: foraminum enim plurima sunt in parietibus & fundo sinus imprimis, quem propterea haud inepte cribriformem dixeris *Gal. de Us. part. l. 9. c. 6.* ὅσας πᾶσι πόδας foramina admodum multa dicit; pleraque oblonga sunt ac instar rimularum hiantia. Intrarunt autem ex foraminibus istis innumeros ductus, seu venas, sanguinem ad sinum deferentes, ac venis hisce inclusi furculi fibrosi & lenti ad tempora & os petrosum usque exporrigebantur, & non solum per venas piæ matris superficiem perreptantes, sed & per eas, quæ intra anfractus incedunt, ac cerebri substantiam subeunt, meare videbam, ac pro numero venarum earumque ramusculorum, hæc corpora eorumque rami numerosi dirimebantur. Commoto enim & attracto leviuscule corpore pituitoso in sinu tertio, omnes ejus appendices, longe lateque intra rivos seu venas sinus istius conclusæ, movebantur, vermiculorum instar attactu irritatorum. Cum itaque rivi ductusque sanguinis seu venæ sanguinem ex arteriis carotidibus & vertebralibus receptantes, ac ad tertium sinum vehentes, ampliores & latiores, propter corpora pituitosa præter naturam ipsis inclusa & spatium sanguini remeanti necessarium essent, manifestissimum simul ac evidentissimum discrimen, inter eas & dictarum articularum ramos observare valui: mutuum quoque complexum ac unionem utrorumque vasorum capillarium pulchre conspexi. Arteriosi rami sursum intra anfractus scandentes, crassiore tunica præditi erant, ut plurimum liberi & nonnisi per emissos furculos annexi, ut levi opera eos avelere, & spithamæ & majore longitudine extrahere potuerim: quo magis alta petebant, eo magis ob crebras divisiones & subdivisiones gracile-

118 EXERCIT. DE LOCO AFF.

ſcebant. Venofi è contra, circa inſertionem, ad parietes & fundum tertii ſinus, ob prædictas cauſas valde ampli erant, ſed tenuiore multum tunica, præ arterioſis, præditi; ut plurimum intertexebantur, maxime paululum à ſinu progreſſi, piæ matri, quosdam etiã cerebri ſubſtantiam ſubintrare vidi; quo magis ad inferiora vergebant, eo graciliores & minutiores evadebant. Poſtquam hæc abunde contemplatus eſſem, totum corpus pituitoſum ex ſinu tertio extraxi, cui haud ægre omnes ejus appendices ſuccedebant, numero, magnitudini & fere longitudini vaſorum reſpondentes, adeo ut plurimæ ſpithamæ longitudinem ſuperaverint, præterea in ramuſculos & filamenta ad numerum prope vaſorum diſiſibiles eſſent. Similia corpora pituitoſa in utraque carotide interna, prope infundibulum, notabilis magnitudinis, aliquousque ſurſum ſcandentia inveni, non tamen tantæ longitudinis atque erant in venis tertii ſinus, quod, ceu fracidiora minusque tenacia, forte abrumperentur.

Eadem *Doctiſſimi Viri Fr. Sylvius & Fr. van der Schagen* / referente *Cl. D. Walæo Epist. I. ad Exc. D. Thom. Bartholinum de motu chyli & ſang.* in arteriis carotidibus & cervicalibus invenerunt, ac iis retractis motum aliquem uſque ad tertium ſinum oſtendiſſe obſervarunt; inde concluſit, juxta alias rationes, ſanguinem ex his arteriis ad tertium ſinum deferri. Sed forre attractionis motus ſua veſtigia in tertio ſinu prodidit, quod cum iis, quæ in venis continebantur filamentis connexa eſſent, aut quod ſimul venæ commotæ eſſent: ſi enim id vehementius fiat, eouſque motus perſtingere poteſt.

Adoleſcens autem hic nihil unquam Apople-

ctici

Etici passus est, at sæpius convellebatur: sed plura suo loco de observatis in illo.

Atque hæc de vasorum sanguiferorum intra cranium distributione dicta veritatis avido sufficere possent; verum quia *Cl. Riolan.* in Respons. ad II. argumentum *Cl. Hoffmanni* insuper addidit ex sanguiductu seu tertio sinu, per torcular sive venam magnam, quæ sinus quartus est (nam hæc ille hoc loco confundere & pro synonymis habere videtur) sanguinem in plexum choroideum & ventriculos prolabi; quæ paucis etiam, antequam hoc responsum deferam, examinanda sunt.

Et si considerato creberrimo arteriarum & venarum complexu, per universam fere tenuem meningem occurrente, venarumque progressu & insertione in tertium sinum, sinusque hujus & lateralium connexionem cum venis jugularibus, quilibet, cui circulatio sanguinis nota est, facile intelligere possit, quorsum hæc fiant; nimirum è sinu tertio, per laterales, sanguinem ad cor postliminio redire, nihil vero per sinum quartum, seu venam magnam *Galen*i ad plexum choroideum & ventriculos deferri, imo potius ejus sanguinem, se descendentem è tertio sinu associare, ac itineris comitem ad cor usque fieri. Tamen ne gratis hæc asserere videar, quædam de sinu quarto, opus supererogationis futura, ut loquuntur, adhuc adjiciam. Primum sinus quartus vena est, ut ipse *Galenus de Us. part. l. 9. c. 7. & Administr. Anatom. l. 9. c. 3.* fatetur, quam quoque *μεγάλη φλέβα* vocat; quod etiam *αὐτοψία* confirmat, nam nulla arteria hujus magnitudinis ullibi in toto corpore tam tenui tunica, qualem sinus quartus habet, prædita est; salvis au-

tem ac firmis C. S. legibus , nihil per venas , maxime majores , ad partem aliquam fluit , sed quicquid sanguinis continent , omnes per eas , dum vivum & vegetum animal est , ad cor refluxit. Deinde nullum sanguinem è tertio in quartum sinum delabi me persuasit , quod injecto liquore in tertium sua sede locatum per siphonem , nihil ad quartum pervenerit , sed ad laterales festinavit. Præterea in sinum hunc tum à carotidis anterioris , apud cristam galli reflexæ & super corpore calloso incedentis , arteriis ramos inferi supra dictum est , qui cum sanguinem vehementius & concitatus commotum in illum effundant , sanguinem ex tertio sinu delabentem , ceu in motu suo ignaviolem ac jam ex longo itinere emenso fessum , repellent , & descensum ejus impediunt , ac ab ingressu ulteriore arcebunt. Denique nullum commodum prævidere possum , si concederetur sanguinem è tertio in quartum sinum delabi , imo potius gravissima damna auguror ; sanguis enim perpetuo movetur & per ampla orificia copiosus illabitur , quale etiam finui quarto datum , ubi torculari , seu sinuum quadrivio conterminus est. Si itaque per eum ad ima & plexum choroideum & ventriculos fluat , non nisi magna copia & continuo perpetuoque motu irrumpet , ac dum singula multa juvant , de multis grandis acervus erit , imprimis cum nullus sanguini per has vias perpetuo defluenti , nec omni in his locis consumendo , reditus ad cor pateat ; nulla enim in basi vena est , ad quam redundans transmitti possit. Nec est ut quis existimet sinum quartum atque ab illo pendentes ramulos , plus sanguinis admissuros , quam cavitas eorum capere possit , cum enim membranæ sint , ac proinde dilatentur facile , novo perpe-

petuoque appulso vel rumpentur, vel in vastissimam molem distendentur : Et quid inde quam pernicies citissima resultabit ? Quod si dicatur superfluum ac inutilem, in plexu choroideo cæterisque ramulis sinus quarti, à ductibus seu rivis tertii sinus denuo imbibi, ac ad tertium sinum deduci, quid hoc esset quam ridiculum & ineptissimum sanguinis circulum de tertio sinu in tertium comminisci ?

Inde etiam manifestissimum evadit, quam probabile sit in plexu choroide, qui per omnes cavitates cerebri, usque ad basin diffunditur, assignare sedem & officinam spirituum animalium, si enim non per sinum quartum sanguis ad ima pergit, sed potius ab imis sursum ad torcular scandit, potius plexus iste suum superfluum sanguinem in sinum effundet ; quam quicquam ab eo accipiet.

Et quis præterea spirituum animalium opifex esset in corpore, ex minutissimis venulis & arteriis, tenuissima membrana & exiguis glandulis composito ? unde suppeteret sufficiens materia spiritus animalis, tot tantisque nervis & cerebro communicandi ? Nam non omnis sinus quarti sanguis ad hunc plexum spectat. Qua via spiritus animalis in nervos, nullo modo ipsi continuos, distribuetur ? Aut quibus sedibus recenter productus includetur ubi necessarium, huc illucve depromendus ? Rectius & sine ulla absurditatis culpa me sensurum confido, si dixerò, ab exiguis, quibus quam plurimis plexus iste conspersus est. glandulis, serosum humorem ex arteriis & venulis emulgeri, quo cavum ventriculorum, non citra prudentis naturæ consilium, blande humectetur : ubicunque enim glandulæ sunt in corpore nostro, ibi serum

secernitur : quod ut magis crederem , me persuaserunt hydatides , quas sæpius in hoc plexu inveni. Et vix commodiori via ac ratione ad ventriculos serosa excrementa , quæ ibi colligi suo loco dicendum erit , pervenire posse existimo. Audentius autem hæc omnia assererem , si , quæ vasorum lymphaticorum in cerebro conditio esset , nossem : nam cerebrum quoque his abundare , nullus dubito.

Ultimo responsionis suæ paragrapho *Cl. Riolanus* ferire conatur *Cl. Hoffmannum* , qui solus aliqua ex parte ipsi adversus est. Hæsitavit enim potissimum in illo , qui spiritus animales nempe , in ventriculorum æquor effusi , in nervos redire possint ? Nodum se solvisse putat *Cl. Riolanus* , si ex *Cl. Hoffmanno* quærat , qua ratione spiritus animales ex vitalibus producti in cerebri substantiam diffundantur , indeque in nervos refluant ? Verum si quis ex *Cl. Riolo* quæreret , qua ratione spiritus animales per omnes nervos dicto citius distribuerentur ? res foret expedita. Certum enim est aliquid è cerebro per nervos in momento dispergi , sive jam spiritus sit , sive radius quidam , solaribus aliquo modo affinis : Cui , si per nervos cerebro densiores , transitus conceditur , quidni & per cerebrum ? Et quid illud per cerebrum diffundi impediat , cum nihil in nervis sanis id remoretur ? Si igitur per cerebri substantiam diffundi nihil obstat , quidni è cerebri substantia , ad nervos universumque corpus propagari possent ? Cum nervi ex cerebro continuentur , imo idem cum illis corpus sint. Tacebo nunc , aliam longe vivi cerebri conditionem esse ac demortui , & ejus porositatem ac raritatem , vel ex sola ζημώσις , seu ebullitione , quæ in vulneribus cerebri observatur , agnosci posse. Quid autem
tem

tem spiritus propellat & quomodo, hujus loci non est.

III. Argumentum *Cl. Hoffmannus* ita proponit: Sed nihil sit hoc. Ventriculi interius cinguntur pia matre, quæ negat & egressum & regressum. Libr. 2. Instit. Med. cap. 64. piam matrem exitum & introitum prohibere scribit.

Cl. Riolanus Cl. Hoffmannum ingressum & regressum negare scribentem allegat, atque ita fortassis sensum obscuriorem reddit. Quibus autem spiritibus pia mater in ventriculis egressum, seu exitum & regressum deneget, *Cl. Hoffmannus* in neutro horum locorum expresse addidit. Quantum percipere ex antecedentibus & consequentibus possum, existimavit *Cl. D. Hoffmannus* spiritus animales in ventriculis collectos; egressu & exitu in nervos & regressu in substantiam cerebri prohiberi: utcunque enim hæc membrana tenuis sit, apta tamen & valida satis est, ad effluxum & influxum impediendum, aliàs enim spiritus intra cerebrum & medullam inclusi & solum hac membrana coerciti, facile exhalare possent: neque quisquam poros aut foraminula, per quæ aditus vel exitus pateret, in iis observavit.

Cl. vero Riolan. videtur putasse spiritibus vitalibus egressum, seu, ut ille scribit, ingressum & regressum in ventriculos ob piam matrem, qua succincti sunt, negari à *D. Hoffmanno*, atque propterea sequentia pro solutione hujus argumenti attulit.

Si ventriculi habent pro velamine tenuem meningem, eò securior est traductio

in ventriculos anteriores, sine ulla jactura. Jam demonstravi ingressum in basi cerebri, viam in quartum ventriculum; non est opus regressu, sanguis enim arteriosus, qui sursum ascendit per duram meningem, destillans in cerebrum, quoquo verum simul suppeditat spiritus toti cerebro, neque sanguis potest penetrare sine spiritibus.

Quanti *Cl. Hoffmannus* suum hoc argumentum faciat, vel ex ejus exordio innotescit; utcunque autem minimam sententiæ suæ partem in illo fundet, non tamen omnium virium expers est, & vel per ipsum *Cl. Riol.* illi suum robur adhuc maneret. Nam supra jam dictum est, spiritus vitales, per arterias in basi hiantes ventriculos ingredientibus, non inservire ventriculis, ut spiritus animales ibi ex illis generentur, sed aliorum pergere, nimirum, vel substantiam cerebri ingredi, vel in plexum choroideum effundi, vel in sinum quartum exonerari. Neque securior est traductio spirituum animalium, & sine ulla jactura, si omnino concederetur spiritus animales in ventriculis generari, cum per infundibulum & per hiatus ventriculorum in basi elabi possent, ut suo loco amplius dicendum est; Atque si omnino tuta & secura esset traductio & via expedita ad quartum ventriculum, nondum tamen constaret spiritus animales nervos subituros, idque propter piam matrem, etiam illum ventriculum vestientem. Et hoc ipsum est, quod *Cl. Hoffmannus* sibi hoc argumento hinc vult: quod *Cl. Riolanus* intactum relinquit, atque ita suis viribus integrum perstat & perstabat argumentum, donec probaverit spiritus animales piam matrem per-

perrumpere ac medulloſam ſubſtantiam ingredi poſſe, etiam nullis poris apparentibus.

Imo ipſe *Cl. Riolanus* hoc in loco innuere videtur, ſpiritus animales piam meningem permeare non poſſe, dum non opus eſſe ſpiritibus regreſſu è ventriculis in cerebrum dicit, ſimulque vel invitus (tanta enim vis veritatis eſt!) confitetur, ſpiritus animales in ſubſtantia cerebri generari, per illam diffundi, ac ex illa in nervos diſtribui, quamvis in paulo prægreſſa demonſtratione veram ſpirituum animalium officinam ventriculos aſſeruerit: quamvis etiam dubius ex *Cl. Hoffmanno*, diffuſionis & diſtributionis rationem per cerebrum & in nervos quæſierit, atque hoc iniquo poſtulado, vel præcipuè ſecundum argumentum annihilare conatus ſit. Ipſe enim de ſpirituum animalium materia ſollicitus: eam ſuperne deorſum ſtillare (licet falſo, cum ab arteriis baſin ſubeuntibus & intra anfractus incedentibus præbeatur) ſtatuit: atque dum non opus eſſe dicit, ut per piam matrem è ventriculis cerebri in ſubſtantiam regrediantur, concedit ſpiritus animales in cerebro produci, per eam diffundi ac ad nervos opticos à thalamis, inde opticis denominatis, oriundos & proceſſus mammillares alioſque nervos, à cerebro proſectos, diſtribui: neque enim his nervis ulla connexio cum quarto ventriculo, & ut loquitur *Riolanus*, ſpirituum cifterna eſt. Videt igitur meliora probatque, ſed præjudicio fascinatus deteriora ſequitur.

IV. *Cl. Hoffmanni* argumentum eſt: Superiores duo ventriculi, cum pateant in ſubjectum tertium, & hic in Infundibulum, quod aperitur in os ſphenoides, & confe-

quen-

quenter in palatum, quis spondebit spiritus hac, scilicet via, non exituros?

Hoc argumentum, quamvis hac ratione fultum & propter spirituum annihilationem efficax satis sit, ad evertendam fucatam ventriculorum nobilitatem, non tamen eam solum hac de causa destruit. Præcipua ejus *ἐνέργεια* sita est in eo, quod iis omnibus perpensis patefit, cuncta, quæ hic de ventriculis proposita sunt, ad excernendas ex iis redundantes cerebri humiditates comparata esse.

Cum vero hæc in examine sexti argumenti maximam partem tractanda sint, videamus nunc, quid sic constitutis rebus *Cl. Riolo*. regerat.

Periculum istud facile vitabit continuo fluxu & pulsu spirituum ad cisternam (seu quartum ventriculum) atque istud foramen adeo exiguum est, & profundum usque ad os sphænoïdes, ut digiti longitudinem æquare possit. Tu, Hoffmannè, qui credis sanguinem à dextro cordis sinu traduci per pulmones, ut redeat in sinistrum, non metuis in exspirando spirituum jacturam?

Sed vereor hanc spirituum animalium jacturam & imminens ab ea periculum, *Cl. Riolo*, tam inanibus & languidis subsidiis propugnatore, non evitari, sed potius auctum iri. Quid enim spiritibus animalibus fluxum, ex anterioribus ventriculis ad tertium, & oblique per canalem longum & angustum ad quartum ventriculum conciliabit? Spiritus enim leve corpus sunt & sua spon-

sponte, non deorsum instar aquæ, aut alterius gravioris corporis, fluent, supernaque semper affectabunt. At pelluntur: Sed quid eos sursum, deorsum, & in obliquum aget? Anne motus cerebri? quem duplicem agnoscit; unum ad Lunæ φάσγος cum Fallopio, alterum quem arteriæ efficiunt, ac soli duræ matri ab illo tribuitur, & in fracturis cranii vidit, qui rupta crassa meninge cessavit, cerebro immobili evadente. Horum autem motuum nullus pulforis officio fungi poterit; ille enim tardior est & fere menstruus, si totam περίοδον spectes; hic extra cerebrum in membrana, manifesta intercapedine ab eo distinctus, cujus effectus non ad profunda cerebri pertinet; insuper systole & diastole constat, quarum altera pellet, altera quod expulit retinebit; Et quomodo inotus mere naturalis, nec voluntatis arbitrio obsequens, in momento, pro ejus imperio spiritus animales in loca à cerebro distantissima, instar radii excutiet? aut pro lubitu ab opere quiescet?

Verum spiritus animales, ex ipsius mente, recte & solo transitu per ventriculos cerebri elaborati, ut supra scripsit, propellentur à spiritu vitali, per hiantes in basi cerebri ventriculos perpetuo affluente & sursum scandente: At à descendente spiritu vitali (ex ipsius ὑποθίσις loquor) per finem quartum, seu magnam *Galeni* venam repercutietur; nam ex oppositis plane sedibus, in eodem spatio, sibi occurrant, & quia descendentes copiosiores, minori labore ascendentes omni aditu prohibebunt: ut taceam illos ad ventriculos anteriores, inde ad tertium & quartum ventriculum unquam perventuros: plexus enim choroideus usque ad hiatum ventriculorum lateralium pertingit; cui innexi sunt ramuli

128 EXERCIT. DE LOCO AFF.

mulæ venæ magnæ. Et posito ad latera ventriculorum, per quæ plexus choroidei ala utrinque descendit, ac carotidis posterioris rami, ibi ubi ventriculi adaperiti sunt, ascendunt, spiritus vitales amico nexu jungi, fursumque ad anteriora ventriculorum lateralium pergere, inde ad tertium deorsum properare, quis spondebit non æque per infundibulum periculose elapsuros, quam canalem ad quartum ventriculum desinentem proficue, & cum animalis commodo ingressuros? Spiritus enim cavo loco inclusus, si impellatur, qua data porta erumpit. Et quidem hoc in loco non leviter, sed fortius concitandus esset, cum per canalem oblongum & angustum in corpus densum, nullisque poris conspicuis pervium adigendus sit, si omnino ex quarto ventriculo, seu cisterna spirituum animalium, per spinalem medullam distribui debet. Quis ergo non citius in animum sibi inducet, spiritus præter suam naturam validius commotos, potius illic erupturos, ubi nec introitus, nec exitus præpeditur, sed omnia patent, qualia in tertio ventriculo ejusque appendice choana, seu infundibulo observantur? At forte inclinatione quadam naturali ad quartum ventriculum spiritus animalis concitus fertur? Minime: nam ut jam dictum, naturalis ejus propensio est fursum tendere: contra ipsius naturam est aliter moveri: quod si necessum sit, oportet ut id ab extrinseco principio ipsi accadat: hoc si fiat, æque deorsum ac oblique movebitur, imprimis si densi corporis objectus commoto spiritui obstet. Cujus rei, præter mille alia, fidem nobis vel venti quotidie faciunt. Inclinationem vero hanc velle occultam & nobis ignotam qualitatem dicere, nimis *ἄτεχνον* foret & dubia per æque, vel magis dubia pro-

probarentur. Non minus attractio spirituum animalium à quarto ventriculo proluxa probatione indiget: imo frustra in hac probanda quemlibet desudaturum existimo, cum nulla in ventriculo quarto ejusque canali attrahentis virtutis, vel ad eam pertinentium instrumentorum vestigia compareant: & altum de hac apud omnes silentium sit.

Cum autem *Cl. Riolanus* prævidisset spiritum animale impulsu, æque deorsum elapsurum, quam oblique ad quartum ventriculum transitorium, finxit foramen, seu cavitatem infundibuli adeo exiguum, illudque ad os sphenoides usque, digitum longum esse dixit. At quis non vidit choanæ, seu infundibuli orificium, ubi tertius ventriculus in illud definit, longe amplius esse canali cisternæ, seu quarti ventriculi, ubi in tertium, ventriculum apertum est: Utcunque vero, quo magis glandulæ pituitariæ appropinquat, angustetur, unde etiam hic ductus infundibuli nomen nactus est, nihil tamen quicquam hoc ipsi derogat, aut prohibet, quominus excrementa per ipsum ad glandulam pituitariam & palatum defluere possint. Nonne idem in renibus observatur? nonne pelvis in renibus & prope renes amplissimus in angustos & graciles ureteres coarctatur? Quis vero unquam propterea urinam ad vesicam destillare negavit, nisi rerum Anatomicarum imperitissimi: sed longum sit infundibulum, & quidem digitum longum (qualem digitum, non indicat:) at non adeo æqualiter exiguum toto ductu, ut scribit, quam longum est. Et licet in progressu magis exiguum sit, quam in principio, ab impulso tamen corpore dilatari potest, compositum enim est ex tenui meninge ac tenuissima cerebri portione, quæ facillime impulsui cedunt & distenduntur. Et æque canalem è

tertio in quartum ventriculum digitum longum esse dicit ac hunc ductum, Anthrop. l. 4. c. 2. dum juxta alia obstacula feri, alteriusve rei ingressum ad quartum ventriculum prohibentia, longitudinem recenset.

Sed quid verbis ulterioribus opus est? si per infundibuli cavitatem adeo exiguam & profundam ferosa excrementa, quando in ventriculis colliguntur, ad palatum expurgari possunt, ut paulo post *Cl. Riolanus in Resp. ad 6. Argum. Cl. Hoffmanni*, fatebitur, quidni & spiritus animalis concitatus expelli queat? de spirituum enim natura est, etiam ea penetrare, quæ humores nullo modo, nisi in spirituum naturam degenerent, permeare valent. Imprimis spiritus animales etiam minutiolem & angustiolem canalem pervadent, cum, ut alibi *Cl. Riol.* loquitur, se instar radiorum habeant.

Quæ autem sub finem responsionis adnectit, sunt *μετάβασις εἰς ἄλλο γένος* & huc plane non pertinent. Alia enim ratio ductuum in pulmonibus, alia in cerebro: In hoc infundibuli meatus clarus & conspicuus est: in illis dubium, an bronchia in venas arteriosas, vel arterias venosas perforata sint, nec ne, & adhuc sub Judice lis est, num aëris substantia ad cor per hæc vasa meet? an verò sanguini sola aëris qualitas impertiatur? Quæ vero contra traductionem sanguinis è dextro cordis ventriculo, per pulmones in sinistram, alibi scripsit, abunde à *Cl. D. Slegelio Comment. de sang. motu c. 7.* refutata sunt, ut hoc loco nec necessum, nec conveniens sit, ea prolixè repetere: commodior locus, ubi de morbis pectoris agendum, erit.

Interim quam spirituum vitalium jacturam *Cl. Riolanus* in traductione sanguinis per pulmones metuit, vel hac vice

Cre-

*Crede mihi vanos res habet ista metus :
 Terror in his ipso major solet esse periclo,
 Quæ timuisse libet, me timuisse pudet.*

V. Cl. Hoffmanni argumentum est. Ventriculi cum nervis continui non sunt, sed cum corpore. Sunt enim cerebrum περιλημένον, quomodo Galenus solet loqui.

Ad hoc Cl. Riolanus respondet : Si procedant nervi ab eminentiis illis, quæ sunt radices spinalis medullæ, intra cerebrum & cerebellum & illæ sint principales portiones cerebri, nonne nervi oriuntur à cerebro ? Tu vero multoties scripsisti nervos intra cerebrum oriri à radicibus spinalis medullæ.

Si hanc Cl. Riolani responsionem oscitanter & superficietenter attendamus, prima fronte consensum cum Hoffmanno polliceri putabitur, nec ipsius conclusioni opposita, nisi forte erratum typographicum subsit. Eadem enim cum Cl. Hoffmanno statuere videtur; nimirum nervos cerebri sobolem esse, ac ab hoc oriri, quod hic aliisque in locis vel maxime urget. Verum si penitus responsum intueamur & quæ alibi in suis documentis nobis reliquit, deprehendemus eò Cl. Riolanum collimare, atque ita inferre velle: si nervi à quatuor his eminentiis oriantur, consequenter in ventriculos desituros, in quibus quatuor eminentiæ protuberant, eorumque latera, ut supra in demonstratione docuit, constituunt, indeque spiritus animales acceptaturos, totique corpori suppeditaturos existimat: atque ob has rationes aliquo modo originis nervorum nomen

132 EXERCIT. DE LOCO AFF.

mereri procul dubio censebit : & sic *Galeno* sua authoritas ac effatum aliqua ex parte vel servabitur, vel ille cum *Cl. Riolano*, ventriculos ita nobilitante, consentire cogetur.

Verum jam supra aliqua ex parte ostensum est, eminentias istas ventriculorum, si accurate res perpendatur, non nervorum radices appellandas esse. Equidem quod posteriores eminentias attinet, quæ latera quarti ventriculi constituunt ac formant, nullo modo radices dicendæ erunt, cum veræ radices, antequam latera quarti ventriculi fiant, cerebello posteriora versus retracto, manifeste ex illo emergere videantur : si vero cerebellum a subiecta medulla oblongata, cui ventriculus quartus, instar calami ad scribendum adaptati, insculptus est, abscindatur, adhuc clarius utrinque caudex, seu crus medullæ posterioris, ex radicibus medullaribus per totum cerebellum diffusis atque in basi ejus in caudicem coactis, conspicietur, dum candida, rotunda, & cerebello magis duriuscula substantia visui occurret.

Nec cerebri eminentiæ, quarum præcipue sunt thalami optici, qui forte duarum anteriorum nomine *Cl. Riolano* veniunt, utpote maximæ & notatu digniores, latifundium radicum spinalis medullæ explent, cum ad hos sive caudices, five crura constituenda concurrat, quicquid cortice albidius est à cortice & à cerebro in specie sic dicto, seu medulla, distinguitur. Plurimæ enim medullofæ portiones citra & ultra has eminentias sunt, quæ nihilominus cum medulla spinali continuæ sunt : Et manifeste crura fornicis fere tota medullosa cum anterioris spinalis medullæ origine uniuntur, atque in unum corpus coalescunt, quamvis nulla communio inter

ea & eminentias intercedat. Postmodum omnes quatuor caudices ulterius progressi, junguntur atque intra calvariam medullam oblongatam pariunt, quæ, quam primum sacrum foramen in occipite transeunt, spinalis vocatur. Et non minus incongrue eminentiæ hæ nervorum origines & radices appellabuntur, quam si quis furculos ramorum, ramos caudicis, caudicem radicum originem & radicem in arboribus, unde hæc metaphora desumpta est, nominare velit. Eminentia enim hæ aliquo modo, ad caudicum rationem perveniunt.

Et nescio quis principatus, hisce eminentiis, præ reliquo corpore medulloso, in cerebro & cerebello delitescente, debeatur, ut secundum *Cl. Riolanum* principaliores dicendæ sint: omnium enim eminentiarum substantia reliquæ medullosoe persimilis est, nihilque peculiare diversum ab illa, si figuram excipias, quæ speciem non variat, obtinet. Multo minus eminentiæ istæ appositè, cum ventriculis, ceu vacuo spatio, continuæ esse dicentur; non secus atque ridicule pronunciaretur, cerebrum continuum existere cum spatio & intercapedine illa, quæ inter utramque meningem est: nam æque in ventriculis ac extrinsecus inter spatium & medullam, tenuis meninx intercedit. Continuitas corporum est, in qua duorum se tangentium superficies in unam coaguntur: si vero superficies non confundantur, penitusque jungantur, contiguæ saltem permanent.

Et quæ possent nervi cum *Galeno* censerī cerebrum περιληρόν, si à ventriculis orirentur? πιλέω enim sive πιλώω est cogo, seu coacto, more πιλοποιῶν, seu è lana pileos cogentium, unde etiam peculiariter lanas cogere significat, de quo am-

plius consulatur *Henr. Stephanus in Thesauroling. Græcæ*. Quis autem nervorum materiam à ventriculis, spatio nudo, expectabit, vel impetrabit? & quidnam in iis occurrit, in nervosum corpus coarctandum?

Posito autem omnium nervorum extremas radices solum in harum eminentiarum superficiem definere, quid inde utilitatis ad nervos redibit? aut quid à ventriculis haurient? Nihil sane; æque enim ventriculorum eminentiæ ac reliquæ partes eorum tenui meninge vestiuntur, quæ omnium corporum, ubi integra est, transitum prohibet, ut jam dictum est. Unde ipse *Cl. Riolanus*, conscius hujus impossibilitatis, supra, non opus esse regressu spirituum in cerebrum scribere coactus fuit. Denique, etsi *Cl. Hoffmannus* multies in suis scriptis confessus sit, nervos à radicibus medullæ spinalis in cerebro, addo & cerebello oriri, nihil illud huic argumento nocebit, quin idem eo ipso innuere videtur; sique superstes esset, id, ceu veritati & propriæ sententiæ congruum, adhuc procul dubio scriberet.

VI. *Cl. Hoffmanni* argumentum & ultimum hoc est, Ventriculi jam habent aliud officium, quod cum hoc, sc. spiritus animales producendi & colligendi, stare neuti-quam potest.

Hoc argumentum *Cl. Riolanus* non solito more & λογισμοῖς aggreditur & forte etiam infaustiore successu: dum regerit. Istud officium tibi pernegc. Choana enim potest serosa excrementa, si quæ sint in ventriculis, expurgare, sed major portio defluens per anfractus exteriores cerebri usque ad basin,

fin, partim in os ethmoides delabitur, partim ad basin cerebri descendit, si non per choanam, saltem per foramina vicina expurgatur in palatum.

Satis hæc pro imperio dicuntur; *ἐφιδέσσομεν*, est adversarii sententiam tantum solenni, vel potius insolenti pernegatione, non solidis & assensum merentibus rationibus evertere & destruere velle. Gratis autem *Cl. Riolanum* pernegare, ventriculos esse excrementorum receptacula, ex *Cl. Hoffmanni* argumentis proxime huic *ἔτι* subjectis, patebit: quæ tempestive & congrue hic apponam, ut benevolus Lector *Riolani*, adversarios suos convincendi, ac, quantum in eo est, publicæ ignominiae exponendi dexteritatem, vel, si mavis, versutiam intelligat.

Primum itaque argumentum est: Structura ventriculorum, præsertim considerata in sectione inversa Varolii, planissime convincit calcitrones factos scilicet esse eductioni excrementorum. Desinunt enim quâ dixi. Imo est unus ventriculus, quomodo Hippocrates & Aristoteles olim æstimabant. Quæ eadem aliis paulo verbis profert, *Instit. Med.* l. 2. c. 64. Ventriculos factos esse colligendis purgandisque cerebri excrementis, Natura quasi intento digito nobis monstrat, cum trium ventriculorum seriem continuat cum infundibulo, glandula pituitaria, osse sphenoides, quod Galenus comparat cum osse ethmoide; Hic enim quia indubitato (ut hæcenus creditum fuit ipseque Riola. autumat)

effluunt excrementa quædam, illac cur non fiet idem? & cur non potiori ratione, cum tantus sit instrumentorum apparatus? 2.

Glandula pituitaria extra duram matrem, in sella sphenoidis statuta, clara voce id testatur. Quin agnominatio, tot seculis

probata, vult idem. 3. Gemini in palato meatus Galeni de Us. part. 1. 8. c. 6. volunt hoc ipsum. Idem Cl. Rioli. Antrop.

1. 4. c. 2. amplius corroborat, dum scribit duas glandulas pituitarias, è ventriculis, per infundibulum allatum humorem imbi-

bere, indeque per quatuor canales in palatum exonerare. 4. Sternutatio, admirabilissimum naturæ opus, non patitur nos aliò

ire. Videmus enim plerosque post illam aut exspuere, aut nares emungere. 5. Si quis sugat lingua cælum palati, quod illustr. Bauhinus medocuit, elicit pituitam.

6. Praxis medica docet, apophlegmatis-mos in affectibus cerebri plurimum posse.

Atque hæc *Cl. D. Hoffmanni* argumenta tanti sunt, ut illa nequaquam superciliose spernenda, aut sicco pede, more Riolano, prætereunda non solum ego, sed & alii non exiguæ eruditionis Viri, crediderint. Etsi vero non omnia ejusdem ponderis sint, & de ultimis tribus adhuc ambigetur: tria tamen priora tantæ efficaciam sunt, ut vel sola hoc evincere possint, & nunquam à quocquam solide refutabuntur: adeo enim omnia, excrementa per hæc loca defluere, clare ostendunt ac quasi in hoc unum conspirant, ventriculos excrementorum potius receptacula, quam spi-

spirituum animalium officinas, constituendos ac declarandos esse.

Verum fortasse pertinaci ventriculorum patrono, non sufficeret omnia in iis accommoda esse ad excrementorum receptionem & expulsionem, nisi constaret ex *αὐροψία* excrementa in iis non raro, sed frequenter ab Anatomicis reperiri. Nolo id eorum autoritate adseverare. qui, postquam ventriculorum nobilitas evilescece cæpit, vixerunt, suosque labores nobis communicarunt. Adducam illos, ceu indubiæ fidei testes, qui ipsi ventriculos spirituum animalium, vel officinam, vel cisternam, vel utrumque statuerunt. Inter hos est supra laudatus *Carpus*, in cerebri sectione, si qua alius, peritissimus & qui, vel propter unicum rete mirabile, centena capita aperuit. Is *comment. in Mundin. Anat. comm.* 34. p. m. 438. b. scribit: *superfluitas grossa cerebri potest videri in majore parte capitum anatomizantium, quia semper est de ea aliqua pars in ventribus cerebri: & in ista concavitate (ventriculum tertium & principium infundibuli putat) ad minus semper est aliqua portio talis humiditatis. Credo bene quod in uno corpore hæc humiditas sit grossior, quam in alio. Ubi primum observandum per grossas humiditates authorem non crassas, viscidas, lentas intelligere, quales quandoque emunguntur, aut post scretum exspuuntur, cum in anfractibus narium retentæ, hanc crassitiam, ipso Carpo monitore, partim ab harum partium calore, partim ab inspirato & expirato aëre nanciscantur. Nam aliàs valde & subtiles & aqueas esse memorat, cum aliæ humiditates per hæc loca transcolari nequeant. Grossas autem dici respective & ad alias superfluitates cerebri collatas; addit, quarum quædam adeo subtiles*

138 EXERCIT. DE LOCO AFF.

sint, ut per futuras cranii resolvantur. Deinde irridet illos, qui putant has humiditates tantum in demortuis reperiri, sc. concretis vaporibus & spiritibus animalibus à frigore, hoc enim si verum esset, majores omnino ventriculi cerebri à natura parandi fuissent, cum ad pauxilli humoris productionem magna vaporum copia requiratur. Et hoc non minus falso credi putat, quam inepte à quibusdam existimabatur aquam pericardii eodem modo, à frigore è vaporibus densatis in demortuis generari, quam tamen in vivorum sectione, corde adhuc fortius saliente, vidit.

Alter est *Vesalius*, merito magni nominis Anatomicus, cujus laboribus multi superbiunt, ejus suppresso nomine, & quo minus fraus subolfactetur, eum cavillantur: Ille *Fabric. corp. hum. l. 7. c. 6.* refert: *Universa ventriculi, scilicet cerebri, superficies lubrica & aqueo humore oblita, & inter dissecandum sæpe ab eodem oppleta conspicitur.* Et paulo post: *Quartus ventriculus nihil in se, præter aqueum humorem, qui in aliis ventriculis communis est, inter dissecandum continere animadvertitur, quemadmodum neque meatus ex tertio ventriculo in quartum pertinens.*

Recentiorum plura testimonia coacervare possem, quæ studio prætereo, non quod infirmiora credam, cum ipse sæpius aquam in ventriculis repererim, & à diligenti scrutatore perpetuo ejus vestigia inventum iri confidam; sed ne rem hanc, id est, ipsissimam veritatem ejus osoribus suspectam, horum allegatione, reddam.

Præter hæc alii alias rationes excogitarunt, quibus ventriculos cerebri ad ignobilius officium merito condemnarent. Cum cerebrum, in homine præcipue, vastæ molis sit, ac propterea multi alimenti indigum, copiosum quoque ex-
cre-

crementorum proventum necessarium, non sine ratione, veriti sunt, qui non nisi intra ventriculos, quales cerebri sunt, recondi nec potuit, nec debuit: alias enim, homini e. gr. perpetuo sputandum fuisset. Insuper multa sæpe excrementa, mane post somnum, exspuenda sunt (argumentum est *Varolii*.) quæ tota nocte inter dormiendum, in loco quodam capaci detenta fuerunt quæque, nonnisi in cavitate quadam insigni concludi potuerunt; & quoniam nullæ aliæ, præter ventriculos, his in locis occurrunt, necessario tantisper ibidem abscondita fuisse, plausibiliter existimant.

Tot tantorumque argumentorum vis atque splendor, etiam ipsum *Galenum* adegit, ut non paucis in locis fateretur, ventriculos cerebri excrementa & colligere & excernere, quamvis eos spirituum animalium officinas esse senserit: videatur de *Us. part. l. 8. c. 10. l. 9. c. 3. & alibi*. Neque *Cl. Riolanus*, utcunque contra *Cl. Hoffmannum* ringatur, pernegare penitus audet, serofos humores è ventriculis in palatum per infundibulum exonerari, nec solum hoc in loco, sed & in aliis id ultro confitetur. Quanti autem faciendum sit hostis testimonium, nemo non novit, nempe nonnisi invicta veritatis potentia expressum fuisse, cum ejus sit obluetari, dum vires suppetunt.

Cum itaque in ventriculis non raro, sed crebrius, si non semper, serosa excrementa colligantur, merito *Cl. Hoffmannus* quæsit, quare hoc cum nobili spirituum officina stare possit? Quis à se impetrare unquam poterit, ea sede, ubi aquosa excrementa confluunt, simul subtilissimos spiritus, qui aliquando nervos ad sensum non perforatos permeaturi sunt, genera-

ri & colligi? quis spondere audebit, non perpetuo eos ab aqua, vel contaminatum iri, vel saltem crassiores evasuros, atque ad opus, ad quod destinati sunt, ineptiores?

Cl. Riolanus ad hoc quæsitum ne hiscere quidem audet, & ut argumenta, ventriculos excrementorum receptacula probantia, præteriit, ita hoc quæsitum responso, vel indignum judicavit, vel absurditatem rei prævidens, tacere maluit, quam male loqui. Ne vero *Cl. Hoffmanno* palmam concedere victusque succumbere cogatur: aliud diverticulum, novo commento quæsit. Nimirum majorem excrementorum portionem per anfractus exteriores defluere; ac partim per os ethmoides delabi, scilicet ut per nares percoletur, partim ad basin cerebri descendere, & si non per choanam, seu infundibulum, saltem per foramina vicina in palatum expurgari.

Non equidem negari potest, intra duram & tenuem meningem serum nonnunquam copiosum cumulari; Quin etiam intra ipsos anfractus quandoque reperitur. Et non semel ipse aquam in his sedibus offendi. At illud recrementum, quod per nares, aut os, apud plerosque hominum quotidie excernitur, quodque βλέννα Græcis vocatur, in his sedibus colligi, & per loca, quæ *Cl. Riolanus* indigitavit, expurgari, res est, de qua summopere dubitari potest. Multo minus catarrhi materia, quæ, ut omnibus notum, magna copia, sæpe paucarum horarum spatio, tum emungitur, tum excreatur & expuitur, has collectionis sedes & expulsionis vias agnoscat. Per os enim ethmoides ne guttula quidem aquæ exstillare potest, utcunque enim hoc os in sceletis, quod multos seduxit, foraminibus abundet, in vivo tamen corpore & cadavere nondum membra-

branis & carne spoliato, tota offis hujus regio, dura matre integra nullibique pervia obducitur, nullumque vel minimum foramen in illa hoc in loco invenitur, nisi quod in avellendo cultro imprudens feceris, quod non raro re ipsa comperii, dum in avulsa hujus loci crassa meninge, etiam soli obversa, ne minimum porum conspiciere potui: quæ in eo adhuc membrana obducto videntur adesse, nulla sunt, nam integra meninx se sinubus insinuat, ut creberrima processus mamillaris germina aliquantum naribus propiora sint, non tamen illam transeant. Quod etiam *Carpus* innuere videtur *Comment. f. c. p. m. 439. a.* Postquam docuisset nobis experientiam testari, exiguis intervallis, excrementa apud omnes homines per nares expurgari, nisi quibus cerebrum valde siccum est, quod breve temporis spatium continuæ transcolationis indicium sit, addidit: *Notandum judicio meo quod naturaliter omnes superfluitates grossæ cerebri descendunt ad istam lacunam, seu infundibulum, nec naturaliter vadit aliqua portio, nisi forte insensilis, talis humiditatis transcolandæ ad illa foramina, quæ sunt in osse basilari, in summitate partis anterioris nasi, quia in substantia intrinseca, neque in extrinseca cerebri est aliquod foramen, seu aliqua via sensibilis, per quam possit ire talis humiditas ad talia foramina.* Concludit, quamvis qui Cardines medicinæ sint, aliter sentiant, se tamen iis non consentire: *Si vero aliquid effluat, illud propter accidens aliquod fieri: sed & hæc cum reverentia Galeni aliter opinantis scribere; tantum piaculum olim erat à Galeno abscedere, & adhuc apud quosdam est! Non abnuat autem catarrhos per hæc loca quandoque ruere; sed si nullæ viæ sint sensibiles, quâ poterunt? Quæ veri-*

42 EXERCIT. DE LOCO AFF.

veritatis cultor amplius desiderat, petat ea ex accuratissimi *D. Schneideri* libro I c. qui plenissime, quid de hac excretionē sentiendum sit, docebit.

Per choanam, seu infundibulum excrementa extra ventriculos collecta, excerni ipse *Cl. Riolanus* asserere non audet, continua enim est ad usque glandulam pituitariam, nullisque rimulis hifcens, ut humiditatibus hisce ingressum largiri possit. Itaque per infundibulo vicinā foramina, in basi, ad palatum expurgari scribit. Quod tamen æquē à veritate alienum est, ac id quod de osse ethmoideo tradidit. Sive enim humiditates eas attendamus, quæ quotidie à plerisque etiam à sanis vel emunguntur, vel aliter ejiciuntur, ac vulgo cerebri naturalia & consueta recrementa putantur, sive catarrhos, seu copiosiores harum humiditatum proventus aspiciamus, neutras per has vias, seu hæc foramina expelli comperiemus. Foramina enim in basi cerebri conspicua, destinata sunt vel egressui nervorum, spinalis medullæ & sinuum lateralium, vel ingressui arteriarum carotidum & vertebralium, ut & illarum, quæ per duram matrem disperguntur. Arterias quod attinet, ubi duram matrem perforant, ita ipsi uniuntur & cum ea undique coalescunt, ut ne minimum foraminulum, inter arterias & crassam meningem animadverti possit; hinc etiam arteriæ, superatâ hac meninge, tenuiore tunica præditæ sunt, ac ante perforationem erant. Multo minus sinus laterales duram matrem perforant, dum inter duplicaturam hujus meningis feruntur, atque hac ratione in basi, cum jugularibus internis junguntur, ut necessario dura meninx propterea integra maneat.

Fatendum equidem est, nervos particulares plerosque, si non omnes, intra cranium & spinalem medullam, crassam meningem ita transire, ut non totum foramen occupent, ne hac ratione huic meningi connascentur, quemadmodum arteriæ & sinus laterales; proindeque concedendum humores, si qua colliguntur extra cerebrum & cerebellum in spatio, quod inter tenuem & crassam membranam est, per hæc foramina defluere posse. Ac lubens hac in parte Fernelio, Volchero Coitero, & Carolo Pisoni assentio, qui serum juxta nervos & spinalem medullam defluere quandoque dicunt. An vero in naturalibus & consuetis excretionibus, ac p. n. quales sunt catarrhi, à quibus pauci immunes fere singulis annis, ad minimum semel sunt, humiditates per hæc foramina elabantur? difficulter affirmari poterit. Nam *Cl. Riolanum* has excretiones, hoc in loco, innuisse videtur, dum hoc commento, absurditatem perpetuæ cumulationis excrementorum in ventriculis & junctæ generationis spirituum animalium effugere & evitare conatur. Quis enim perpetua juxta nervos defluxione & impetuoso ac nimio harum humiditatum in catarrhis decursu ad palatum, non timebit actionum eorum organorum, ad quos pertinent, vel abolitionem, vel imminutionem, vel depravationem? Et posito innoxie & citra actionum læsionem ex his foraminibus excidere, quis tamen unquam monstravit, eos ad palatum & nares descensuros? Annon potius ductum nervorum, ad insertionem usque, sequentur? Imprimis cum dura meninx eos semper comitetur: nisi quis rimis plenam, toto incessu hoc, dicere velit, quod tamen nec *Cl. Riolanus*, nec alius vidit, nec unquam forte videbit.

144 EXERCIT. DE LOCO AFF.

Postquam laborem suum *Cl. Riolanus*, in refutando absurda, ut ipsi videbatur opinione *Cl. Hoffmanni*, exantlavit, opus scommatibus coronat; quasi his fulcris invicta veritas indigeat, quæ potius ipsius dedecora existunt. Spiritum *Cl. Hoffmannum*, in hac quæstione ulterius pertractanda, deficere ait: qui certe, doctissimum ac solidissimum Philosophum ac Medicum, non defecisset, si aliquid superaddendum operæ pretium duxisset. Quæ attulit, satis negotii *Cl. Riolo* fecisse videntur, in quibus enodandis strenue, sed procul dubio frustra sudavit; atque facile intelligi potest, ipsi argumenta ad everrendas ventriculis familiares sordes, defuisse; sique, qui superfluit, nodos solvere velit, novis spiritibus, novisque ausis, sed firmioribus rationibus fultis, necessarium fore, nisi rideri & exhibilari malit. Si verò adeò formosus est *Cl. Riolanus*, (nam se nuper in φιλαυτίας suæ æquore vidit) ut flocci omnia faciat, fruatur sua arrogantia, quod vitium inique *Cl. Hoffmanno* impegit: ipsumque sequatur, sub cæcæ obedientiæ lege, magnum gregis balantis agmen, quorum forte oculos magni nominis splendor perstrinxit, aut quibus *Riolaneum αὐτὸς ἔφα* satis facit. Nos omnes ἀληθόφιλοι *Cl. Hoffmannum* ducem sequemur, quamdiu rationi sanæ & sensibus congrua loquutus fuerit: A quibus si in avia deflectat, ut humanum est errare, non majoris nobis fiet, quam alius quantivis pretii, qui hallucinatur. Nobis enim augustior & sanctior est veritas, quam ut nudam hominis auctoritatem, ejus cynosuram credere possimus.

Interea *Cl. Hoffmannus* intrepidus victor, *Cl. Riolo* tam imbelli, hac ex parte, Hercule, perstabit, & merito de præclare parta victoria triumph-

triumphum canet, & nisi aliis arietibus ipfius munimenta petierit, securus in utramque aurem dormiet.

Veretur autem *Cl. Riolanus*, si ventriculis adultera nobilitas, gravi rationum & sensuum sententia, abjudicetur, totam cerebri Pathologiam perturbatum iri. At qualis pessundet, quam ea, quæ longa traditione in quorundam cerebris adolevit, atque apud eos consenuit; qui naturam non suo pede metiendam putarunt, sed præconceptorum opinionum cancellis coercendam existimarunt? Vereor ego rectius & citra cujuspiam injuriam, nos multa nimis in Medicina gratis credere, eò quod ejus latifundium pridem exhaustum superstitiose arbitremur: Cum multa in Pathologia occurrant, quæ sensuum testimonio non respondeant: Et quæ exempli loco affert symptomata, Apoplexiam & Epilepsiam scilicet, ambo id evincere possent, atque ex propria *Cl. Riolani* assertione, si necessum foret, demonstrare.

His ita ad finem perductis, paucis videndum superest, an ventriculo quarto, præcæteris, singulare privilegium obtigerit, ut ille, vel pro spirituum animalium cisterna, vel eorundem nobili officina habendus sit? Etsi verò ex præmissis haud obscure divinari possit, in quem censum veniat, tamen quædam insuper addenda sunt, cum in hac rerum Anatomicarum luce, quidam existant, qui ipsum nimis magnifice adhuc extollant, quamvis in cæteris nobiscum fere sentiant.

Si itaque hic ventriculus cisterna nuncupandus sit, spiritus animales vel ex anterioribus cerebri ventriculis, vel ex ipsius cerebri & cerebelli substantia huc ablegandi erunt, nam aliunde proficisci

cisci nemo, ut existimo, credet. Ventriculi nihil spirituosum suppeditare possunt, cum spiritibus animalibus in cavo ventriculorum nullus locus sit: ut abunde supra demonstratum est. Cerebrum vero, aut cerebellum spiritus in hujus ventriculi cavitatem effundere, ex cruribus medullæ oblongatæ, utpote quæ ejus latera formant, quis opinabitur? cum paulo post illis in eadem crura redeundum sit, ut per nervos quoquoeversum distribuantur: ut taceam ingressum & regressum tenuem meningem remorari. Proinde ventriculus iste spirituum animalium cisterna & promuscondus non esse poterit.

Ergo, si hic ventriculus cæteris cerebri præstare debet, in eo spiritus generabuntur: quod mihi æque ac prius à veritate alienum videtur. Nihil dicam de opifice horum spirituum, quem difficulter quispiam in has oras, exulem à cerebello, condemnabit: nihil de ejus ortu, quem ex accidenti casuque resultare quidam affirmant: nihil de excrementorum in eo collectione, quam ipsi cum reliquis ventriculis communem ajunt: nihil de impossibili ad omnes nervos distributione, cum æque ac alii ventriculi pia matre vestiantur, & vix ad nervos opticos & processus mammillares, spiritus hic generati, perventuri sint. Sit ille purissimus, sit ad recipiendos spiritus capacissimus, sit denique eo in loco situs, unde quoquoeversum spiritus diffundi possint. Solum ex hujus ventriculi patronis quæsierim, ex qua materia spiritus animalis, hoc in loco, producendus sit? Cum nec millesima arteriarum, sive vertebraliū, sive carotidum, ad hunc ventriculum pertingat: nec in æternum probabitur vel minimam *ἀπομὸν* spirituum vitalium in ejus cavitatem effundi. Quem verò, ob finem immenso
nu-

numero arteriæ per cerebrum & cerebellum dispergentur? an nutritionis solum causa? frustra igitur tantæ molis opus creatum erit, atque eo animal, citra actionum animalium jacturam, carere potuisset. Deinde credibilis est, spiritus animales potius per canalem ad tertium redituros, utpote manifeste apertum, quam insensiles poros crurum medullæ ingressuros atque ad cerebrum & cerebellum, ut actionibus animalibus inserviant, abituros. Ad tertium autem ventriculum, si spiritus perveniant, quid eos maneat, jam supra pluribus indicatum est, atque ita frustra spiritus in hoc ventriculo generabuntur.

Mirari satis neque Anatomicos quosdam, qui inter primos sunt, audere illud Laniorum experimentum apud *Galenum*, pro asserenda hujus ventriculi nobilitate, in medium proferre, quo, cultro in cervice ad hunc ventriculum adacto, jumenta protinus apoplectica concidere dicuntur. Si unquam elenchus non causæ ut causæ commissus fuit, familiaris aliàs in reddendis morborum causis error, hic aperte committitur. Quis enim non animadvertit, cultro per foramen sacrum in occipite intruso, à Lanio imprimis, medullam & vertebrales arterias abscindi, antequam ad hunc ventriculum perveniatur? Vidi Romæ hujus artis clientem, omnes oves, quas mactationi destinarat, cultro ad manubrium usque in alterutrum oculorum immisso, eas statim omni sensu & motu privasse, quod nonnisi carotidibus juxta infundibulum abscissis, ventriculo tum hoc, tum reliquis integris permanentibus, factum nullus dubito.

Cum itaque ex his, quæ hæcenus in medium allata sunt, abunde constet, ventriculos cerebri, nec spiritus animales generare, nec colligere,

gere, aut distribuere per universum nervosum genus, multo minus nobiles animæ actiones, quas principes vocant, in iis peragi, cum excrementorum receptacula sint, non nisi quod veritati congruum est, fatendum erit: nempe, vel Galeni oppletionem ventriculorum cerebri confertim factam, vel sequacium ejus, sive obstructionem, sive constipationem, sive compressionem, quatenus tales solum sunt; nec ulterius sanguinis motui per arterias & venas, vel spirituum animalium distributioni per medullarem substantiam cerebri, obsistunt, non causas Apoplexiæ proximas statuendas esse: & consequenter hætenus ventriculos falso ac erroneè sedes Apoplexiæ habitos fuisse.

His alia argumenta accumulari possent, videlicet observatum à magni nominis Viris, quosdam Apoplecticos factos salvis & sanis omnibus ventriculis, & contra, alios, ventriculis cerebri summopere repletis, ab Apoplexia immunes fuisse, quod vel maxime etiam evincunt Hydrocephalorum historiæ. Etsi vero, *Cl. Hercules Saxonia, Professor Medicus Patavinus celeberrimus, Pract. Med. p. 1. c. 12.* hunc obicem remove fatagat, dum opinatur, Apoplexiam puellæ Augustanæ apud *Vesalium* non obvenisse, quod materia aquea fuerit, Apoplexiam autem factura pituitosa, crassa, secundum *Galen*i effata, esse debeat: Veruntamen hoc effugio hunc scopulum nondum superavit, nec unquam superabit. Si enim *Galen*i autoritate cum *Saxonia* agendum sit, objici poterit, illum Apoplexiam credere ab humore confertim ventriculos implente fieri,
nulla

nulla obstructionis facta mentione, quod æque à sero, ac ab alio quovis humore, præstari potest, ut satis superque vel hæc *Vesalii* historia docet. Deinde summe dubium est adhuc, num ventriculi cerebri unquam humore frigido crasso confertim impleri possint? vel an unquam eo repleti visi fuerint? Unde enim tanta copia & *αἰσχροῦς* irrueret? imo adhuc ambigitur, pituitam viscidam, qualis sæpe vel emungitur, vel expuitur, intra cerebrum colligi, cum, ut supra ex *Carpo* relatum fuit, excrementa intra cerebrum sint aquea, atque hac consistentia frequenter in cerebri sectione reperiantur, ac lentorem & visciditatem suam, extra cerebrum elapsa demum acquirant; nam si tam viscida ac lenta essent, nec per infundibulum, nec per quatuor *Cl. Riolani* canales, ad palatum & nares expurgari possent. Denique fallitur *Cl. Saxonia* serosos humores non posse, sive foramina, sive poros, spiritibus animalibus (si qua omnino in ventriculis vel generarentur, vel colligerentur) transitum largientibus; obstruere, cum enim oppido exigui sint, ac propterea oculorum aciem effugientes, quis non cogitabit illos æque ab aqua, quam ab alio humore obturatum iri? Imo viæ pertinacius occludentur, quoniam humores aliquo usque se hisce meatibus insinuare possunt, cum viscida ac lenti in superficie persistant. Tacebo tanta aquæ vi, si spiritus in ventriculis continerentur, omnem eorum proventum pessundatum iri, ac vel ob hanc solam causam Apoplexiam oborituram.

Et ipse *Galenus* l. 8. de *Us. part. c. 10.* ansam præbet de ventriculis cerebri aliud sentiendi, quam hætenus creditum fuit: dum refert adolescentem *Smyrnensem* ad alterutrum ventricu-

lorum usque vulneratum, semet oculato teste, superstitem permanisse; quod utique non factum fuisset, si ventriculi spirituum animalium penus, ac sedes Apoplexiæ essent. Nec est ut quispiam patrociniū à ventriculorum duplicitate petat, nam alia ventriculorum est ratio quam aliarum partium geminarum, omnes enim quatuor cerebri ventriculi quasi unus sunt, ob cavitatis quandam continuitatem, aliis partibus imparē.

Non deessent alia, quæ ostenderent ventriculos cerebri non esse Locum affectum in Apoplexia, ἀκρίβως ita acceptum, verum superfluum existimo ea hoc loco recensere, cum aliàs prolixior fuerim in examinanda *Cl. Riolani* sententia, quàm instituti mei ratio fert. Sola ventriculorum spuria nobilitas elusa, sufficit ad demonstrandum ventriculos in Apoplexia non esse locum affectum.

Ad eas angustias redacta est Medicina, ut si quispiam ratione & sensuum fide edoctus, aliter sentiat ac plurimi, qui *Galenī* autoritate gloriantur, statim apud hos ingeniorum tyrannos, novator & sciolus audiat. Quod si vero horum dictatorum sententiæ, cum ipsius *Galenī* scriptis conferantur, non raro plurimum ab iis descivisse comperiemur: quod ipsum etiam in Apoplexia accidit; ut enim jam dictum, apud *Galenum* oppletio ventriculorum, juxta alias, causa tanti mali nullibi obstructio reperitur. Quanti vero in apoplexia oppletionem ventriculorum cerebri faciant, vel ex solo *Saxonia*, ut haberi vult & creditur Γαλλωικοτάτω, constat. Imo omnes ventriculorum cerebri admiratores, nonnisi cum *Saxonia* sentire cogentur, quoties in memoriam sibi hydrocephalos revocabunt, atque
aquæ

aquæ copiam ventriculis inclusam perpendent.

Obstructionis autem commentum *Galeo* recentius est, ac Græcis posterioribus atque Arabibus & Latinis, Græcorum & Arabum opiniones combinantibus, debetur, ut facile patebit horum scripta evolventibus.

Si vero antiquitate sententiarum cum his certandum foret, sique in vetustate Scriptorum potius, quam in his vetustiore Natura, veritas collocata esset, facile superari possent. Magnus enim *Hippocrates* Medicus vetustissimus nuspiam ventriculorum læsorum mentionem in Apoplexia facit: Quem verò locum affectum quasque causas Princeps ille Medicorum constituerit, malo verbis *Prosperi Martiani, Medici Romani celeberrimi, in Lectione monumentorum Hippocraticorum versatissimi ac fidi interpretis*, quam meis explicare; quod eo lubentius facio, quod ipsius *Magnus Hippocrates* cum notationibus Romæ, Anno 1626. primum lucem viderit, scilicet bienio ante editas *Exercitationes de motu cordis & sanguinis Cl. Harvæi*, quæ primum Anno 1628. Francofurti excusæ fuerunt. Ita enim ille in lib. 2. de Morb. ad paragr. 64. p. 168. Edit. Romanæ: Apoplexiæ tres invenio in Hippocratis doctrina differentias, quarum etsi diversæ sint causæ antecedentes, in essentia tamen conveniunt omnes, quæ in sanguinis statione consistit, unde spirituum motus, & actio omnis tollitur. Nam (ut ipse inferius ait) dum sanguis non movetur, fieri non potest, ut non etiam corpus quiescat; sanguinis vero nomine comprehendimus etiam spirituosum illum humorem, qui in arteriis continetur, quo mediante non solum spiritibus animalibus materia subministratur, sed & fovetur continuo & in naturali dispositione conservatur. Quum igitur sanguis mo-

tu privatur, spirituum non modo intercipitur motus, qui fit per sanguinem: sed simul & semel animalis spiritus generatio, quæ fit in cerebro, vitatur & interrumpitur ex materiæ defectu, venis seu arteriis interceptis: notum est enim animales spiritus ex vitalibus generari. Hanc vero sanguinis stationem fieri existimavit Hipp. in venis, seu arteriis totius corporis, in Apoplexia vero potissimum intercipi eas, quæ sunt in collo & pectore: quia animadvertit in his partibus maxime apparere affectus interceptionis, difficultatem scilicet respirationis & angustiam, unde stertor: quæ communia sunt symptomata apoplexiæ, quamvis hæc reducantur à posterioribus in resolutionem musculorum moventium pectus: an vero saniori iudicio, non affirmabo, cum videam pectoris musculos evidentius operari in apoplexia, quam in febre ardenti, quamvis in hac maximus sit usus respirationis: quod non eveniret, si ob resolutionem musculorum læderetur respiratio: imo in paralyssi manifesta musculorum thoracis, nulla adest spirandi difficultas manifesta, nullaque angustia, dummodo non adsit apoplexia, & contra in angina eadem vigent symptomata, cum tamen nulla adsit resolutio.

Quæ, quam aliena sint à vulgata opinione, quilibet intelligere potest. Quæ vero de difficultate respirandi in Apoplexia adfert, altiore indagine merentur, ac suo loco applicanda erunt, qua propter hic ea præterimus. Triplicem autem ob causam sanguinis motum sisti ex Hippocrate dicit. Primum, cum humores acres sanguini in arteriis contento admiscantur, unde sanguis conrescit & sistitur, eo plane modo, quo lac, coagulo injecto, conrescit. Atque hoc modo fieri Apoplexiam illam, de qua hoc loco sermonem habet, ut & s. 4. *Acut. v. 46. & lib. de Glan-*

Glandul. v. 103. Deinde, cum ob nimiam venarum repletionem, seu interceptionem, ventilatio ejus prohibetur, unde sanguis corrumpitur, ejus spiritus suffocantur,isque à motu suo cessat: de qua etiam 4. *Acut. paragr. 39.* Hæc apoplexiæ species subito fit; cum signis plethoræ. Denique sanguis motu privatur, propter affluxum frigidorum humorum, de qua Apoplexiæ specie etiam hoc loco agit, atque hæc non derepente fit, neque omnes in principio actiones abolentur & si sanguis pituitam superet, evadunt, fin minus, sanguis magis congelatur & ægri moriuntur. Quæ ab ebrietate fit apoplexia, vel ad primam speciem referendam dicit, quatenus acri & calida facultate in sanguinem agit, ut humores similes, vel ad secundam, si vinum magna vaporum copia ac propria substantia vasa repleat, atque ita plenitudinem efficiat.

Memoratu digna sunt, quibus hunc de causa proxima & loco affecto, discursum concludit, quæ verbotenus exscribam: *Cum hæc sint Apoplexiæ differentia, earumque enarratarum causæ, videant posteriores, quantum à præceptoris doctrina, & ex consequenti à veritate recedant, dum cujuslibet Apoplexiæ causam, aut saltem pro majori parte, in pituitam frigidam & humidam rejicientes, curationem perpetuo calefacientibus & exsiccantibus instituunt, quandoquidem facta totius corporis purgatione, si morbus præbet inducias, ad vulgata sua decocta ex Guajaco, Sassafras aliisque similibus, tanquam ad columnas Herculis (Non plus ultra) confugiunt, cum animadvertere deberent, ex tribus Apoplexiæ speciebus unicam tantum & de raro contingentem in frigidos succos Hipp. consilio, referendam esse.*

Hæc *Cl. D. Martiani* etsi mere Hippocratem

spirent, & laudem suam mereantur, quædam tamen adjicienda existimo. Quamvis *D. Hippocrates* frequentius Apoplexiæ (ceu subitæ abolitionis omnium sensuum & motus animalis, respiratione sola excepta) causam proximam sanguinis motum inhibutum statuatur, & consequenter, Locum affectum, *κρείως* acceptum, agnoscat nonnisi vasa succum hunc vivificum, calido abundantem, spiritibusque maxime prægnantem advehentia: tamen etiam illuviem in cerebro redundantem memorat 1. 3. *de Morb.* non procul à principio; verba ipsa apponam. Οἱ βλητοὶ λεγόμενοι εἶναι, ὅποταν ὁ ἐγκέφαλος πλησθῇ πολλῆς ἀκαθαρσίας, ὁδύνῃ παρέχῃ τὸ πρὸς θέν τῆς κεφαλῆς πρῶτον, καὶ ἀναβλέπειν ἐδύναται, οἱ μὲν ἀμφοῖν τοῖν ὀφθαλμοῖν, οἱ δὲ θατέρω καὶ κῶμοι μὲν ἔχῃ καὶ ἐκφρωνές εἰσι. Sydere icti dicuntur esse cum multa vitiosorum humorum illuvie cerebrum oppletum fuerit: imprimis capitis pars anterior ipsis dolorem exhibet: Et aliqui quidem ambobus oculis, aliqui vero altero intueri nequeunt: sompor ipsos detinet, mente alienantur, &c. Hanc autem illuviem non vasis inclusam Hippocratem innuere opinor: alibi enim ut 2. *de Morb.* ubi Apoplexiam fieri dicit à pituita, vel bile, vel plenitudine sanguinem coagulante, vel congelante, hos humores, seu qualitate, seu quantitate peccantes affluere & sanguini permisceri refert, quod nonnisi intra vasa contingere necessum est: at horum nullam hic mentionem facit. Præterea visus vel in alterutro, vel in utroque oculo abolitionem, inter prima symptomata recenset, cum tamen irruente per carotides, vel vertebrales arterias vitiosa & copiosa illuvie, æque alii sensus, tam interni, quam externi, imo citius damnum a tali impetu accipere possint, utpote primi & proximi huic irruptioni; vel saltem

tem simul cum visu in discrimen manifestæ & maturæ læsionis incurrere deberent, si hæc copia vitiosorum humorum vasis inclusa esset: nam nemo sibi illuviem vasis inclusam quietam imaginetur & sensim agentem, cum ex *Hipp.* mente Apoplexia, affectus sc. subitus, ab ea efficiendus sit. Quæ confirmat l. 2. *de morbis*, ubi symptomata fere eadem recenset, quæ ab aqua ἐπὶ τῷ ἐγκεφάλῳ super cerebro genita & collecta producantur, sc. partium capitis anteriorum dolor, visus abolitio, vel visus duplex, nam ait tales ἀμβλῦσσαν, ἢ ἐν τῷ ἐνὸς δύο ὄραν & quæ alia addit, ibi videnda: quorum sublatio si medicamenti non succedat, suadet, ut secta in syncipite cuti, ad cerebrum usque cranium perforetur. Quod autem apoplexiæ non meminerit in hac aquæ super cerebro collectione, id factum arbitror, quia non omnis aquæ coacervatio hanc inducit, sed copiosa, & ἐπίταν ὁ ἐγκεφαλὸς πλησθῆ πολλῆς ἀκαθαρσίης. Et adhuc clarius l. *de Glandulis*, ubi de cerebri excrementis loquitur, dicit ea, nisi descendant, morbos creare, inter quos paulo post etiam Apoplexiam numerat. An vero illuvies cerebro incumbens & à vasis exclusa Apoplexiam faciat, extrinsecus vasa refrigerando ac congelando, non secus ac pituita aut bilis (quam *Hipp.* l. 1. *de morb.* sanguine frigidiores statuit) sanguini affusa & permixta eum afficiunt? vel an cerebrum premendo viasque spirituum animalium coarctando, illam generent? hujus loci non est disquirere: Alibi fusius de hac re loquendi occasio dabitur.

Deinde observandum, etsi *Hipp.* colli & pectoris vasa sanguifera loca affecta & in quibus coagulatur sanguis, in quibusdam Apoplexiæ speciebus aperte dicat, tamen l. 2. *de Morbis*,

156 EXERCIT. DE LOCO AFF.

in quadam Apoplexia, etiam capitis vasa grumoli & congelati sanguinis sedem ac tanti mali fontem manifeste fatetur, dum ait τῶν ταῦτα πάσχει, ὅταν αἱ ἐν τῇ κεφαλῇ φλέβες θερμανθῶσιν, καὶ θερμανθεῖσαι, εἰρύνωσι φλέγμα ἐς ἑαυτάς. Hic sc. Apoplecticus ita afficitur, ubi capitis venæ (nam hoc nomine & arteriæ apud Hipp. veniunt) calefactæ pituitam ad se attraxerint, Et paulo post: Αἱ φλέβες ἐπὶ ἑαυτάς εἰρύνωσι φλέγμα, ἀνάγκη ὑπὲρ ψυχρότητος τῶ φλέγματος τὸ αἷμα ἐσάναι μᾶλλον νῦν. ἢ ἐν τῷ πρὶν χρόνῳ, καὶ ἐψύχθαι. Venæ postquam ad se phlegma attraxerint, necessum à frigiditate phlegmatis sanguinem subligere magis nunc, quam antea & refrigerari & concreescere: non autem moto sanguine necessario corpus quiescere.

Denique notandum τὴν ἀπάληψιν τῶ φλεβῶν, Hipp. eandem esse cum Galeni ἀφ' ἧς φλεγμονώδης cerebri, ut videre est apud Gal. l. de morb. caus. c. 3. & comment. de vict. rat. in Acut. 4. Quod etiam pluribus probat Petr. Sal. Diversus de Aff. partic. ab aliis omissis c. 2. de Apoplexia sanguinea; alique, id ipsum animadverterunt. Videatur quoque Anus. Foes. Oeconomia Magni Hippocratis.

Præter ἀφ' ἧς φλεγμονώδης, Galenus l. 4. de Loc. Aff. c. 2. alterius loci affecti in Apoplexia meminit, dum dicit. Ἐν τοῖς κάρσις τέ καὶ ταῖς ἐπιληψίαις, αἱ κοιλίαι μὲν μᾶλλον, ἥττον δὲ αὐτὸ τὸ σῶμα τῶ ἐγκεφάλῳ πάσχειν εἰώθεν, ἐν δὲ ταῖς ἀπληξίαις μᾶλλον τὸ σῶμα. In somnibus & Epilepsia ventres magis, corpus cerebri minus affici solet; in Apoplexia vero corpus magis. Quem locum etiam Cl. Hoffmannus allegat in Animadv. in Montan. & Erast. c. 14. par. 33. quo evincere conatur Galenum non obscure deferere ventriculos, ceu Locum affectum, & materiam præscriptam, sc. humorem fri-

frigidum, crassum & lentum; tantam enim vim Adrasteas esse, ut cum fulgorem ejus ferre non posset, manum faciei prætenderit & fugerit. Nutabundum igitur *Galenum* in suas partes trahere adnititur, adducto loco *Gal. ex Comment. 4. de victus rat. in Acut. Hipp.* ubi de ἀπολήψει καὶ πληρώσει τῶν φλεβῶν verba fecit. Verum cum locum hunc varii *Galeni* interpretes diversimode explicant & nulli non vires suas intendunt, ut ventriculorum angustiam atque ita Apoplexiæ causam & sedem, etiam ex hoc *Galeni* pronunciato, eliciant, eum missum faciam. Videantur de hoc textu Authores *Galenum* sibi contrarium concilians, *Massar. Pract. l. 1. c. 13. Cæsalpin. Art. Med. l. 5. c. 37. Petr. Paulus Pered. in schol. ad l. 1. c. 11. Methodi curandi Joh. Mich. Paschalii. Aurel. Anselm. Gerocem. l. 1. c. 4. Hercül. Saxon. Pr. p. 1. c. 12. Jul. Guastavin. Locor. de Medic. select. l. 2. c. 31.* atque alii. Quorum plerique volunt, tantum in ventriculis cerebri vitium esse, ut etiam ad corpus cerebri pertingat, fecus autem in Epilepsia.

Author *de Util. Resp.* qui inter spurios *Galeni* extat; contingere Apoplexiam dicit, ab humore plurimo & crasso, in eo loco, ubi venæ & arteriæ procedentes à corde, transeunt per columnam conjunguntur ad pelliculas cerebri & spinalis medullæ. Quibus Author iste, qui totus *Aristotelicus* est, indigitari videtur, in apoplexia locum affectum esse rete mirabile, aut aliquid ipsi ἀνάλογον.

Ex Arabibus *Avicennam* seligo, qui *Fen. I. tertii, c. 11. Tract. 5.* veluti in compendio causas proximas & loca affecta in Apoplexia tradit; Locum hunc, me flagitante, *Nobil. & Excell. D. D. Henricus Scretæ à Zavorziz. linguarum*
orien-

158 EXERCIT. DE LOCO AFF.

orientalium gnarissimus, in hac secunda editione, ex Arabico exemplo Romæ 1593. excuso ita in Latinum transtulit:

Apoplexia est privatio sensus ac motus partium, orta ab obstructione, quæ fit in ventriculis cerebri ac meatibus spirituum sentientium ac moventium. Et paulo inferius. Hæcque obstructio est vel ab occlusione vel a repletione. Occlusio fit, si quid vel in cerebro corripitur, quod illud dolore afficit aut lædit, ibique motibus contractionis movetur; vel est qualitas conjuncta, quæ suâ indole ceu frigus asperum, contrahit ac incrassat. Repletio autem est vel cum vel sine tumore. Repletio cum tumore fit, si illic materia, quæ partim repletionem partim extensionem obstruit, colligitur; hæcque est ex speciebus apoplexiæ gravissimæ, ac perinde est, sive materia sit calida, sive frigida. Quæ absque tumore est, ac plerumque accidit, hospitatur & in ipso cerebro, & in ejus confinibus, meatibus scilicet spirituum extra cerebrum: estque vel humor sanguineus in ventriculis cerebri subito effusus, vel humor phlegmaticus, qui & potior & frequentior est; fit & in meatibus spirituum juxta cerebrum, quum arteriæ ac venæ a nimia repletionem ac sanguinis copia obstruuntur; hinc prohibito spiritibus transi-

tu

tu haud mora intercedit, quin suffocet: quemadmodum & accidit, quando fit utriusque venæ jugularis constrictio cum abolitione sensus ac motus; non secus si eadem a causis internis fit, eundem quoque effectum producet.

Alios vel Græcos, vel Arabes allegare, operæ pretium esse non dico, cum sua vel ex his desumpserint, vel illis conformia tradiderint.

Hæc principum Medicorum oracula nos manifeste docent, illos obstructionem & oppletionem ventriculorum cerebri in Apoplexia, vel penitus ignorasse, vel, juxta oppletionem & obstructionem, etiam alias causas proximas aliaque loca affecta agnovisse, quæ ad ventriculos nullo modo spectant. A quibus, cum Medici, his pluribus seculis juniores, secessum fecerint atque fere solam ventriculorum cerebri angustiam in Apoplexia accusaverint, causasque illas, quas Principes isti Viri tradiderunt, non nisi quæ ventriculos coarctant & angustiores reddunt, admitterint, atque, ut suæ opinionis assentatores Veteres efficerent, varie illorum sententias torserint, factum est, ut non pauci Recentiorum sibi fumum amplius vendi noluerint, superiorique seculo, instauratâ Anatomîâ, publicis scriptis & officium ventriculorum cerebri, ipsisque falso attributam sedem apoplexiæ oppugnarint.

Quæ cum ita sint, nemo mihi vitio vertet, si tum his prælucentibus, tum nuper invento sanguinis circulari motu persuasus, paulo aliter ac multi, de sede apoplexiæ locutus fuero. Neque enim possibile est, ut ille, qui perpetuum sanguinis fluxum è corde per arterias & refluxum
ejus

160 EXERCIT. DE LOCO AFF.

ejus per venas ad cor in vivis animalibus intellexerit, idem sentiat, cum illis, qui sanguinem perpetuo intra venas stagnare credunt, & nonnisi à partibus penuria aliqua laborantibus attrahi, aut à nuper generato sanguine, lento gradu, protrudi, aut alias ob causas tardissime ad partes transportari putant.

Quo autem felicius affectum locum in Apoplexia indagare valeam, ejus causas proximas & generationis modos simul succincte tradam, cum his neglectis, aliàs minus commode negotium successurum sit. In his vero inquirendis, partim Veterum, partim Recentiorum quorundam vestigia premam, atque Apoplexiam produci ante omnia, ceu in præloquio ponam, vel propter sanguinis per arterias affluxum ad cerebrum denegatum, vel ob spiritus animalis effluxum ex cerebro & cerebello, per nervos & spinalem medullam, prohibitum, vel ob utramque causam, in quibusdam casibus, concurrentem.

Causæ autem hæc præstituræ, primùm tantæ efficacisë esse debent, ut earum vi, omnes actiones animales subito pessundentur, sive se diu, antequam *ἐνέργειαν* suam exserant, indiciis quibusdam, ceu futuræ apoplexiæ prodromis, prodant, sive se prius non ostendant, ut nec à sagacissimo prævideri possint. Deinde in iis, qui ex apoplexia brevi convalescunt, aut in hemiplexiam incurrunt, ita causæ illæ comparatæ esse debent, ut vel subito & brevi tempore removeri queant, vel ita dispositæ sint, ut in dimidiam partem medullæ oblongatæ & spinalis haud difficulter trudi possint. Denique in his apoplexiæ cau-

causis requiritur, ut primariò actiones animales aboleant, si enim secus fiat, potius aliorum affectuum, ut syncopes, exempli gratia, causæ nuncupandæ erunt.

Sanguinis influxum quod attinet, apud omnes in confesso est, eum in omnibus partibus viventis corporis summopere necessarium esse, non solum ut caloris & laborum voracitate deperdita instaurentur, & partes ad statam magnitudinem incrementa sumant, sed vel præcipue, ut perpetuo calore influente imbuantur, ceu principali omnium facultatum instrumento, quo demto, non solum omni agendi potentia partes spoliantur, verum etiam nisi tempestive suppeditas ferat, emoriuntur, ut corruptum præprope re ense recidendum sit, ne pars sincerior adhuc, in idem vitium pertrahatur. Quæ reliquarum corporis partium fors est, eadem vel maxime etiam Cerebrum manet, ac præ reliquis vivifici hujus nectaris perpetuo influxu, ad actiones suas, peragendas, indiget & quam primum influxus iste vel penitus denegatur, vel parcior & minor est, quam ad actiones ejus requiritur, illæ aut abolentur, vel imminuuntur, aut depravantur. Hoc ita se habere pridem Aristotelici ac Medicorum plures multis & evidentibus argumentis præbarunt. Inter hæc sunt etiam Leipothymia & syncope, in quibus, nemo est qui neget, vel tantum spiritus vitales (si omnino sint, qui de sanguine dubitent, cum tamen sine sanguine illa influant nunquam) ad partes non distribui, nec calore influente refocillari. At in his affectibus, antequam ad *ἀναιμία* & vigorem suum pervenerint, dumque cordis & articularum aliquis motus persistat, ægrique adhuc respirant, nec dum labia pallefcunt, nec truncorum instar, ceu emortuum corpus, jacent, prius

aures tinniunt, oculis viridia nigraque obversantur atque ex his sæpe ægri imminentem Leipothymiam præsentiant; mox omnes sensus & motus animales cessant, sæpe adhuc pulsu tangentis manum, licet imbecillè, feriente. Quæ omnia clarissimum testimonium perhibent, quam cito animales actiones vel depraventur, vel immi-
nuantur, vel penitus auferantur, si sanguinis influxus non continuus sit, sed ob cordis vitium interrumpatur penitus, aut saltem non debita ac consuetæ quantitate fiat: etiam antequam cordis actiones penitus cessent.

*Et cui non ex subito, nec prius præviso terrore,
Poplite succiduo genua intremuere fugitque
Et color & sanguis animusque relinquit eun-
tem?*

Nonne præter motus depravationem in artubus, etiam mens turbatur, ut quid vel loquantur, vel agant territi nesciant? Idque nullam aliam ob causam, quam quia à cerebro, aliqua ex parte,

Sanguis abit, mentemque calor corpusque relinquit.

Jam olim *Medici & Philosophi*, ut sanguinis influxum à corde cerebro summopere necessarium certius evincerent, utque cordi soli, præ reliquis in corpore membris, principatum deberi demonstrarent, carotides in collo ligarunt, quibus oclusis ac denegato sanguinis influxu, observarunt animalibus soporem obrepisse & sine motu ac sensu prostrata jacuisse: unde etiam arteriæ nomen illud nactæ sunt.

Verum *Galenus* his adversissimus fuit, qui magnis conatibus cerebri principatum asserere semper adnixus est: unde *Lib. de Util. Respir. c. 5. l. de Us. puls. c. 2. passim in lib. de placit. Hipp.*

Et *Plat.* maxime *l. 2. c. 6.* audacter, & confidenter pronunciat: cerebrum non valde opus habere spiritu à corde, ipsi exiguum commodum ab illo suggeri, exiguumque incommodum ligatis carotidibus persentire; pulsus usum esse partes calore reficere, & spiritibus animalibus materiam præbere, at hunc usum non tanti esse, ut non animal eo aliquandiu carere possit, ejusque defectus aëre refarciri queat: se verò in hac sua opinione certiores evasisse carotidum ligatura, quâ administratâ animal citra omnem offensam perstitit, imo nihil, neque statim, neque postea, passum esse, per integrum diem inspirasse ac expirasse seque movisse. Et hoc non semel, sed sæpius se expertum gloriatur *l. c. de Us. puls.* Monet autem diligenter hæmorrhagiam cavendam esse, ideoque carotidem duobus in locis ligandam, atque inter media vincula dissectandam, sicque animal satis promptum, etiam ad cursum, visum iri. Et ut adversariorum auctoritatem elevet, vel plane annihilat, *de Plat. Hipp. Et Plat. l. cit.* ait illos cum arteriis nervos ligasse, unde animalia obmutuerint, eosque obmutescentiam soporem credidisse.

Quanti vero hoc experimentum *Galenus* faciendum, jam pridem multi præclari *Medici Et Philosophi* indicarunt: omnes nominare superfluum duco. Apponam nervosum hac de re judicium. *Exc. D. Antonidis van der Linden / Physiolog. Med. c. 16. Art. 16. paragr. 231.*

Gloria cum sufflat tumidum Et vigor igneus ar-
mat,

Abripit accensum vincendi vanâ cupido;

Sane Medicum cum Galenus ageret, non Philosophum

phum, cum quid utile arti animo doceret sedato, securus de veritate, veritatem alibi negatam professus semper fuit, apertius quandoque licet, quandoque tectius. Hujus effati veritatem ipsum Galenum, de hac ipsa re, confirmare, in sequentibus dicit: Nam quæ Hipp. de vasorum interceptione in apoplexia tradidit, illum probare ostendit in *Comment. 4. de vict. rat. in ac. l. 23. & de sang. Miss. cap. 5.* Si vero interna ἀποληψίς hæc præstet, quidni & externa? Cum utraque constricta carotide accuratissime occludantur. Insuper authorum testimonia de primo experimento fidem facientium, aliquot allegat, qui l. c. videantur. Concludit verbis Hieron. Rubei, quæ reperiuntur in Annot. ad Cels. l. 2. c. 1. referentis, *observatum ligatas carotides soporem attulisse: neque verisimile esse doctissimum Anatomicum, aut conjunctos nervos imprudenter una cum arteria adstrinxisse, aut eum, qui mutus esset redditus sopore oppressum dixisse.*

Exc. D. Rolpink Dissert. Anat. l. 6. c. 44. cum Cl. D. Hoffmanno & Thom. à Vega, utriusque partis experimentis fidem derogat, quod neutrum ad demonstrationem sufficiat, nec omnis sanguinis commeatus à corde ad cerebrum, carotidum ligatura, intercludatur: nam profundiores & in ima colli parte locatæ arteriæ ligari nequeunt. Et, si rem ipsam fateri velimus, ipsissimam veritatem *Clarissimi isti Viri* locuti sunt. Quisquis enim arteriarum vertebralium ortum, progressum atque introitum in cranium noverit, facile sibi in animum inducet, has arterias, citra præsentissimum animalis interitum, nullo modo vinciri posse, sunt enim profundissimæ & per peculiaria foramina transversorum processuum vertebrarum ad cranium tendunt, & peculiari
fora.

foramine factō cranium intrant. Quid autem vertebrales arteriæ præstent, facile ex earum magnitudine & dispersione per cerebrum & cerebellum divinari poterit : de qua re videantur plura supra p. 106.

Galenus tamen disputationis fervore abreptus, ut contra *Aristotelem*, *Praxagoram*, *Erasistratum* aliosque evinceret, cor non magna commoda cerebro conferre ad generandos & fovendos spiritus animales, non persistit in his, sed ulterius statuit *de Placit. Hipp. & Plat. l. 2. c. 6.* non solum carotidibus ligatis & præcis, verum etiam venis eodem modo affectis, actiones animales nihilominus peragi posse. Cum enim alibi crebrius docuisset venas & arterias passim anastomosijungi, atque hæc vasa sibi mutuo contenta impertire, arteriasque ex venis, venas ex arteriis aliquid accipere, ut omnia præcidat, quæ *Peripateticis* quocunque modo favere possent, addidit, etiam venis vinctis & dissectis, non grave damnum animalia persentire actionesque cerebro proprias, motum, sc. & sensus, inculparte diu perficere posse. Imo modicum atque residuum calorem ex prægresso incendio, quod cerebro perpetuus spirituum vitalium influxus naturaliter affert, sufficere ad actiones illas peragendas : Et cum spiritus animales in perpetuo fluxu sint, tum hic, tum alibi, illos ab inspirato aëre abunde refocillari atque reparari, ut caloris communicatione diu, sine detrimento, cerebrum carere possit.

Verum *Galenum* falsitatis arguere possunt, non solum *leipothymia*, *syncope* & *suffocatione* ab utero ægrotantes, sed & *suspensio* mulctati : In illis enim quam primum influxus sanguinis à corde ad cerebrum denegari incipit ; actiones ani-

males primum labefactantur, mox penitus abolentur, diuque sæpe abolitæ manent, donec scilicet sanguis è præcordiis & centro ad circumferentiam & totum habitum denuo & pristino impetu diffundatur; In his vel præcipue etiam actiones animales abolentur, quia sanguinis influxus per carotides, tum refluxus per jugulares præpeditur; unde non solum maxima ex parte cerebrum arterioso sanguine defraudatur, sed & illius, qui per vertebrales adhuc irruit, refluxus per jugulares resti constrictas prohibetur, ac propterea vasa cerebri *Ἀράσει* quandam *φλεγμονώδως* seu *τῶν φλεβῶν ἀνέληψιν* incurrunt, atque ita apoplectici quidpiam patiuntur, *Galeno* etiam vel invito assensuro, qui ut supra dictum, cum *Hippocrate* talem Apoplexiæ modum admittit.

Nec est ut quispiam putet, in laqueo suffocatis omnimodam inspirationis interceptionem *Galeno* patrocinari, eò quod ex ipsius opinione aër inspiratus præcipua materia spirituum animalium sit, quo, respiratione læsa, privatur. Non ea afferam argumenta, quibus recentiores solidissimè probarunt aërem per os & nares attractum, nullatenus ad cerebrum perferri, nec hac ratione spiritus animales ab eo sustentari: Sufficiet hac vice actiones animales in multis diu persistere ac inoffense peragi, respiratione nulla suscepta, quod vel soli urinatores, horarum spatiis sub aquis delitescentes, ac in profundum mare projecta inquirentes feliciterque in apricum proferentes, probare possunt. Tacebo pisces, citra respirationis adminiculum, vel omnino rarissima respiratione facta (nam sunt, qui non sine rationibus asserunt, pisces quoque respiratione uti, de qua *Exc. Marc. Aurel. Severinus* integrum tractatum pollicitus est) nihilominus omnes

omnes actiones animales obire, si cætera salva sint, nimirum sanguinis à corde influxus; imo plerique piscium aëri expositi languidiores redduntur ac cito expirant. Novi ab utero suffocatas ad sensum non respirasse, & tamen anxie sollicitudinis & dictorum ab astantibus prolatorum, paroxysmo cessante, probe recordasse.

Si forte quispiam esset, qui existimaret, ideo actiones animales aboleri in suspensis, quod spinalis quoque medulla à laqueo aliquid patiatur, non parum semet falleret, nam spinalis medulla vertebris inclusa nullatenus afficitur à resti, neque enim vertebræ ossæ, quacunque etiam vi constriçto vinculo, cedunt premuntve medullam; & posito, quod tamen impossibile est, vertebrae coarctari, at remanerent partes supra vinculum à labe immunes, capitisque sensus, & quarundam ejus partium motus permaneret.

Ut autem evidentius constet, in strangulatis magis animales actiones, quam vitales, pati atque illas præ his aboleri, non læsis nervis, aut cerebro, nisi quatenus influxus per jugulares impeditur, rem historiâ suspensæ cujusdam Anglæ, quæ à resti libera, Medicorum industria penitus convaluit, à Medicinæ perito in lingua Anglicana, & nuper in Germanicam translata, Norimbergæ recusa fuit. Commodiori quidem loco inferius inferenda fuisset, ne tamen quidpiam hoc in discursu contra *Galenum* mancum sit, hic eam haud inepte subjungi posse putavi.

Anna Greane, ætatis anno 22. staturæ mediocris, carnosæ & robusta, inprægnata fuit à juvene quodam; 16. septimana abortiit. Accusata fuit infanticidii ac postquam tribus septimanis in carcere detenta fuisset, Anno 1650. 14. Decembr.

Oxonix ad patibulum damnabatur. Postquam ad supplicii locum venisset, psalmum cecinit, & quædam pro causæ suæ bonitate ac innocentia effata est: mox è scala præcipitata, per dimidiam horam è furca pependit. Consanguinei, qui supplicium subeunti adstabant, ut poenæ acerbitem cito morte effugeret, omnia, quæ ad illam accelerandam faciunt, ausi sunt: quidam miseræ pectus pugnis cædebant, quidam pedes omni nixu attrahebant, alii pendulum corpus elevabant, ut pondere suo delabens, arctius restim constringeret: hæcque tanta violentia peragebant, ut iudices laquei lacerationem verentes, eos à crudeli hac pietate abarcuerint. Mortua ab omnibus credita à furca sublata, in loculum feralem recondita & ad vicinam domum deportata fuit, ubi Medici cadaver exspectabant, illud aperturi. Referato loculo, observatum illam respirando subobscurè quasi stertere. Quidam astantium si forte vitæ quidpiam superesset, illud eliminaturus, pectus pugnis contudit.

Paulo post advenerunt D. Petty, Anatomix Professor, & D. Willis, qui illam in loculo extensam, tempestate frigida, in conclavi frigido, respirantem animadvertentes, mentem suam mutarunt, ac de reparanda valetudine ipsaque è mortis faucibus eripienda consilium iniverunt. Itaque illam adhuc in capulo decubuant erexerunt dentesque firmiter junctos diduxerunt, & spiritus calidos ac roborantes infuderunt: unde se plus movere, obscure tussire, paulo post manus aperire ac corporis extrema scalpere cæpit: quæ omnia intra horæ quadrantem eveniebant. Interea aliquoties cordiales aquas infuderunt, laryngemque penna titillarunt, unde oculos aperuit, mox tamen iterum clausit. Medici in extremis

mis calorem observantes, de venæ sectione cogitarunt. Ligato autem brachio convellebatur: nihilominus, pertusa vena, uncias quinque sanguinis emisérunt, qui prompte & velociter erupit, ut vix fisti potuerit. Toto hoc tempore pulsus erat debilis & parvus, rarius intermittens. Brachio à vinculis soluto, ac sæpius, sed paulatim aqua roborante in fauces instillata, se magis magisque pluribus in locis movebat. Hinc in lectum calidum manibus pedibusque obligatam collocarunt, ac cervicem, tempora, pedumque plantas oleis & spiritibus calidis inunxerunt, unde denuo oculos aperuit, imasque corporis partes movere cæpit.

Medicis his accesserunt D. Batthurst & D. Clerke, in curatione comites laborumque socii futuri. Pectori contuso cataplasma apposuerunt: clysteres calidos, in quibus aromata decocta fuerunt, ad calefacienda intestina, injiciendos curarunt: fœminæque cuidam persuaserunt, ut nuda misellæ accumberet. Circa meridiem sudavit. Facies intumescere tum cæpit, & rubebat admodum ibi, ubi laquei nodus necebat. Toto hoc tempore sæpius oculos aperuit, at statim iterum clausit: & quamvis crebrius compellata fuisset, nullo tamen indiciolo, se vel audire, vel loqui posse, prodidit. Non longè post denuo tentarunt, num alloquentes intelligeret, petieruntque ut vel niſtando, vel manus movendo indicium præberet: quod oculos parum aperiendo præstitit. Hinc veriti faciem tumidiorem evasuram, & ob vasorum obstructionem, sanguine veluti suffocato, febrim suborituram, denuo novem sanguinis uncias ex dextro brachio emisérunt, & hac nocte ab illa discesserunt. Post bihorium clare & distincte aliquot verba protulit.

170 EXERCIT. DE LOCO AFF.

Die 15. Decembris, hora 8. matutina, eam invisentes melius valere offenderunt, atque ad quæsitâ respondere valentem. Conquestâ est imprimis de laryngis dolore, & faucium siccitate, nulla mentione, de aliarum partium dolore, factâ: itaque cataplasma collo circumposuerunt: Julepum & cerevisiam calidam, faucium causa, propinatam averfabatur, delectabatur frigida, pro qua etiam gratias egit. Hoc tempore secum mussitavit ac suspiria duxit, ac si pristina anxietas, de subeundo supplicio, pectus versaret. Circa meridiem pectus & latera dolebant, nihil vero discoloris à contusione videbatur. Nocte clyster injectus & pectori lateribusque cataplasma, ad dissipandum grumosum sanguinem, appositum fuit. Hora 9. noctis ridebat, vultu sereno alacrique animo loquebatur: facies rite colorata: & quamvis febricitaret, lingua tamen nec arida, aut rimosa, aut flava vel pituita obstita erat.

Die 16. Decemb. post somnum febris non crevit. Iterum sex sanguinis uncia ex sinistro brachio emissæ fuerunt. A. V. S. nec debilis, nec pusillanimis facta est: sermo promptus: querelæ tantum de cervice, larynge & pectore. Medici sciscitabantur ante peractam V. S. quæ mens ipsi fuerit, priusquam supplicium adiret? Respondit, postquam matri vestes tradidisset, atque audivisset poenæ sociam catenis liberam, ad supplicium raptam esse, omnium se oblitam fuisse, imo nec meminisse se unquam vinculis solutam, vel psalmos cecinisse, vel quidquam verborum ad spectatores effatam esse: quamvis testes adfuerint dictorum ipsius memores. Carnificis tantum recordabatur, singulariter vestiti. Postquam mentem recuperavit, solum de subeundo

eundo supplicio anxia erat, ac si ipsam maneret adhuc poena, quam pridem perpeſſa erat. Nocte hac latera aliæque contuſæ partes corporis inflammabantur, livebant, veſiculæ erumpabant, ac verſicolora erant: rubebat gena dextra, intumuitque cervix.

Die 17. Dec. Ipfæ ſenſit pulſum arteriarum: lingua tamen nec aſpera, nec ſicca: prægreſſa nocte bene dormivit. Mane ſurgenti caput tam debile erat, ut erecta ſtare nequirit: dolorem queſta eſt in fundo ventriculi: Linguae extremus apex ipſi quaſi emortuus videbatur, quem forte inter ſupplicii cruciatus momordit. Petiit panis fruſtulum, quod toſtum & cereviſia madidum accepit. Veſperi cervicis & laryngis dolores remiſerunt: ſtupidus manſit linguae apex. Nocte hac 6. ſeptemve horis dormiit.

Die 18. Dec. ſurrexit, comedit portiunculam gallinæ juvenculæ. Omnia ſymptomata, videntibus quaſi Medicis, declinabant: nondum tamen ſola abſque ſuſtentaculo incedere valuit. Cervix tumida meliora ſpoſpondit: ſtupor linguae deſinere cæpit: ac tota hac nocte optime dormiit. Poſt quatrimum, & quod amplius eſt, cum tempeſtas frigidior eſſet, liveſcebat ima brachii pars & hypogaſtrium dextrum, prope pubem, quæ ſenſim flavescens, quinque dierum ſpatio evanuit. Pectoris & laterum dolor reſpirando exacerbatus, ac inæqualis pulſus, contuſioni ac extravafato ſanguini intra pulmones tributus, Medicorum diligentia, hoc temporis tractu, evanuerunt: Linguaeque ac cervicis vitia ceſſarunt.

Supererat ſola vertigo, quæ ipſi moleſta fuit, quoties vel ſurgebat, vel ambulabat: quæ tamen brevi ſublata fuit. Cum itaque omnia vitæ

munia, inoffenso pede, iterum obire potuisset, ea prorsus ratione, ac ante hoc infortunium valuit, ad suos domum dimissa fuit: Reportatis innocentiae trophæis, bona valetudine & ferali loculo. Tantum valuit, benedicente Deo, Medicorum industria & prudentia!

Etsi plurima consideratione dignissima huic historiae insint, quæ Medicum & rerum naturalium admiratorem in plurimis erudire possent, non tamen omnia, sed præcipue ad rem præsentem facientia notabimus. Primum itaque patet, dato collo, actiones animales omnes, brevi temporis spatio, tum à furca pendulæ, tum à furca demissæ aliquandiu abolitas fuisse, instarque apoplecticæ juvenculam hanc jacuisse. Cum enim vulgus eos emortuos credat, qui nec sensu, nec motu aliquo animali (ad quem suo modo respiratio referri potest) vitæ superstitis testimonia suggerunt, illa quoque cadaver existimata fuit: nec enim alias justitiæ rigor unquam concessisset, illam ab infami ligno liberandam ac afflictissimum collum tam mature enodandum esse, si vel minima residuæ vitæ suspicio animadverti potuisset. Medici equidem accuratius in hanc inquirunt, non solum pulsum & cordis motum sollicita mente indagando, sed etiam respirationem, lanam carminatam & specula nitida ori admovendo, & cyathos aqua plenos pectori imponendo, explorant: quod hoc loco fecisse neque decorum, neque necessarium fuisset. Certum est ad sensum omnes animales actiones abolitas fuisse: nam è furca sublata, nullum membrum movit; in capulum ferale locata percussaque ab adstante, nullum sensus indicium præbuit; quamvis tum respirare iterum cæpisset. Nec est ut quisquam existimet, illam, ob metum denuo adeun-

di

di supplicii, dolorem occultasse : nam non obscure ex historia patet, sensus quoque internos abolitos fuisse, cum plura ignoraverit eorum, quæ in principio supplicii peregerat, nihilque eorum sciverit, quæ tunc secum acta fuerunt : nam immemor omnium erat, recordabatur tantum carnificis, postquam ad se rediit, vel quod forte larvatus fuerit, vel quod præ reliquis, ceu apertus vitæ inimicus, ipsi terribilis esset. Præterea nec vidit, nec audivit aliquandiu à cruce libera : nec locuta est, non tam ob instrumentorum vocis læsionem à laqueo (nam paulo post adhibita remedia & V. S. loqui cæpit) quam quod adstantes nondum intellexerat & mente vel turbata, vel ab agendo, penitus cessante, nulla animi sensa componere & expromere potuerat. Denique diu partes à contusione & resti læsæ, stupidæ manserunt, ut non, nisi longo tempore post, de dolore cervicis, laryngis, pectoris, laterumque, ut & de linguæ extremæ stupore conquesta fuerit.

Deinde observandum actiones has animales tam subito ablatas fuisse, non cerebro, cerebello, aut eorum ventriculis læsis, ut *Galenus* credidisset, nulla enim vis capiti illata fuit, si commercium, quod cordi cum cerebro est, interceptum excipias. Nec medullæ spinali, aut nervis per collum descendentibus hæc actionum animalium deperditio adscribenda est; nam licet hæc à laqueo compressa concederem, perstitissent tamen partium quarundam capitis sensus & motus integri: Imo si cerebrum cordis ope non tanto pere indigeret, omnibus sensibus internis etiam suus vigor adhuc mansisset.

An autem hæc sensuum & motus abolitio leipothymia tribuenda sit? dubito. Etsi enim plu-

174 EXERCIT. DE LOCO AFF.

rima sint, quæ juvenculæ isti leipothyimiam, addo & syncopen accersere potuissent : atque imprimis præcordiorum percussiones crebrius repetitæ, ut in vulgus notum est, validæ satis sint, ad symptomata hæc inducenda, cum violenti ejusmodi insultus ad ventriculum pertingant, qui nervis abundat, & horum quoque beneficio, plurimum cum corde consentit. Alia tamen ratio est horum, quorum res ad restim pervenit, quam cæterorum, quibus, alias sanis, hæc ab externa causa eveniunt. Quam primum enim è scala præcipitati in aëre pendent, constricto arctius laqueo, stupor in toto corpore & consequenter in ventriculo obrepit, unde minus tales læsiones perferunt ventriculus, minusque cor in sympathiam trahit. Hinc etiam Juvencula ista, utcumque impetuosissime præcordia pugnis dedolata fuerint, non statim, jam recuperatis sensu & motu, de dolore harum partium sed aliquandiu post, querebatur. Cum ante aliquot annos ad *Illustrissimum Comitem Fridericum à Furstenberg, p. m.* vocatus fuissém, viæ dux, Rusticus quidam Hondingensis, datus est, qui mihi inter alia narravit, in publica Germaniæ calamitate, à militibus aliquando se captum, vicinæque arbori appensum fuisse, constrictoque laqueo, se ab arbore pendulum, ne minimum dolorem perpeßum esse; cumque laqueo sive rupto, sive præciso, hanc mortem evasisset, se sine omni sensu, aliquot horis, profundo quasi sopore sepultum, jacuisse, tandem citra omnem humanam opem ad se rediisse, ac in vicina dumeta aufugisse, persuasus penitus, nullum mitius mortis genus suspendio esse: quod per me credat.

Et revera leipothyimiam, in hac Juvencula, suspendii tempore, vel saltem à laqueo libera-

tæ, cum sensus & motus animales adhuc aboliti essent, abfuisse, non pauca probant: nam extrema calebant, & cum *D. Petty* ipsam accessisset, arterias, licet obscurius, pulsasse deprehendit, ac respiravit, actionibus animalibus adhuc quiescentibus: Et omnium luculentissime cor in opere suo non obtorpuisse, sed validum ac strenuum perstitisse, venæ sectio edocet: pertusa enim vena, sanguis promptissime erupit, & quidem tanto impetu, ut vix sisti potuerit: Secus ac fieri solet, si in motu suo elanguescat; ut videre est in *αιματοφείσας*, si leipothymia in V. S. obruantur, tum enim statim sistitur sanguinis effluxus, aut non nisi stillatim elabitur: Corde autem penitus emortuo, plane nullus in sanguine, discissa vena vel arteria, impetus observatur; si verò effluat, id ipsi, quod aliis corporibus humidis & gravibus contingere solet, evenit.

Denique observandum tam cito Juvenulam hanc pristinam valetudinem recuperasse, partim ob Medicorum industriam, partim ob tempus suspendij brevius. Cum enim robusta & *εὐσχεύη* esset, nec vertebrales arteriæ non tam ob colli crassitiem, quam ob earundem securum & contra tales injurias probe munitum ad cerebrum incessum, constrictæ fuissent, cor vividum vegetumque per has arterias semper patulas multum sanguinis ad cerebrum & cerebellum transmisit, qui illa tum refocillavit, tum stagnantem in rivis & sinubus sanguinem per jugulares, remoto laqueo, mature propulsavit, atque partes istas levavit onere, non minus molesto atque erat spirituum & sanguinis arteriosi, qui per carotides influere debuerat, denegatio: unde paulo postquam à patibulo demissa esset, respirare cepit.

Quam-

176 EXERCIT. DE LOCO AFF.

Quamprimum verò insuper Medicorum industria accessit, magis magisque reliquæ actiones repullulare cæperunt. Hi enim omnem suam sollicitudinem eo direxisse videntur, ut sanguini liberum & solitum motum conciliarent: Proinde, diducto ore, infuderunt spiritus & aquas cor, parva quantitate, efficacissime roborantes; sanguinis copiam, onerosam aliàs gravato cordi futuram, imminuerunt, atque iteratis vicibus ad viginti uncias extraxerunt, unde sanguinis mole levatum, reliquum eo facilius & promptius in universum corpus dispergere potuit, eumque qui in venis, vel stagnavit, vel ignavius movebatur, avidius ad se pellexit: collo cataplasma circumposuerunt, ac totum oleis & spiritibus calidis inunxerunt, ut contusa discuterentur, liberiorque sanguis per carotides ad caput flueret, & per jugulares remearet: Clysteres aromatibus conditos injiciendos curarunt, tum ut fæces, intestinis forte molestiores aliisque partibus nocentiores futuras, educerent, tum ut sanguinis torpidioris in vasis mesentericis motum promoverent. Hinc factum est, ut primum manibus scalpere, mox oculos aperire & plures partes movere & tussire potuerit: postea, amplius Medicorum dexteritate adjuta, adstantes intelligere, loqui, videre, ridere potuit, atque dolorem & stuporem in partibus contusis sensit: tandemque omnes actiones, paucorum dierum spatio emenso, rite, ceu sana, denuo obire valuit.

Cæteris omnibus reparatis, vertigo aliquandiu remansit, forte quia sanguis, in arteriis & venis capillaribus, per medullosam cerebri substantiam dispersis, stagnavit, viasque animalium spirituum premendo, eorundem liberum motum aliqua ex parte impedivit; verum restituto pristino

stino sanguinis motu, & hoc symptoma brevi cessavit.

Memorabilis est convulsio, quæ ligato brachio ante venæ sectionem accidit: quæ oborta est nervis à vinculo pressis, colli nervos aliàs à suspendio afflicto, in consensum rapientibus: vel quia constrictis venis & arteriis in brachio, sanguis copiosior ad cerebrum, aliàs à sanguine obutum, properavit. Nam sanguine emisso & soluto vinculo cessavit. Reliqua huc non pertinentia prætereo.

Non dubito, si vertebrales arteriæ apud istam juvenulam occlusæ fuissent, à luxatis vertebis, quin doctissimi hi Viri oleum & operam perdidissent. Aliquando ad pistorem quendam, sexaginta circiter annos habentem, vocatus fui, qui è scala delapsus, vehementer cervicem pedi scallæ impegit, unde subito omnium partium infra collum paralytis subsecuta est: octavo die post apoplecticus decessit. Procul dubio ob luxatas vertebrales paralytis accidit, quæ autem apoplexiæ causa fuerit, certo dicere nequeo, cum cada-veris apertio mihi non concessa fuerit. De sanguine extra vasato intra cranium, dubito, nam altero die post casum, quo ipsum conveneram, congrue de omnibus rebus loquebatur & cum lacrymis miseriam suam deploravit. Quod & sexto adhuc die fecit. An ob inflammationem post casum partibus imis colli accedentem, vertebrales, propter luxationem angustiores, amplius coarctatæ fuerint? unde cerebrum non contemnendo sanguinis arteriosi influxu privatum, ad apoplexiam dispositum fuit, quæ senem eo facilius, alias ob causas concurrentes, obruere valuit. Alias puerum novi ceraso delapsum, similem in paralytin incurrisse, qui tamen inter-

grum

178 EXERCIT. DE LOCO AFF.

grum biennium superstes fuit, cujus historiam suo loco tradam. Dum Patavii Medicinæ operam dedi, aliquot latrones simul suspendio multatos vidi. E scala dejecti priores sinebantur, donec ultimus numerum complevisset. Interea, qui primi supplicium adibant, pedes concutiebant, linguas exserebant ac oculos pervertebant. Hinc Carnifex crudelissime singulorum humeris insultavit, ac pede caput in transversum egit, atque ita, quicquid vitæ residuum supererat, in momento extinxit. Aliquot studiosi Medicinæ petiimus unum alterumve cadaver, scrutaturi vertebrarum luxationem aliaque ad rem nostram factura: verum, ob criminum atrocitatem, frustillatim, in viis publicis, triste spectaculum & terribile facinorosis exemplum futuri, suspendendi erant, sic spe nostra frustrati fuimus.

Omnia autem clarissime capite plexi demonstrant, quam cerebrum indigum cordis perpetua & non interrupta ope sit, quam primum enim caput cervice recisum est, omnis sensus & motus animalis, etiam in capite, moritur. Cum tamen si cerebrum sibi sufficeret, nullaque vel exigua commoda, ad animales functiones perficiendas, à corde acciperet ad minimum palpebræ & oculi tacti sentire & se movere deberent, imprimis si oculi pungerentur, utpote exquisitissimo sensu præditi, quod autem neminem mortalium animadvertisse, puto. At videtur eo ipso momento, quo caput decollatum fuit, etiam splendorem suum oculos amittere, unde quo in loco res cerebri tum sint, facile divinari possit. Nec quicquam *Galenum* juvabit, si dicatur illos, præ supplicii horrore, tantum non jam mortuos esse: quam ob rem enim tales existunt? nisi quam quod cor trepidum, sanguinem

nem torpidius ad extrema caputque protrudit.

Atque ita ex his patet, cerebro continuum sanguinis influxum per arterias, tum ob alia, tum ad actiones animales peragendas, omnino summe necessarium esse, & si forte eo defraudetur, statim omnes ejus actiones penitus cessare. An verò ab interna causa & citra cordis vitium idem evenire possit? dispiciendum utique erit: nisi enim constet ab interna causa tale quidpiam contingere, non possumus sanguini denegato culpam impingere, cum plerique apoplecticorum, citra causam externam, aut violentam corruant: si verò cordis vitio sanguis non influat, syncope, non apoplexia generabitur.

Ut verò clarius evincere valeam, apoplexiam quandoque contingere, sanguine, debita & ad actiones animales sufficiente quantitate cerebro non impertito, id fieri dicendum, vel ob articularum carotidum internarum & vertebrarum obstructionem, vel propter earundem compressionem, vel denique aperto p. n. intra cranium vase & copiose profuso sanguine, alias ad commoda cerebri cessuro.

Obstructionem primum quod attinet, de ea pridem dubitatum fuit & adhuc ambigi potest. Cum enim sanguis, qui per arterias carotides & vertebrales è sinistro cordis ventriculo ad cerebrum ejectionatur, nuper admodum per minutissima capillamenta venæ arteriosæ in arteriam venosam transfusus & quasi percolatus fuerit: quin etiam juxta *Cl. Jacobi de Bak lib. de Corde S. 2. c. 5.* aëre permixto, tenuior & subtilior redditus sit: insuper in cordis sinistrum ventriculum in-

M

fusus,

fusus, novas vires novumque calorem, five ab infuso fontis calido, five à validiore ex corde excussione, acquisiverit, nullatenus credibile videtur, sanguini permisceri viscidos atque lentos humores, sufficientes futuros ad arteriarum carotidum & vertebralium cavitatem amplissimam, respectu capillamentorum, quæ paulo ante sanguis permeaverat, obturandam, sanguinisque liberum transitum ad cerebrum & cerebellum penitus prohibendum.

Nec est, ut sensim in his arteriis tales humiditates coacervari putetur: cum enim rectæ sint à corde ad cranium, nullibique, ut *Cl. Nymann. de Apopl. cap. 15.* loquitur, contortæ: motusque sanguinis per eas nunquam interrumpatur in sanis, quales plerique apoplecticorum ante insultum existimantur, isque validissimus sit, ceu cordi propior, unde nulla mora vel quies humoribus talibus, ad cumulationem obstructioni suffecturam concedetur, sed protinus ulterius propellentur. Et si forte aliquid horum humorum in una alterave harum arteriarum colligatur, quod temporis progressu obstructionem parere possit, quis credet in omnibus his quatuor fontibus talem ac tantam humiditatem cumulatam iri, quæ simul ac semel & in momento quasi omnes prope cerebrum oppilet? Imo si in omnibus quatuor arteriis sensim cumulari concedatur, adhuc tamen dubitari posset illam omnem sanguinis aditum prohibeturam: nam sanguinis irruentis impetus hoc in loco vehemens est, arteriæque membranæ sunt, atque propterea ad distensionem aptæ, sanguinis impulsui cedentes, quæ ampliores redditæ, aliquem saltem sanguinis transitum permissuræ sunt.

Utcunque autem hæc argumenta valida appareant,

reant, & apoplexiæ generationem ab obstructione harum arteriarum, eo loci, ubi cranium subeunt, rarò vel nunquam contingentem probare videantur, non tamen omnino impossibile existimo. Atque ut hoc credam: me persuadent corpora sive pituitosa, sive fibrosa, quæ sæpius in cadaveribus cachecticorum, diuque & frequenter ex morbis decubantium inveni. Ut plurimum hæc corpora radices agunt in cavernis thalammorum cordis atque ibidem non rarò ad notabilem magnitudinem excrescunt, & ut Cl. Viri observarunt, quandoque ovi gallinacei magnitudinem superant: hinc è sinistro ventriculo ramos sursum deorsumque per aortam emittunt, qui pro arteriarum capacitate & numero in plures & minutiores ramusculos pariter dirimuntur, adeò ut reperto tali corpore in una arteriarum, non dubitarim simile in alia quavis arteria latitatum, periculumque faciendo, rem ita se habere sensibus comperii. In foemina quadam diu asthmatica, & cum cordis palpitatione conflante, tandem cardiaca syncope interemta, ulnæ longitudinem superantes ramos ex aorta extraxi. Adeo ut non dubitem talia corpora etiam carotides internas, & vertebrales prope cerebrum subire, imo ulterius progredi, & reapse in Jacobo Knoll his in oris reperi, de quo supra p. 116.

Si itaque fibrosa hæc corpora, infelicia ægri cordis germina, pariter carotides & vertebrales arterias non procul ab ingressu intra cranium, aut in ipso ingressus loco occupent; non dubito haud difficulter obstructionem oborituram; & quidem talem, quâ ostia harum arteriarum vel penitus occludantur, vel saltem angustiora eatenus reddantur, ut sanguis sufficiente, ad cere-

bri refectionem & spirituum animalium generationem, copia influere nequeat. Cum enim non raro sanguis ad vehementiorem motum, & præter solitum concitetur vel ob animi, vel corporis motum, vel ab assumtis calidis, vino imprimis, aut ejus spiritu, impetuosius cerebrum versus quoque ruit, unde facile corpora hæc abrumpuntur, maxime si fracida sint, ut in Jacobo Knoll/ atque pertinacius harum arteriarum ostiis impinguntur, eaque penitus occludunt; Vel si forte tenaciora existant, ut non raro sunt, nihilominus obstructio obvenire poterit, tum à copia irruentis sanguinis, tum à corporibus istis, simul & quasi conjurato ad obstructionem concurrentibus; qualia obstructionum genera, ab humorum & sanguinis copia, sibimet mole & redundantia viam præpedientium, passim non solum recentiores, sed & Principes Medicorum memorant: atque idem evenire dicitur, quod in vitris oblongo & angusto collo præditis observatur, è quibus, licet humore impleta sint, parum vel nihil humoris exstillat, si subito invertantur, humore tenui totum orificium occupante. Quamvis sint, qui vacui metu id fieri dicant; alii tamen sunt, qui, liquore subito ad orificium majore quantitate decumbente, contingere ajunt, quam ut ex angusto spatio elabi possit. Forte etiam crassities & lentor sanguinis, contractus vel à visceris alicujus coquentis vitio, vel ab assumtis alimentis vitiosi succi, ad obstructionem aliquid conferet, occupatis scilicet jam his arteriis à corporibus istis fibrosis: de qua re inferius pluribus.

Nec est ut dicatur has arterias ægrius obstructionem passuras, quia membranæ sint, cordique propinquæ & per quas valide & fere recta
sur-

furfum fanguis cerebrum verfus pellatur; utriusque enim arteriæ ingreffus intra cranium ita conftitutus eft, ut quacunq; etiam vi accedente, nullo modo amplius diffendi valeant. Vertebrales namque utrinque per peculiare foramen cerebrum fubeunt, quod accurate magnitudini arteriarum refpondet, quodque totum illæ occupant. Carotides autem, præter quam quod per canalem offeum, fub offe petrofo, feruntur, appropinquantes duræ membranæ protinus perforandæ, fub anteriore ἀμφώδι, quafi per circum offeum, meant ac tranfeuntes duram meningem, ab ea undique ambiuntur, eo loci ubi craffiffima eft & pertinaciffime bafi cranii adhæret, adeo ut non minus hæ ad dilatationem difficiles fint, quam vertebrales. Si itaque arteriæ hæ obftrictæ fint, accedente fanguinis impetu, corpus obftruens inagis magisque impingetur, ac pertinacior obftrictio evadet

Neque adeo rectæ funt nullibique contortæ hæ arteriæ in progreflu fuo ad cerebrum, ut *Cl. Nymannus* ftatuebat, nam ut ex fig. fupra pofita videre eft, utraq; carotis mire flexuofa & incurva prope fellam equinam reperitur; præterea ibidem ventricofior & amplior eft, atque ante ingreffum in canalem erat, unde humores vifcidī, lenti atque hæc corpora fibrofa facilius nidulari atque incrementa capere poffunt, quæ, fanguine impetuofo commoto, verfus introitum anguftiorem adacta, citius obftructionem efficient, quæ eo validior & infuperabilior eveniet, quo impetus fanguinis vehementior fuerit.

Verum objiciet hic aliquis, fi corpora hæc pituitofa in corde primas radices agunt, ibi adolefcunt atque hinc æqualiter, pro numero arte-

184 EXERCIT. DE LOCO AFF.

riarum, disperguntur, non tam apoplexiam, quam alios affectus producent, æque hominem è medio auferentes: quales sunt orthopnœa, syncope cardiaca & similes, quos talia corpora produxisse passim Clari Viri memorarunt, nulla de concurrente Apoplexia facta mentione.

Fatendum equidem illos, in quorum corde & arteriis hujusmodi corpora delitescent, nunquam integra valetudine frui, sed iis cor palpitare, difficulter respirare, in omnibus actionibus torpidiores esse, faciemque illis & manus fædo livore conspurcari quin etiam accedentibus aliis causis morbificis, siue internis, siue externis, aut morbo alterius partis, istos subito interfici, non oboriente apoplexia vere sic dicta. At nihilominus existimo Apoplexiam quandoque lethiferam ab illis effici, quæ syncope nullatenus dicenda, cum permanentibus actionibus vitalibus, omnes animales aboleri ab his corporibus queant. Cum enim, ut supra dictum, ea arteriarum & vertebraliū & carotidum conditio prope cerebrum sit, ut amplius distendi nequeant, si occupentur penitus tum ab his corporibus, tum aliis humoribus ad obstructionem pariendam concurrentibus, omnino apoplexia continget, citra alios mortiferos affectus: reliquæ namque arteriæ & cor ipsum, utcunque hæc corpora contineant, aliquem tamen & ad vitam sufficientem sanguini transitum concedunt, unde abolitis omnibus animalibus, vitales aliquandiu superstites esse possunt. Cum enim cor & arteriæ molles partes sint & ad distensionem aptæ, si talia corpora in illis hospitent, sanguine vehementius moto cedent, amplioresque evadent.

Basileæ Anno 1644. cum *Cl. D. D. Felice Platero, Magni Plateri ex fratre nepote*, Fœminam

nam aſcite & anafarca diu ægrotantem, tandem-
 que fatis concedentem aperui, invenimus cordis
 finiftrum ventriculum & aortam arteriam, in
 quibus hæc corpora contenta erant, tantum non
 duplo majores fuiſſe naturalibus. Atque ob hanc
 rationem fit, ut, licet æqualiter per arterias,
 imprimis majores hæc corpora diſpergantur, non
 æque tamen damnosa ſint. Hinc quoque obſer-
 vatum quosdam cum iſtis corporibus diu ſatis
 commode vixiſſe, atque pleraque vitæ munia
 obiviſſe; & licet per periodos, aut ob cauſam
 externam quandoque vehementer cor palpitaret,
 pulſus inæqualis diu fuerit, sæpeque aſthma ve-
 hemens afflixiſſet, non tamen ſtatim occubiſſet.
 Utcunque enim ſanguis ad impetum proritatus
 in cor irruat atque ipſi ſuffocationem minetur,
 quia tamen in motu ſuo validum eſt, imprimis
 ſi ad has anguſtias redigatur, ſtatim exſurgit &
 quod moleſtum eſt ejicere omnibus viribus an-
 nittitur, quod haud adeo difficulter præſtat,
 dum per patulam & membraneam aortam noxium
 evomere qualibet ſyſtole poteſt, aortâ impulſo
 ſanguini non pertinaciter obſiſtente, ſed poſt tot
 expulſiones cedente. Unde quidem tunc cor à
 moleſtia aliquo modo liberatur, graviora paſſu-
 ro cerebro, ſi ab expulſo ſanguine obſtructio
 gignatur, Quamvis negari non poſſit, ſi cor lan-
 guidum ſit, nec ſanguinem amplius propellere
 valeat, ſyncopen potius cardiacam productum
 iri, quam apoplexiam, corde mature tanto one-
 ri ſuccumbente: Atque ita affecti plerunque vi-
 vi videntesque pereunt, mortem præſentiunt,
 atque aſtantibus eam prænuntiant. Si verò pri-
 mum animales actiones omnes peſſumdentur,
 ſalvis adhuc vitalibus, non video cur non affe-
 ctus Apoplexia nominandus ſit, utcunque ſyn-

cope aut citior mors superveniat, si enim huic affectui apoplexiæ nomen denegandum, nulla lethifera Apoplexia erit, cum omnis mortem adferens, mediante syncope, seu omnium vitalium actionum abolitione finiatur: nec Medici in arte exercitati, tam imperiti erunt (ut quidam putant) qui confusuri sunt cardiacam syncopen & apoplexiam, cum à mediocriter etiam in arte versato, utriusque discrimen facile agnosci possit: nam in syncope extrema frigent, facies pallescit, sudor frigidus erumpit, pulsus evanescit atque respiratio penitus aufertur. In Apoplexia verò abolitis actionibus animalibus, nihilominus respirant, arteriæ pulsant, extrema calida ut plurimum deprehenduntur, & quandoque facies rubicunda conspicitur.

Nec adeo probabiliter à quibusdam infertur, denegato sanguinis influxu ad cerebrum, illum retro cessurum ac obruto corde potius syncopen, quam apoplexiam facturum. Sanguis enim systole è corde exclusus, non tam facile in cor relabitur (ut de valvulis alias refluxum prohibentibus fileam, quarum usus, aorta ab his corporibus occupata, forte nullus est) quia à perpetuo succedente sanguine, dum cor contrahitur, ulterius pellitur, sique propter obstaculum aliquod, unam alteramve permeare nequeat, uberior per vicinas arterias ruit, ut fieri necessum est in illis, quibus membrum aliquod resectum fuit. Atque propterea hoc in casu, obstructis carotidibus internis & vertebralibus, copiosior per externas distribuitur: unde certior ratio reddi potest, quamobrem quibusdam apoplecticis facies rubescat, temporum & colli arteriæ micent, jugularesque turgidiores conspiciantur. Quam verò arteriæ & venæ ad distensionem atque

que ad copiosorem sanguinem capiendum faciles sint, non solum illi docent, quibus vel mero vel exercitiis venæ incaluerunt, sed & uterinæ arteriæ ac venæ in gravidis, quæ quadruplo sæpe ampliores redduntur, & brevi evacuato sanguine iterum concidunt atque sua sponte ad pristinam gracilitatem redeunt. Nolo tamen inficias ire huiusmodi ægros, præ aliis quibusdam apoplecticis citissime perire, non tam quod nulli spiritus animales ad respirationis instrumenta influant, quam quia sanguis progressu temporis ignavius propellitur, & propter obstaculum prope cranium, impletis reliquis arteriis, in corde stagnat, unde cor alias à pituitosis corporibus gravatum maturius obruitur, atque mors acceleratur. Quia autem primum actiones animales sublatae fuerunt, affectum apoplexiæ nomine non defraudandum censeo, licet syncope aut citior mors supervenerit, nisi talem mortis suæ causam duplici affectui debere velimus; Apoplexiæ sc. & supervenienti syncopæ.

Huic apoplexiæ ii potissimum obnoxii videntur, qui perpetuo otio torpent, obæsi sunt, ingerunt alimenta viscida, lenta; cachectici, quibus facies & manus livent, aut saturatè rubeſcunt, quibus pulsus perpetuo inæqualis est; Asthmatici, qui denique sævos quandoque insultus palpitacionis cordis experiuntur.

Ægre etiam malum hoc curabitur, & tantum non impossibile erit tales pristinæ sanitati afferre, quod enim remediorum genus adhibueris, fere frustraneus eris. Vena secta sanguinis quidem impetus coercetur, minorique copia ad locum obturatum properat, at non revellentur impacta corpora. Nec illa purgantibus alliciuntur, vel enim purgantium vis eò non pertingit, vel

si pertingat evanida tamen est, cum licet validissima sint, illa avellere nequeant; interea corde alias afflicto, vires purgantium violentiâ magis destruuntur, ac celerius mors accersitur. Apophlegmatismi, errhina & similia humores ex glandulis oris, narium carunculis & cerebri ventriculis eliciunt, fontem verò malorum nullatenus exhaustiunt. Eadem fortuna est Phænigmarum, Vesicatoriorum & fortius adhuc agentium, ferramentorum scilicet ignitorum, utcunque enim hæc profundius vi sua penetrent & è longinquo sæpe vitiosa extrahant, non tamen ad basin cerebri virtutem suam exserunt, in quibus sedibus proxima mali causa abscondita est. Balsamis tempora illinire, est lapides, ut mollescant, oleo inungere velle. Aquæ & spiritus antapoplectici, sanguinem accendendo & fundendo, malum potius exasperant, quam opem ferunt.

Hac apoplexiæ specie repente occisus videtur *Baxius* quidam, homo torpidus ac hæbes, apud *Excell D. Tulpium observ. med. l. 1. c. 27.* In cujus corde corpus pituitosum vastæ molis, quod Polypum cordis vocat, repertum fuit, quod assurgebat bifido trunco, per arteriam aortam nimirum & venosam: quin etiam inveniebatur in venis cerebri & sinu falciformi, ut inde instar longioris fili extrahi potuerit, Ubi primum observandum, si talia corpora in corde & arteriis existant, eadem in venis infallibiliter occurrere. Præterea notandum, venas & arterias cerebri plerumque pridem non accurate distinctas fuisse. Denique animadvertendum, etsi plurima aqua maduerit cerebrum: quin etiam spinalis medulla valde uda ab ipsa reddita fuerit, non tamen primas partes aquæ, in efficiendo apoplexiam hanc, deferendas esse: Cum, ut infra dicendum pluribus

bus erit, aquæ plurimum intra cranium & ventriculos cerebri sæpe cumuletur, citra apoplexiæ productionem: insuper confestim apoplexia ægrum sustulit, quod aqua præstare nequit. Quamvis non negem, occupatis arteriis à pituitosi corporis ramis, aquam abundantiorē ad accelerandam apoplexiam multum contulisse. An vero *Cardinalis Ferrerius* apud *Guarinnon. Consult. 252.* Apoplexia, propter oppletas carotides internas, perierit? non facile dixerim: cum rem paulo confusius proponat, nec obstructarum arteriarum sufficientia indicia afferat. Similia symptomata observavi in iis, qui, rupto vase intra cranium, apoplectici decesserant.

Supra dictum arteriarum vertebraliū & carotidum ramos cerebro & cerebello, tum in basi maxime, tum intra anfractus, minutissimos & pene innumeros furculos impertire, qui se immergunt substantiæ eorum, ut & medullæ oblongatæ. Quæri itaque posset, an non & ipsi subito obstrui possint, atque impedita communicatione spirituum vitalium cerebro ac cerebello, ea proportionē, quæ ad animalium spirituum generationem ac reparationem necessaria est, an non inquam hanc ob causam etiam apoplexia oboritura sit? Etsi prima fronte id creditu difficile sit, cum arteriolarum numerus ingens existat, qui à diversis ramis, diversis in locis sitis originem nanciscuntur. Verum considerata sanguinis varia constitutione, ejusque motu æquo, sine omni delectu: Surculorum exiguitate, cerebri cerebellique nativa indole, vitiisque ipsi, tum ab internis, tum ab externis causis evenientibus; forte etiam hæreditariis morbis concurrentibus: ac denique multiplicibus in victu erroribus,

rioribus, non adeo impossibile videtur quin furculi omnes simul & semel obstruantur. At iis obstructis necessario Apoplexia consequetur, cum ut supra ostensum est, cerebrum, vel etiam tantillo temporis iis carere nequeat, citra actionum animalium cunctarum abolitionem: & quamvis per duram matrem liberius sanguis fluat, aut per majores ramos anfractus intercurrentes, nullum tamen commodum in cerebrum & cerebellum redundabit, cum sanguis ille ad sinus properet, hinc per jugulares ad cor refluat, medullosa interim substantia spirituum communione quasi orbata existente. Sanguinem enim primum quod attinet, nemo negabit illum pro temperamento- rum, ætatis, sexus, victus, regionis, temporis anni varietate, varium quoque esse; & non raro V. S. emissio sanguine conspicitur, nam si seorsim asservetur ac frigeat, sæpe tota ejus superficies viscido phlegmate operitur, quod citra digitorum conspurcationem non semel à reliquo sanguine, pelliculæ instar, avulsi; si verò aquæ permisceatur, antequam illa tepescat, virgultis immixtis idem phlegma, magna quantitate, tenaciter adhærescere vidi. Qualem sanguinem frequenter in Ichthyophagis, otiosis, obæsis ac lautius victitantibus animadverto. Sanguis autem iste pariter per omnes arterias, citra omnem selectum, propellitur, neque tenuiora sursum, crassiora deorsum ruunt, nulla namque sanguini intra arterias, vel mora vel requies est, ob perpetuum cordis & arteriarum motum, sanguinis particulis semet, ut undæ undam, trudentibus; non secus ac in aquagiis videtur, aquæ rivulos, qua data porta, per appositos canaliculos, sibi undiquaque similes erumpere. Si itaque diu & sæpius in die (viginti enim quatuor horarum spa-
tio

tio aliquoties sanguis circulatur) vasa hæc medullosam substantiam permeantia, talis sanguis, cui viscidæ plurimæ ac lentæ particule perinixtæ sunt, transeat, sensim quædam hujusmodi portiunculæ adhærescent, prout canalibus, per quos sæpius thermarum aqua rapidissime fluit, topi accrescunt. In agro Aponensi vidi, à Thermarum aqua ad sensum limpidissima ac purissima, rotam molarem, quam versabat, brevi tempore undiquaque densissimo candicante lapide, unciarum duarum crassitie incrustatam fuisse, quem alternis mensibus molitores, ceu in opera sua, remoram, dedolare cogebantur. Licet igitur non statim arteriolæ hæ, vel pori per quos spiritus vitales medullosæ substantiæ communicantur, à lentis his humoribus penitus obstruantur, at certe ad oppilationem paulatim disponentur, quæ tandem contingit, si sanguinis vitium non emendetur, sed diutius perseveret, aut si externa causa accedat, quæ sanguinis motum acceleret, ut majori copia irruat; aut ejus motum per vasa hæc remoretur. Atque obstructio eo facilius eveniet, quia vasa hæc exilia valde sunt & vix capillos æquantia, unde non pauci doctissimi Viri cerebro illa denegare ausi fuerunt. Ad quam producendam non parum faciet quoque, si hæreditario quasi jure minutiora sint; unde forte quædam Apoplexia hæreditaria est. Obstructionis quoque generationem non minus promovebit ipsa cerebri constitutio, quæ frigida est, nisi perpetuo à sanguine irroretur; & ponderosior, quæ non sufficienter resecta collabetur, ac vasa jam p. n. angustiora amplius coarctabit, atque ad plenioram obstructionem disponet. Quid causæ externæ ad hunc affectum producendum valeant

histo-

historiæ Medicorum abunde docent, quibus quosdam ab ira, Venere, intempestivis & violentioribus exercitiis, ebrietate, spiritus vini nimia ingurgitatione, austrina tempestate post aquilonarem, similibusque subito apoplecticos corruisse traditur. Quæ, si in corpus viscido sanguine præditum, qui diu hæc capillamenta arteriarum alluit, incidant, facile obstructionem aliquando producturas admodum verisimile est, idque plurimarum vel plerarumque & in momento quasi: harum enim vis est sanguinem vehementer concitare & fundere, atque ut copiosior ad cerebrum properet, efficere, qui ad capillamenta delatus, cum ob eorum exiguam & parem capacitatem transire nequeat, partim prægressum validius impinget atque obstructionem pariet (quæ haud difficulter suborietur, cum pori illi, qui in medullarem substantiam ex arteriis patent, oppido exigui esse debeant, eos enim permeet necessum est, subtilissima spirituum animalium materia, quæ ceu fulgur & aura ocyor, quoscunque nervos, ad quodlibet imperium voluntatis, pervolare debet) partim subsistet, unde secundum Hipp. supra citatum, aliquo modo refrigerabitur, atque certior obstructio oborietur.

Obstructio vero hæc non una ratione animales actiones prostermit, sed pro ejus conditione nunc plures nunc pauciores, prout scilicet paucæ vel multæ arteriolarum, perfectius vel imbecillius obstruuntur. Hinc quidam tantum loquela privantur: si in uno latere opilentur, hemiplegia subsequitur: si utrinque, vera apoplexia exoritur, curatu facilior vel pertinacior, prout imbecillior vel validior illa fuerit: Quod medicinam facientes quotidie fieri experiuntur.

Et ipsa curandi ratio frequenter tales apoplexias,

xias, maxime illas, à quibus ægri plenam valetudinem brevi recuperant, à tali obstructione nasci comprobat. Quidam enim sua sponte, citra omnem remediorum usum, ob naturæ robur & obstructionis levitatem: alii cephalicorum usu, non pauci sanguinis effusione sanitati restituntur. Exemplum suppeditat rursus *Ampl. D. Tulp. obs. Med. l. 1. c. 7.* de Juvene quodam plethorico, subito in gravissimam apoplexiam præcipitato; cui ex utroque brachio illico sanguis extractus fuit, unde evidenter symptomata remiserunt, breviq; convaluit. Præterito Vere scriniarii cujusdam nostratis uxor juvencula, Plethorica alias & succiplena, uterum gerens, ob creberrimam & largiorem narium hæmorrhagiam cachectica facta est, atque ante partum prænatura, subito hemiplegia levicula, cum aliquo sermonis vitio correpta fuit, à qua paucarum horarum spatio, benedicente Deo, Aqua antapoplectica temperata, ipsam vindicavi, ut nulla in actionibus animalibus labes, nisi ipsi connata blæstias observari potuerit: quæ adhuc vegeta ac robusta vivit, sinistri nihil amplius persentians.

Nuper admodum fœminam, in nobis vicino campo Altenburgensi, offendi, quæ hac in urbe, inter pocula, subito morbo attonito tacta fuit, quam convivæ mulierculæ mox succutiebant, atque ad incessum adigebant, unde mox in hemiplegiam mutabatur, ac paulo post sola brachii paralyxis & sermonis aliquale vitium remansit, ut inter medias comites incedere potuerit, & brevi plenam valetudinem ab aquis cephalicis adepta sit, &, quod equidem sciam, adhuc sana degit.

R. D. Jacob Meister / Pastor Benkensis, ditio-
nis

nis Tigurinae, à multis annis in more positum habuit, statim à prandio, per unam atque alteram horam somno in lecto indulgere; hac præterita æstate hemicraniam dextri lateris aliquot diebus passus est. 4. Julii, quum à somno pomeridiano surgere vellet, apoplecticus concidit, & aliquandiu humi prostratus jacuit, antequam domesticis innotuerat. Altero die summo mane ad ipsum vocatus fui, reperii morbum in hemiplegiam lateris dextri desuisse, loqui ne verbum quidem potuit, palpebris nictitabat, exiguamque curam adstantium habebat. Statim suppositorium ex Saponem Veneto, cum alia ad manus non essent, indendum curavi, atque paulo post ex sinistri brachii mediana uncias sex sanguinis emisi. Aquis cephalicis temperatis & Balsamo cephalico, ex vulgato apoplectico, admixtis oleis succini, rutæ, roris marini, ipsum refocillavi, unde brevi melius habere cœpit, adstantes agnovit, nec diu post unum atque alterum verbum protulit. Aliis ad rem facientibus adhibitis, perfecte loqui, legere, obambulare progressu temporis de novo valuit, imbecillius perstitit brachium, quod quidem movere potest, quin etiam in eo, si tangatur, sentit, ægrius tamen adhuc elevat. Cætera valet, adeo tamen ut citius obliviscatur præsentium, quam ante insultum hunc in ipso animadvertebatur: pridem autem actorum optime recordatur.

Hoc autumnno 16. Sept. *Nobilissimus ac strenuus D. Joh. Theob. Freiburger, Reverendissimi D. Præsulis Rheinoviensis frater germanus*, post animi commotionem, summo mane evigilans opinatus est, se videre magnam pulicum turmam pariete perreptantium ac subsilientium, brachium & pedes dexter valide tremebant ac præter
volun-

voluntatem succutiebantur, quin etiam totum hoc latus stupor occupabat. E lecto surrecturum vertigo corripuit, quæ statim ipsum ad decubitus compulit. Caput totum doluit. Os amarum erat, appetitu penitus prostrato. Accersitus eo ipso mane, statim exhibui pilularum mearum catholicarum grana quatuordecim, cum 2. gr. extracti castorei: alvo aliquoties exonerata, statim melius habuit; ac alternis diebus, hujus extracti catholici dimidio scrupulo ante prandium sumpto, quin etiam usu confectionis cubebarum cum aqua cephalica temperata penitus, paucorum dierum spatio convaluit. Cum postmodum venam secandam curavissem, deprehendi sanguinem puriorem reddentem: nam prope sexagenarius summo mane, quocunque etiam cælo, venatum abibat, nullosque labores fugiebat: Hactenusque optime habuit. *Forest. l. 10. obs. 76.* Famulo Zytepsæ sexagenario ex apoplexia jam hemiplectico, præmissis purgantibus, venam secuit, quæ egregie contulit. *Ib. obs. 78.* Juveni 29. ann. Melancholico morbo in hemiplegiam desinente etiam V. S. adhibuit, quam optime tulit. *Ib. obs. 81.* Fœminæ Plethoricæ. 35. ann. cum V. S. neglecta fuisset, nec illam amplius administrare licuisset, post d. 7. ejus loco, cucurbitulas nati & scapulæ dextræ applicandas curavit, quæ multum juxta alia profuerunt. Plures historias accumulare possem, si instituti ratio ferret: sufficiant istæ: si quis plures desiderabit, eas praxis medicinam attente exercenti abunde suppeditabit.

Quotquot autem apposui, aliæve his similes, indicio sunt apoplexias tales, siue perfectas, siue imperfectiores, graviorum certe prænuntias, potius ab arteriolarum, (earum maxime, quæ in

196 EXERCIT. DE LOCO AFF.

basi medullam oblongatam & rotundiorē subeunt) obstructione proficisci, quam ab aliis quibusvis causis, quæ adhuc recensendæ supersunt. Quælibet enim cæterarum apoplexiarum, ab aliis causis oriunda, vel plane incurabilis est, vel, si medicabilis sit, longius tempus ad curationem postulat, vixque unquam tam diligenter & fidè curatur, quin indelebilem labem vel in sensu aliquo, vel in motu, post se relinquat. Etsi in fœmina *obs.* 81. apud *Forestum* diu vestigia apoplexiæ remanserint, non dubito tamen, si mature ipsi suppetiæ latæ fuissent, quin citius & citra omnem mendam, valetudinem recuperasset, cum formosissima fuerit, & procul dubio, si harum arteriolarum obstructionem excipias, cætera sanissima extiterit; & brevi adhibitis à *Foresto* medicamentis melius habere cæperit, licet nondum omnia symptomata desierint, quod in tamdiu sine ope derelictâ mirandum non est, tanto enim temporis intervallo, medullosa substantia, calidi influentis sufficiente quantitate privata, non facile emendabilem intemperiem contrahere potuit.

Reliquorum autem paroxysmorum apoplecticorum causam, vix aliam, præter dictarum arteriolarum obstructionem fuisse, clarius inde constat, quod non operoso remediorum apparatu, brevique tempore & quidem penitus, liberati fuerint. In alia enim apoplexia, à diversa causa profecta, sæpius repetita vix tantum valuissent. Sive enim ab obstructis carotidibus & vertebralibus, sive ab oppilato torculari à corporibus pituitosis, sive à sero intra medullosam substantiam effuso, sive ab eo, extra illam, in cava cranii, & ventriculorum fluctuante, sive à sanguine extra vasa profuso efficiatur, tum effi-

caciora remedia postulantur, tum longe diutius medicamentorum usus, dubio cum successu continuandus erit. Quin etiam succussio corporis in Fœmina illa, malo pullulante, non præmissis aliis, subito salutifera fuit, quæ aliis, si non exitiosa fuisset, saltem aliàs nocuisset malumque exacerbasset. *Forest. n. l. 10. obs. 74.* Agitationem corporis, non purgato corpore, in pituitosa & sanguinea Apoplexia plane improbat, cum magis ab ea humores commoveantur: imo omnino caute instituendam monet: Quod cum in *Se-ne Bokelio l. c.* neglectum fuisset, misellus æger Medici imprudentiam morte luit. *Cl. Nymanus de Apopl. c. 39.* meminit ægro, intempestiva tali agitatione, mortem subitanæ acceleratam fuisse.

Profuisse autem successio hæc & ad incessum coactio, ideo videtur, quia agitato corpore, agitabatur sanguis, qui ad validiorem motum incitatus, pauxillum illius, quod obstructionem jam faciebat & amplius facturum erat, ex arteriis excussit atque in venulas & ulterius perpulit, unde aliqua ejus portio, subtilior scilicet & spirituum animalium materia, per poros in substantiam cerebri transudare potuit: unde illa primum incedere iterum valuit. Post incessum copiosiores successerunt spiritus vitales, nam protinus itineri pedestri (domum, quæ integro milliari ab urbe nostra distat, properans) se credidit. Cum enim ad tam crebrum motum spiritus animales copiosi requirantur, qui non nisi ex vitalibus reficiuntur, omnes conatus procul dubio natura, agitatione excitata, adhibuit, ut medullosæ substantiæ suggerantur; quod eo citius quoque præstitum, quoniam incessu illo sanguis non parum incaluit subtiliorque redditus promptior

capillamenta & poros permeare valuit. Quod ab obstructione residuum erat, cum domi esset, usu aquæ cephalicæ ex serpillo, majorana, rore marino, salvia, cerasisque nigris, penitus sublatum fuit. Hæc enim attenuandi, incidendi, abstergendi; adeoque obstructa referandi vim habere, & si materia pauca sit, profutura nemo negabit.

Uxori scriniarii similis aqua, eandem ob causam juxta modicam deambulationem, profuit. Si à serosa humiditate intra medullosam substantiam effusa paroxysmus iste originem duxisset, non tam cito desisset, & procul dubio alia symptomata præcessissent, vel malum comitata fuissent, qualia sunt sopor, vertigo, visus duplex, & hujusmodi alia, de quibus suo loco pluribus, imo deambulando magis intra medullam adacta, paralyfin genuisset.

Altiores indagines mereretur cumulus symptomatum, qui nobilissimum D. Capitaneum obruebat, species scilicet innumerorum pulicum oculis obversantium, vertigo, capitis dolor, convulsivi motus artuum dextri lateris, eorundemque stupor: Verum cum hæc alibi commodius excuti queant, ab ulteriore inquisitione hac vice abstineo: Sufficit non exigua obstructarum articularum indicia, ipsam quoque medellam præbuisse; nam evacuatis viscidis & lentis humoribus cum biliosis, atque usurpata aqua cephalica temperata & confectione cubebæ penitus convaleuit, nihilque hæcenus sinistri persensit. Hæc enim omnia tum ad antecedentem, tum ad proximam tollendam sufficientia erant, non suffectura, si alia causa proxima paroxysmum generasset. Quin etiam sanguis postmodum emissus, superficie pituitosa coopertus, de possibili hujus
ob-

obstructionis productione, testimonium perhibuit.

Illud tamen non negaverim, si causa obstructionis antecedens abundet in corpore, succussionem & aquas cephalicas, imprimis si calidiores sint, quales sunt spiritus vulgo dicti, non solum non profuturas, sed & nocituras: Imo etiam, si pertinacior sit, hæc, juxta purgationem, non sufficientia fore, verum alia quoque adhibenda esse, quorum usus diuturnior futurus sit.

Imprimis autem necessario *Venæ sectio* adhibenda erit, quam pridem præclari Medici in Apoplexia laudarunt. Omnium in ore est *Celsi* effatum *ex l. 3. cap. ult.* Ubi sanguinis detractionem in apoplexia vel occidere, vel liberare dicit; aliud vero curationis genus vix unquam sanitatem restituere, sæpe mortem tantum differre, vitam interim infestare: addit, si post sanguinis missionem non redeat & motus & mens, nihil spei superesse: si redeat, sanitatem quoque respici. Ideo *Capivacc. Pract. l. 1. c. 17.* spatium duodecim horarum, in paroxysmo apoplectico tres venas aperiendas monet, primam mediam in brachio, altera remotam in pede, tertiam propiorem in fronte vel naribus. *Cl. Nymann. l. c. 36. p. 14.* prolixus est in commendanda V. S. quæ utilissimum auxilium sit, nullo modo vel omittendum vel negligendum à Medico: nec differendum, sed quantocius maturandum, siue die, siue nocte, etiam nondum injecto clystere. Statuit etiam in omnibus convenire, siue plethorici fuerint, siue non; cum vix remedium sit, quod potentiùs humores è capite, præ V. S. revellat. Eamque copiose atque iteratis vicibus instituit, nulla habita ratione virium, quæ oppressæ sint, non diffi-

200 EXERCIT. DE LOCO AFF.

pata: Experientiam enim testari, quosdam sola V. S. ab apoplexia liberatos fuisse. Sic observavit ipse, in Consule quodam, 70. annum excedente, feliciter adhibitam fuisse: ex *Dodon. obs. Med. c. 8.* memorat, foeminam fortissima apoplexia oppressam, iterata V. S. eodem die restitutam fuisse. Concludit, caute nihilominus, si morbus chronicus prægressus fuerit, aut mors præ foribus sit, V. S. administrandam, ne Medicus ægrum occidisse videatur.

Et vix ullus Practicorum est, qui non V. S. suadeat in apoplexia sanguinea. An autem in omni, præter casus memoratos, conveniat, ut *Cl. Nymannus* opinatur, dubito. Ille enim propter suam hypothesin, quâ omnem apoplexiam, sinuum concursu obstructo fieri probat, itantus est in decantandis laudibus venæ sectionis: quæ cum non in omni apoplexia locum habeat: ut hætenus probavi, ac in posterum probandum erit, Venæ sectionis par & perpetua utilitas in dubium vocabitur. Parum V. S. conducere occupatis arteriis vertebralibus & carotidibus, à corporibus fibrosis, jam dictum est: eadem fors manebit apoplecticos, quibus torcular oppilatum est, cum nonnisi à simili corpore penitus obturari possit, ut suo loco dicendum erit. Neque etiam V. S. conveniet, sero intra ventriculos & cavitatem cranii effuso, cum hac causa proxima non tollatur, sed vires aliàs fractæ, amplius debilitentur. A rupto vase oboriente apoplexia, res conclamata est: eaque horum apoplecticorum fortuna est, ut quicquid adhibueris remediorum, nihil effecturus sis: ut quoque animadvertit *Petrus Salins Div. de Aff. partic. omis. c. 2.* dum casum hunc insanabilem pronuntiat, tum quia sanguinis copia intra ventriculos, addo & ad basin,

basin, effusa, arte educi non potest, tum quia, ibi permanens, in grumos convertetur.

In ea, quæ à sero, intra substantiam effuso, fit apoplexia, Venæ sectio per accidens potius proderit, quam per se, quatenus nimirum, propter fusum sanguinem, turgescencia feri & sanguinis compescitur: propterea non sola affectum hunc abiget, sed præterea necessaria erunt illa, quæ serum substantiam medullosam irrigans absorbent & evacuant.

Si vero unica Venæ sectio, vel iterata, citra adjumentum aliorum remediorum, hunc affectum tollat, ut *Nymannus* observatum memorat, probatque ex *Dodonæo*, quibus etiam *Cl. Tulpii* historia conformis est, talis apoplexia non nisi arteriolarum subita obstructione generata erit. Qua enim ratione aliàs sanguis in cerebri & cerebelli medullosa substantia abundare, hunc effectum producere, ac tam cito removeri possit, non video: si namque in venis omnibus stagnet, id non nisi obstructo torculari fiet: si in quibusdam tantum, alia symptomata, quam apoplexia, resultabunt, ut & si substantia medullosa, à sanguine extra vasa fuso, irrigetur.

Venæ sectio autem in apoplexia ab obstructione harum arteriolarum, plures ob causas prodest; nam primum sistitur sanguinis præternaturalis impetus, qui plerunque hujus obstructionis occasio est; & minore copia ad cerebrum prope- rat, dum ex. gr. è brachii vena emissio sanguine, non parva portio per axillares, ad resarciendum illum, qui V. S. effusus fuit, brachia petit. Deinde reliquo ex corpore atque ex cerebro sanguis haud cunctanter ad cor, ob V. S. illo privatum, festinat, depauperato opem laturus. Cor vero sanguinis mole, qua, ante & in ipso pa-

roxyfmo, oneratum erat, levatum, refluxum ad ipsum sanguinem alacrius, decētiore ordine & cerebro salutari futura quantitate propellit, qui obstructionem facientem ac medulloſæ ſubſtantiæ moleſtum eluit, atque in venarum capillamenta, extremis arterioliſ conjuncta, protrudit.

Quod ſi res ad primam V. S. non ſuccedat, ſemel vel iterum ea repetita ſuccedet: Vel ejus defectus Cucurbitulæ, Veſicatoria, phœnigmi & hujus generis alia reſarcient. Feſtina autem V. S. & circa principia affectus inſtituta, vel ſola omne momentum feret, vixque ullis aliis remediis opus erit, ut in Juvene apud *Cl. D. Tulpium*: ſi verò differatur, ut in ſcœmina apud *Foreſtum*, alia, ut jam dictum, neceſſaria erunt, cum nunquam in parte aliqua, ſanguis arteriis incluſus, impune ſtagnet: ac propterea purgantia, cephalica temperata, interna & externa, er rhina, maſticatoria, apophlegmatiſini, & quæ aliæ excogitari poſſunt auxiliatrices manus adhibendæ erunt.

Imo, ſi pertinacior obſtructio fit, lethum aſſerre poteſt, maxime ſi, ob remoratum ſanguinem, una atque altera arteriolarum rumpatur; aut ſi affectus fortior negligatur; aut ſi error, vel ab aſtantiſ, vel à Medico committatur. Et licet æger priſtinæ ſanitati reſtituatur, facile recidivam pati poteſt, ſi in diætâ peccare pergat, ac congrua præſervantia reſpuat, prout Juveni illi apud *D. Tulp.* contigit.

Compreſſio arteriarum alterum morbi genus eſt propter quod ſanguinis aditus ad partes prohibetur. An vero in apoplexia generanda ſola, citra alterius morbi concurſum locum habitura ſit, valde dubito. Quocunque enim mentem

vertam, vix causam reperio, quæ carotides & vertebrales prope & post ingressum intra cranium, aut earum propagines omnes, vel maximam partem, sola, exiguique temporis intervallo ita comprimere & coarctare possit, ut omnium actionum animalium abolitio consequatur. Suspendium quidem aliquid apoplectici efficit, verum non solum carotides comprimendo atque ingressum sanguinis prohibendo, sed & venarum jugularium coarctatione refluxum ejus impediendo; unde sanguis intra cerebrum & cerebellum cumulatur, atque propterea Apoplexia generabitur, eo modo quo *Galenus* ob *φλεγμονώδην Αἰθέριον*, & *Petr. Sal. Div. de aff. omis.* c. 2. aut *Hipp. l. c.* eam produci putarunt: nisi luxato jugulo, etiam vertebrales arteriæ à vertebriis premantur. Serum intra cranium, copiosissimum quoque, siue purum putum sit, siue pituita permixtum, vix arterias coarctabit, ut vel solæ hydrocephalorum historiæ docent: Atque in hydrope ascite observatur, sanguinem per arterias, medias inter undas fluctantes, diu sæpe eluctari ac libere fluere. A sanguine extra vasa intra cranium effuso, atque in grumo concreto, licet arteriæ premi possint, non tamen ob compressionem potius, quam aliam ob causam, paulo post recensendam, apoplexia gignitur. Verum annon aliquando in illis, qui ob luxatas colli vertebrae, diu paralytici decubuerunt, quibusque ob eandem causam, vertebrales arteriæ angustiores redditæ fuerunt, annon inquam carotidum quoque subita compressio supervenire possit, atque apoplexia gigni? Etsi hoc certo statuere non audeam, haud tamen adeo à verosimili abest, quin aliquando fieri hoc queat. Experimur enim quotidie paristhmia aliasque glandulas subito intumescere

mescere à serosa defluxione, accedente ob do-
 lorem tenuioris sanguinis affluxu, sæpeque ad
 insignem magnitudinem excrefcere: Cum itaque
 Paralytici, ob exercitii defectum plurimum feri
 cumulent intra ventriculos cerebri, illudque
 sæpe situ acre evadat, si subito per infundibu-
 lum, ad glandulam pituitariam ruat, nec omne
 ad palatum expurgetur, non admodum absurde
 dicetur, glandulam tumidam valde, brevi tem-
 pore, evasuram atque ad latera ejus incedentes
 carotides compressuram, unde cerebro ac cere-
 bello, tam vertebralium, quam carotidum vi-
 tio, sanguinis influxu privatis, apoplexia subo-
 rietur, ac miserrimis hisce paralyticis, aliquan-
 do subitum ærumnarum finem adferet. Quamvis
 autem aliàs arteriarum intra cranium compressio
 sola apoplexiam non generet, symbolam tamen
 suam non raro ad illius productionem conferre,
 ex iis quæ dicenda supersunt, patebit.

Apertio denique vasorum sanguiferorum præ-
 ternaturalis, cerebrum & cerebellum defrau-
 dat vivifico succo, ad actionum animalium
 ἐνέργειαν summe necessario, unde etiam apoplexia
 quandoque consequitur. Non tamen quocunque
 vase, quolibet in loco aperto, aut ad omnem,
 etiam copiosiore sanguinis profusionem apo-
 plexiam produci dixerim, cum sæpe mensium,
 hæmorrhoidum, nariumque hæmorrhagiæ admo-
 dum nimix sint; quinetiam ob vulnera adversis
 corporis partibus inflicta, non raro, incredibili
 copia effluat, nihil tamen hæc patientibus apo-
 plectici contingat. Quamvis negari non possit,
 actionibus animalibus hujusmodi hæmorrhagias
 plurimum nocere, iisque ægros ad apoplexiam,
 nisi alio mortis genere præveniantur, disponi,
 qua tandem aliis causis concurrentibus pereunt.

Hinc

Hinc *Avicenn. Tr. 5. Fen. 1. Tert. c. 11. Qui plurimum utuntur Venæ sectione, propter melancholicum suum sanguinem, multitudine quidem V.S. juvantur: sed in fine deficiunt, quoniam incidunt in apoplexiam.* Igitur quæ apertio vasorum apoplexiam effectura est, potius intra cranium fiet, hac enim ratione medullosa substantia, sanguine, proxime in usum ipsius cessuro, orbatur, quin etiam premitur, aliaque quæ ab extravasato sanguine, suam indolem protinus perdente ac noxio evadente, perpetitur. Nec tamen quilibet sanguis intra cranii cavitatem effusus apoplexiam adfert: non raro enim, contuso capite, intra cranium rumpuntur vasa, sanguisque exstillat, qui per aures, nates & os effluit, citra apoplexiæ discrimen, dum vel, trypano perforato cranio, sanguinis exitus paratur, vel dum corruptus, antequam lethalia symptomata efficiat, emplastris & fomentis congruis dissipatur, quod frequentissime nostris in oris feliciter, citra trypani usurpationem, citra ullam ægri noxam præstitum memini. Et nuper admodum Juvenis Rusticus Flurlingensis, securis parte obtusa, supra tempus sinistrum valide percussus, erumpente sanguine plurimo ex aure, cum parentes ipsius à trypano abhorrerent, V. S. & hujusmodi fomentis integræ sanitati restitutus fuit. Quod etiam factitatum memorant, *Exc. D. Thom. Barthol. Hist. Anat. c. 2. obs. 41. & Cl. D. Job. Dan. Horst. Anat. obs. 1.* Mirabilis est capitis vulneratio, quam recenset *Valleriola Obs. Med. l. 4. obs. 10.* de Milite quodam, qui ænei tormenti globulum excepit in tempore sinistro, eo paulo altius egrediente ex opposito latere, distracto & dilacerato utrinque cranio; qui citra apoplectica symptomata, miraculo integre curatus fuit, nisi, quod

quod surdaster & cæcus manserit: Existimat equidem *Valleriola* nec cerebri membranas, nec cerebrum ipsum læsum fuisse. Quod tamen mihi nequaquam probabile videtur: non enim duræ matris conditio similis est intestinorum constitutioni in abdomine, quæ non raro illæsa manent, gladio, vel sclopetorum globulis cavum abdominis penetrantibus; lubrica namque sunt, liberioraque armorum imperui cedere possunt: dura vero meninx pertinacissime cranio, maxime autem circa futuram sagittalem, validissimis fibris accreta est, adeo ut magno nixu, cerebrum detegentibus avellenda sit. Unde globulo petita, vel centies rupta fuisset, imprimis quia globulo à sinistro tempore ad oppositum transeundum fuit. Non minus à verosimili abest surditatis & cæcitatæ causa, quam ibidem reddit, scilicet ab ictu, concusso cerebro, sanguinem in opticos & auditorios nervos incidisse & obstructionem peperisse: nam, præter quam quod nulla in his nervis cavitas appareat, sanguis in profundioribus cerebri partibus, unde hi nervi exoriuntur, citra gravissima symptomata, quorum tamen nulla mentio ab ipso fit, effusus nunquam fuisset: imo vix ulla arte curari potuisset.

Non minus admirandum est vulnus *Nobilis Poloni*; cujus historiam *Prænobilis & Excellentissimus D. Joh. Georgius Felverus S. R. M. Poloniae Archiater*; è *Foro Tiberii*, nuper admodum ad me perscripsit; quam propriis Clarissimi Viri verbis integram apponam: *Historia Nobilis Poloni*, quam inter alia scripta *Varsoviæ* fusius & exactius, secundum omnia annotata, reliqui, quantum memoria quidem nunc suggerit, ita fere se habet. Accidit 15. Augusti, anni 1649. quo Sereniss. Rex Poloniae *Joh. Casimirus*, dum auxiliares co-

pias

pias ad Exercitum Polonorum, ab ingenti Tartarorum & Cossaccorum colluvie obsessum, ipsemet praesens duceret, atque aliquot millia dictorum hostium circa oppidum Zbornow obvia haberet, cum quibus acriter & foeliciter pugnatum fuit, ut inter alios Equites vulneratos, etiam Nobilis quidam Polonus, cujus nomen modo non occurrit, sagittâ sive telo Tartarico, per caput saucius, equo insidens, ex conflictu ad castra & quidam recta ad Sereniss. Regis Tentorium pergeret, ubi ab equo prosiliens se Regi, cum magna adstantium admiratione, ostentavit, telum adhuc ita artificiose quasi & aequaliter per medium capitis infixum gerens, ut nulla pars illius magis aut minus, ex uno aut altero latere promineret, quod sane invisum atque admirandum omnibus accurrentibus praebuit spectaculum, maxime dum Regi adhuc verba faciens, suam probare & commendare adnitebatur alacritatem, & non exiguam hosti illatam cladem: qui mox à Rege nostrae Medicorum & Chirurgorum praesentium diligentissimae curae serio commendatus, per conveniens temporis spatium, afflante aurâ divinâ, integræ valetudini restitutus fuit, atque insequente anno post, in peregrinationibus per Italiam, Venetiis febre acutâ prehensus periit. Juvenis robustus & boni corporis habitus; telo verâ ictus fuit infra temporum ossa, versus prominentiam ossium jugularium utriusque lateris, præter febrem symptomaticam, vix alia graviora, quàm quæ vulneratos communiter comitari solent, passus est symptomata, ea propter solis fere Chirurgis reliqua cura commissa fuit, qui motum ab una statione ad alteram exercitum commodè sequi valuit. Es ist für ein sonderbaren favor-schuss von menniglich gehalten worden.

Ex hac historia clarius elucescit, citra apoplex

plexiam, aut aliam graviorum symptomatum colluviem, non solum intra cranium & duram matrem, sed & intra hanc & tenuem meningem, quin etiam in ipsam cerebri substantiam, modo non quoque in ventriculos anteriores, innoxie sanguinem effusum fuisse. Verum merito hæc inter monstra & rarissime Medicinam facientibus occurrentia recensenda sunt. Quotusquisque enim mortem, vulnere cerebrum penetrante evadit? Si quid in re obscura, &, ut *Valleriola* loquitur, captum fere humanum superante, divinare licet, minutiora tantum vasa, tum à globulo, tum à telo læsa, minusque sanguinis profusum fuisse, existimo. Præterea utrinque sanguini exitus patuit, qui aliàs, gravius capite contuso, magno ægri commodo, non rarò trypano parandus est: Sic Romæ anno 1646. mense Dec. vidi *Experientissimum ac Dexterrimum Cheirurgum* *D. Nicol. Larcheum*, Juveni cuidam, qui in tempore dextro, ab acuto saxo, cum ossis subiecti rima, vulneratus fuit, dilatato vulnere, secto etiam ex parte temporali musculo, terebra cranium, eo loci perforasse, sanguineque evacuato ægrum bonæ valetudini reddidisse, idque præter multorum expectationem, non solum ob locum periculose læsum, sed & propter symptomatum concursum, apoplexiam minitantem. Denique in ambobus his admirandis capitis vulneribus, nec telum, nec globulus æneus nobiliorem cerebri partem, medullofam scilicet profundiorē substantiam, ubi spiritus generantur, & unde in nervos derivantur, attigerunt: quæ si fauciata fuisset, procul dubio de utriusque vita actum fuisset, cum supernarum cerebri partium vulnera haud adeo, experientia teste, incurabilia sint. Memini *Excell. D. Veslingium* Pa-

tavii cerebri vulnus in fincipite Juveni hortulano inflicturn, demtis tribus cerebri drachmis, feliciter percuraffe: & Holfatum militem in fronte vulnus profunde ad cerebrum penetrans accepiffe, nihilominus ultra quadrimeftre, omnibus fenfibus (excepto vifu, cujus jacturam non ob cerebri vulnus fecit, fed propter difciffam in utroque oculo corneam, unde omnes humores prolapfi funt) & motu integris, falvum perftitiffe, qui procul dubio evafiffet, nifi fcclerata manus, ob caufas hic reticendas, ipfius mortem acceleraffet. Quæ luculentius confirmat *diligentiffimus rerum naturalium & medicarum fcrutator, Volcher. Coiter. Mifcell. obf. Anat. & Chcir. p. 122.* his verbis: *Quod fuma admiratione dignum exiftit, brutorum viventium cerebra detexi, vulneravi, & intactis nervis eorundemque principio & ventriculis mediis illæfis, exemi, at nullum vel vocis, vel refpirationis, vel fenfus, vel motus offenfionis fignum in iis deprehendi. Aves absque cerebro aliquandiu vivunt, ut quilibet in gallinis, vel pullis gallinaceis, fi roftrum fuperius, cum dimidia capitis parte abfciderit, cerebrique majorem exemerit partem, experiri poteft. Vifus autem & auditus in Nobili Polono illæfi manferunt, fecus ac in milite apud Valleriolam factum eft, quoniam telum Tartaricum, globulo acutius, duram meningem citius perfodit, minusque hanc membranam extendit, vel concuffit, unde etiam nervi optici & auditorii nec abrupti, nec loco moti fuerunt, quorum alterutrum, vel utrumque in milite factum fufpico.*

Quod fi vero fclopetorum globuli, vel aliud quodcunque telorum genus, profundiora cerebri perrumpat, nullus mortalium evadere mortem poterit. Cujus rei fidem mihi, præter mille mili-

militum experimenta, fecerunt *Illustrissimus ac Fortissimus Heros Heinr. Ludov. Maximilianus Landgravius Tulingorum, Dom. in Pappenheim, &c.* Cui anno 1633. d. 27. Jun. in obsidione arcis Altæ Stöfflæ, tempus dextrum sclopeti globulo, in parte elatiore, transfixum fuit, globulo in sinistro latere profundiora cerebri petente, unde omni sensu & motu privatus concidit ac paulo post, anno ætatis 23. magno *Illustrissimæ* familiæ luctu, exspiravit: ut & *Dalmata* quidam, cui, per os lambdoides, anteriora versus hujusmodi globulus, per cerebellum & cerebrum, Patavii adactus fuit, qui protinus vitæ telam abruptit.

Ergo sanguis extra vasa intra cranium effusus, apoplexiam efficiet, si vel copiosior elabatur, vel in profundioribus locis & circa basin maxime, extra vasa stagnet, quod tres primæ historiæ, à me recensitæ comprobare videntur. In *Cubiculario* enim *Rheinoviensi* totum spatium, quod inter utramque meningem est, & ventriculi omnes magna sanguinis copia adimplebantur. *Exc. D. Hoffmannus Instit. l. 3. c. 92. in aberrat. p. 439.* de hoc casu ambigere videtur, dum quærit, qua via & qua de causâ, citra causam externam, sanguis è superioribus ad inferiora descendat? & in *Animadvers. Com. Mont. & Erast. de morb. c. 14. par. 73.* inquit, *Quis ventriculos sanguine oppletos in apoplecticis vidit unquam?* Verum considerato sanguinis motu, vasorum natura & partium intra cranium conformatione, id non adeo difficulter fieri posse puto. Sanguis enim, intra arterias imprimis, celerime, ac, dum vivit homo, continuo movetur, nisi obstructio remoram pariat, adeo ut aperto vase, brevi tempore magna sanguinis vis

erum.

erumpat, quod hæmorrhagiæ sæpe enormes testantur: qui si intra ventriculos effundetur, per hiatus ambos lateralium ventriculorum, ubi prope basin aperti sunt, absque ullo impedimento descendere potest; imo, accedente novo sanguinis appulsu, intra spatium, quod utramque meningem intercedit, sursum non illubenter scandet. Eadem sanguinis ratio est, qui ex superno vase aperto effluit, nam hic vel citrapulsus, solo pondere, deorsum ruere, intra spatium meningum, valeret.

Vasa autem sanguifera tam intus recondita, quam externum habitum perreptantia, non raro, citra causam externam & violentam, sua sponte aperiri, notius est, quam ut probatione indigeat. Ut tamen res clarior evadat, duo exempla in externo corporis habitu apertorum sua sponte vasorum apponam. Vivit apud nos Nobilis quædam Matrona, 44. annorum, habitu corporis gracili prædita, facie rosea, ac cætera sana ac vegeta: huic ante quindecim annos in manus sinistrae pollicis extremi parte externa; macula atro-rubescens, quam extremo minimi digiti apice fere tegeres, oborta est: ipsa existimat inter pariundum se hanc pollicis partem vehementius manubrio fellæ allisisse. E medio hujus maculæ, singulis annis ter quaterve sanguis cum saltu, aliquot cubitorum altitudine, sua sponte erumpit, & quidem non parva quantitate, aliquando enim à sanguinis hoc effluxu fere leipothymiam incurrit. Consueta sanguinis portione emissa; apertum vas, citra opem medicam coalescit, nullo rimulæ vestigio fere comparente. Inde etiam macula, elatior paulo cuti, detumescit, quæ trimestris spatio denuo incrementa sumit. Extra consuetam periodum quandoque arteriola ista

O

ape-

aperitur, si manum aquæ, in quo sapo dissolutus sit, immergat. Alterum exemplum præbet *Famula*, quæ ante aliquot annos, apud Charissimos Parentes meos diu serviebat; huic jam effatæ, mensibus suppressis, poplitæa in pede dextro sua sponte aperiebatur, magnamque sanguinis vim, ac si lanceta vulnerata fuisset, effundebat; aliquandoque in balneo reserata fuit, & nisi focia aquam cruentatam observasset, cum sanguine animam emisisset: sanguinis effluxu cessante, ne vestigium quidem loci aperti animadvertere licuit. Novi similia apud Authores Medicos legi; quorum confirmationi hæc interserviant.

Cum itaque in partibus subcutaneis atque interioribus vasa sanguifera, nec cæsim nec punctim læsa, ob sanguinis vitium ac propriam imbecillitatem frequenter reserentur, quidni intra cranium in ventriculis, vel extra ventriculos aperiri queant? Imprimis arteriæ aperientur, in quibus sanguinis motus concitator est, quæque intra cranium tenuiore tunica, quam alibi præditæ sunt; quarum cum non paucæ, nec adeo exiguæ ventriculos subeant, ut supra dictum, & ipsæ hiscere poterunt, sanguinem in cavum eorum, experientia patrocinate, excreturæ. Quam autem ob rationem sanguinis tanta profusio apoplexiam effecerit, quilibet facile intelliget, qui secum reputabit, sic constitutis rebus cerebrum non posse non privari sufficienti spirituum materia ac vivifico suo fomite, cujus perpetuo indigum est. Insuper tanta sanguinis subito effusi copia non parum spirituum animalium adhuc residuorum undique vias compressisse, atque eos omni exitu prohibuisse videtur, ut vel ob hanc
so-

EXERCIT. DE LOCO AFF. 213

solam causam, omnium animalium actionum abolitio consequi potuerit.

Ex secunda quoque historia manifestum est, liberaliorem sanguinis excretionem intra anfractum anteriorem apoplexiam produxisse, cum in toto reliquo cerebro nihil quicquam à nobis inventum fuerit, cui vel proximæ, vel sociæ causæ nomen tribui potuisset. Modum generationis spurii hujus aneurismatis, in enarratione hujus historiæ indigitavi, ne actum agam, hic denuo repetendum non puto. Inquisitionem autem hoc meretur; quamobrem scilicet altera cerebri parte & cerebello sanis ad sensum existentibus, nihilominus omnium actionum animalium, citissime interficiens, abolitio secuta sit? Cum in multorum ore sit, ideo plerasque partes duplices esse, ut una læsa, altera tamen officio communi fungatur; atque ob hanc causam cerebrum ipsum quoque in medio aliquousque divisum nec *Galenus* abnuit, & sequaces ejus probant, licet sint, qui idem pernegent. Verum si quod res est fatendum erit, non aliter me extricare potero, quam si dixerò cerebri partibus profundioribus & nobilioribus insigniter læsis, etiam alteram, licet sanam, in consensum protinus rapi; non secus ac observatum est, alterutro rene notabiliter læso, & alterum muneris sui quasi oblitum fuisse. Nam si quis statuendum putet; ab hoc aneurismate basin cerebri, etiam in altero sano latere; pressam fuisse, illum hydrocephali redarguent; in quibus aquæ pondus longe hanc sanguinis molem superat. In Cubiculario quidem sanguis extravasatus tale quid efficere potuit, at sanguinis longe major copia erat. Frequentissime autem in apoplexiis tum lethalibus, tum in iis, quæ vel ad integram, vel

aliqualem saltem valetudinem terminantur, alterutrum tantum latus à causa proxima occupari existimo, cum illa plerunque ab hemiplegia occipiant; hinc aliquot novi, antequam fatalis apoplexia penitus eos obruisset, crêta vel aliis indiciis significasse, quid secum fieri velint, quod etiam de *Tracastorio* narratur: hæc vero maturius in hemiplegiam definunt quam ut credi possit, antihac causam in utroque latere delituisset; hemiplectici enim latere sano ita uti possunt ut plurimum, ut nulla in illo imbecillitas notari possit. Quomodo autem hæc compassio fiat, sententiâ mea hac vice *πέχω*. diligentior inquisitio atque aliorum labores forsitan veritatem mihi aperient. Hemiplegiæ vero causa haud difficulter in hac *Barbarâ* reddi posset, cum dimidium cerebri, maximam partem, sanguine spoliatum fuerit, effuso copiose intra anfractum sanguine, arteriis plerisque eo vacuis, secus ac se in opposito latere habebant.

In tertia historia *Annæ*, tota basis, medulla scilicet globosa & oblonga, intra medullarem substantiam & tenuem meningem, sanguine suffusa erat, pertingente suffusione ad anfractus aliquousque. Quod factum forte ex ruptis radiculis, seu filamentis illis arteriosis, quæ à vertebralibus & carotidibus in basi exorta, immediate utramque medullam ibidem subeunt. Rupta autem fuerunt ex casu, cujus procul dubio vertigo occasio erat, quam redundans in ventriculis aqua peperit: nam ad pedem colliculi mortua inventa fuit, sarmentorum fasciculo, quem collegerat, in editiore loco jacente: unde etiam vulnus in tempore accepit. Licet enim neque os temporis, ubi vulnerata erat, neque meninges faucis fuerint, nihilominus tenellulæ, concusso

vehementius capite, abrumpi potuerunt; quod eo facilius quoque contigit, quia ob redundans in ventriculis serum, in vetula flaccidiores erant. Hoc etiam *Fernel. de Abditis rer. caus. lib. 2. cap. 15.* observavit in quodam, qui ex sinistri oculi vehementiore ictu, subito attonitus corruit, ac frustranea omni ope, post duodecim horas interijt. Discisso capite neque ossis, neque meningum, neque substantiæ cerebri quicquam contractum divulsumve, sed duntaxat interiores oculi venas, contusionis vi diruptas animadvertit, è quibus sanguis cochlearium duorum mensura, in cerebri basim procubuerat. Similia alij observarunt. Videatur *Exc. D. Tulp. obs. Med. l. 1. c. 2. & 3.* Cum indagaturus arteriarum per cerebrum distributionem, præterita hyeme, aliquot boum capita aperirem, animadverti, ex percussione frontis, qua boves velut apoplectici concidunt, non solum supernas cerebri partes & ventriculos cruore infarctos, sed & in basi omnia cruore suffusa fuisse, procul dubio, ob ictus vehementiam, filamentis illis arteriosis abruptis: quin etiam ob eandem causam os cuneiforme in basi fractum semel conspexi, quod se vidisse quoque *c. 3. l. c. D. Tulp.* in sene ex altiore loco delapso, memorat. Apoplexiam autem huic Vetulæ, sanguis huc effusus, ideo videtur attulisse, quia sanguis arteriosus præcipuè cerebri & cerebelli substantiæ, ubi spiritus plurimi animales generantur, & unde omnes distribuuntur, denegatus fuit, idque partim propter plures abruptas arteriolas, partim quia ab extravasato & grumescente sanguine reliquæ adhuc integræ, in tota basi, compressæ fuerunt, unde fere penitus ad hanc medullarem substantiam sanguini aditus interclusus fuit: Non vero ob pressam & coarctatam

tam medullam, cum sanguis paucus, nec ad compressionem sufficiens, intra tenuem meningem ac medullarem substantiam, effluerit, qui tantum per superficiem ejus diffundebatur. At quantum sanguinis, ad compressionem totius basis cerebri conficiendam, requiratur, vel ejus moles edocere posset. Et quamvis arteriæ, quæ anfractus intercurrunt, integræ perstiterint, cerebrum debito fomite refecerint, atque illud, ex suggesto spiritu vitali, animales in superioribus partibus produxerit, illi tamen ad sensus externos reliquumque habitum corporis distribui nequiverunt: postquam enim globosa & oblonga medulla sanguine & vivifico calore spoliata fuit, porosam suam & facile permeabilem conformationem, frigidior reddita, perdidit, spiritibusque transitum ulteriorem negavit. Tantum enim valet sanguis hoc in loco extravasatus, ut etiam duo cochlearia ad inevitabilem celerrimamque mortem adferendam sufficiant, probante id *Fernelii* historia modo citata: Cum alibi intra cranium copiosior effusus, ut supra ostensum est, si mature succurratur, non semper enecet. Quid autem fero in ventriculis cumulado apud foeminam istam tribuendum sit, ex sequentibus patebit.

Effusio autem sanguinis extra vasa, intra cranium, fit vel propter eorundem anastomosin & osculorum reformationem, vel frequentius, ob eorum rupturam & lacerationem, vel rarius, propter erosionem. Ob *Ἀγπήδησις* vix apoplexiam generari opinor, cum tardius ob tale vitium sanguis exstillet & paucus, qui ad affectum celerimum producendum, non sufficiet.

Anastomosin vel propter sanguinis copiam, vel fervorem, vel tenuitatem, alibi fieri notum est:

est: quidni & illa ob easdem causas intra cranium fiat? cum vasa in his locis æque tenuia sint ac alibi, imo arteriæ, etiam majores, tenuiori tunica vestiuntur, atque illa ipsa sanguinis vitia in cerebro non minus locum habeant, quam in reliquo corpore: sine discrimine enim sanguis sursum deorsumque ex corde pellitur. Sic observatum, suppressa consueta aliqua hæmorrhagia, apoplexiam obortam fuisse. Exemplum suppeditat *Guil. Fabrit. Hild. c. 3. obs. 11.* confirmat hoc *Cl. Plater. Pract. Tract. 1. l. 1. c. 2. Jacbin in 9. Rhaf. c. 9.* vidit divites otiosas, menstruis jam cessantibus, apoplecticas evasisse. Et si sanguis fervidior sit, aut ob animi, vel corporis motum, vehementius concitetur, citius oscula vasorum recludentur: ita referunt Impp. Verum Antoninum, & Valentinianum ab apoplexiâ, sensibus paulo ante integris, subito exspirasse. Ob sanguinem tenuiorem *Cubiculario Rheinov.* vasa referata quoque suspicor, eo quod temperamento calidiore præditus erat & potulenta apud ipsum, solidioris substantiæ alimenta in victu superarant. Alios duos novi largius semper bibentes, parcius autem firmioribus cibis utentes, apoplexia paucissimarum horarum spatio extinctos fuisse, ex ore demortuorum copioso effluente sanguine.

Rumpuntur vasa itidem ob sanguinis vel copiam, vel concitatiores motum, ut num vasa disrupta, vel eorum oscula referata fuerint, ignores. Quorsum etiam faciunt extrinsecus impetuosius capiti insultantia, ex quorum numero sunt casus & ictus vehementiores. Frequenter autem hæc vasa rumpuntur; hinc cum viventibus adhuc & post mortem, magnam sanguinis copiam per os & nares erumpere toties observa-

218 EXERCIT. DE LOCO AFF.

rit *Exc. D. Felix Plater. Pract. Tr. I. l. I. c. 2.* aliquoties sibi persuasit, hanc potissimam apoplexiæ causam esse. Externæ causæ caput obtundentes, si in caput incidant, cujus vasa imbecilliora sunt ac sanguine distenta, etsi sæpe leviculae sint, nihilominus tamen vasa hæc disrumpere valent: prout apud *Benivenium, Fabrit. Hildan.* & alios legitur; alapam, aut nullius momenti aliàs futuram capitis allisionem, apoplexiam attulisse. Promptius quoque hæc vasa diffringentur, si, iis obstructis, sanguis vehementius moveatur, cum enim sanguini, e. gr. in arteriola incluso, ob ulteriorem progressum impeditum, major, continuo sanguinis motu, copia accedat, quam angustia arteriæ unius vel plurimum capere possit, facile rumpentur, idque citius quam alibi, quia, ut dictum arteriarum tunica tenerior, quam in aliis locis: maxime senibus, quorum arteriæ, ut aliæ spermaticæ partes, sicciores sunt. Quod ut credam, nuperum exemplum me docuit. Mercator quidam nostras, senex septuagenarius, sed vegetus, exacte plethoricus & laute, verum temperanter victitans, proprio ex consilio, media æstate, aliquot septimanis, fusque deque habitis legibus medicis, balneo usus est. Nondum imposito curationi fine, mane è lecto surrecturus, omnium symptomatum cumulo se obrutum sensit, quem iis molestum supra dixi, quorum arteriæ intra cranium obstructæ sunt. Usurpatis congruis medicamentis & V. S. utcunque convaluit; atque in posterum sibi met mederi pil. Francof. satagebat. Vix duobus mensibus elapsis, ex gravi & ab infomniis variis turbato sopore mane excitatus, forsan post liberaliorem cœnam, caput supra modum gravatum & quasi fumis impletum causabatur, erecto,

cto capite omnia in gyrum rapi videbantur; quamobrem noluit surgere, sed in lecto iusculum ac dimidiam gallinam elixam pransus est, superbibendo haustum egregium vini generosioris. Vix finito prandio subito accersor. Dum ipsi adstiti, vitiabatur loquela, & paucorum momentorum intervallo, latus sinistrum resolvebatur. Intra vero quadrantem horæ, dum clyster atque alia medicamenta, ad suscitandum ægrum convenientia, parantur, omnes sensus & motus abolentur, me quasi singula vidente & palpante. Respiratio mox inæqualis & cum stertore peragebatur: quandoque statim ab insultu, intermittebatur. Protinus omnia vehementissimæ apoplexiæ indicia aderant, ut necessario ab omni remedium usu mihi cessandum fuerit. Post quatuor horas mortuus est. Ex ore demortui plurimum cruoris effluxit. Idem forte Juveni apud *Cl. D. Tulp.* præservationem spernenti, evenit.

Erosio, ut monui, rarior est, quin tamen aliquando fiat, non impossibile esse videtur, si tota massa sanguinea corrodentibus humoribus scateat. Variolis apoplexiam supervenisse puellæ cuidam audiui, quod procul dubio vase aliquo ab interna variola eroso contigit, nam & eas intus circa partes membraneas erumpere notum est. Nisi forte incuria adstantium reperiussæ fuerint, & vitiosus humor sanguini permixtus, potius vas aliquod ruperit. Ulcera vero cerebri, alio mortis genere ægros interficient, quam apoplexia, vel si ejus causa forte sint, alia ratione, quam vasorum erosionem, efficient. Qui apoplexiam ab effuso intra cranium sanguine incurrunt, nihil sinistri præsentunt, aut tale quidpiam suspicantur, nisi quod obstructis arteriolis vasorum

O 5

ruptu-

rupturam præcedentem aliquando capitis gravitatem, vertiginem, lateris alicujus stuporem & similia ante insultum experiantur. Cæteris enim in casibus, cum, antequam vas rumpatur, nihil insueti, aut adversi in capite sufferant, de hoc malo ne minimum quidem cogitant. Plethorici vero plerique potius alium quemvis morbum, nisi præmoneantur, extimescunt. Cum autem jam ingruit morbus, altero latere jam hemiplectico, verbis aliisque indiciiis opem implorant: Mercator ille, cujus modo mentionem feci, exoriente malo miseriam imminentem balbutiente lingua deploravit, ac remedia quantocyus maturanda significavit, alias si tardentur de se actum iri. Novi quempiam, quid secum factum velit, in tabellam creta scripsisse. Paulo post, idque celerrime omnes animales actiones pereunt, ac protinus, paucarum horarum spatio, emoriuntur: Cum alii apoplectici sæpe triduo & amplius omni motu & sensibus orbat, truncorum instar, respiratione sæpe non adeo vitiosa jaceant. Ob sanguinis enim effusionem, ut dictum, cerebrum, præcipuo actionum instrumento, calore scilicet spoliatur, spiritibus animalibus materia subtrahitur, si copiose effluat, perfrigeratur cerebrum ac premitur, unde collabitur; porisque coarctatis, spiritibus animalibus exitus denegatur.

Apoplexiam à sanguine ad interiora cranii effuso, supra, ex *Petro Salio*, incurabilem pronuntiavi, & hætenus id penitus persuasus eram. Cum enim sanguis extravasatus, repentinum hoc malum effecturus, vel quantitate nimia, vel loco peccare debeat, vix perspicere potui, qua ratione vel redundans, vel situ noxius, cum ægri levamine, auferri possit: Si namque tanta copia ventriculi omneque cavum spatium intra

cra-

cranium adimpleatur , qua hæc loca in *Cubiculario* infarcta vidi , nullam viam invenio , per quam nocentior ejus portio exhauriri possit. Multo minus sanguis , qui intra anfractus in *Barbara* delituit , ulla arte , cum commodo ægræ , elici potuisset : (ut taceam , vix quempiam mortaliū extitūrum , qui primo insultu perspicacissima ingenii vi , causam hic absconditam , subolfactorus sit) Trypano namque perfosso hic syn-
cipitis osse , pertusis quin etiam meningibus & substantia cerebri , effluxisset quidem sanguis : at rupta arteria , ob perpetuum motum sanguinis , semper novus affluxisset , per recens foramen cum vitæ exitu desiturus. Nec ille , qui per basin fusus est sanguis atque apoplexiam producit , ut in *Anna* , ulla arte tolli poterit : sensibilibiter enim sanguinem extravasatum ex his locis extrahere velle , insanix propius foret , quam dextræ medendi rationi : insensibilibiter discutientia ad sanguinem , loco maxime peccantem , non penetrabunt ; vel si penetrent , malo nullam medicinam adferent , sed augebunt , dum sanguinem fluxilem magis reddunt & ad elapsū , ex ruptis arteriis , promptiorem. Atque ob hæc argumenta apoplexiam à sanguine extravasato generatum adhuc immedicabilem existimo. Non tamen ignarus sum , Rationem sibi sæpe discrimina fingere , quæ Natura , minus remediorum operoso apparatu turbata , feliciter dispellit , timidumque eludit. Quod forte aliquando & in hoc casu evenit : videmus enim non raro quosdam , ex gravi capitis percussione , omnibus sensibus & motu privatos , instar apoplecticorum corruere , qui nihilominus sæpe haud difficulter curantur. Tribuitur quidem vulgo id turbatis spiritibus animalibus , ob vehementius commotum cerebrum ;

rum si quis durationem symptomatum diuturniorem & curandi rationem expendat, vix soli spirituum perturbationi hunc symptomatum cumulum adscribere poterit. Consideretur historia, quam *Exc. D. Thom. Barthol. obs. Anat. c. 3. obs. 3.* exhibet de juvene, qui sine sensu, voce & motu, ab exploso sclopeto nucham versus, quinque dierum spatio jacuit. Præterea quotidie experimur, partes extimas vehementer contusas, ruptis capillaribus vasis, integra cuti, valde intumescere, citra tamen suppurationem vel sua sponte subsidere, vel repellentibus & tandem discutientibus admotis, omnem extuberantiam evanescere. Quid ni ergo & idem, hoc in loco, paucis arteriis in basi ruptis & non adeo multo sanguine effuso, contingere posset? Maxime si Naturæ tempestive & congruis remediis suppetiæ ferantur, sed de his pluribus differendi, forsitan alibi amplior occasio dabitur.

A spirituum animalium effluxu ad sensus & motus voluntarii instrumenta prohibito, utcumque spiritus vitales cerebro & cerebello abunde impertiantur, apoplexiam fieri, à *Galen*i temporibus ad hoc usque seculum, creditum fuit. Imò à plerisque spirituum animalium subita denegatio, pluribus, vel omnibus partibus sensibus & motui dicatis facta, sola apoplexiæ causa censebatur; Licet enim quidam apoplexiam quoque à sanguine fieri concesserint, non tamen id largiti sunt, nisi qua sanguis sive vasis inclusus, sive extra vasa effusus, ventriculos & meatus, per quos spiritus animales feruntur, vel comprimeret vel obstrueret. Primus, quod equidem sciam, inter Recentiores *Cl. Georgius Nymanus Professor Wittebergensis*, peculiari tractatu de apoplexia ausus est negare ullam veram apoplexiam gene-

generari, à spirituum animalium effluxu omnimode intercepto. Quod ut demonstret c. 12. loc. cit. probat ventriculos nec spirituum animalium officinam, nec receptaculum, nec sedem apoplexiæ esse: c. 13. pluribus contendit nervorum principium amplum, nec adeo sibi vicinum, simul & semel idque subito non facile vel coarctari, vel obstrui posse: si vero id fieri concedatur, non tamen principes sensus & visum aboleri, ac propterea à spirituum animalium effluxu impedito, apoplexiam nunquam oboriri autumat: C. 14. & 15. Omnem veram apoplexiam fieri concludit, ob torcularis angustiam subito contingentem, propter quam & cerebro & cerebello spiritus vitales denegentur, inde subito omnium actionum animalium abolitio consequatur. Verum sententia hæc, ut *Exc. D. Guern. Rolpink. Meth. Cognosc. & Cur. capitis aff. dissert. 9. p. 21.* loquitur, *multis magis speciosa, quam solida videtur.* Etsi enim quæ contra ventriculorum usum c. 12. attulit, admitti possint; minus tamen veritati consentanea sunt, quæ c. 13. proposuit, quæ cum doctissimo calamo *Cl. D. Rolpinkii loc. cit.* debellata fuerint, nolo ea hic repetere. Spiritibus autem vitalibus cerebrum & cerebellum defraudari, torculari occluso, jam *Cl. Rioli. Anthropol. l. 4. c. 3. & Cl. Thom. Bartholini Inst. Anat. l. 3. c. 2.* exploserunt, ejusque rei falsitas vel ex sola arteriarum supra exposita distributione facile agnosci potest. Itaque missum faciam hac vice *Cl. Nymannum* atque propius ostendam, apoplexiam veram quoque generari, ab effluxu spirituum totali, ad instrumenta sensus & motus præpedito. Quod fiet ob principii omnium nervorum vel obstructionem,

nem, vel compressionem subito factam, unde denegatis spiritibus animalibus, quamvis abundant vitales apoplexia sequitur.

Obstructionem primum quod spectat, præsupponendum ante omnia, cerebrum & cerebellum porosum esse, non solum arteriolarum, quarum plurimas recipit, ratione, cujusmodi poros non paucos oculis usurpare licet, sed & propter spiritus animales, qui ex substantia utriusque in nervos propellendi sunt. Hos enim spiritus corpus quoddam esse quælibet fere particulares partium paralyfes & nervorum ligaturæ docent, si namque spiritus isti, in numerum qualitatum spiritualium referendi essent, hos obices facile superare possent (non secus ac lumen densissima vitra transit, atque odores escarum à piscibus profundissimis alveis immerfis percipiuntur) nunquamque ulla vel ab humore, vel vinculo paralyfis generaretur, sed omnis nonnisi discisso nervo fieret. Deinde necessum est, ut pori medullosæ substantiæ patefiant arteriolis per eam dispersis, nisi enim aperti sint, citissime deficiunt animales spiritus, cum summopere indigeant perpetua spirituum vitalium refocillatione, qua denegata, jam supra dictum, brevi actiones animales perire. Quæ enim à *Galeno* traditur ab aëre spirituum animalium instauration, valde dubia est, cum per os ethmoides nihil cranium subeat: per infundibulum verò aërem intrare non probile est, nam per unam, eandemque viam diversorum corporum contrarius motus fieret; & quamvis intraret, nihil tamen spiritibus prodesset, cum ventriculi excrementorum receptacula, nullo modo spirituum officina sint. Quoniam igitur ex his constat, cerebrum & cerebellum

lum porosum esse, eorumque poros non solum in nervos hiare, sed & arterioliis patefcere, haud difficulter intelligetur, medullofam eorum substantiam obstrui posse; eademque opera manifestum evadit, unde humor obstruens affluat: quia enim duo tantum vasorum genera substantiam hanc subintrant, venæ scilicet & arteriæ, his potius hæc provincia deferenda erit, quam illis, cum per arterias in omnes partes influant, per venas ad cor refluant. Lymphatica verò vasa hæc loca irrigare, nondum notum est. Et quoties cælum palati ac faucium, nullis foraminibus cerebrum versus (exceptis illis, quæ à glandula pituitaria proficiscuntur) pervium, infundibulique conformationem, superne latam, inferius acuminatam, intueor, non possum mihi persuadere, vapores, è ventriculo e. gr. sursum exhalare, atque à cranio, ceu tecto fumo- sæ domui imposito, in humores, non secus ac in destillando objectu alembici fit, condensari, qui postmodum variorum capitis morborum causæ sint. Nonne potius per os & nares, vias satis patulas, exhibunt, quam ingressuri sint foramina, excrementorum cerebri perpetuæ evacuationi dicata? fere enim semper infundibulum & canaliculi à glandula pituitaria derivati, excrementis è ventriculis descendentibus, occupantur, ut vaporibus ascendentibus vix locus esse possit, nisi penetrationem corporum admittere velimus.

Si ullus humorum in corpore nostro, memoratos poros medullo sæ substantiæ, in cerebro & cerebello, subito oppilare poterit, *Serum* id præ reliquis præstabit. Etsi enim peculiarem cum cerebro familiaritatem habere videatur, eo quod tenuioris pituitæ, quæ serum est, metropolis dicatur

226 EXERCIT. DE LOCO AFF.

atur atque in embryone cerebrum instar feri fluidum conspiciatur, puteturque lymphæ *Bartholiniana* ex spiritu animali coagulato generari, quin etiam frequenter, si non perpetuo, intra ventriculos aliqua feri portio reperiatur, quandoque magno impetu in catarrhis excernatur, ac denique nervosis partibus læsis, quasi suppetias laturum affluat, nihilominus tamen, si copia, aut loco peccet; nullum emolumentum affert, quin potius ejus sanitatem destruit, atque in actionibus suis perturbat, & non raro eas penitus abolere valet. Plures autem horum pororum, vel maximam partem, si non omnes, *serum* præ cæteris humoribus obstruere potest, quoniam individuus sanguinis comes est, ac cum eo per universum cerebrum intra capillares arterias fertur, & tenue est ac visciditatis fere expers, ut minutiora foramina transire ac angustissimis meatibus se insinuare possit, non secus ac aqua spongiarum cavernulas, aut spongiis densiora corpora pervadit. Præterea non difficulter à sanguine segregatur, ut non solum urina, lachrymæ & sudores testantur, sed etiam morbi quidam, ut catarrhi, diarrhœa serosa, arthritis, alique comprobant: cujus rei documenta præclara, in plurimis affectibus à capite ad calcem descriptis, aureus liber *Caroli Pisonis de Serosa colluvie* exhibet, qui consulatur; Lectorem enim benevolam docebit, purum putum serum, subito sæpe à sanguine secretum, multorum malorum causam existere. Quam facile serum intra vasa effervescens, magna copia & celerrime à sanguine segregetur, & ut *Car. Piso* loquitur, despu-metur, nuper admodum apud *R. D. P. Gabrielem Mejerum Franciscanum* animadverti: qui cum antidhac assidue libris inhæreret, ac Provincialis mu-

munere bis fungeretur, varias experiundo tempestates, ante aliquot annos arthritide corripit. Hoc autumno rediit paroxysmus cum horrore & ephemera febris occipiens, mox dolore articulos invadente. Circa principium insultus crebrius & copiosius urinam excernere cogeatur, ut urinam plurimum potulenta superarit: quod Virum doctissimum, in victus ratione alias temperatissimum, ob rei novitatem, in admirationem rapuit. Mox pedes & brachia, juxta dolorem, oedemate tumuerunt. Quæ omnia celerem feri à sanguine secretionem, tantorumque effectuum causam, haud obscure arguunt.

Serum vero hoc, siue sanguini intra arterias adhuc confusum sit, siue jam extra illas pulsum fuerit, mobile admodum est impetuique pulsoris lubenter cedit, ut profunde intra cerebri poros adigi possit. Si itaque serum intra vasa effervescat ac ab illo segregetur, in cerebelli ac cerebri substantiam quaquaversum extrudi poterit, ubi tum spiritus animales corrumpet, tum vias ac meatus eorum obturabit: & quia arteriolæ omnes eorum particulas subeunt, nulla à feri ebullientis ac tumultuantis irrigatione immunis erit; unde omnes quoque animales actiones, nec sensibus internis exceptis, peribunt; atque hanc ob causam felicius omnium sensuum abolitorum ratio reddi potest, quam si solum basin coarctatam, aut obstructam in apoplexia dicamus, nec nobis ad liberiores spirituum motum prohibitum recurrendum erit. Inde quoque manifestum evadit, quamobrem, sensibus externis & motu reparatis, sæpe internorum sensuum imbecillitas aliqua remaneat, utcunque enim de feri natura sit facile discuti posse, quia tamen profundis cerebri partibus se quoque immergit, quorum

P

fum

sum medicamentorum virtus vix penetrare potest, aut quia non raro ipsi aliquid mucosi, ut *Cl. Piso* monet, permiscetur, non exigua ejus portio immota perstabit & à reliquiis istis facile labes aliqua sensibus aspergetur, quæ ægre emendabitur; Eadem reliquæ occasionem recidivæ, frequenter apoplecticis quibusdam evenienti, præbebunt: Sic malum hoc ter quaterque recurrisse novi. Non autem existimandum est, ob capillarium arteriarum medullosam substantiam trans-euntium exilitatem, non tantam feri copiam in illam effusum iri, quæ ad tot actiones abolendas sufficeret; perpetuo enim sanguinis motu jugiter novum serum adfluit, quod cum sanguini confusum sit ac ad secretionem promptum & facile, prægressum absque mora sequetur, donec ad quantitatem illam pervenerit, quæ ad effectum hunc producendum requiritur. Non equidem negaverim, hunc feri imbrem aliquando largiorem, quandoque parciorem esse: sæpeque illum plures, non raro etiam pauciores medullosæ substantiæ partes perpluere, unde etiam fortior vel debilior apoplexia enascitur: nonnunquam ob feri ignaviorem & mediocrem irruptionem, se tantum vel futuræ vel imminentis indices ostentant. Consuli *Chr. Beyero* apud *Exc. D. Rolfink. diss. 9. l. c. p. 23.* brachii sinistri paralysis & loquelæ vitium, capitis gravitati indormiscenti, obtigit, procul dubio parva quantitate feri poros medullosos occupante. *Idem p. 38. Ib.* Bis in Nobilibus ægrotis observavit sensus tantum, manente motu, abolitos. Quod etiam *Cl. D. Sennertum* & *Spigelium* notasse memorat. Non raro à primo insultu tantum lateris alterutrius paralysis, cum levi sensuum internorum &

loquelæ vitio observatur. Si copia feri irruentis adhuc minor sit, sopores p. n. producet.

Verum enimvero nemo hominum est, cujus-
cunque demum temperamenti & ætatis sit, cu-
jus massæ sanguineæ non quoque serum permi-
sceatur, sæpe satis copiosum, quod toto vitæ
cursu frequenter effervesceat, ac fermentatum
quasi & ebulliens intra vasa non raro à sanguine
secessum facit, atque vel manifeste & sensibili-
ter excernitur, vel in partem aliquam decum-
bens, illam tumidam reddit & dolore afficit:
Rarius autem apoplexiam gignit, imprimis in ju-
nioribus ac pueris, quibus apoplexia est corvo-
rarior albo. Igitur haud immerito de hujus affe-
ctus à sero generatione tali dubitabitur. Quo-
niam autem omnis actio ab agente fit in patiente
disposito, forsitan, hoc Philosophorum axioma-
te in auxilium sumpto, dubium hoc expugnari
poterit; Etsi enim sæpe in corporibus colluvies
humorum redundet, non tamen semper morbos
producit; Id enim apud quosdam temperamenti
robur ac partium quarundam ea virtus est, ut
sæpe validissimas morborum causas eludant. Ita-
que si serum, dicta ratione apoplexiam produ-
cturum est, præsupponenda erit prævia cerebri
& cerebelli *dispositio*, atque imbecillitas quædam,
ob quam serum irruens promptius recipitur, va-
lidiusque & efficacius actiones animales omnes
prostermit & abolet, quamvis aliquando serum
fermentantium vis tanta sit, ut citra talem dispo-
sitionem, sola id præstare valeat.

Si quid in re obscura definire licet, *dispositio-
nem* hanc consistere existimo in pororum illo-
rum, qui ex arteriolarum capillamentis in me-
dullosum substantiam hiant, spiritibusque vitali-
bus transitum largiuntur, nimia laxitate, ob quam

230 EXERCIT. DE LOCO AFF.

non solum spirituosæ sanguinis partes, sed & tenuiores feri portiones transsudare possunt; ut & in prævia repletionem meatuum ac cavernularum, per quas spiritus animales moventur, sensim à serosis humiditatibus introducta, propter quam, si feri nimbus ingruat, spiritus animales corrumpuntur, eorumque viæ penitus occluduntur, subsequente actionum illarum, quarum instrumenta sunt, ablatione: non secus ac loca alias irrigua, ab imbre permadescunt. Dispositiones has originem suam ab illis, quæ caput vulgo replere dicuntur, ducere autumo. Quorsum etiam facient, discussionem excrementorum tertie concoctionis impediencia, illa profundius impinguentia & incrassantia; ut & poros ac meatus coarctantia. His si hæreditario jure, & à vitæ primordiis aliquid accedat, eo citius dispositiones istæ parabuntur; sicut etiam apud illos fieri solet, quibus caput natura debilius est, & vel à fragrantiore odorem læduntur, cerebrumque impleri sentiunt; quod calidum & humidum cerebrum habentibus evenire fertur.

Caput præ multis replent atque hanc dispositionem inducunt *Narcotica*, quæ si immoderatus assumantur, etiam sola apoplexiam effecisse, sæpius observatum fuit. Ex horum numero sunt omnes liquores inebriantes, qui ex fermentatione spirituosam, aliqua ex parte, naturam nacti sunt, quam hac ratione adipisci pulchre pluribus demonstrat *Cl. Billichius de Fermentatione Platonica*: quales sunt Vinum, Cerevisia, Hydromel vinosum, atque hujus generis alia, quæ eosdem effectus, licet diversa quantitate, cum opio edant, non video cur non & suo modo stupefacientia dicenda sint. Oppugnavit quidam nuper *Exc. D. Fel. Platerum Quæst. med.*
Para-

Paradox. & Endox. 76. primum firmis rationibus hoc statuentem : sed tanti ejus argumenta non sunt, ut à *Platero* nos avocare possint. Concedit enim Vinum diutius, frequentius ac largius sumptum tremorem, paralyfin & tandem apoplexiam efficere, non tamen vi narcotica, sed longe alia ratione: scilicet Vinum, cum halituosum sit, nervos & caput implere, spiritibusque animalibus vias intercludere, tamdiu, donec vinosi isti halitus dissipentur, quibus discussis somnus cesset, & functiones animales revertantur.

Quærerem ex Disputatore, quam ratione ab opio, exempli causa, temulentiam, soporem, & si nimium ipsius devoretur, apoplexiam produci putaret? Nonne halitus suavis naturalis somni, & si copiosiores sint, præternaturalis causa existunt? Nonne ab opio sumto caput aliquandiu aggravatur? manifesto indicio ab insigni fermentandi, seu in halitus vertendi opii vi, plurimum horum se spirituum animalium viis insinuassee, ac eas aliqua ex parte oppilasse. Et si nimium ejusdem assumatur, scire averem ex illo, qua ratione apoplexiam gigneret? Anne ventriculos cerebri implendo ac obstruendo? Cui sententiæ impense adhuc favet. An potius meatus plerosque ita infarciendo, ut spiritibus animalibus omnis transitus denegetur? Quod credibilius, quam excogitata quorundam spirituum animalium fixatio, ab opio calido ac sudorifero. Sedem vero apoplexiæ ventriculos non esse abunde hætenus dictum est. Deinde narcotica maligna & venenata pronuntiat, Vinum vero malignitati resistere cordisque robur tueri dicit, atque ita directe Vinum & narcotica sibimet opponit. Verum si propius rem intueamur, narcoti-

ca non parva injuria affici experiemur. Nonne enim Opium, quod inter prima narcotica ipse refert, præcipuum ingredientium Theriacæ Andr. & Mithridatii est? Et quis non Practicorum quotidie saluberrimas opii vires in debellandis morbis experitur? Si nimirum debita quantitate, convenientique tempore, in affectibus, qui opium poscunt, exhibeatur. Audiat Cl. Jacobum Bont. in notis ad c. 4. Garc. ab Orta p. 9. scribentem: *Certe laudes hujus succi, ex papavere expressi, si vellem referre, viderer Chymicis velle suum honorem præripere; hoc saltem dico, si nobis hic de Opio, ac opiatis non esset prospectum, frustra in calidissimis Indiæ orientalis regionibus medicinam faceremus dysentericæ, Cholerae, febribus ardentibus ac reliquis biliosis affectibus orgasmo turgentibus.* Et paulo post subjungit: *Profecto insignis est oscitantia ista, quæ in abusum medicamenti ac minus bene præparati dicuntur, in usum nobilissimi inter omnia pharmaca velle referre: sine fundamento sæpe, ac in scholis sine experientia.* Similia repetit Meth. Med. Indicæ c. 2. Si quam igitur noxam pepererit opium, non præstantissimo ac utilissimo medicamento, sed vel imperitiæ, vel imprudentiæ medentis adscribenda est: Hac enim ratione saluberrimorum abusus nocuus esse potest; Imo ipsissima, utcunque roborent & lætificent cor hominis, nimia quantitate, aut in morbis calidis, aut data non apto tempore, Vina nocent. Insuper objicit narcotica parva quantitate magna vi pollere, atque effectus edere, quos vinum justa quantitate sumptum, non præstet, imo reperiri potatores, qui tanquam gurgites & voragines de poculorum magnitudine certent, nihil tamen inde nocumenti persentiscant. At si memor triti illius Philosophorum fuisset op-

pugna-

pugnator, scil. *magis & minus non variare speciem*, procul dubio ab hoc argumento abstinuisset. Notum est, bibones quosdam extitisse qui vasta pocula non solum absque omni damno, sed etiam circa notabilem temulentiam exsiccarunt: In qua re multum prava consuetudo valet: quamvis & hi tandem luxuriæ & temeritatis poenas persolverint. Plurimi tamen, si modum excedant, nullum eorum symptomatum evitant, quæ alias narcoticis tribuuntur. Eadem quoque apud plerosque opii ratio est, si debita dosi negligatur; Alii tamen, qui ejus usui assueverunt, nobis Europæis incredibili quantitate, illud devorarunt. *Bellon. Itin. Or. l. 3. c. 15.* Janizaro cuidam drachmam semis, postridie integram dedit, citra omnem noxam, præterquam quod temulentiam aliquam excitavit. *Garcias ab Orta* communiter apud Indos Orientales à viginti ad quinquaginta hordei granorum pondus dari scribit. Idem novit quendam Corasenum natione, à secretis Nizamoxæ, qui singulis diebus tres laminas opii comederet, quæ penderent decem drachmas, & amplius: & licet stupidus & dormitabundus semper videretur, aptissime tamen & docte de omnibus disputabat. Tantum potuit consuetudo! nostris centesima pars pro dosi suffecisset, nec tuto quotidiano usu, etiam in minore dosi, futuro. Concludit Vinum calorem nativum augere, concoctionem promoveri, sanguinem laudabilem gignere, cruditates emendare, cor exhilarare, spiritus instaurare & superfluitates absorbere; nihil vero horum de narcoticis dici posse. Etsi non pauca in his essent, quæ censuram mererentur, illa tamen hac vice prætereo. Libenter concedo discrimen esse inter vinum & Narcotica κατ' ἐξοχὴν sic dicta, illud

enim medicamentum alimentosum est, hæc fere medicamenta sunt, nisi longa consuetudine in alimenta quasi degenerent. Falsissimum tamen narcotica nihil horum suo modo præstare; Nam opium, ut pridem *Cl. Sennertus*, *Winkelmannus*, *Schröderus* aliique solidis argumentis demonstrarunt, calidum est, nullusque hætenus eorum fundamenta subruit; calidum igitur opium calorem nostrum, qui nobiscum natus est, si languescat, instaurabit & excitabit: somnum conciliando coctiones juvabit & cruditates dissipabit, dolores sopiendo, spiritus instaurabit, cor exhilarabit, ac denique sudorem movendo, ut *Cl. D. Platerus* observavit, & prout quilibet periculum facere potest, ad sanguinis laudabilis productionem & correctionem, legitime usurpatum, valebit. Hinc *Garcias l. c.* Asiaticis & Afris opii esui asuetis, citra vitæ periculum, ab eo abstinere, non licitum esse, & plerosque ideo liberalius eo uti, quo lassitudinem ex laboribus animique fastidia tollant, scribit: sed hæc *ὡς ἐν παρόδῳ* dicta de his sufficiant.

Vino, ipsique similibus efficacius cerebrum ac cerebellum replent spiritus sic dicti, qui ex memoratis liquoribus jam fermentationem aliquam passis, destillando eliciuntur. Unde elegantissimus & peritissimus Medicus *Joh. Crato Cons. 37.* exhibilat aquas vitæ ab apoplexia præservantes, dum ait: *Aquarum harum vitæ mortiferarum magna est varietas, summa in usu vanitas, atque non minus interdum quam ebrietas, quæ hujus mali mater est, cum eodem modo cerebrum afficiant, nocent.* Quod spiritus vini præstat, idem & juniperinus, cerasorum nigrorum, liliorum convallium & similes valent, idque eo potentius, si infusis aromatibus imbuantur. Hi si frequenter
assu-

assumantur, non solum cerebrum ad apoplexiam proclive reddunt, sed & nimium ingurgitati, citra aliam causam, soli illam sæpius effecerunt.

Hæc virtute vincunt peculiariter dicta narcotica, inter quæ principatum gerit *Opium*. Horum usus diu continuatus cerebrum disponit ad pleniorum meatuum occlusionem, quæ certo ad quamlibet leviculam occasionem subsequitur. Si vero illis ægri in quantitate abutantur, sola hoc lethi genere occidunt. Ante aliquot annos Medicus quidam A. artis nostræ Macula, hic civi cuidam nostrati, ob tertianam notham caput dolenti & assidue vigili, viginti duo grana præscripsit, atque in Pharmacopolio pillulas pro lubitu sumendas imprudenter signavit, quas cum æger brevi devorasset, paucorum dierum spatio, ex morbo rarius lethali decumbens, vitam cum morte mutavit. Alii stupefacientium effectus, perpetuum somnum adferentes, apud authores medicarum observationum extant, qui consulantur. Videatur effectus Theriacæ, medicamenti nobilissimi & laudatissimi, in infante primæ anni apud *Phil. Hechstetter. Obs. Med. dec. 3. c. 6.*

Præter hæc plurima alia sunt caput replentia, ut absinthium, crocus, allium, cæpæ, sem. sinapi, canabis, atque alia, quæ apud *Cl. Sennert. Pr. l. I. p. I. c. I.* & alibi occurrunt. Quæ autem ratione hæc cerebrum repleant, Vini exemplo, pro virili explanabo. Vinum intra stomachum reconditum, (maxime si parum solidioris alimenti, aut nihil assumptum prius fuerit, quæ alias humida imbibere & quasi absorbere solent, ac diutius in ventriculo detinent (cito elaboratur ac per venas lacteas & novos ductus chyliferos ad cor properat & sanguini permixtum

236 EXERCIT. DE LOCO AFF.

protinus cum eo in orbem agitur; cum ad renes pervenerit, aquosior ejus portio ab ipsis emulgetur & mature emingitur. Spirituosior pars, dum amplius cum sanguine indefinenter movetur, magis magisque incalescit, simulque aquosiores sanguinis partes, facile in halitus solubiles, incidit & attenuat. Hac ratione affectum per arterias superna quoque petit ac per minutissima arteriolarum capillamenta medullofam cerebri & cerebelli substantiam subintrat, & quia aliquot circumgyrationibus cum sanguine, subtilius ac spirituosius redditum est, cum vitalibus spiritibus per arteriolarum poros in meatus, spirituum animalium vias, irrumpit. Si moderate id fiat, haud ingratus est hospes, sed torpidiores animales spiritus excitat, alacrioresque reddit, unde Poëtarum Pegasus appellari meruit: si immoderatus irrumpat, turbantur spiritus ac deliria oboriuntur, pro temperamentorum varietate diversa, quæ in compendio *Horat. Cram. l. 3. Od. 21.* piam suam testam decantando, tradit. Qui plus quam humano more Vinum ingurgitarunt, præ bestiis turpissimis, abominandi sunt, ut truncorum instar sensu & motu expertum tractandi sint. Dum spurii isti spiritus cum halitibus, aut feri tenuioribus portiunculis & veris vitalibus, animalium spirituum materia, interiores sacri hujus palatii aditus invadunt, quia solito plures sunt, arteriolarum foraminula, ad vias animalium spirituum patentia, ampliora reddunt: unde si crebrius vini abusu peccetur, patulis magis factis foraminulis, sensim medullosa substantia, ad promptius recipienda spiritibus animalibus eorumque actionibus adversa, disponitur: Hinc etiam fit, ut qui juniores adhuc strenui potatores erant, senes, uno atque alte-

ro cyatho evacuato, statim inebrientur. Postquam ebriosi deferbuerunt atque crapulam edormierunt, portionibus subtilioribus dissipatis, reliquæ intra meatus dictos, à peculiari, cui par non est in corpore, medullosa substantia coagulantur, ac in humores degenerant, ibidemque subsistunt, cum ulterius in nervos ob eorum cavitatem angustam pergere facile nequeant, regressusque ad arteriolas, ob perpetuum novumque appulsum spirituum vitalium, prohibeatur: unde bibones mane stupent, manusque eorum tremunt, donec denuo venæ mero incalescant. Si itaque quotidie in bibendo errores committantur, magis magisque cerebrum ac cerebellum apoplexiæ obnoxium reddetur, quæ levi ad feri effervescentiam occasione data, dispositos obruit. Ex his forte patebit, qua ratione & reliqua, quæ cerebrum replere creduntur, hoc præstent. Vinum enim in agendo vel vincunt, vel infirmiora sunt, prout scilicet sanguini permixta citius, vel tardius, in partes tenuiores, vel crassiores resolvuntur, plures vel pauciores sanguinis portiones attenuant, secumque intra meatus rapiunt, ac sui vestigia graviora vel mitiora ibi relinquunt. Horum enim quædam tantæ efficacix sunt, ut si in iis fumendis nimium peccetur, vel prima vice interimant, quod opium & vini spiritum non semel fecisse notum est: Vino tardius id effecturo.

Replentia in producendo hanc dispositionem, aliquando perniciosam futuram, adjuvant *Otium*, quod apud lautius victitantes suave vitiosorum humorum sustentaculum est, unde etiam desides à Spiritu vini & similibus magis læduntur, quam rustici aliique quotidie graviores labores subeuntes: Item *somnus* si longius protrahatur,

aut statim à cibo sumpto ineatur: etsi enim somnum magnum naturæ beneficium sit, cujus adminiculo animales spiritus non parum refocillantur; si verò immodicus sit, aut intempestivus, manifeste caput gravari sentitur, dum scilicet amicæ exhalationes, juxta spirituum animalium defectum somnum efficientes, longius durante somno, quasi congelantur ac meatus medullæ obsident. *Senilis ætas*, quæ alias fœcunda morborum mater est, graviterque errores juveniles luit, etiam suum symbolum ad hanc dispositionem confert, dum ob calidi nativi imbecillitatem, excrementa ex tertia coctione, in medullosa substantia, ignavius propelluntur, vel dissipantur. Huc pertinent humores incrassantia forissecus obvenientia; *temestas frigida*, *venti boreales*, *Itinera per montes nivosos*: Hinc accolæ montis S. Gotthardi in Helvetia nostra singulis fere annis experiuntur ignavius transeuntes primum sopore opprimi, densatis nempe intra cranium vaporibus; & nisi ipsis succurratur atque ad progressum adigantur, totos congelascere, non tam spirituum vitalium, quam animalium culpa, quos primum pati dormiendi magna necessitas docet. Apud *Macrobius* & *Alex. Benedictus* legitur, *Lunæ radios* apoplexiam fecisse; quod eodem modo illos præstitisse mihi persuadet experimentum *Clarissimi Domini Stephani Spleissii*, *Gymnasiarchæ nostratis*, *Philologi & Mathematici insignis*, *amici mei singularis*, quod mihi ex observationum suarum physicarum thesauro communicavit, ita enim ille: *Cum aliquando inter naturæ secreta relatam legissem generationem glaciei tempore æstivo, ope patinæ stannæ: in qua, infuso prius hydrargyro, aqua superfusa, lunæque radiis exposita congelasceret: idem experimentum,*

tem-

tempestate minime glaciali, absque hydrargyro adgressus sum; speculo vitreo concavo: cujus jacturam, si quod fractionis periculum à congelatione immineret, non magni aestimabam, eo quod non ex coni, sed rudi sphaerae sectione confectum esset. Hinc igitur aquam infusam, lunaeque plenilunio proximae, coelo à nubibus purgato, exposui: inter ea somnum lumine ac libro fallens, saepius fidem eventus exploravi, donec tandem aqua superficiei tenus constricta fuisset. Inde facile est judicare, lunae radios non debili aliquo calore infectos, sed potius insigni frigefaciendi facultate praeditos esse. Faciliiori negotio idem hoc modo expertus fui. Eodem speculo lunaribus radiis collectis (ut alias in combustionibus, solis radiis) sinistraeque manus vola aliquandiu exceptis, primo punctiunculas frigidas sensi; ac deinceps frigore invalescente manum horror occupavit, ut quasi tota obtorpesceret. Idem tentavi conspicio vitreo utrinque convexo, bipalmaris fere latitudinis, ad trium pedum interval- lum vehementer urente, eundemque à luna in manu frigidum torporem observavi. Non igitur ambigendum est, quin, praeter reliquas lunaris luminis facultates, nobis nondum satis perspectas, solis radii calidissimi à lunae superficie reflexi, ejusdem frigore imbuantur, & apud nos valide frigefaciant: idque maxime, si luna plena, terrisque proxima in extremo suo septentrionis termino constituta fuerit; quia tunc & lumine fortior est; & radios rectiores, id est, fortiores ad nos emittit: sed minus, quo magis ab ejusmodi situ ac constitutione digressa fuerit. Frigus ergo si aliquandiu in cerebrum agat, dispositionem introducet, si vero diutius seviet, apoplexiam eatenus generabit, qua primario spiritus animales pessundet, totamque cerebri oeconomiam evertit.

His itaque expeditis, haud difficulter intelligitur, quamobrem non omnes, qui sero abundant, aut quibus admodum intra vasa sanguifera tumultuatur, apoplexia obruantur, sed solum illi, in quibus medullosa substantia, vel ob vitæ errores, vel hæreditariam infirmitatem promptius & largius serum, à massa sanguinea, mediante quadam fermentatione segregatum, recipit; ac sibi obstructionem inferri, non renititur.

Serum ergo rebus sic cum hominis valetudine constitutis, apoplexiam, si redundans in vasis sanguiferis ebulliat & fermentescat, efficiet: celerime enim cum sanguine universo movetur & copiose brevi tempore, in partem ad receptionem dispositam illabi, omnesque medullosi corporis angulos pervadere potest, ut mirum non sit, etiam principes actiones aboleri. Sero ebullitionem conciliant liquores illi, qui ex fermentatione spirituosiores facti sunt, & spiritus, destillando ab ipsorum phlegmate segregati, aliaque serum fervidius & halituosum reddentia: atque hoc nomine *Nob. Car. Piso* toto libro *de serosa colluv.* vinum sæpius causatur. Idem præstant animi motus nimii, imprimis Ira: Corporis exercitia intempestiva & immodica: subitæ aëris mutationes, austrinæ enim humores fundunt & colliquant: aquilonares poris universi corporis & vasis capillaribus constrictis, ad interna serum cum sanguine adigunt, ubi in temperamentis calidioribus fervorem concipit: Aliquando, si in corpore redundet & falsius sit, sua sponte effervesceat. Cumulatur verò assumptis copiosius potulentis, & si expultrix ignavior sit, nec per urinam, sudores, aut consuetam aliam evacuationem excernatur; quorsum pertinent exercitiorum neglectus, fonticulorum & ulcerum in-

veteratorum consolidationes : huc referunt quidam menstruorum suppressionem. Quid Ischuria, renum vitio contingens, hic valeat, consulantur Practici & Observationes Medicæ. Quin etiam feri decubitus ad articulos, in Arthritide periodica, si emanent, occasio apoplexiæ esse solent, dum illud massæ sanguineæ permixtum aliquandiu manens, irritatum ad cerebrum impetuosius ruit. Salsius & acrius redditur ciborum salitorum & aromatibus conditorum nimio usu : quorsum etiam referunt viscerum sanguificantium calidiorem intemperiem & obstructions.

Quibus hæc apoplexiæ species imminet & foraminula arteriolarum medullofæ substantiæ patentiora sunt, spirituumque animalium viæ jam à sero præoccupatæ, capitis aliquam & diuturnam gravitatem percipiunt, crebrius vertigine corripuntur, tenebræ oculis nonnunquam offunduntur, vagi splendores occurrunt, aures tinniunt, somnolenti sunt, sæpeque mensæ indormiunt, somniis horrendis terrentur; incubus vexat, dormientes dentibus strident, ad motum segniores sunt, palpebræ micant, sensus formationis brachia potissimum perreptat, manus, quandoque totum corpus tremit; vox non raro interrumpitur, rerum obliviscuntur, & quandoque mente abalienantur. Si æqualiter ita affecto cerebro & cerebello serum irrumpat, omnesque ejus partes invadât, statim omnes actiones animales abolentur & quidem pertinacius in illo latere, in quod æger decumbere consuevit, cum excrementa, morbi hujus pararii, copiosiora ibi colligantur, firmiterque se partibus insinuant. Aliquando naturæ beneficio in alterutro latere, dissipatis humoribus, mature motus & sensus
redit.

re lit. In opposito vero latere diu sæpe; sensu & motu privati, jacent, loquuntur difficulter ac mens ægrotat, adeo ut multo labore vix integre curentur, diu sæpe Judicii & memoriæ labe supersit. Utcunque autem pristinæ sanitati restituti videantur, crebrius tamen recidivam patiuntur, qualibet recidiva diriora sui vestigia relinquente, & tandem fractis medullæ viribus, apoplectici moriuntur. Qualis forte periodica apoplexia, cujus apud quosdam Veterum mentio fit; quomodo *Avicennæ* periodica intelligenda fit, videatur *Zacut. Lus. L. 1. Medic. princ. hist. 33. in Comment. d. 17.*

Apoplexia à fero effervescente ac in penitiora cerebri ac cerebelli dispositi irruente, illustre præ multis exemplum mihi præbuit. *Nobilis quidam Vir*, ex primaria civitatis nostræ familia prognatus: qui habitu corporis valde obæso præditus erat: ipsi facies saturate rubra: capilli nigri, manus fere attactu frigidæ: ob corporis molem vastissimam, vix alio labore, quam tardigrada deambulatione corpus exercuit: multum in evolvendis Latinis & Germanicis historiis occupabatur. In victus ratione omnino sobrius erat. Cum sentiret à vino etiam modice sumto se lædi ac statim inebriari, convivia studiose jam ante aliquot annos fugit. Juvenis aliquoties insultus epilepticos perpeffus est, à quibus integre industria *Exc. D. D. Alexandri Harderi p. m. quondam poliatri nostratis optime meriti*, integre vindicatus fuit, ut toto reliquo vitæ decursu nihil horum amplius persenserit. Circa 45. ætatis annum, apoplexiæ prodromos animadvertere cœpit, quos magno studio coram lectissima conjugē celavit, præservantia tamen non neglexit: Matris & Sororis territus exemplis. Mater enim
ipfius

crebris insultibus apoplecticis adorta, tandem subito forti apoplexia extincta fuit: Soror virgo 20 annorum circiter, subitanea quoque morte obiit. Triennio ante fatalem diem aliquoties vertigine correptus fuit, occasionem ut plurimum præbente ira, quæ tamen, convenientibus adhibitis, brevi evanuit. Noctu aliquando è lecto surgens, præ quadam animi consternatione, quam ipse explicare nequit, lectum repetere non valuit, quamvis cubile lunaribus radiis illustratum esset. Non semel quoque vel ob pluviam tempestatem, vel ob animi commotionem, vel ob victus errorem, pedum quandam debilitatem sensit, ob quam solita facilitate hypocausti limina subire non potuit, sed incurius impegit: unde non raro maternum sibi fatum imminere prædixit. Anno 1651. d. 13 Aug. ætatis 49. hora ante prandium subito dormiendi necessitate aliqua inconsueta obrutus fuit. Accersitus deprehendit ipsum profunde dormientem, à sopore magno labore excitatum, delira loquentem, ad tactum toto corpore calidum, pulsum freq. cel. magnum & mollem habentem, & concitatus respirantem: Urina tinctior flavedine erat, & statim ab emissionem turbabatur, manum frequenter occipiti & temporibus admovit, ac si eo loci valde doleret. Lethargum dixi. Alvi fœcibus clystere educis, statim Venam secandam curavi, ac capiti oxyrhodinum, adjectis discutientibus, imposui: persistit sopor profundus: 14. Aug. Clysterem fortio-rem, Cucurbitulas cum Scarificatione & Vesicatoria suasi, perdurante nihilominus eadem dormiendi necessitate: 15. Aug. purgans hydragogum satis validum exhibui, cujus beneficio aliquoties evacuabatur, unde minore labore excitari à sopore poterat; expergefactus neminem

tamen agnovit. 16. Aug. revellentibus perrexi: topica discutientibus auxi. Toto hoc quatrinduo nec cibum, nec potum petiit, oblata autem non respuit. Urinam nonnisi cum fœcibus alvinis reddidit. 17. Aug. fortius purgans propinavi, à quo alvus crebrius exonerabatur: unde sopor p. n. penitus debellatus fuit atque rationi consentanea loqui & agere cœpit, omnino ignarus eorum, quæ primis diebus secum acta erant, aut quomodo malum sibi evenerit. 19. Aug. qui septimus morbi erat, penitus sanitati restitutus sibi met & adstantibus videbatur. Animadverti tamen memoriæ & iudicii aliquam infirmitatem, quæ tamen progressu temporis serum evacuanti- bus, tam universalibus, quam particularibus, ac cerebrum roborantibus sublata fuit, ut ne minima quidem menda in ipso notari potuerit. Atque ita sanitati redditus consueta munia laudabiliter denuo obivit. In more positum habebat, vesperi aliquot horis ante cœnam, cum vicinis in platea, parum custodito capite, obambulare, & de variis rebus differere; quod etiam mense Novembri, hujus anni, valde pluvio, sæpe ad horam noctis fecitavit. 27. Novembr. in cœna largius suilla vescebatur. 28. Novembr. in forum Judiciale, cujus assessor erat, abiit, causam cujusdam acturus: postquam aliquandiu huic negotio operam navasset, sensit aliquid adversi sibi imminere, ac domum properavit, lectum petiit, statimque obdormivit. Mox vocor: alto somno obrutum invenio; ut excitem omnia molior. Dum Clyster paratur, in toto dextro latere resolvitur motumque & sensum omnem amittit, ut nec dolorosas vellicationes eo in latere senserit. Urina cruda erat & copiosa; pulsus plane non febrilis. A sopore vix magno labore excitari

citari poterat. Serum à cerebro revellere, sopitamque animalem facultatem suscitare variis ingeniis annixus sum. Altero die post meridiem totum dextrum latus motu convulsivo concutiebatur, ac finita hac concussione artuum, motus & sensus redierunt: perdurante nihilominus sopore adhuc sex diebus. Toto hoc tempore cibum & potum, omniaque medicamenta summo pere averfabatur, ut nec granulum nec guttulam horum, primis duobus diebus admiserit; oblata convitiis repudiavit. Circa septimum appetitus rediit. Clanculum itaque ea quæ serum evacuant ac absorbent, caputque roborant cum alimentis propinavi. Postquam sopor præternaturalis nono die secessum fecit, atque interdium sanorum instar evigilavit, observavi memoriam penitus extinctam esse, nec eum ante actorum reminisci, nec recentissime audita, visa, factave fideliter servare, servataque, etiam de iis sollicitatum, congrue reddere. Ea memoriæ miscra conditio aliquot septimanis erat, ut nec fratres & familiares agnoverit, multo minus nomine proprio appellitare potuerit. Literarum penitus oblitus erat, quamvis in Latina non vulgariter doctus esset, ut ne verbulum quidem, sanis alias oculis, legere potuerit. Temporis progressu uxorem & filias sive consuetudine quotidiana, sive medicamentorum multiplici usu noscere cœpit: orationem Dominicam, cujus quoque oblitus erat, integram, citra hæsitationem recitavit: psalmorum aliquot melodias, ut vocant, congruo concentu & clara voce expressit, textus debiti penitus ignarus: legere potuit unam alteramque voculam Latinam, præ Germanicis, at longiorem vel integram lineam perlegere, aut effari nunquam valuit. Si ad legendum ipsum inci-

246 EXERCIT. DE LOCO AFF.

tavi, ajebat olim hæc sibi notissima fuisse, nunc verò qua ratione literarum jacturam fecerit, se omnino ignorare, Scripsit sæpius integras lineas, etiam paragraphos, Latine & Germanice, elegantibus characteribus, sed sine sensu & quæ ipsemet postea legere nequii. Familiarium, quoties mentio fiebat, aut si ipsi eum invisebant, gestibus & verbis eorum notitiam testabatur, at nullum nomine suo impertire poterat. In principio morbi, nullam rei domesticæ curam habuit: tunc verò pluribus indiciis se de illa sollicitum significavit, ac crebrius uxorem, ut bene administraretur pluribus verbis, sæpius ad rem nihil facientibus, monuit. Sæpius sermonem integrum memoriæ & rationis usum pollicentem, occæpit, sed in medio discursu substitit, nec obphantasmatum vel defectum vel confusionem orationis telam pertexere potuit. Oblivionem hanc rerum, Judicii que imbecillitatem, ultimis temporibus non raro deploravit, & se hæc aliquando integra recuperaturum anxie speravit. In cæteris actionibus quibuscunque, nullum vitium effatu dignum observari poterat. Quamvis varia tum à me, tum ab aliis ad reparandam memoriam acceperit, omnia tamen frustranea erant. Anno 1652. d. 18. Mart. forti apoplexia tactus fuit: 22. Martii, in cassum plurimis adhibitis, diem suum obiit.

Hujus generis etiam videntur esse apoplexiæ, quas *Nob. Carolus Piso de morb. ex serosa colluv. p. 87.* leves vocavit; ac pleræque illæ, quæ si ve medicamentis adhibitis, si ve citra eorum usum, paulo post in paralyfin alterutrius lateris desinunt, sensibus internis aliquando infirmioribus persistentibus, nonnunquam eorundem redeunte pleno vigore. Sartor apud *Cl. Pison. l. c.*

otio deditus & ebrius in apoplexiam incidit, ac quatuor diebus sensu & motu privatus jacuit, quibus elapsis, *potius gratia*, ut loquitur, *quam remediis adjutus*, ad se rediit, decubitu materiæ morbificæ in mediam spinalem medullam & propagines septimi nervorum paris factò, ut dimidii corporis paralytis & balbuties remanserint: quæ caloris beneficio emendata fuerint, ut exire & stipem petere potuerit. Faber *ibidem* madidus, sine sensu & motu, in medio itinere concidit, & tribus diebus sub dio prostratus humi decubuit: repertus, domumque reductus, sensum quidem recuperavit, dextrum tamen latus resolutum mansit, ut post quartum annum ægre incedere potuerit, balbutiens & sudore in paralytico brachio madens. Simile in Nob. matrona à Helmeſtatt observavit, quæ tamen post aliquot menses, fortiore recurrente apoplexia, ab illa enecta fuit. Quinetiam refert Lotharingiam hujus morbi feracissimam esse, & frequenter aliquos civium, hyeme circa insignes aëris mutationes prosternere, sive ob creberrimam crapulam, sive ob uliginosam cœli solique naturam, sive utraque causa concurrente, contingat. Recteque in explicatione harum historiarum concludit; præ reliquis humoribus, serum hujus apoplexiæ causam existere, neque enim viscidum, lentum & crassum humorem omnem detergi, excuti & in principium nervorum depelli subito posse, neque humorem talem, cavo nervorum, sensum fallenti, celeriter se insinuare, neque in nervos trajectum; penitus unquam resolvi; (quod tamen in hac paralyti factum, non raro dierum, aliquando mensium spatio, observatum fuerit) cum enim id caloris beneficio fiat, potius humores glutinosos induratum, prout in calculo-

248 EXERCIT. DE LOCO AFF.

rum generatione & crustarum narium productione cernitur, quam dissipatum iri. Non minus vere asserit, certius hanc apoplexiam ab obstructione, quam à compressione oriri, nam comprimens causa non ita celeriter simul & semel omnes actiones abolere, nec tam cito materia omnis expelli posset, aut hemiplegiam efficere; qua enim ratione serum forinsecus cerebro & cerebello incumbens, locum suum deferere, ac tum dimidiæ medullæ se insinuare posset? quid serum ad alterutrum latus medullæ adigere nervisque quibusdam potius, quam omnibus impingere valeret?

Non parum autem in eo falli videtur, quod putet apoplexiam fieri impletis à sero ventriculis, hemiplegiam vero subsequi ejus decubitus in nervorum principium: vel enim soli hydrocephali illius opinionem falsitatis arguere possent. Præterea non video, qua ratione serum è ventriculis in medullam alterutrius lateris potius, quam ad utriusque deponatur: vel enim pondere eo ruit, vel pellitur: quocunque modo id fiat, æquali impetu ad medullæ subjectæ partes feretur, nullaque hemiplegia superveniet, nam humores ventriculis inclusi, sive pellantur, sive insita gravitate moveantur, cum tres anteriores unica cavitas sint, nullum in motu selectum observabunt, sed quo poterunt abibunt, ad subjectam scil. partem, ubi utriusque medullæ propagines eminent. Tacebo serum potius per infundibulum, amplo foramine præditum, elapsurum, quam cæcos ductus medullæ celeriter introiturum. Impossibilitas obstructionis totius medullofi corporis intra cranium, ac morbificæ causæ repentinus decubitus, quæ hoc in loco causatur, tribuenda sunt ignorantiae Circulationis-

lationis sanguinis, quam si novisset Vir sagacissimus, monumenta hæc sua illustriora reddidisset, nec hæc in dubium vocasset, ut procul dubio ex antegressis constabit.

Notandum porro est, apud *Pison.* hanc apoplexiam facilioris vel difficilioris solutionis esse, prout serum vel sincerum est, vel mucis permixtum: sed & ad talem apoplexiam fortiolem vel leviolem, solutu faciliorem vel difficiliorem producendam quoque faciunt, feri major vel minor copia partium obrutarum multitudo vel raritas, cerebri robur vel imbecillitas, à paroxifinis, vel nullis vel crebrioribus jam prægressis, inducta; quorsum pertinet dispositio pertinacior, vel ad emendationem pronior.

Respirationis superstitis in hac apoplexia causas *Piso l. c.* operose tradit, sed præ ejus opinione placet *Cl. Regii Medicat. 4. p. 302.* sententia, scribentis respirationem ideo restare, quia spiritus animales, qui supersunt, viam per nervos respirationis instrumentis dicatos, ad influendum inveniunt, quoniam hi nervi *ob motum respirationis, qui jam inde à prima nativitate; & dormienti & vigilant, sine ulla intermissione continuatur, magis quam reliqui omnes totius corporis nervi & muscoli, quippe qui per vices diutine sæpe quiescant, ad spiritus vicissim recipiendos sunt adaptati.* Et cum hæc manifesta & sufficiens causa sit, nequaquam ad miram & occultam naturæ providentiam ac summam respirationis necessitatem confugiendum arbitratur. Et certe hujus apoplexiæ generandi modus, à somni naturalis & p. n. productionis ratione, causæ tantum magnitudine differt, ac proinde, ut in sopore gravi, respiratio aliquandiu supermanere poterit, donec morbi gravitate omnes spi-

250 EXERCIT. DE LOCO AFF.

ritus pessundentur viæque omnes claudantur.

An verò & alii humores, qui ad cerebrum & cerebellum deferuntur, obstructionem viarum, spirituum animalium pariant? dispiciendum est. Quicquid humorum intra medullam dictarum partium effunditur, per arterias illuc transportari paulo ante indigitavi. Arteriis autem naturaliter nihil nisi sanguis includitur, præter naturam bilis, & mucosus quidam humor confunditur, quibus vulgo melancholia additur.

In sanguine, si refrigescat, juxta *Cl. Plate-
rum*, non secus ac in lacte, triplex substantia conspicitur, butyrofa, tenuis, splendide rutilans & superficiem vestiens: caseosa crassa & fibrosa huic subjecta & ima petens: ac serosa ambabus circumflua, nunc pallidior, nunc flavior instarque urinæ, lachrymarum & sudoris falsa. Si cale scat & moveatur sanguis, nullum in eo partium discrimen observatur, sibi quæ undique similis, ex vena vel arteria aperta effluens, conspicitur; si quæ ex recenti vulnere profiliens, dum adhuc fervet, per linteum colatur, omnis minutissima foraminula, nullis vel certe rarissimis fibrillis in linteo resistentibus, permeat, ut etiam in examine sanguinis leproforum, qui valde adustus & crassus creditur, iterum observavi. Serosam sanguinis portionem, à reliqua massa segregatam, meatus obstruere aliquando posse, hæcenus pro virili ostendi. Reliquæ autem duæ substantiæ, si in halitus subtilissimos vertantur, eosdem meatus ingrediuntur, sed tantum abest, ut damnum inferant, ut potius summo-pere conducant, spirituum enim animalium materia sunt, & quo puriores & nitidiores, eo etiam præstantiores animales inde resultant. Crassiores
verò

vero earum partes, hos meatus, utpote minutissimos omnemque visum fugientes, subire nequeunt, unde etiam medullosa substantia marmoreo candore splendet: Si qua præter naturam, ob vim illatam, nimium dilatatis meatibus, irruant, illud, quod à sanguine extravasato, & intra poros aliarum partium effuso fit, accidit, nimirum inflammatio gignitur, alius ab apoplexia morbus, aliisque stipatus symptomatibus, & forte non tam universalis omnemque cerebri & cerebelli ~~desperat~~ occupans, prout in apoplexia fieri necessum est. Quæ præter naturam sanguini admiscentur, ut aliis partibus, quas sanguis alluit, nocent, ita non minus cerebro ac cerebello obesse ac eorum actiones turbare & perfundare valent.

Supra dictum, viscida ac *mucosa sanguini confusa*, omnem aditum spirituum vitalium ad interiora medullosæ substantiæ intercipere posse: Per se quidem ac sola, intima, ob meatuum angustiam, penetrare nequeunt, at calefacta cum sanguine, & motu attenuata, seroque diluta, non raro cum illa in profundiora medullæ irrumunt, ac, ut jam monui ex *Cl. Pisone*, affectum graviolem atque curatu difficiliorem reddunt, utpote calori plane immorigera.

Bilis equidem omnino majorem in hepate proventum esse, quam hætenus credebatur, felicissimo invento *Cl. Francisci Glyssonii Angli* innotuit: quotquot enim rami venæ portæ per hepar disperguntur, tot ramusculos ductuum biliferorum ipsi accumbere, in libro ingeniosissimo de *Hepate*, nuper nos docuit, ipsique sensus id probant. Si itaque liberior bilis excretio, per ductum & poros choledochos impediatur, regurgitat illa in cavam, sanguini permiscetur ac sero dilu-

252 EXERCIT. DE LOCO AFF.

ta minutissimos quoque meatus transit, ut icterus comprobatur, in quo urina crocea evadit, sudores non raro flavedine lintea tingentes emergunt, ac albuginea oculorum tunica, alias densissima, flavescit. Ac proinde nullum dubium est, interiora cerebri & cerebelli permeare, unde Ictericis spontanea lassitudo, capitis dolor & vertigo quandoque obvenit: An vero unquam apoplexiam produxerit? credo id sine exemplo esse: si qua forte eam fecerit, non solam præstitisse arbitror, sed cum sero mixtam, ac propterea fere eadem ejus ratio erit, quæ apoplexiæ à sero meatus obstruente est.

A. *Melancholia* omnem apoplexiam ortum ducere, *Cardanius* magno conatu probare annixus est, quem ob hanc assertionem *Mercurial. de Cogn. & Cur. corp. hum. Affect. l. 1. c. 19. & Nymann. lib. de Apopl. c. 18.* atque alii exagitant. *Fernelius* è contra nullam ab ea produci autumat. Verum cum humorem illum Melancholicum (qui hætenus à liene, ex hepate, aut venis mesaraicis, per venam splenicam alicui ac ad peculiare, nescio quos, usus præparari credebatur) non ens censeam, ut suo loco amplius ostendam, apoplexiam à tali humore prætereo. An vero ab humore melancholico alibi generato quandoque fiat, hac vice mentem non explico, cum prius exponendum esset, qualis, ubi & quantus in corpore nostro producat, quod nec hujus loci est, nec meum fert institutum.

Non minus universalis cerebri ac cerebelli *Compressio*, seu apoplexiæ causa, controversa est, ac fuit obstructio omnium meatuum spiritus animalis. Et cum plures clarissimorum Medicorum hanc impossibilem existimarent, ut huic dubio medelam adferrent, excogitarunt cerebri

com-

compressionem in basi, quam ad actiones animales abolendas sufficientem putarunt. Verum non satis fecerunt *Cl. Nymanno* cæterisque omnibus, qui prævident nec sensus internos, nec externos omnes hac ratione perituros: nec respirationem salvam fore, sed primo vitium passuram, cum diaphragmatis & pectoris musculi nervos à medulla accipiant, quæ præ aliquot nervis, cerebro & cerebello in basi compresso, necessario læditur, Itaque si compressio apoplexiam factura est, necessum erit, ut cerebrum & cerebellum undiquaque prematur, omnes spirituum animalium viæ coarctentur, spiritibusque omnis effluxus præcludatur, cum, ut supra dictum, nervorum radices quaquaversum in utroque diffundantur.

Difficile autem erit tale corpus intra cranium reperire, quod cerebrum ac cerebellum eo usque comprimere valeat, ut spiritibus animalibus omnis transitus, idque brevi tempore, denegetur: *Sanguis* equidem, sive arteria, sive vena insigniore referata, tam in habitu corporis, quam in partibus internis, celerrime, magnaue copia, profunditur; nec ab eo interiora cranii immunia sunt, ut supra pluribus dictum est; verum alia plane ratione apoplexiam talis hæmorrhagia gignit, quam premendo, scilicet cerebrum & cerebellum, tum spiritibus vitalibus, animalium materia, tum calore omnium actionum *ἐνέργεια* privando: & si forte copiosius effusus comprimat, non tamen pressioni in abolendis actionibus animalibus primæ partes tribuendæ sunt, cum pereant, antequam quicquam premendo valeat; non secus ac alibi profusus, & vitales & animales actiones destruit, citra ullam compressionem. *Bilem* tanta copia huc affluxisse ac cerebrum

in

254 EXERCIT. DE LOCO AFF.

in se coegisse, sine exemplo est; nec quæ in universo redundat hepate, huic compressioni sufficeret: ut taceam bilem sinceram, semper mordacem, alios effectus producturam, maxime circa meninges, partes exquisitissimo sensu præditas, collectam, quam apoplexiam. *Pituita* crassa, viscida, lenta, in & extra cerebri ventriculos nunquam tanta copia observata inter cranium fuit, quæ tantam molem comprimere potuisset.

Serum ingenti copia, non solum intra ventriculos, sed & in spatio, quod utramque meningem intercedit, cumulari, nemo negabit, nisi in lectione observationum Medicarum hospes sit, rariusque aut nunquam cadavera secuerit. Neque id abnuat *Cl. Nymannus de Apopl. c. 21.* negat tamen serum magna quantitate in his locis collectum, comprimendo apoplexiam efficere. Præcipua illius argumenta delibabo, additis ex aliorum monumentis, aut quæ ratio suggerit, iis, quæ rem speciosiores reddere possent. Primum suppeditant argumentum Hydrocephali, imprimis autem *Vesalii* supra traditus, in quo aqua abundantissime in medullis cerebri, in ipsis scilicet ventriculis, cumulata fuit, & si quicquam serum comprimendo valeret, hic id præstitisset: obtigit enim puellæ bienni, in qua ætate cerebrum flaccidius & mollius adhuc est, atque haud illubenter incumbens impulsui cedere ac coartari potest: in profecta vero ætate, cui apoplexia familiaris est, cerebrum solidius, durius ac ad resistendum robustius evadit. Serum vero comprimendo nihil valuisse, omnium animalium actionum integritas, ad mortem usque, abunde testatur. Præterea serum magna quantitate, minime subito & confertim in parte aliqua vel genera-

neratur, vel colligitur, sed sensim cumulatur, si exitus ipsi per consueta loca denegetur; unde etiam subito & unico quasi momento premendo, omnem cerebri actionem abolere, hominemque attonitum reddere nequit; sed unam actionem post alteram pessundabit, donec tandem omnes cum vita desinant, qualis mors non apoplexiæ tribuenda erit, eo quod è tot læsis actionibus, una atque altera existere possit, quæ vitam abrumpere valeat, nondum abolitis omnibus animalibus actionibus, qualis exempli gratia respiratio est, maximam partem, si non tota, animalis, quæ nervis ad thoracis musculos & diaphragma pertinentibus lædi potest, sensibus internis maxime integris. Insuper vix credibile est, cranii cavitatem, repletis ventriculis & spatio inter meninges, plus feri admissuram, cum cerebrum & cerebellum multis modis solidiora sint aquâ, cujus impulsus potius retundent, quam cedent, fero, ceu corpore humido & facile mobili, vel intra vasa restituro, vel potius retrocessuro ac alibi exitum quæsituto Denique addit *Cl. Nyman.* illos, qui in apoplexia defunctis serum copiosum conspexerunt, non meminisse fere semper in ventriculis cerebri aquosam humiditatem reperiri, etiam in iis, qui apoplexia nunquam laborarunt: neque animadvertisse crassiores humores alibi existentes, secus ac *Columbus*, qui, in gravi apoplexia demortuis, aquosum humorem purissimum, sed semper glutinosum invenit.

Cum itaque serum comprimendo apoplexiam efficere, ob rationes quasdam ex his memoratas, non existimasset, quomodo illam inducat, cum *Cl. Plater* l. c. exponit, nimirum excrementa tenuia & aquea, intra calvariam immoderatus
con-

256 EXERCIT. DE LOCO AFF.

congesta, nisi per destinatas vias effluant, cerebri substantiam largo humore perfundere, longo impulsu irrigare, ac molliorem laxioremque reddere, ut magna illa moles subito diffuat ac subsidat. Imo cum cerebrum corpus concameratum sit, plurimasque cellulas, &, quæ eas sustinent, fulcra habeat, ac in viventibus, à spiritibus illustratum, valde, pro suis actionibus, extendatur, fornice & corpore calloso præter modum humectatis, tandemque destructis, universam ejus machinam prorsus aliquando collabi, hominesque senes imprimis, hoc modo repente jugulari, & rationem suadere & αὐτοψίαν demonstrare, scribit. Hanc vero apoplexiam non veram, sed notham existimat, (quamvis in ea sensus & motus aboleantur, atque eadem habeat symptomata, graviora tamen, quodque protinus tollantur respiratio & pulsus: unde ægri cito & in momento moriantur, nec unquam restituantur) cum in syncope & aliis nonnullis affectibus idem fiat, quæ apoplexia non censentur. In tali enim affectu subsidentiam & collapsum præcedere interceptionem spirituum influentium, cum in vera prius sinus & meatus cerebri obstruantur, spiritusque vitales intercipientur, unde in se subsidat, utpote à spiritibus non illuminatum. Deinde actiones animales, neque ob animalium, nec vitalium spirituum privationem tolli primario, sed ob cerebri repentinum collapsum & destructionem.

Inter ea, quæ spirituum animalium vias in cerebro & cerebello comprimunt, refertur decantata *Galenī* Ἀφθεσις φλεγμονώδης, de qua supra p. 165. quorsum etiam pertinet ἀπόληψις καὶ πλήρωσις τῶν φλεβῶν *Hippocr.* Quid illa sit, commode explicuit *Petr. Sal. divers. c. 2. de aff. particul.* illos-

losque erroris arguit, qui exposuerunt *Ἀφροδίτη* vel inflammationem, vel erysipelas, five meningum, five cerebri ipsius esse, cum ab his alia symptomata producantur, nec spirituum animalium effluxus prohibeatur. Ipse vero statuit, illam consistere in venarum arteriarumque nimia repletionem, à sanguine: cujus ratione fiat constipatio & constrictio, ut non tantum spirituum transitus impediatur, sed & ipsi strangulentur & suffocentur: unde perfecta succedat apoplexia. Sed & hanc plane rejicit *Cl. Nyman.* l. c. c. 22. Imo illam unquam existisse dubitat, non enim se videre ait, quomodo tanta sanguinis copia, quæ vasa repleat, & quidem ita distendat, ut hæc cerebri poros omnes comprimant & occludant, in cerebrum & meninges ruere possit: In phrenitide & febribus quibusdam sanguinem cum impetu cerebrum petere, dolorem quidem sævissimum & deliria parere, non autem apoplexiæ obnoxios, tale quid passuros unquam: potius hoc malum athletas & plethoricosprehendere. Præterea Vasa sibi ostendi exposcit, quæ dilatata comprimendo cerebri medullam nervosque omnes prorsus constringere possent. Nec probabile opinatur, tantam distensionem vasorum subito fieri & omnia vasa simul & semel summe repleti posse, ad præceps hoc & gravissimum malum, quod unico quasi momento ingruit, & inopino velut turbine ægrum percellit & siderat. Et quæ alia ad hanc *Ἀφροδίτη* explo-dendam affert.

Sunt præterea alia quæ cerebrum ac cerebellum premere possunt, ut tumores frigidi, sensim intra calvariam prognati, calculi in cerebro & circa meninges reperti; Patavii vidi officulum corpori falciformi, dimidiæ uncie longitudine,
ac-

258 EXERCIT. DE LOCO AFF.

accretum : Ejusmodi etiam sunt globuli plumbei, telorum fragmina & similia. Verum cum hæc non universum molem coarctent, sed portionem saltem ejus aliquam eamque exiguam, non apoplexiam efficient, sed aliter cerebri actiones lædent: aut si ad hæc apoplexia unquam sequuta sit, alia longe ratione illam, procul dubio, quam comprimendo produxerunt, neque sola illam effecerunt, sed concurrentibus aliis causis, nimirum vel sanguinis profusione, vel affluxu ejus decenti impedito, vel excrementorum nimia collectione ob alienorum horum præsentiam, vel læsionem aliquam particulæ internæ. Globulo enim, vel alio quovis armorum genere intra cranium immisso, fieri vix potest, quin interiora lacerentur, unde iis debilitatis facile magnus excrementorum proventus resultat.

Atque hæc sunt, quæ apud quosdam compressionem cerebri & cerebelli, ceu apoplexiæ causam proximam, si non impossibilem, certe difficilem reddiderunt. Et bilem quidem quod attinet, ut pituitam crassam viscidamque, qualis nonnunquam emungitur, ac melancholiam, nunquam illam comprimendo fecisse, haud invitus ipsemet largior. Quinetiam fateor, sanguinem extra vasa copiosius intra cranium effusum, potius cerebrum ac cerebellum necessariis spiritibus vitalibus privando, quam universam molem premendo ac coarctando, hoc malum frequenter adferre, cum sæpe ad largiores sanguinis in interiora profusiones, apoplexia subsequatur, antequam ea copia ex vasis elabatur, quæ ad compressionem sufficiens foret, ut procul dubio haud obscure secunda & tertia historia comprobant.

Seri alia est ratio; observatum enim est abundan-

danter admodum illud intra cranium collectum fuisse, neque illud negat *Cl. Nymannus* (utcumque adversus compressioni sit, atque illud, quod opinioni suæ, de torcularis obstructione, ceu proxima veræ apoplexiæ causa contrarium est, penitus fastidiat) neque *Cl. Plateri* observationem in dubium vocat: Ipseque vidi non solum ventriculos, sed & spatium intra utramque meningem eo repletum, ut ex historia quarta patet, quæ ad confirmationem hujus non parum faciet. Si itaque serum tanta abundantia, tum in ventriculis, tum in spatio intra utramque meningem cumuletur, ut naturalis & congenita horum cavitas illud amplius capere nequeat; quin etiam cum sanguine perpetuus novusque ejus affluxus accedat, nec per solitas vias excernatur, non video, quamobrem, utcumque vasta sit cerebri & cerebelli moles, ab illo non undique comprimi possit. Quotidie enim experimur serum intra cavitatem aliquam corporis nostri conclusum, auctuario novo jugiter accedente, illam magis magisque distendi ac ad stupendam magnitudinem excrescere, & tantum non præ mole rumpi. Quidni etiam ab incumbente, ac singulis momentis incrementa sumente feri appulsu, cerebrum & cerebellum comprimatur atque ita coarctetur, ut spiritibus animalibus tandem omnem transitum deneget? Cum cranium densum ac osseum & cedere nescium, nulla vi expandi possit, cerebri vero ac cerebelli consistentia multis modis muscutorum ac membranarum substantia mollior sit, atque haud difficili conatu in se cogi possit. Quæ autem huic adversa hætenus recensui, non tanti illa existimo, ut diversum sentiam, ut nunc dispiciendum erit.

Hydrocephali equidem speciosum argumen-
R
tum

tum sunt, sed si rem penitus intuebinur, non insuperabile cognoscemus. De externis, qui inter cutim capillosam capitis & cranium existunt, qualis à *Cl. Pione* describitur, hic non sermo est, cum nihil ad compressionem faciant: interni indignantur. In his intra ventriculos aquam stabulari, ac potissimum puerili ætati, sive ob principiorum generationis, sive ob partus aliquod vitium, obtingere, me hydrocephalorum, maxime monstroforum, historiæ persuadent. Cum autem in infantibus ac teneriore ætate cranii futuræ non tam arcte combinentur (ut vel ex sola illa membranea cranii constitutione, ibi, ubi coronalis & sagittalis futura uniuntur, constet) haud difficulter intelligetur, quamobrem minus in illa, quam in adultiore, aut in proventa ætate ac senibus comprimatur cerebrum ab aqua: In hac enim futuræ non tantum arctissime junguntur, verum etiam non raro cranium plane coalescit. Unde pueris aqua, priusquam cerebrum premat, ventriculos distendit, crescente illa, etiam futuras, non ægre cedentes, divellit, tandem etiam membranas expandit, ut caput ad hanc molem, quæ in hydrocephalis conspicitur, excrecere possit, hinc aqua capacius spatium habens, nec amplius angustis cranii cancellis coërcita, minus comprimendo valet: quorum cum neutrum senibus contingere possibile sit, ob cranii duritiem ac unitatem, aqua quotidie intra cranium incrementa sumens, sibi spatium parat, ac obvia, qualia sunt cerebrum & cerebellum, premit, atque eousque premendo pergit, donec coarctatis omnibus spirituum animalium viis, apoplexia sequatur. Neque adeo immune cerebrum à tali compressionem in hydrocephalis esse, tum *Vesalii s. c.* historia, tum *Gnil.*

EXERCIT. DE LOCO AFF. 261

Fabrit. c. 1. obs. 10. ostendunt; Augustanæ enim puellulæ, quoties ab astantibus movebatur, & nonnihil, quantumvis etiam leviter, erigebatur, illico tussis & difficultas respirandi, cum miro totius faciei rubore, sanguinis suffusione, lachrymarumque proventu, molesta erat: procul dubio nullam aliam ob causam, quam quod erecto capite, aquæ pondere premeretur cerebrum, unde effluxu animalium spirituum prohibito, respiratio læsa, & influxu vitalium impedito, facies rubore perfundebatur: nullum enim in pulmonibus vitium notavit. *Fabritii* vero puero, in cuius capite major aquæ copia colligebatur, tantum non omnes actiones animales abolebantur, de quo supra vide pag. 65. quam actionum jacturam potius compressioni quàm humectationi tribuendam, infra dicendum erit.

Seri autem notabilem copiam, semper in cavitate aliqua corporis nostri sensim colligi falsum est. Sæpe enim brevi etiam temporis spatio, magnam ejus quantitatem cumulari, vel soli hydropes subitanei, quorum apud Medicos mentio fit, abunde testantur; nam sive ab eroso rene, aut rupto uretere, aut majore vase lymphatico, sive ab ingurgitata avidius aqua, calefactis nimium visceribus (quod messoribus æstate non raro evenit) fiant, brevi abdomen ad insignem magnitudinem attollitur. Quæ etiam sanior ratio probat, cum enim, ut supra dictum, serum facile à sanguine segregetur, prompte segregatum, per patentia loca, ex vasis excernatur, ac ob perpetuum sanguinis motum, indefinenter novum ad excretionem similem affluat, non longo tempore, magna ejus copia, in cavitate aliqua cumulari poterit; maxime, si in massa san-

262 EXERCIT. DE LOCO AFF.

guinea redundet, nec exitus pateat in cavitate illa, in quam effusionis primordia fiebant.

Et posito serum quandoque, intra cranium, in ventriculis cerebri ac in spatio inter utramque meningem, sensim accumulari, non tamen sequitur, illud nunquam universam molem, exiguo temporis intervallo, comprimere ac apoplexiam inducere posse. Plurimæ enim morborum causæ, quæ continentes vocantur, ac immediate morbum producunt & fovent, plerunque sensim coacervantur, sæpe diu in corpore delitescunt, nullasque molestias exhibent, & non raro pauca sui indicia præbent; aut si quandoque molestæ sint, nondum tamen illum morbum efficiunt, quem parituræ sunt, si vel virtute validiores, vel quantitate abundantiores evadant, vel sepultæ quasi, ab occasione aliqua excitentur; Tunc enim sæpe subito in actum deducuntur, morbosque gignunt, ut non solum febres quædam, si non omnes, sed & plurimi morborum organicorum probant. Et ad rem præsentem illustrandam, non parum facit hydrops pectoris, in quo aqua sensim cumulata, primum parum vel nihil molesta est, hinc crescendo & acrior facta ruffim siccam efficit, adhuc abundantior respirationem difficiliorem reddit, palpitationem cordis excitat, tandemque quantitate major, quam ut pectoris cavum eam capere possit, pressis undique pulmonibus, subito hominem, nondum id timentem, suffocat: ut nuper probe in juvene quodam *Philippo Spærlino* observavi, qui nullo in pulmonibus vitio, si compressionem excipias, apparente, subito ab aquæ copia in pectore cumulata, suffocatus obiit, cujus historiæ, suo loco, Deo volente L. B. quoque participem

faciam. Eadem feri intra cranium, in dictis spatiis, collecti conditio est. Sæpe enim ibidem copiose stabulatur, citra ullam, vel certe non graviores actionum animalium læsionem, ut non solum illi probant, in quorum ventriculis multum aquæ sæpe inventum fuit, quamvis in viventibus nulla animalis actio læsa observata fuerit: Sed imprimis *Vesalii* hydrocephalus sæpius memoratus evidentissime demonstrat; quamvis enim in puellula illa, aqua incredibili copia in ventriculis cerebri redundarit, nullum tamen in actionibus animalibus vitium animadversum fuit, si consueto more decubuit, nec caput commovebatur. Si vero copiosius cumuletur, vel licet non tanta abundantia, quanta in hydrocephalo *Vesalii* congesta fuit, attamen memorata spatia vel utrinque maximam partem, vel in alterutro latere plenius adimpleat, non impune id fert cerebrum, nec sine noxa & actionum animalium læsione ibidem reconditur; & ut ingenue fatear, mortem accelerare potest, antequam apoplexia oboriatur. concurrentibus aliis nonnunquam morbis, alias non lethalibus futuris. Id præterito anno in cive nostrati *Thoma Kellero*, pectinario, 68 annorum sene, observavi. Ille, juvenis aliquot annis militiam secutus est: adultior pluribus vicibus sanguinem copiose per alvum & vomitum excrevit, & quidem ante decennium tanta copia, ut de vita ipsius desperatum fuerit, ac procul dubio exspirasset, nisi dexteritate & industria *Nobilissimi D. Joh. Scretæ à Zavorziz p. m. nuper Poliatræ nostri optime meriti*, adjutus fuisset. Biennio ante ipsius obitum, idem fere profluvium sanguinis passus est. Ob tot & tantas hæmorrhagias pallidus erat minusque firmæ valetudinis, quam propterea diligenter ob-

264 EXERCIT. DE LOCO AFF.

servare cogeatur. Nondum annus est, ex quo primum coryza, cum vehementi capitis dolore, aliquot septimanis, laborare cœpit; quibus sub-
latis vertigo ipsi, imprimis obambulanti, ante & post cibum sumptum, admodum molesta fuit; quin etiam rigor quidam & formicationis sensus spinam tantum dorsi pervadebat, quem excipiebat imminentis leipothymix timor; mane imprimis; quamvis in pulsu nec minimum quidem defectum animadvertere potuerim, nec pallidior solito evaderet. Septimestre circiter ante obitum, noctu lectum perminxit, ac memoria debilitari cœpit. Non longe post levis hemiplegia sinistrum latus corripuit, non tamen omnem sensum & motum sustulit in hoc latere, nam manuductus, ægre licet, incedere ac brachium parum elevare valuit. Indies fortior facta est hemiplegia & non solum sensum & motum in dicto latere abolevit, sed & paucas post septimanas loquelam vitiavit, ut difficulter & nonnisi à familiaribus intelligi potuerit, sensibus internis magis magisque quotidie quoque deficientibus. Aliquot septimanis ante obitum omnem rationis & sermonis usum perdidit, ut articulatam vocem efferre amplius nequirit, nulloque indicio adstantium notitiam prodere valuerit. Ultimis mensibus plurimum dormiebat, ac integros dies sopore traduxisset, nisi excitatus fuisset. Toto hoc tempore saliva largissime diu noctuque profluxit, ut lintea collo circumposita, perpetuo permadescerent, Paralyticum brachium valde œdemate tumuit: in cujus olecrani parte exteriori, cutis dimidii bazii amplitudine penitus emoriebatur, ac si à cauterio potentiali corrosa fuisset, frustra sua sponte excidente, ac fero, ceu ex fonticulo arte facto, exstillante, non ulterius per-

pergente hoc cutis sphacelo. Quandiu decubuit, ad mortis usque articulum in dextro latere sensus & motus integre perstitit: ac paulo ante obitum adstantium quendam, ipsum ad iram concitantem, valide manu percussit. Octiduo ante fatalem diem respiratio cum stertore fiebat, cum pulsu summe debili, ut singulas in horas moriturum putarem. Ultimo biduo ne guttulam, vel cibi, vel aquarum cordialium, deglutiit. Mortuus est circa finem Decembris anni præteriti. Non dubito, plurimum aquæ in ventriculis & spatio inter meninges cumulatum fuisse, maxime vero in sinistro latere, & re vera id comperiissem sectione, si per uxorem mihi licuisset. Apoplexiam autem non produxisse arbitror, tum quia plurimum feri ore effluxit, tum quia multum ad pulmones destillavit, ac respirationem difficiliorem reddidit, respirationis instrumentis ob hemiplegiam, & corde, ob alimentum penuriam & diuturnum morbum, aliàs afflictis, unde viribus omnino prostratis, mors apoplexiam prævenit.

Si vero adhuc copiosius in prædictis locis serum colligatur, nec ullibi ipsi exitus, nisi forte per ostium illud magnum in occipite, pateat, magis magisque accumulabitur, atque actionem unam post alteram prosterneat nervis illis primum læsis, quos serum debiliores & ad patientum præ cæteris adaptatos invenerit. Et postquam ea feri copia redundaverit, quam dicta spatia capere nequiverint, cerebrum ac cerebellum, longa irrigatione infirmiora ac flaccidiora reddita, aliquando subito corrueant ac ab incumbente sero comprimuntur; unde spiritibus animalibus omni via ad exitum præclusa, resistentibus in medulla suffocatis, & forte vitalibus

266 EXERCIT. DE LOCO AFF.

aditu negato, ob capillarium arteriarum superficiem perreptantium coarctationem, confestim omnes actiones animales abolebuntur, quod eo facilius fit, quia pleræque actiones jam sublatae sunt. Celerius tum quoque omnibus actionibus interitus adferetur, si serum in massa sanguinea redundans, ob corporis exercitium, ab misellis istis jam diu intermissum, data aliqua occasione, aut sua sponte effervescat, aut aliàs intra cranium abundanti, per notas vias copiosum de novo accedat, stagnansque, ceu torrens, adaugeat. Hæc omnia historia quarta superius recensita comprobatur: non pauca enim indicant *Jacobum Reutingerum* sero abundasse; quod sensim intra calvariam collectum fuit, ob vigilias, quas cardialgia peperit: augebatur ob ingentem capitis dolorem, unde gutta serena oborta est. Cumulatum vero amplius ac per orificium occipitis juxta spinalem medullam defluens, urinæ involuntarium profluvium: hinc pedum paralytin, tandem fortissimam apoplexiam subito attulit. Et quidem serum non solum omnes ventriculos cerebri, spatium intra meninges & fistulam spinalem, per quam medulla descendit, adimplendo, sed & cerebrum ac cerebellum comprimendo apoplexiam effecisse, amplius spatium inter utramque meningem, quam naturaliter esse solet, haud dubie mihi persuasit. Etsi enim raræ guttulæ sanguineæ, ob defectum spirituum vitalium, illam generatam innuere videantur, non tamen huic adscribendam arbitror, cum non penitus defecerint, nam sanguis & vitales spiritus per arteriolas pulsu irruunt, ob quem aqua incumbens aliquo modo repellitur, ut aliquis adhuc influxus fieri possit. Rariores autem erant, quia per aliquot dierum decursum, nihil omni-

no alimenti assumpserat. Non negarim tamen minutissima capillamenta, superficiem perreptantia, in quibus pulsus elanguescit, à compressione non tuta fuisse, quæ forte etiam raritatis guttularum aliqua causa erat: at harum compressio tanti non est, ut universam molem sanguinis influxu privare possit, cum intra profundiores anfractus majores arteriæ repant, quæ sanguinem ipsi impertire possunt.

Dum hæc scribo, *Vir admodum reverendus D. Ægidius Tonsor V. D. M. fidelissimus*, hujus apoplexiæ quoque exemplum præbet. Senex erat 78. circiter annorum, statura corporis procera, habitu corporis firmo: à puero ad decrepitam usque ætatem rarissime ægrotavit, dentium seriem integram ad finem vitæ servavit, si unicum excipias, quem Juvenis perdidit, cujus alveolus in mortis vicino intumuit ac parum cruoris sua sponte exstillavit: oculorum acies semper perstitit, ut nunquam perspicillo uti ipsi opus fuerit. Quamdiu ingenii vires concedebant, assiduus erat in legendo & scribendo, ad spartam quam nactus erat, exonerandam, quod etiam haud vulgariter ipsum præstitisse, ipsius monumenta testantur, quæ partim luci credidit, partim manuscripta supersunt: Et vix alio exercitio occupabatur, quam publice docendo ac modice deambulando. In victu temperatus erat, & maxime lacticiniis delectabatur, quibus ultimis annis fere sustentebatur. Jam ab aliquot annis incessus difficilis erat, imbecillitate incrementa cum ætate sumente, ut jam ab anno fere neque solus, neque suppositis domesticorum humeris innixus progredi amplius valuerit; & ultimis mensibus, nec pedibus insistere licuerit; quamvis in lecto repositus pedes extendere & flectere & attractum per-

sentire potuisset ; sinistrum tamen , paulo ante mortem , ob tendinum pedem flectentium exsiccationem , penitus extendere nequii . permanente sensu integro & aliquo adhuc motu . Ab aliquot mensibus , inscio & præter voluntatem urina profluxit . Plusquam annus est , ex quo memoriæ sensim jacturam fecit , vigorque mentis abiit , adeo ut salva adhuc oculorum acie , nec legere , nec adstantes , præter unicam filiam , agnoscere potuerit . Auditus ab aliquot septimanis imminutus , ac paulo post , tantum non abolitus fuit . Substitit etiam hoc tempore consueta & copiosa exscretio . 18. Jan. hujus anni , omnis sensus & motus subito interiit : Respiratio hoc primo ac subsequente die , non vitiosior erat , quam in profunde dormientibus esse solet : pulsus languidus & parvus : colorem pristinum facies tunc temporis retinuit : nec habitus & extrema consueto calore privabantur . Ex ore saliva tenuis , aquea , satis copiose emanavit . Accedente ad respirationem stertore , viribusque labantibus , piam animam Deo Creatori suo , 21. Jan. summo mane reddidit .

Non dubito , si non in omnibus , certe in plerisque istis , quibus sensim ita actiones animales debilitantur , tandem subito & in momento quasi abolentur omnes , plurimum aquæ intra cranium atque hæc compressionis vestigia repertum iri . Quamobrem vero isti apoplectici dicendi non sint , nullatenus video : etsi enim in his una actio animalis post alteram languescat vel aboleatur , nondum tamen omnes ablatae sunt , sed quædam superstites permanent , quæ tandem aliquando , causa sc. *duplex* suam acquirente , subito omnes prosternuntur , quod cum fit , affectio hæc ac hic omnium animalium actionum interitus , non nisi

nisi apoplexia nominari poterit : nihil enim hic est quod vel catarrhum suffocativum, vel syn-
copen cardiacam referat, cum respiratio, pul-
sus, color faciei & calor totius, aliquot diebus
in talibus permaneant. Hinc *Massar. Pract. med.*
l. 1. c. 13. sententia ferri poterit, (si dextre ac-
cipiatur & de prodromis potius explicetur) dum
ad essentiam apoplexiæ constituendam non requi-
ri putat, ut subito & derepente incidat : *Est enim,*
ut loquitur, apoplexia frequenter hominem subito
invadat, tamen evenit aliquando, quod ego non
semel observavi, ut præcedant nonnulla præludia,
torpidus quidam sensus & motus, veluti quedam
vagantes formicæ, quæ in brachiis & aliis, parti-
bis sentiuntur, & alia id genus, ut tandem sensim
ac sensim, non subito apoplexia succedat. Nam se-
cundum *Bened. Viç. Favent. de cur. morb. T. 1.*
c. 27. (conciliantem *Galenum*, apoplexiam nunc
acutum, nunc chronicum morbum dicentem)
tota morbi periodus consideranda est, in qua qua-
tuor tempora ut plurimum sunt, principium, aug-
mentum, vigor & declinatio : & in morbis chro-
nicis, qui à crudo & mitiore humore oriuntur,
qualem aliquando etiam apoplexia agnoscit, sæ-
pe causa cum minore molestia in parte manet,
& non prius, quam in vigore, animadvertitur.
Itaque infert, ratione principii & augmenti, five
cogniti, five non cogniti, morbum diuturnum
apoplexiam esse : ratione vigoris, five cumuli
omnium symptomatum, seu abolitionis omnium
actionum animalium morbum acutissimum esse.
Et consequenter vigorem apoplecticum sæpe præ-
cedere multa symptomata innuit, quæ quidem
apoplexia nondum sunt, nisi abusive & minus
proprie sumta, at veram minitantur : Si autem
his omnium actionum animalium abolitio, salva
qua-

270 EXERCIT. DE LOCO AFF.

quadantenus respiratione & pulsu, superveniat, quidni Apoplexia vocitetur? Epilepsiæ quam plurimæ suos prodromos habent, qui tamen affectui nihil derogant, nec eas hoc nomine spoliant. Eadem plurimorum adhuc affectuum ratio est, ut causæ eorum se effectibus quibusdam ostendant, antequam in nervum erumpant, qui effectus prodromi, seu præludii nomen merentur, aliquando ipso affectus nomine impertiuntur.

Inane animo commentum est, cranii cavitationem interiorē non plus feri admissuram, quam ventriculi & spatium intra meninges capiunt. Et si enim cerebrum & cerebellum aqua solidiora sint, quia tamen impetu & pulsu affertur, cedere coguntur; non secus ac in macrocosmo torrentem nulla obstacula remorari possunt; & fontium scaturigines, si alveis coercerentur, perque solitos rivulos fluere prohibeantur, dirutis aggeribus omnia inundant. Et quantus feri irruentis impetus sit, vel soli hydropici docent, in quibus nihil aquæ invium est, & nihil non perumpit; cedunt hepar, ventriculus, lien, muscoli abdominis, & cuius denique ipsa, multo solidior & tenacior medullosa utriusque corpore.

Quæ ultimo loco *Cl. Nymannus* attulit, ipsi suo modo largiri possunt, ac fatendum est, sæpe multum feri in & extra cerebri ventriculos repertum fuisse, citra apoplexiam; at tantam copiam, qualem *Cl. Platerus* invenit, & ego in *Reutingero* observavi, absque productione apoplexiæ, unquam intra cranium, consolidatis, aut firmiter combinatis ejus futuris, visum fuisse ambigo; nec ipse negare audent, dum in sequentibus *Cl. Plateri* apoplexiæ generandi modum adprobat. Quæ de crassis alibi inquirendis humo-

humoribus monet, suam *ὑπόδιον* de torcularis obstructione sapiunt, cui *Columbi* autoritas non patrocinator; ut enim ille ventriculorum obstructionem, ceu apoplexiæ causam, factam tectam conservare valeret, humorem aquosum purissimum, simul glutinosum memoravit. At obstructionem hanc, hujus mali causam, pluribus passim in suo *libro de Apoplexia* damnavit. Præterea suspicor hanc limpidissimam aquam, non magis glutinosam fuisse, quam urina, vel serum alibi in cavitate aliquam effusum est, quæque consistentiæ ratione, non nisi angustissimos meatus obstruere potest, quales spirituum animalium vias esse, supra dixi. Et si forte *Columbus* non omnem hanc aquam glutinosam putaverit, sed solum partem ejus aliquam, prout in hydropicis nonnunquam sero viscida crassa permixta videntur, quæ ob pondus ima petunt, atque in ascite intestinis & mesenterio adhærent, non secus ac sedimentum in urina ad fundum matulæ descendit: nihilominus *Nymannum* parum hoc effugium juvabit; tantillum enim feri glutinosi extra spiritus generationis locum, aut distributionis vias constitutum, nihil ad apoplexiæ exortum faciet, dum, spirituum animalium nec *γένεσιν* nec *ἀνάδοσιν* impedit, nisi forte per accidens, dum, infundibuli angustias opplendo, feri cumulationem intra ventriculos promovet, quod justa quantitate congestum, tandem apoplexiam gignere valeat, prout pridem *Carpus l. supra cit.* illam infundibulo obstructo generari sensit.

Cum vero *Cl. Nymannus* non plane negare posset apoplexiam quandoque à sero cerebrum ac cerebellum circumfluente ac ventriculos implente, excitari. *Cl. Plateri* sententiam se amplecti simulat, ac concedit, longa irrigatione cerebri
mo-

272 EXERCIT. DE LOCO AFF.

molem subsidere, malumque istud efficere, quod tamen vera apoplexia non sit. Verum si *Cl. Plateri* mens attentius perscrutetur, illum à compressione non abhorruisse, constabit; nam *Pract. Tr. 1. l. 1. c. 2.* expresse dicit, serum apoplexiam parere, eo quod longo impulsu irriget, ut magna illa cerebri moles mollior laxiorque facta, subito diffuat ac subsidat, *nervorumque principium in basi calvariae, à cerebro prodiens premat & spiritui animali transitum præcludat.* Atque amplius in sequentibus se explicat *Quando pituita* (hoc nomine excrementa aquea frigida humida comprehendit) *ventriculos cerebri subito adimplet non obstruendo, cum spiritus animalis non in ipsis, sed in cerebri substantia undique & nervis sedem suam habeat, nec per ventriculos transeat, sed eodem modo basin cerebri gravando, apoplexiam quoque inducere potest.* *Nymannus* autem non parum sibi & *Cl. Platero* contrarius est; dum cerebri machinam concameratam, fulcris subnixam, fornice tectam (callosum enim corpus externa fornicis facies est) & cellulis distinctam admiratur, & hæc spatia spiritibus illustrata, in viventibus valde extendi, ad actionum cerebri commodum, autumat; hac non ratione damnatam de ventriculorum nobilitate opinionem, ipsemet reparat: Ubi namque cerebrum, quam in ventriculis, concameratum sit, ignoro; nullæque nisi in iis ipsis, cellulæ & recessus existunt, (nisi forte anfractus, extra cerebri substantiam positos putet.) Hi igitur si à spiritibus illustrandi & extendendi sunt *Nymanno*, & spirituum & excrementorum receptacula erunt: quod plurimis antidhac ipsemet ceu absurdum exploserat: & *Cl. Platero* adversus est.

Subsidentiam totius hujus molis quod attinet, eam

eam quidem passim *Cl. Hoffmannus*, ceu absurdam irridet: verum si cum compressione jungatur, non adeo à veritate alienam, aut impossibilem existimo: universum enim medullosum corpus spiritibus tam vitalibus, quam animalibus refertum, elevari & tantum non omne cranii spatium implere, iis vero orbum subsidere, vel infantes moribundi probant, dum in illis non solum circa futuram lamdoideam & sagittalem manifeste & profundi sulci conspiciuntur, sed & membranea cranii dispositio, prope conjunctionem sagittalis & coronalis futuræ, foveolam nancisci deprehenditur: non aliam ob causam procul dubio, quam quia cerebri universa moles ob instantem mortem, frigidior & gravior facta, subsidet secumque corpus falciforme & laterales sinus annexos detrahit. Si ergo subsidentia compressioni ab incumbente corpore accedat, coarctatis in universo cerebro & cerebello meatibus, & impedito spirituum effluxu, utique apoplexia generabitur.

Hanc autem omnium animalium actionum abolitionem, non spuriam apoplexiam facile dixerim, cum veræ definitio ipsi competat: & quæ ipsam præcedunt, non ad apoplexiam, sed ad sui generis symptomata pertineant. Nec tanti sunt ea, quibus illi hoc nomen derogare *Cl. Ny-mannus* conatur: falsum enim est, idem hic fieri, quod in syncope & aliis nonnullis affectibus accidit: in hac namque omnes animales abolentur, sæpe adhuc per plures dies salvis vitalibus: In syncope & vitales & animales omnes cessant: In similibus affectibus quædam ex ambabus supermanent. Quæ insuper addit, definitionis terminis non includuntur, siue enim subsidentia præcedat, siue sequatur spirituum influentium inter-

terceptionem, definitionem non evertit. Imo ille illuminationis defectus medulloso corpori, ob torcularis obstructionem, contingens, cui hæc omnia innituntur, ut supra dictum, nullus est, cum cerebrum nec quicquam à sinibus accipiat. Nec verosimile est actionum abolitionem primario subsidentiam sequi, non vero spirituum interceptionem & privationem, cum spiritus proximum harum actionum instrumentum sint, qui nisi prius vel impediuntur in motu, vel destruantur, à collapsu cerebri nunquam apoplexia excitatur.

Atque ita ex his apparet, serum copiosissime intra cranium in ventriculis & spatio inter meninges collectum, veram apoplexiam comprimendo producere posse.

Antequam ulterius pergam, obiter videndum est, an non serum extrinsecus cerebro ac cerebello incumbens, humectando apoplexiam gignere valeat? Id pridem mihi persuasus penitus eram: cum enim paralyfin particularem, ab humore nervos alluente & admodum madefaciente oriri crederem, facile in hunc errorem ductus sum, existimans idem omnium nervorum principium, & quidem facilius, quia nervis mollius, perpeffurum. Verum aliud me docuerunt non solum Hydrocephali *Vesalii* & quem ante aliquot annos hic vidi, sed etiam anatome *Jacobi Spærlini* viatoris 70. circiter annorum, qui d. 10. Maj. 1657. in nosodochio phthisi obiit. Hic fere ad ultimum usque halitum loqui poterat, ac ingentem dolorem in utraque femoris interna parte pertulit, quin etiam assidue caput doluit. Remoto cranio plurimum serî suppallidi in omnibus ventriculis & spatio intra meninges reperiî, ita tamen ut cerebrum nondum comprimeret, spatium

tium enim non amplius erat, ut in *Röntingero*, cum ad eam feri abundantiam nondum pervenisset: quinetiam universa anfractuum superficies, humore perspicuo lentoque, ceu gelatina, oblita erat, si superficiem illam sauciavi, exstillavit ichor serosus. Si itaque quicquam serum extrinsecus humectando valuisset, unam, vel alteram saltem actionem hic abolevisset, & loquelam præ multis: cum undique serum diffusum extitisset, ac superficiei cerebri jam se insinuare cæpisset.

Quamobrem verò tanta copia serum hîc colligatur, & quibus è locis elabatur, inquisitione dignissimum foret: verum quia aliàs longior, quam primo proposueram, in hac exercitatione, fui, hac vice paucis dico obstructionem infundibuli, ac consuetorum catarrhorum suppressionem, ad feri accumulationem multum facere: & diuturnos capitis dolores, sero ad effluxum stimulos addere, prout meliceriam, vulneratis nervis, valdeque dolentibus, copiose profundi quotidie experimur.

Διὰ τὴν φλεγμονώδη quod attinet, certum est sanguinis circulatione, arteriarum cerebri distributione ac sinuum vero usu ignoratis, nunquam illam probatum iri, nec *Cl. Nymanni* argumenta superari posse. Verum agnita S. C. notoque sinuum usu, arteriarum ac rivulorum ad sinus progressu, si unquam torcular obstructum fuit, vel oppilari potuit, (cujus occlusionem ut probaret, *Cl. Nymannus Tractatum de apoplexia* potissimum adornavit,) haud difficulter intelligitur, unde tanta sanguinis copia irruat, quæ vasa & quam repente oppleri possint, ut omnes meatus comprimere valeant, & cur senibus præ

S

athletis

276 EXERCIT. DE LOCO AFF.

athletis & plethoricis obtingat. Si itaque vel torcular, vel laterales sinus, ibi, ubi jugularibus venis uniuntur, subito à corporibus pituitosis (qualia æque in venis ac arteriis reperiuntur) obturentur, quicquid sanguinis per arterias carotides & vertebrales, perpetuo ejus motu, affluit, intra dictarum arteriarum propagines, per cerebrum, cerebellum, meningem tenuem & anfractus dispersas, ut & in rivis ab his profectis & ad sinus abeuntibus, stagnabit, brevique summo-pere replebit ac distendet, unde medullosa substantia undiquaque arctissime comprimetur, omnesque spirituum animalium meatus claudentur, subitoque apoplexia oborietur. Et cum senes, ob calidi nativi ad interitum vergentis debilitatem, crudos humores imprimis cumulent, illi præ athletic, apoplexiæ tali obnoxii erunt. Atque hac ratione explicatam *Cl. Nymanni* sententiam, de torcularis obstructione, cum *Exc. D. Rolfink. l. c.* tolerandam arbitror.

Cætera vero quæ cerebrum premunt, five intus prognata, ut tumores, calculi, officula, five extrinsecus immissa ut globuli, telorum fragmenta & similia, sola ad apoplexiam producendam non sufficere facile credo: dum vero vel vasa rumpunt, vel dolorem excitant, atque ad humorum affluxum irritant, vel coctionem tertiam turbant, & ad excrementorum proveniunt nimium faciunt, aliquando ad hunc effectum producendum concurrere, reliquasque causas in agendo juvare possunt. Aliquando citra apoplexiam alio mortis genere interimunt: sic *Nobilis Bonecurtius* apud *Cl. Platerum l. 1. obs. p. m. 13.* à tumore globoso, glandulæ instar carnosæ, scirrhusæ, fungosæque, pomi mediocri-

cris magnitudine, super corpore calloso nato, post capitis percussione[m], obstupeſcentiæ tandemque mortis cauſa extitit. In Ephemeridibus *Exc. D. D. Johannis Burgouveri p. m. Poliatri noſtri deſideratiſſimi*, legi, aurifabrum quendam noſtratem, 34. annorum ætatis, poſt deaurationem, ſubito apoplexia forti tactum, occubiſſe: qua autem ratione, hunc laborem, talis effectus ſecutus ſit, explicatu difficile erit, cum interiora cranii *Viro doctiſſimo rerumque anatomicarum ſtudioſiſſimo* perſcrutari non licuerit. Non dubito tamen *mercurium* has turbas dediſſe, cum nervoſo generi & cerebro inimicus admodum ſit, ut non ſolum illi, qui in deaurando occupantur, frequenter experiuntur, dum tremuli, ſtupidi ac paralytici fiunt, ſed & poſt inunctiones mercuriales ex ſalivatione cognoscitur. Ante aliquot annos lanii cujuſdam uxori, in parte externa tibiæ, crudeliſſimo dolore afflicta, impoſui per biduum emplaſtrum de ſpermate ranarum cum ꝑ, unde quidem dolor evanuit, ſed tantus ſalivæ profluxus paucorum dierum ſpatio ſubſecutus eſt, ut eam triplo capacior cranio cavitas capere nullo modo potuiſſet. Insuper lingua valde intumuit, fauces undique exulceratæ fuerunt, ut magno labore ægram vix priſtinæ valetudini reſtituere potuerim. Adeo ut *mercurium* potius humores in cerebro commovendo, fundendo ac ibidem ad exitum ſollicitando, quam cerebrum ponderoſa ſua ſubſtantia gravando, apoplexiam producere exiſtimem. Quamvis enim *Petr. Caſtellus med. Romanus celeberrimus*, in Xenodochio incurabilium Romæ, in illis, qui poſt mercuriales inunctiones obierant, capitis tibiæque oſſium cavitates, ar-

278 EXERCIT. DE LOCO AFF.

gento vivo scatere deprehenderit ; atque in uxore J. C. cujusdam (quæ frequenter inunctione ex hydrargyro usa era , & in eam capitis gravitatem devenerat , ut eo parum in aliquod latus inclinato , statim illuc magnum pondus deferri perciperet , nec caput , nisi adhibita manu attollere poterat) binas ejus uncias invenerit , non tamen premendo universo cerebro suffecisset , nec ipse hunc effectum produxisse memorat *in dissert.*

I. *dodecap. chalcant. p. 7.*

Ex causis apoplexiæ supersunt , quæ una eademque opera , spiritus vitales aditu ad medullosum corpus & animales exitu prohibent.

Quod solum *sanguis* intra cranium copiose extravasatus & *serum* abundantissime in ventriculis & spatio inter meninges collectum , præstabunt ; si forte non credatur , sanguinis hoc effluvium , cerebrum & cerebellum spiritibus solum privando , & feri cumulum comprimendo & coarctando tantum , apoplexiam producere posse de quibus cum pluribus hætenus dictum sit , plura non addo.

Cum ergo apoplexia fiat medulloso corpore cerebri & cerebelli , vel spirituum vitalium influxu privato , vel ejus meatibus , qui spirituum animalium viæ sunt , aut obstructis , aut compressis , in apoplexia locum affectum , proprie sic dictum , concludo esse medullosam utriusque substantiam , undique causarum nominatarum vim , vel certe maximam partem , experientem.

Historiis apoplexia defunctorum & Exercitationi de Loco in illa affecto , pridem publica luci

ci creditis, prout in prima editione pollicitus fueram, subjungo Appendicem Historiarum ex cadaveribus illorum, qui vel apoplexia vel simili morbo obierunt, quæ hætenus mihi secunda ob-
venerunt. Cuilibet scholia adjiciam, in quibus, Deo favente, pro viribus operam dabo, ut prio-
ra vel corrigantur vel illustrentur, simulque no-
vis inventis seculi hujus sagacissimi adaptentur.



HISTORIARUM & OBSERVATIONUM
APOPLECTICARUM
& similibus, potissimum
ANATOMÆ
subjectarum
AUCTARIUM.

Cum SCHOLIIS.

Authore

JOH. JACOBO WEPFERO,
Med. Doct. & Poliatr. Scaphus.

Cui addita est

EPISTOLA
EXCELLENTISSIMI ET CLARISSIMI
D. JOHANNIS OTT,
Philosophiæ & Medicinæ Doctoris.

DE SCRIPTIS

D. G. HOLDERI *de Elementis Sermonis,*
D. MORLANDI *Stentorophonia.*



AMSTELÆDAMI,

Apud JANSSONIO-WAESBERGIOS.
MDCCXXIV.



V I R O

NOBILISSIMO ET AMPLISSIMO

D O M I N O

JOH. JACOBO STOKARO

à Neuforn

REIPUBLICÆ
SCAPHUSIANÆ

QUÆSTORI SPECTATISSIMO,
ASSESSORI SENATUS SECRE-
TORIS PRUDENTISSIMO,
PRÆSIDI SCHOLARCHARUM
BENE MERITO,

AMITINO Suo summe Benevolo

*Quicquid est OPELLÆ cum OFFICIIS
Amica & grata mente*

OFFERT & DEDICAT

JOH. JACOBUS WEPFER,
Med. Doct. & Poliat. Scaphus.

§ 5

NO-

NOBILISSIME DOMINE:

EXperimenta facere Medicum decere, imo omnino necessarium esse, ut in faciendis occupetur, multa sunt quæ suadent. Non illa intelligo, quæ maleferiati quidam audent, qui illotis manibus hæc sacra tractant, qui nulla arte Medica, nulla corporis humani scientia, nulla morborum aut causarum morbificarum cognitione, nulla virtutis medicamentorum notitia imbuti, sola lucri dulcedine allekti, per mortes experimenta impie faciunt. Illa omnium calculo laudanda arbitror, quibus admiranda corporis humani Oeconomia accurate addiscitur: quibus singulorum partium structuræ, usus & actiones peruestigantur, quibus, ut omnia certius innotescant, authores non deterrentur, si vivorum brutorum sectione innocuas commaculent

ma-

manus : quibus morborum sedes & causarum virulentias in cadaveribus scrutantur , & audentes nec faniem nec fætores horrent : quibus medicamentorum , quæ regna mineralium , vegetabilium & animalium suppeditant , virtutes indagantur , nec artifices turpe putant carbonum fumo denigrari. His obscura illustrantur , abdita eruuntur , falsa exploduntur , veritas , qua nihil pulchrius , nihil utilius , nihil suavius , acquiritur. His suffultus Medicus imperterrito animo hostes sanitatis aggreditur , eosque feliciter pellit , nisi malum plus docta manu valeat ; certe nulla Conscientiam macula conspergit , aut stigma illi inurit. In experimentis faciendis integræ Societates laudabiliter desudarunt , inter quas merito Anglica , origine , industria & rerum longa nocte sepultarum inventionem & revelationem , merito primatum tenet. Hujus Exemplum laude dignissimum secutæ sunt aliæ Nationes : in Germa-

ma-

mania Inclytum Collegium Curiosorum, In Italia Academia Lynceorum, eandem imitari Danos, auspicio Magni Bartholini, Acta testantur: iisdem in Gallia & jam quoque Romæ Literatos velificare Ephemerides testantur, in quibus non pauca Experimentorum Physico-Medidorum vestigia occurrunt. Privatorum huic litantium operæ censum enumerare non possem. Ex quo tempore Medicinæ operam dedi, nolui totus a libris pendere, ipsemet, quoties occasio offerebatur, Naturam consului, non pænitendo fructu, non enim raro aliter se rem habere, quam vulgo traditur, inveni. Specimen ante septendecim annos publici juris feci: quod nova editione ad quorundam petitionem, primis exemplaribus distractis, itero: addo novarum Historiarum & Observationum Auctarium, Hoc Nomini tuo, VIR NOBILISSIME, inscribo. Multa sunt quæ me id facere

cere jufferunt: novi enim primam
 Editionem , TIBI quoque dedica-
 tam , benevole acceptam a TE
 fuisse: Insuper hoc genus studiorum
 apprime TIBI semper placuit , &
 non ita pridem diligenter in Leges
 & Instituta tum Inclyti Collegii Cu-
 rioforum , tum Academiæ Ex-
 terarum , eadem versantium , in-
 quisivisti : denique Ipsemet agnoscis
 magnam inter Studium Politicum &
 Medicum affinitatem intercedere: &
 Respublicas suos morbos suosque
 aliquando paroxysmos pati & Opi-
 ferum prudentia & rerum usu in-
 structum postulare. Hanc ob cau-
 sam , postquam apud Celeber. D.
 MATTHIAM BERNEGGERUM
 fundamenta studii Historico-Politici
 posuisti , provide Experientiam ad-
 jungendam censuisti: Itinera in Gal-
 liam , Angliam , Bataviam , ad Res-
 publicas Germaniæ inferioris susce-
 pisti , Principibus Viris innotuisti ,
 & post aliquot annorum decursum ,
 mul-

multarum rerum notitia dives tandem domum rediisti. Vix domum redux ad negotia publica admotus & non diu post Provinciæ Transalpinæ Locarnensium præfectus creatus fuisti, quantum VIRUM TE ibi præstiteris, Monumentum publicum ob rem benegestam erectum & nomen STOKARIANUM cum summa laude omnium ore adhuc resonans, fidem faciunt. Hac provincia defunctus in Archigrammateum, paulo post in Reip. Quæstorem, Senatus secretioris Assessorem, Præsidemque Scholarcharum electus fuisti. Legationem in Angliam, ad Baravos, in Sabaudiam semel, ad Conventus Præpotentum Helvetiorum sæpiissime obivisti, quanta fide, quanta dexteritate & quo applausu tum has tum alia demandata munera peregeris, nolo memorare, cum me ad Panegyryn bene meritam scribendam viribus imparem facile agnoscam. Sospi-
tet

tet TE NOBILISSIME DOMINE,
 DEUS T. O. M. ad magnum REI-
 PUBLICÆ, SCHOLÆ & NOBI-
 LISSIMÆ FAMILIÆ incremen-
 tum! simulque rogo, ut paucas has
 pagellas, Venerationis debitæ testes,
 benigne suspicias, porroque faveas

Dabam ex Musæo
 d. 2. Febr. 1675.

*Nobiliss. & Ampliss.
 Dom. T.*

Cultori deditissimo

JOH. JACOBO WEPFERO,

Med. Doct. & Physico Scaphus.

PRÆ-

P R Æ F A T I O

Ad LECTOREM Benevolum.

COmperiit Nob. Dom. Onophrius a Waldkirch *hujus libelli Exemplaria distracta pridem fuisse, aliosque ejus editionem adornaturos: Itaque pro amore quo ergo Bonas literas fertur, a me petiit, ut ipsimet suis sumptibus hanc Opellam recudendam permitterem. Annuī facile: simulque Auctarium Historiarum & Observationum, quas ad priorum illustrationem facturas arbitrabar, addidi. Quatuor harum ex Ephemeridibus Exc. D. D. Burgouveri descripsi, quas ante aliquot annos obiter perlustravi, cognovique plurima his inesse, quæ ad emolumentum rei Medicæ egregie facerent, quæ Prænob. Dominus Filius aliquando publico non denegabit: quibus adjungendæ essent Observationes Venerandi Domini Avi ὁμωνύμης, jam ad prælam concinnatæ: Sic enim memoria Virorum de Patria optime meritorum apud seram posteritatem sarta tecta conservaretur. Tres mecum communicarunt Viri Excellentissimi & Doctissimi D. D. Emanuel Hurter, D. D. Maximilianus Henricus Egermeyer*

meyer & D. D. Ludovicus Hermannus Combachius, quos his amice rogo, ut porro ejusmodi observationibus rem Medicam locupletent & exornent. Exc. D. D. Christophorus Harderus mecum Poliater, qui saepe in secandis Cadaveribus socius meus & pars magna fuit; ab aliquot annis Diarium curationum & observationum rariorum congeffit, ex quo selectiora colliget ac se quoque Bono publico vixisse abunde literato Orbi testabitur. Cuilibet Historiae subjunxi Scholia, in quibus ex Φ αινομένοις unum alterumve elicere conatus sum, quod putaram vel ad Apoplexiae vel alius affectus explicationem pertinere: Aliorum Observationes, quæ hæc vel confirmassent vel illustrassent vel etiam oppugnassent, hac vice studio omisi, quia animus est, si Deus vitam & vires concesserit, Centuriam Observationum & Curationum Apoplecticarum & affectuum congenerum, quam in promptu habeo, aliquando typis excudendam tradere, itidem cum Scholiis, in quibus aliorum observata magis locum habebunt, utpote Casibus subnectenda qui plus conjecturis obnoxii sunt, quam ut sufficienter ad omnium palatum demonstrari possint. Calci opellae adjeci Exc. Dom. D. Johannis Ott Epistolam amicissimam, qui felici connubio Medicinæ Mathesin junxit: Il-

le sub manibus habet Tractatum in tres Libros distributum: quorum primus est Versio G. Holderi de Elementis Sermonis, Alter Samuelis Morlandi Tuba Stentoro-phonica pariter ex Anglica in Latinam Linguam translata: Tertius ex occasione tractatus Morlandi continet doctrinam de Augmento, seu Multiplicatione soni, una cum solutione Problematis Morlandiani Viris in Orbe literario Doctis propositi, Geometrice & Physice conceptam. Ob necessaria adhuc aliqua facienda Experimenta & privata negotia ad debitam perfectionem opus nondum deduxit. Interea Epistolam hanc, ceu scripti ingeniosissimi prolusoriam, ad me dedit, qua Benevolum Lectorem, cum bona Domini Authoris venia defraudare nec volui, nec debui. Nob. & Exc. D. D. Friderici Lucii Scretæ a Zavorziz meditationes de magno Liene cum Authore exspirarunt: Ejus Frater Germanus Nob. D. D. Heinricus, Amicus meus singularis Observationibus & curationibus Chymicis, quod Fata negarunt, cum bono Deo recompensabit. Historia Puellæ sine cerebro natæ Anni tertii Ephemeridibus Collegii curiosorum, cum Dissertatione, inserta fuit. His Amice & Benevole Lector vale & conatibus meis ulterius fave: sic ad reliquarum
Ob-

Observationum Anatomicarum editionem stimulum addes, quam Deo benedicente maturabo propediem. DEUS T. O. M. ut ad sanctissimi ipsius Nominis gloriam & ægrorum salutem cedant, Faxit!



HISTORIA PRIMA.

Johannes Eberlin, Vir robustus, statura oblongus, 50. annorum : Vino deditus : Auriga in Nosodochio nostro. Anno 1672. d. 12. Decembr. ebrius vesperi hora 7. ex scala præceps decidit atque occiput in ultimo scalæ gradu validissime impexit, adeo ut gradum illum ligneum allisione hac violentissima propemodum fiderit. Post casum sublatus ad aliquot passus obambulavit, brachia movit, sanguis ex aure dextra & ore copiose emanavit; mox vomuit bis cruorem tum sincerum tum nigricantem. Neque Medicus neque Chirurgus vocabatur vesperi : Rusticus capillos obiter detondit vulnusque leviculum in occipite aceto eluit ac Empl. quodam viridi obtexit. Post horam septimam lecto impositus loquebatur plerunque rationi non consentanea; querebatur vinum subdole auferri (nam alias ad rem attentior erat) aliaque inepta effutiebat; quæ num vino, anne vero casui adscribenda forent? dubitarunt adstantes: Quandoque de lapsu hoc gravissimo querelas fudit: quandoque potum poscebat. Prima hora postquam decubuit crebro surgere ac abire ex conclavi

cona-

conabatur. Ante decimam peccata sua agnoscere, deplorare & deprecari cœpit, seque precibus ac suspiriis Deo commendavit. Postea indormivit ac cum stertore respiravit. D. 13. Dec. Exc. D. D. Christophor. Harder vocatus fuit, qui Apoplexia fortissima affectum invenit; nam omnes sensus externi & interni cum motu voluntario aboliti prorsus erant, ut nullo ingenio excitari posset, oblatas aquas Antapoplecticas & Syrupos deglutire nequirit: respiratio cum validissimo stertore supererat, cum pulsu, ac facies rubebat, & totus habitus adhuc calebat. Vesperis circa quartam demortuus est. D. 14. Dec. Cadaver cum D. D. Hardero aperui. In syncipite dextro occurrit tumor cum folliculo, quos Nattas vocant, olivaris, nuce juglande minor, qui vas sanguiferum ex poro cranii emergens recipiebat. In medio ossis Lambdoidei dextrorsum sedes visa fuit, sine fractura aut fissura foris conspicua. Foris in occipite ad collum usque omnia sub cute sanguine suffusa erant. Remota olla plurimum sanguinis grumosi sub dura meninge in tota postica parte, maxime dextra, qui ibidem quoque antrorsum effusus erat, & in ipsa basi cerebri copiose invenimus: quin etiam multum sanguinis grumosi; per

ostium magnum in fistulam spinæ dorsi penetrasse visum à nobis fuit. Ventriculus dexter plenus erat sero cruento : sinister serum continuit multo minus dextro, minusque cruentum. Intra anfractus nihil cruoris invenimus, quamvis meninx tenuis alicubi sanguine suffusa esset. Cerebrum plane non subsidit, imo totum cranium ad summum usque implevit, non secus ac apud alios videtur, qui nihil apoplectici passi sunt. Avulsa meninge dura ab osse Lambdoideo cæterisque in basi nulla quoque vel rima vel fissura conspici poterat, ibi ubi sedes foris ossi impressa fuit: at in basi & ima ossis Lambdoidei parte fissura manifesta erat, quæ inde ad os cuneiforme & sellam equinam usque in dextro latere extendebatur, adeo ut pressa foras cuti in occipite ichor cruentus exsudarit, ossa amplius hiscerent & quasi divulsæ moverentur. Alia quoque fissura reperta in processu interno ossis temporum, qui os petrosum continet, eaque transversa, quæ cum priore non continua erat; nec futura reputari poterat, cum in sinistra parte non observaretur. Os cuneiforme cum Lambdoideo ceu in Viro jam propectæ ætatis in unum os coaluerat.

SCHOLIA.

I. Affectus iste Apoplexiæ nomine non defraudandus videtur, quamvis a causa externa & violenta, scilicet gravissima capitis allisione evenerit: cum non raro occurrant Ægri, apud quos subito actiones animales, respiratione & pulsu exceptis, citissime abolentur, brevique enecantur, quamvis nulla causa externa huic violentiæ par præcesserit, potissimum à sanguine copiose intra cranium effuso, qui uno ore Apoplectici dicuntur. Hæc apoplexiæ merito fortissima nuncupatur: nam post horam duodecimam à casu adeo omnes actiones animales abolitæ ut non solum nullo ingenio excitari, verum etiam non amplius deglutire potuerit. Forsan jam post horam tertiam in vigore erat, id adstantibus non advertentibus & somnum circa decimam naturalem credentibus, nam jam tunc cum stertore respiravit.

II. Apoplexiæ istius causam proximam fuisse sanguinem copiosissime intra cranium profusum abunde sensibus patuit. Hoc sanguinis diluvium casum præcessisse, aut apoplexiæ consequens & effectum fuisse, ut quidam opinantur, neutiquam verosimile est, nam ante casum sanissimus fuit & cuticulam curavit. Negari quidem nequit temulentiam casus parariam fuisse, dum aut mentem perturbavit, ut notissimas sobrio vias, in tenebris invenire nequirit, aut pedibus manibusque robur ademerit, ut firmo gressu incedere & vicina adminicula apprehendere non potuerit. Verum ipsissimam capitis allisionem vehementissimam ad arteriarum ramulos in basi avellendos, rumpendos & lacerandos sufficientissimam

fuisse, luculenter demonstrant fissuræ in basi crani, sc. ossis Lambdoidei parte ima ad os usque cuneiforme crassissimum & in processu interno ossis temporum; non superficialiæ & levēs, sed profundæ & totum os utrinque penetrantes, ut presso vel foris vel intus his osse sanguis transfudarit. Sanguis copiosissime in spatium quod inter meninges est, in dextro latere imprimis, ad basin cerebri, ad ventriculos ut & ad fistulam spinæ per ostium magnum in occipite, brevi tempore, profusus fuit ex arteriarum ramulis ruptis & avulsis ob perpetuum & validum pulsus, nam Cor in Viro sano & robusto vegetum erat ac venæ mero incaluerant. Apoplexiam vero fortissimam produxisse non una ratione videtur, nam ab hac largissima hæmorrhagia medullosæ substantiæ non solum in basi, verum etiam in vicinis partibus, ubi crura medullosa emergunt, spirituum animalium materia subtracta fuit, ipsa medullosa substantia nectare hoc vivifico orba in se collapsa densior evasit, ut spiritibus animalibus, qui in anteriore & superiore cerebri parte ex sanguine arterioso per ramos carotidis anteriores anfractus & corpus callosum perreptantes allato, adhuc generabantur, transitum denegaret; denique foris à copioso sanguine extravasato amplius coarctabatur; solam enim compressionem à sanguine intra spatium meningum stagnante ad apoplexiam faciendam sufficere evincunt, illi qui omnibus sensibus & motu privati, solo trypano a præsentissimo interitu vindicantur: quod ad aliam observationem plenius, Deo volente, explicabo.

III. Serum in utroque ventriculo repertum copiosius in dextro, parcius in sinistro in utroque cruentum, minus tamen sanguine tinctum
in

in sinistro, forte quia serum à sanguine concreto separatum, per rimas ventriculorum versus basin hiantes intravit: quamvis non negarim ante casum illud in ventriculis redundasse, nam bibulus erat: verum licet omnis contagii cruenti expers fuisset, illud apoplexiam nec effecisset, nec illam adhuc dum accelerasset, cum non raro maiore copia serum in his sedibus reppererim, qui plane alio morbo quam apoplexia, aut affinitatem aliquam cum ipsa habente diem suum obierunt.

IV. Sanguis ex ore & aure dextra copiose pro-
manavit & bis cruorem tum sincerum, tum nigricantem evomuit, non quod sanguini ex cavo cranii via manifesta aut occulta sensibus vel per aures, vel os cribriforme, vel per basin cranii patuerit, id enim si factum fuisset sique in his sedibus sanguis exitum invenisset, non tam celeriter, nec irrevocabili fato omnes actiones animales pessum dedisset, cum alii post ictum, casum &c. cranio perforato, etiam non multo sanguine primum emanante, levamen experiantur. Potius ab eadem violentissima capitis allisione vasa sanguifera intra aurem dextram ejusque canalem & in externa basi cranii disrupta fuerunt, quod alias à capitis percussione evenisse memini, salvis arteriis interioribus cranii, vel certe non graviter faucibus, cum citra motus aut sensuum interiorum læsionem contigerit. Fidem huic assertationi etiam obstinatissime facient fissuræ ossis sphænoidis penetrantes, quæ allisionem tam validam fuisse innuunt, ut pari facilitate, qua os crassissimum findebatur, etiam vasa tenerrima non solum intus sed etiam foris, itidem proxime ossi connata rumpi potuerint.

V. Post casum ab accurrentibus contubernali-
bus sublatus ad aliquot passus obambulavit, bra-

chia movit, loquebatur: omnia salva putabant, cum nulla fractura aut luxationis signa comparerent. Actiones istas perficere valuit, quia spiritus animales adhuc in medulloso cerebri corpore abundarunt, libereque ad musculos artuum & loquelæ inservientes effluere poterant. Quanti vero faciendi sit cerebri gravior commotio atque ab illa pendens spirituum animalium perturbatio, quam nonnulli solam quandoque sufficere opinantur ad actiones animales aliquandiu vel abolendas vel imminuendas: Certe si quidpiam valeret, in gravissima hac allusione ita statim illas labefecisset, ut ad gressum ineptus fuisset, eoque magis, quia insuper mox à lapsu quoque sanguis intra cranium copiose satis profusus fuit, & ex sanguine ex aure & ore manante conjicere licet.

VI. Decubitus verbis & factis se delirum ostendit. Vino delirium adscribebatur merito in principio; postquam vero crebro surgere & ex conclavi proripere se conabatur, jam sanguis extravasatus incalescens, gravius spiritus animales perturbans ac meninges exquisito sensu præditas affligens accusandus videtur; inde enim anxietas quædam surgebat, quæ phantasiæ pejus quidpiam imminere prædicebat quasi: quamobrem, nondum crapula penitus profligata, peccata sua deplorare & summum Numen precibus sibi conciliare studebat. Forte etiam crapulæ impetus retusus fuit sanguine copiose non solum intra sed etiam extra cranium profuso.

VII. Somnus circa horam decimam obrepens, naturali proxime accessisse videri posset, cum hora ista somnum capiendi consueta fuerit seque paulo ante largioribus haustibus ad illum invitaret: Verum respiratio cum stertore jam apoplexiam

xiam in procinctu fuisse arguit, quæ invalescente somno per momenta, continuo ex arteriolis sanguine intra spatium meningum expulso, augebatur, donec ad summum vigorem pervenisset, sensibus sopore sepultis & nec vel minimum obfistentibus.

VIII. Abolitis omnibus actionibus cæteris, Cor nihilominus, etiam sequente die, validissime adhuc movebatur, quod ex pulsu, faciei rubedine & calore in toto habitu constitit; hæc namque non nisi à sanguine libere & largiter, propter integrum cordis motum in universum habitum distributo proveniunt. Cordis motum atque respirationem spirituum animalium ministerio perfici, negari nequit, postquam Viri Clarissimi & de universa Medicina optime Meriti Dom. *Willis* & D. *Lowerus* veritatem hanc præclaris experimentis stabiliverunt. Cur vero cæteris actionibus animalibus prostratis, istæ superstites manserint? nullum aliud effugium certius arripere licebit, quam si cum Exc. D. *Willis* statuam actiones animales non voluntatis imperio subjectas a Cerebello dependere: atque plures arteriarum ramulos à vertebralibus proxime oriundos atque ad cerebellum abeuntes, integros post casum perstitisse: non equidem omnes à laceratione immunes dixerim, non solum propterea, quia multum sanguinis in occipite & circa ostium magnum & in fistula spinæ invenimus, cum ille sub sinibus lateralibus è basi huc transfluere potuerit, sed potissimum ob mortem celeriore, quam ut vel sanguinis profusioni largiori vel reliquarum actionum animalium abolitioni adscribi deberet: nam quotidie experimur multos sanguine etiam ad libras profuso & quasdam hystericas omnibus actionibus animalibus etiam

etiam pulsu & respiratione ad sensum diutius sublatis supervivere: ut taceam apud hunc apoplexia ista defunctum plurimum sanguinis in vasis majoribus medii & imi ventris redundasse.

IX. Misello nihil opis Medicæ adferri potuisset: Revellentia cujuscunque generis vix tantum valuissent, cum nec vel minimum lacera vasa vel glandularum oscula omnibus sensibus abolitis resorbuissent. Vim sopitam suscitantia trunco adnota fuissent: Trypanum infame fecissemus, quamvis enim sanguinis extravasati forte tantillum eduxissemus, perstitisset tamen in basi potior & nocentior pars, insuper ad quemlibet pulsum nova effusio supervenisset, cerebrumque magis magisque suo calido influente non sine majore actionum animalium prostratione orbatum fuisset: ut taceam fissuras in imo ossis Lambdoidei, osse cuneiformi & processu ossis temporum, semper aliquid monstri alentes & vel solas immedicabiles.

X. Natta, tumoris cum folliculo species, non infrequenter caput occupat. Omnes arteriâ quadam, à qua nutrimentum & augmentum capiunt, præditæ sunt: Succinguntur intus peculiari tunica: Contenta non unius generis sunt, in quibusdam inveni substantiam piuguem, flammam concipientem, in plurimis cretaceam solam vel sero perfusam. Familia hic est inter primarias hujus generis tumoribus obnoxia. Si basis angusta sit, seta equina sensim magis magisque constricta decidunt, quod aliquoties a me factitatum fuit: si vero basis amplior ac constrictionem respuat, in summitate vulnus oblongum infligo, contenta exprimo a basi, ubi ceu per pediculum, nutrimentum suscipit, inde cum pauxillo gossypii butyrum antimonii solum vel cum Lin. digestivo per-

permixtum, ut scaturiginem obturem; nisi enim pediculus abscindatur aut erodatur, brevi repul-
lulant. Tumores hujusmodi a Chirurgo temera-
riis & imperitis uno ictu amputatos novi, lar-
gissima subsequente hæmorrhagia, quæ vix fisti
poterat, non sine virium prostratione. Antimo-
nii butyrum nullos dolores, nullum pruritus ex-
citatur, nisi imprudenter labia cutis capillatæ at-
tingantur; interna enim pellicula sensus expers
est. Natta apud istum vas sanguiferum è cranio
emergens accepit, quod procul dubio furculus
arteriosus à dura meninge oriundus fuit.

HISTORIA II.

Vinitor quidam in vico Textorum 1647.
Mens. Sept. ebrius de scala cadens vehe-
menter caput allisit. Post casum quereba-
tur de cephalalgia gravissima: una atque
altera hora elapsa penitus obmutuit cum
sopore profundo: mox supervenere con-
vulsiones cum omnium sensuum abolitio-
ne. Toto corpore incaluit, sudavit largi-
ter. Duodecima post casum hora subinde
quantum cochlear capit aquæ antiepilepti-
cæ dedi: Clysterem acrem infundendum
curavi in decocto cephalico colocynth. dr.
in pet. ligat coctis. derafis capillis totum
caput etnucha inungebantur ol. ros. myr-
tin. lumbric. Imponebatur catapl. ex fa-
rin. hord. fabar. Lent. in aq. & aceto coct.
ad. ol. ros. Cham. Ab usu aq. antiepilepti-
cæ

cæ convulsiones remiserunt. Pulsus erat magnus, robustus. Itaque vena secabatur: hora post V. S. redierunt convulsiones atque ultra horam durarunt. Cessante Epilepsia, fortissima apoplexia supervenit cum omnimoda sensuum & motus abolitione: cum stertore respiravit. Hora 3. pomeridiana mortuus est.

S C H O L I A.

I. Etsi hujus Apoplectici & duorum subsequen-
tium cadavera non secuerim, nullus tamen du-
bito quin plurimum sanguinis apud illos intra
cranium profusum fuerit, itidem Apoplexiæ au-
thorem. Huic sanguis extravasatus mero effe-
vescens primum cephalalgiam peperit & quam-
vis cerebrum graviter commotum fuerit, demum
post unam alteramve horam attulit insultum apo-
plecticum, quem ἀφασία cum sopore prodidit: for-
san alia ejus indicia aderant, quæ adstantes, ho-
mines rudes, non animadverterunt.

II. Convulsiones veterno isti apoplectico mox
supervenerunt, quia meninges nondum obstu-
perant, sanguisque apud hominem rusticum du-
ris laboribus æstate prægressa incensus, nunc vi-
no fervens acrius illas punxerat, ut principium
nervosum spiritibus animalibus abundans, viis
& meatibus nondum interclusis insurrexerit, cor-
rugationes motusque convulsivos violentissimos,
ad molestiam meningibus illatam excutiendam
instituerit, non sine successu aliquo, nam à ve-
terno excitatus deglutivit aquam antiepilepticam,
atque artus moverat & ad mentem redierat, ad-
eo

eo ut Venæ sectionem, viribus validis adhuc, imperare ausus fuerim. Hora post Venæ sectionem Convulsiones redierunt, cum ab illa causa proxima removeri nequirit, imo gravius infestantur effluvio sanguinis vel aucto vel exacerbato, quas excepit Apoplexia fortissima, post pauculas horas funesta.

III. A Convulsionibus habitus totus incaluit, sudorque largiter manavit, propter agitationem vehementissimam totius massæ sanguineæ, antea tum à labore tum à vino fervidioris: lymphæque abundantioris attenuationem ab eadem conquassatione.

IV. Epilepsiam ultra horas durantem secuta est Apoplexia sanguine largius intra cranium effuso, tum quia fluxibilior à violentissimo motu redditus fuerat, tum quia corrugato cerebro fortius superne exprimebatur & inferne ascensu liberiore prohibebatur.

HISTORIA III.

Martinus Sigg Dörflinganus: Juvenis robustus: dum miles noctu excubias agit, d. 21. Januar. 1656. ex alto ultra duas contignationes cadit, gravissimeque synciput dextrum allidit cum cranii fractura per cutim integram perceptibili. Horis 30. negligitur. Omnibus sensibus & motu abolitis, sola respiratione cum pulsu magno superstita. d. 23. Jan. cum D. Davide Tripelio

pelio Chirurgo industrio cutim capillatam & pericranium incidi ac cranium denudavi, trypano illud perforaturus. Verum cum singulis horis vires deficerent, nolui auxilium his in oris insuetum profanare. Vespero hujus diei mortuus est.

S C H O L I A.

I. Num protinus à casu apoplecticus evaserit non rescivi, cum nullus commilitonum ipsi adfuerit, ipseque ultra horam omni ope destitutus humi prostratus jacuerit & postmodum ultra 30. horas neglectus fuerit. Quoniam vero ad tertium diem supervixit, nullus dubito, quin in principio refocillatus aliquandiu ad mentem rediisset. Forte quoque sanguis extravasatus post casum magis supernas quam cranii infernas partes intus occupavit ac propterea minus infestavit.

II. Trypano synciput perforare animus erat, quia viribus adhuc valebat & sine stertore respirabat; verum viribus ad momenta propemodum labascentibus inceptum perficere non lubuit; si per socordiam adstantium in principio instituere perforationem cranii licuisset, de felici successu non dubitarem.

HISTORIA IV.

Jacobus Gyfler Flachensis Juvenis 26. annorum d. 28. Jun. 1673. ante meridiem imprudenter jactu lapidis vehementer in tempore sinistro percussus fuit. Hora prima

ma pomeridiana ex vico in vineam abiit, strenue duabus horis operam peregit, quibus elapsis, cum labores non amplius sustinere posset, domum properavit. Prope domum ante Januam humi cecidit, diu instar Syncoptici jacuit: aceto rosaceo naribus admoto refocillatus surrexit, & manu ductus titubans ad cubile pervenit, mox obmutuit: totum dextrum latus paralyticum fit: sinistrum vero pedem & brachium, omnibus sensibus privatus movit. D. 30. Jun. mane totum latus dextrum convellebatur. Hora tertia pomeridiana mortuus est. Post obitum totum sinistrum latus lividum evasit: detracta Cuti capillata, multum sanguinis grumosi circa tempus Chirurgus pagi illius & cum sede fissuram in osse temporis sinistri reperiit. Cranium non aperuit.

SCHOLIA.

I. Ex hac historia patet à sanguine intra cranium effuso non protinus actiones animales languescere: non dubito enim statim post ictum illum extravasatum fuisse, sed paucum: sanguine à prandio & post labores magis fluxili reddito effluvium auctum ac tum demum actiones animales prostratæ fuerunt.

II. Cur vero ab ictu tempore sinistro læso eoque sanguine suffuso illiusque ossi sede impressa dextrum latus paralyti & motu convulsivo affectum

etum fuerit? hac vice vel propterea Judicium suspendo, quia cranii apertionem Chirurgus neglexit: de hac re vero ad alias observationes differendi locus commodior erit.

HISTORIA V.

Ex Ephemeridibus Exc. I. Dom. Johannis
Burgouveri Poliatri quondam nostri.

Miles quidam in tempore dextro supra musculum temporalem cæsim vulneratus fuit, Mens. Sept. Ann. 1634. primis septem diebus nihil observabatur, quod periculum aliquod minaretur: postmodum vino se obruens, veneri abutens, & ad excandescentiam propter authorem vulneris præsentem commotus, febrile incepit. Venæsectio omittebatur, minus curate vulnus deligabatur & ob supinam tonsoris negligentiam minus ab aëre frigido custodiebatur. Supervenerunt vomitus biliosus & convulsiones: paulo post ceu Apoplecticus mortuus est. Vulnere ad cranium denudato ac ablata cuti musculus temporalis integer inventus fuit: pus laudabile & bene coctum occurrit: cranium vero, ubi aëri patuit denigratum & cariosum reperiabatur, cum fissura. Remota cranii olla, dura meninx inflammata & stupendæ crassitie fuerat: trans illam multum ichoris
cruenti

cruenti cum portione puris stagnavit. Tenuis meninx itidem inflammata & pure confpersa inventa fuit; ac sub illa ichor fluctuabat.

SCHOLIA.

I. Hanc & tres subsequentes Historias *Clar. Dn. D. Job. Burgouveri*, Poliatri nostri optime meriti, Practici felicissimi, atavis editi Medicis, meis admisceo, luce publica non defraudandas: optandumque foret, ut cæteræ, quas *Vir summe industrius* diligentissime conscripsit ac aliquot *Ephemeridum* Voluminibus inseruit, ab oblivione vindicarentur.

II. Vix vulnus insignius est, maxime si partes nervosas attigerit, cui non protinus febricula jungatur; quæ quando pus generatur, augetur: unde prudentes Chirurghi, nisi largissime sanguinem vulnerati profuderint, tempestive Plethoricis venam secant, victum tenuem & refrigerantem imperant, vinum denegant aliaque quæ ad febrim ejusque fomitem submovendum pertinent, instituunt. In omnibus enim vulneribus, imprimis partium nervosarum labia vicinæque partes intumescunt aliquantulum & aliquo modo inflammantur: nam sanguinis, succi nervosi, & lymphæ motus perturbatur & impeditur, canaliculis per quos meant remeantque faucis, contusis, compressis atque constipatis ab extravasato liquore; stagnantes incendium concipiunt, quod incrementa sumit, quando in pus mutantur eorumque particulæ incensæ sanguini reduci magis magis admixtæ calorem p. n. in tota massa sanguineâ accendunt, nunc majorem, nunc mi-

norem, prout sc. inflammatio circa vulnus levior, aut gravior fuerit, quem merito Febrim nuncupamus, non secus ac continuas, quæ plerunque ab insigni & profunda inflammatione partis principis pendent & foveantur, ut suo loco amplius probandum erit. Febricula hæc plerunque periculo caret nec molestiam aliquam parit, quæ alicujus momenti esset, si ægri rite tractentur & sanguinis circulatio reliquorumque humorum motus reparetur: si vero error committatur raro impune illam ferunt. Apud Militem istum indubie inflammationum reliquæ partium vulneratarum apparuerunt in cadavere, sc. dura meninx stupendæ crassitie & tenuis meninx manifeste inflammata, à quibus febris excitata fuit: fovebatur autem ab ichore subcruento copioso cum pure intra spatium utriusque meningis & sub tenui quoque fluctuante: postea à Venæ sectione & aëris frigidi admissione, particulis putridis profundius adactis & percussis, à Vini ingurgitatione, Venere & excandescentiâ prorsus effera reddita ægrum ad incitas redegit.

III. Dum humores, tum intra partium vulneratarum porulos stagnantes, extravasati, mitiores erant, neque vomitus neque convulsiones ante diem septimum affligerunt: postquam verò tum ob febrim vinique abusum acriores evaserunt, tum ob animi motum impensius agitati fuerunt, primum vellicatis nervis vagi paris Vomitus cierunt, deinde aucta illorum malignitate, ipso nervorum principio irritato, Convulsiones universales concitarunt.

IV. Ceu apoplecticum mortuum scribit *Vir doctissimus*; quamvis enim ante supremam horam omnes actiones animales abolitæ fuerint, noluit tamen hunc symptomatum concursum lethum

thum adferentem Apoplexiam simpliciter dicere, cum febris sanguinem spiritibus orbans, Vomitus illorum instaurationem prohibentes & Convulsiones residuum dissipantes quoque ad mortem accelerandam symbolum contulerint. Quicquid vero Apoplectici Militi isti evenit, ichori & puri intra meninges cumulatis, cerebrum prementibus & reliquias spirituum animalium quasi suffocantibus, attribuendum existimo: nam ob duram meningem stupende crassam ichori exitus, vulneris labiis coarctatis, penitus intercludebatur, unde etiam sub cuti incisa pus laudabile inventum fuit, quod ab ichore, si via patuisset, dilutius evasisset. Ejus exclusionem procul dubio Vir peritissimus adjuvisset, nisi re demum conclamata accersitus fuisset, nam Chirurgicarum operationum gnarissimus erat, utpote *Magni Spiegelii* cum *Exc. D. Rolfincio* Patavii studiorum socio & *Celeberrimi D. Guilb. Fabritii Hildani* olim discipulus: profanasset enim non sine proprii nominis contumelia remedium in Republica, ubi vota sunt libera, quæ non semper ponderantur sed numerantur.

HISTORIA VI.

Somnambulo quidam, Æstate 1633. ex alto ædium se in straturam filiceam viæ publicæ præcipitavit: artubus mire conquassatis & cranio fisso cum collectione sanguinis sub cranio. Ægro & astantibus trepanum abhorrentibus, bis venæ sectionem adhibuit: totum dorsum oleo discutiente inunxit: truncum pelle arietina ad-

huc a recenti detractiōe calente involvit : Capiti facculos cephalicos in vino coctos applicuit : cerebro dedit Tincturam traumaticam : vinum denegavit , propinavit decoctum Corn. Cervi. Alvum subduxit brodio prunorum Laxat. & suppositoriis. Vires subinde refecit aqua Cord. temperata, sic convaluit.

S C H O L I A.

I. Vir iste consistentis ætatis, non exigua corporis mole præditus, ex secunda ædium contiguatione in straturam filiceam non pleno casu in caput ruit, sed præcipuum impetum truncus corporis primò sustinuit, alias vix omnium actionum animalium abolitionem & præsentissimam mortem evitasset : interea tamen etiam graviter caput allisit, quia cranium fissum fuit, non sine sanguinis intra cranium effusione, quæ perpetuus fissurarum comes est.

II. Itali aliique locorum calidiorum incolæ protinus trepanum arripiendum statuissent, idemque *Exc. D. D. Burgouverus* factururus erat, nisi æger & adstantes ab auxilio his in locis insolito & vel solo nomine plerisque terrifico abhorruissent, ipsiusque conatibus obstitissent. Itaque aliis remediis sanguinis ulteriorem profusionem intra cranium prohibere & jam extravasatum absumere annixus est: Venæ repetita sectione sanguinis copiam imminuit, ejus motum, a casu & a grumis hinc inde in toto habitu incendium capientibus, perturbatum & impetuosius factum coërcuit, venasque sanguinis quantitate aliqua de-

detracta quasi famelicas reddidit, ut avidius effusum reorbuerint: quorsum etiam pertinuit vitus tenuis & refrigerans: Exhibita Tinctura traumatica & foris applicitis sacculis herbis cephalicis farctis & in vino coctis sanguinem extravasatum in grumos abiturum ac putrilegine sua graviora damna allaturum, ita disposuit, ut vel vasa sanguifera, vel glandularum poros denuo subintrare potuerit. Idque fecit non sine felici successu, nec sine exemplo, cum etiam ab aliis citra cranii perforationem, idem non raro ex voto præstitum sit. Sanguinem extravasatum in auras tenues abivisse & halitus instar evanuisse credere nequeo, obstitisset enim cranii crassities & duræ meningis densitas, ob quam pertinacissime etiam aquam meram in hydrocephalis detinet, ut nullo ingenio, citra incisionem periculi plenissimam, auferri possit. Quotidie observamus in tenellæ ætatis puellis tumores in fronte ad dimidii ovi gallinacei magnitudinem ex forti alligione assurgentes, & atro-livescentes a sanguine suffuso, protinus admoto ferro frigido subsidere, aut percussione hac in principio neglecta, applicito carnis calfactæ frustulo paucarum horarum intervallo citra manifestam evacuationem evanescere. Alias quoque in praxi animadvertimus pulveribus contra casum, Unguentis potabilibus, ex quorum numero Tinctura traumatica est, decoctis traumaticis grumosum sanguinem dissolvi partimque intra vasa sanguifera reorbueri, partim ejus excretionem facilitari. Ante aliquot annos Teloniarius quidam Vitriarium quendam, ob injurias plures illatas, ut loquebatur, paterne castigavit atque priapo tauri primum a cervice ad imas furas, postea a sternum ad tibias usque inclementer & plusquam Turcice percussit: unde paulo post

difficulter respiravit, circa præcordia summopere angebatur, tormina ventris patiebatur, cum dolore primum mingebat, & tandem aliquandiu urina substitit: Cruorem tussi, vomitu cum fæcibus alvinis & urina egressit; Tinctura traumatica aliquoties assumpta & foris grumos dissolventibus applicitis & victu tenui persuaso, homo alias nequam & hac castigatione non usque adeo indignus, convaluit.

HISTORIA VII.

M. G. V. D. M. Tempus finistrum, casu ab alto per scalam lapideam, vehementer allisit 1631. grumos sanguinis per nares excrevit, tinnierunt aures: vomuit: vino potu deliravit. Statim tinctur. traumaticæ drachma cum dimidia dabatur: die secundo vena secabatur: Caput inungebatur tinctura traumatica, ung. populneo, ol. chamom. violac. mixtis, Propinabatur Julepus ex Aquis heder. terrestr. Veron. Chærefol. beton. Syr. viol. papav. err. & accetos. citri. Intra octiduum convaluit.

SCHOLIA.

I. Sanguinem apud Virum istum intra cranium extravasatum fuisse, credibile faciunt plura, sc. casus per scalam lapideam aliquot gradibus constantem, allisio capitis in tempore sinistro, ubi cranium pertenuè est, Vomitus, quem vix sola spirituum perturbatio effecit, & aurium tinnitus: imprimis id evincere poterit delirium post haustum

stum vini, nisi enim sanguis extravasatus à vino incaluisse, vix delirasset, quin potius vinum parce sumptum spiritus turbatos refocillasset iisque motum naturalem reparasset, sublatis obstaculis remorantibus. Grumi autem per nares excreti, non erant portio sanguinis intra cranium detenti, cum ad illos nulla via grumis pateat: indicio tamen fuerunt æque intra cranium, quam foris in cavernis nasi vasa sanguifera a casu disrumpi potuisse.

II. Sanguinem paucum extravasatum intus delituisse argumento est convalescentia paucorum dierum spatio, paucis remediis adhibitis, acquisita. Inter quæ non ultima laus debetur Tincturæ traumaticæ: quæ cum *Exc. D. Burgouvero* familiaris admodum primumque hic in usum deducta fuerit, atque hodie etiam Practicis nostris frequenter ægris hujusmodi suadeatur exoptato successu, ejus descriptionem aliis quoque communem facere lubet: quæ talis est: R. But. Maj. lib. iii. liquefiant lento calore in Vase terreo Vitreato ac despumentur: adde flores & folia herbarum recentium, quarumlibet perfectam maturitatem adeptarum ac minutim incisarum, sc. Herb. Chærefol. Petrosel. an. M. ii. Plantagin. utriusque Nasturtii aquat. Anagallid. Beccabung. Solani, Meliss. Virgæ aureæ, pentaphyll. veron. bistort. Nicotian. Salv. nob. flor. Hyperic. centaur. min. an. Mjs; digerantur in loco tepido & quotidie bis terve bacillo agentur, donec herbæ omnes accesserint: postea coquantur lento calore & fortiter exprimendo colantur, colaturæ indantur lumbricor. terrest. aq. plantag. & Aceto rub. Idæi lotorum & minutim concisorum uncia cum dimidia: Iterum coquantur lento calore ad consumptionem

succorum; percolato admisceatur Mellis despumati Libr. i. fervetur in vase terreo vitreato, datur drachma una vel etiam duæ seorsim, vel in juscule solutæ, quoties suspicio grumosi & congelati sanguinis obvenit: quin etiam in principio pleuritidis commode datam memini. Unguentis Anodynis foris illinendis haud inepte quoque jungitur. Quidam cum lumbricis addunt stercoreis ovilli Mj. quod tamen citra virium imminutionem à multis annis omisimus.

HISTORIA VIII.

In cadavere Illustrissimi Domini Henrici Ludovici Maximiliani Comitis de Papenheim, in obsidione arcis Altæ Stöfflæ sclopeti globulo per altiore tempore dextri partem ad profundiora cerebri in latere sinistro adacto, interempti, condituræ causa eviscerato, nihil fere sanguinis in Cava descendente & arteria aorta reperiit.

SCHOLIUM.

Luétuosissimum Illustrissimi Domini Comitis fatum, cujus mentionem quoque supra p. 210. feci, palam nobis fidem facit non solum alibi faucio vase sanguifero insigniore, verum etiam intra cranium lacerato maximum sanguinis proventum perdi, quamvis mole quibusdam vasis in medio & imo ventre atque artubus impares sint, si sinus & carotides juxta infundibulum excipiantur.

tur: atque totam cranii cavitatem oppleri posse, nisi vulneris amplitudo cumulationem impediat: nam cava descendens ut aortæ vacuæ plurimum cruoris statim post ictum emanasse docent. Ejus effluvium promovit, quod Rheda statim post illatum vulnus per loca aspera vehabatur, unde forte vasa majora magis sanguine exhausta visa sunt, quam alias observatur. Plures Illustrissimo Domino luctus & doloris monumenta posuerunt tunc temporis, inter quæ non ultimum fuit Nobilissimi & Amplissimi Domini JOH. WILHELMI ZIEGLERI Proconsulis nostri & Exc. Dom. D. Johann. BURGOUVERI p. m. Soceri, quod his non immerito subjungo:

Alter nunc mortem oppetiit PAPENHEMIUS heros,

Partis defensor melioris & affecula causæ.

Ambo pulverei tormenti fulmine læsi

Sub Juga sunt mortis rapti melioribus annis.

Ille quidem in bellis exercitus, ille peritus
Armorum, & pugnis gnarus, devincere bello

Magnum Europæo peperit sibi nomen in orbe.

Hic tamen (ô Lethi tardassent fata sagittas!)

Haud minor & rerum gestis & fama futurus.

Verum erat in fatis, gerere ardua qui bene cæpit,

AL-

ALTUM capturus calido molimine castrum,

Clauderet ut vitam generosæ mortis honore.

Si quondam EVANDRI primis quoque gnatus in armis,

Sic & SAULIADES, fidus DAVIDIS ACHATES,

Nuper & Arctoæ sic ingens GLORIA terræ,

Et nostri magnum miraculum temporis, IPSE

REX est præpropera SVECORUM morte peremptus,

Quis tanto neget esse Comes per funera REGI?

HISTORIA IX.

Rusticus quidam Gravenhusanus in Sylva Nigra, robustus, 40. circiter annorum, dum abietem d. 2. April 1668. amputat, inopinato cadente arbore ab extremis ramis fortiter in collo & occipite percutitur & humi sternitur; totus attonitus, sensibus internis & externis, tactu excepto, abolitis, domum defertur, lecto impositus aliquot horis brachia & pedes movet. Acetum calefactum ori infundunt, quæ unica medicina ad manus erat; deglutiit abs-

absque difficultate. d. 3. April. cum forte pagum transirem ad illum vocabar. Jacuit omni sensu & motu privatus, nullaque vellicatione, inclamatione, acribus naribus admotis aliterve excitari amplius potuit: respiravit cum stertore: pulsus debilior erat. Cum in propinquo mors esset, præter topica nulla remedia adhibere volui. Brevi post meum abitum extinctus fuit.

SCHOLIA.

I. Nullus dubito quin a validissima occipitis percussione vas intra cranium ruptum sanguisque profusus fuerit, verum non statim copia valde excedens, quia in principio artus adhuc movit & tactus constitit: postquam autem decubuit ac acetum ebibit, solemne ad grumos dissolvendos apud Rusticos remedium, extravasati sanguinis quantitas aucta fuit: nisi enim cerebrum & cerebellum hoc vivifico nectare privata & oppressa fuissent, sique sola spirituum perturbatio adfuisset, non tam cito omnes actiones animales periissent, nec tam celeriter vita ad finem properasset.

II. Forte auxilia congrua mature adhibita non frustranea fuissent. Circa principium praxis meæ subulcus nostras, Scottel cognominatus, ab abietis ceduæ ramis in occipite percussus & prostratus fuit. Ex sylva domum delatus omnibus sensibus, tactu superstite, privatus, artus subinde movit. Clysteribus repetitis vicibus injectis, iterata venæsectione, crebro data Tinctura traumatica, sacculis herbis cephalicis infarctis & in
aqua

aqua cum pauxillo aceti coctis capiti impositis, victuque tenui & refrigerante praescripto sensim convaluit diuque supervixit, permanente quadam labe in memoria & iudicio, forte ob morbum organicum in cerebro superstitem.

HISTORIA X:

Ex Communicatione Exc. D. D. Emanuelis Hurteri Practici nostratis felicissimi.

Illustrissimus Dominus Rudolfus Hannibal Comes de Reitnaw, ultimus familiae, annorum 39. habitu corporis obæso & statura mediocri praeditus: a multis annis melancholicus, facie atrorubescente, taciturnus: *πικρόχολος* & : literis addictus ac in legendis historiis plurimum occupatus. Anno 1671. 16. Januar. mane è lecto surrecturus, anxietatem quandam percepit, quam vomitus secutus est: eodem die parum comedit: potulenta rursus evomuit: noctem habuit inquietam, parum dormivit: noctu incaluit. Hoc die pilulas sibi familiares sumpsit ante prandium: inde bis vomuit, quater dejecit. die 17. Januar. Vomitus cessavit, parum comedit nec multum bibit: manus & facies per totum diem erant pallidae & frigidae: noctu melius dormivit. Die 18. Januar. non nisi de anxietate

te præcordiorum conquestus est: parum comedit, bibit vinum cum decocto Rhabarbi & macis alteratum: Circa vesperam rursus pejus habuit: cænavit parum; varie faciem affidentes immutatam observarunt: noctem habuit quietam. die 19. Jan. Illustrissimum Dominum plane restitutum putabant: in prandio melius quam hætenus comedit: a mensa hora prima pomeridiana surrexit inque locum secretiorem secessit, ubi per horæ quadrantem commorabatur: famulus ibi humi jacentem invenit, domestici conscii facti omnes statim accurrunt inque lectum deportant. Post bihorium adveniens ipsum fortissima Apoplexia jam dudum defunctum inveni. Apoplecticum vero fuisse conjeci, quia Aulici ajebant Illustrissimum Dominum post casum adhuc respirasse atque illi sacris provissum fuisse. d. 20. Januar. Cadaver condituræ causâ aperui, præsentibus multis Aulicis & D. Laurentio Chirurgo Hohentwielensi. In ventre infimo omnia se naturaliter habebant, præter quam quod Lien valde corrugatus esset, variæ incisuræ & corpora duo cartilaginosa in superficie apparerent. Inter secandum Chirurgus diaphragma læsit, unde ex Thorace magna sanguinis quantitas, dimidiam circiter libram ponderans, defluebat. Thorace aper-

to

to nec cor, nec pulmones ob maximam sanguinis grumosi copiam primò in conspectum veniebant: pendebat libram cum dimidia fere. In pericardio & Cordis ventriculis nullum plane sanguinem deprehendere potui. Pulmones nullum vitium contraxerant, dempta Calvaria in capite, extra ventriculos cerebri sanguinem quoque, sed magis serosum deprehendi dimidiæ plus minus libræ pondere. Cerebro dissecto omnia diligenter examinavi, nec quicquam tamen vitiosi animadvertere potui.

S C H O L I A.

I. Invasio morbi Febrili insultui non multo ab-
 similis fuit, nam post cænam sanus lectum petiit,
 mane surrecturus anxietate & vomitu correptus
 fuit cum appetitus dejectione; nocte sequente
 æstuavit: perstitit anxietas cum inappetentia ad
 tertium diem, noctes fuerunt inquietæ & die ter-
 tio a vino lædebatur. Si maturius Cl. D. D. Hur-
 ter vel ego vocati fuissetus, quod demum Illu-
 strissimo Domino ad mortem tendentem factum
 fuit, forte certiora febris signa ex pulsu, urina,
 attactu, lassitudine spontanea deprehendisse-
 mus.

II. Causam anxietatis, procul dubio cum vi-
 rium prostratione statim ab invasione junctæ, non
 in ventriculi cavitate delituisse existimo, quam-
 vis vomuerit, cibos abhorruerit & potulentia re-
 jecerit, nam nec vomitu nec purgantibus anxie-
 tas tollebatur, insuper non sitiit: Nec adscri-
 benda

benda videtur fermento stomachi, bili & succo pancreatico in duodenum confluentibus & inter se conflictantibus, nam continua fuit & neque purgantibus neque victu tenui emendabatur: nec credibile videtur huic triumviratui moram ad quartum usque diem concessam fuisse a duodeno exquisito sensu prædito & continuo vermiculari suo motu adversa vel sursum vel deorsum propellente. Nec principium nervorum laceffitum in prima invasione, arbitror, quamvis post obitum sanguis serosus in spatio meningibus interjecto repertus fuerit, noctesque inquietas traduxerit: nam de nulla cephalalgia nullaque vertigine, quantum nobis constitit, unquam conquestus est: sed sanguinem sub sterno copiose effusum & collectum præcipue culpandum puto, nam sauciato intempestive in cadaveris apertione diaphragmate circiter dimidiam libram cruoris effluxit & remoto sterno libra cum dimidia sanguinis reperta fuit, ut præ copia, secedente quoque mediastino, nec cor nec pulmones videri potuerint, mediastino hæc viscera operiente, unde nec in pericardio nec cavitate reliqua pectoris sanguis stagnavit & pulmones a vitio immunes inventi fuerunt. Sanguis enim etiam in his sedibus copiose cumulari potest, quia etiam illas vasa sanguifera transeunt & mediastinum facile a sterno secedit, ut quidam spatium quoddam vacuum inter sternum & mediastinum naturale, quamvis falso, crediderint. Deinde jam die secundo facies & extrema pallebant & frigebant, & die tertio facies varie immutabatur, quod in simplici anxietate ab humore acri orificia stomachi & duodenum affligente citra sævis-
simam cardialgiam, cujus ne verbulo mentionem Adstantes fecerunt, nunquam evenit. De-

nique anxietas die primo post pilulas nescio quas purgantes & ab infuso Rhabarbari die tertio exacerbabatur, quæ potius abstergendo & eliminando contenta ventriculi opem ferre debuissent. Nox quidem fatalem diem præcedens quietior fuit noctuque dormivit, quia cerebrum ob hæmorrhagiam istam perfrigeratum fuit, unde etiam somno aliquantulum Illustrissimus Dominus Comes refocillatus in principio diei quarti melius habere & extra periculi aleam constitutus adstantibus videbatur, quamvis anguis in herba lateret. Forsan Medicus præsens alia indicia animadvertisset sc. dolorem tensivum & gravativum cum difficultate respirationis &c. Rusticum senem novi, qui multis annis sub sterno Empyema sustinuit, quod juxta cartilaginem Ensi-formem in sinistro latere sibi exitum paraverat; quoties fistula occludebatur, aut a pure concreto obstruebatur, a pure stagnante valde angebatur circa præcordia, difficulter respirabat ac dolorem aggravantem & tensivum patiebatur: quam primum vero fistula turundis ex radice gentianæ dilatata pus copiose profuderat, statim melius habuit & aliquot annis satis commode vixit. Paraphrenitis apud Illustrissimum Dominum Comitem nondum observabatur (nisi forte noctes ob delirium quoddam inquietæ fuerint) quoniam particulæ sanguinis extravasati nondum sejunctæ, nec igneæ & sulphureæ separatæ cæteris dominabantur, aut quia membranâ mediastini coercitæ nec nervos diaphragmatis attigerunt, nec dum massæ sanguineæ copiose immixtæ fuerunt.

III. Sanguis statim in principio invasionis huc effusus nec demum appropinquante morte, aut post obitum hic collectus fuit, statim enim appare-

APOPLECTICORUM. 325

parebant insignis hæmorrhagiæ effectus & spatium sub sterno amplius erat, quam ut a moribundo corde sanguis huc pelli, mediastinum extravasatus a sterno avellere, multo minus omni motu cessante, solo pondere sinum aut cavitatem aliquam efformare potuisset. Ex vasis autem enormiter sanguis extrudebatur ob copiam & tenuitatem seu fluxibilitatem: nam plethoricus erat, ut ex habitu Corporis obæso & facie præ sanguinis copia atrorubescente patuit. Cumulavit sanguinem ob victum lautiozem & vitam desidem, cæteris omnibus sanis & validis quæ ad sanguificationem requiruntur. Unde vero sanguis fluxibilior & forte etiam acrior evaserit apud Illustrissimum Dominum Comitem dubitatur. Lienem causabantur Adstantes. Verum utcunque *Illustrissimus Dominus Comes* Melancholicus, vel potius paucorum verborum & meditabundus fuerit, & Lienem valde corrugatum variis incisuris & duobus corporibus cartilaginosis superficietibus in cadavere præditum conspexerint: nihilo minus Lienem sanguinis acrioris & fluidioris auctorem neutiquam dixerim, nam neque sanguificat neque sanguinem qualitate aliqua peculiari ad vitam vegetantem necessaria imbuat, cum plurimorum experimento constet illo dextre exciso animalia satis commode supervivere; ad illum proxime, per arteriam splenicam affluit sanguis laudatissimus omnibus numeris absolutissimus, & non minus perfectus quam cerebro aliive parti nobili cor impertitur; nullaque mora ad imutationem necessaria conceditur, & si vel decem guttulæ in quolibet appulsu restitarent, non mensium, non septimanarum, sed paucorum dierum spatium in molem vastissimam excresceret, quoniam, præter Venam splenicam arteriæ pro-

portioni rite respondentem, nullum in eo ut in glandulis conglomeratis, vas excretorium reperitur: in ventriculum aut per ductum pancreaticum se exonerare antiquata & pridem ab oculatissimis Anatomicis explosa opinio est: per nervos ad cerebrum aliquid inde deferri nondum sufficienter probatum est, mihiq̃ue magis magisque omni verisimilitudine carere videtur, postquam aliquot nervorum extremitates vel in membranas expandi, vel cum muscutorum & membranarum fibris, seu staminibus intime sociari atque uniri vidi: Vasa Lymphatica ipsi non detraho, verum hæc communia habet cum Ventriculo, intestinis, hepate, utero, testiculis aliisque partibus membranis obvolutis, quæ hanc ob causam sanguinem peculiariter neutiquam alterare creduntur. Quamvis Lien autem singulare parenchyma sc. ex fibris mire inter se contextis obtineat (de quo ad *Perillustr. D. Thom. Barthol.* 1662. scripsi, ut videri potest *Cent. 4. Epist. 13.*) quod non contemnendos usus actionemque aliquam pollicetur, quam tamen definire non aûsim, cum alibi corpuscula fungosa ex similibus fibris concinnata in corpore humano repperim, quæ ad sanguinis neque confectionem neque depurationem neque immutationem vel minimum momentum adferunt: adeo ut hætenus *Lienem* nonnisi *Sanguinis* aliquod *Diverticulum* putarim, ne sc. pleno impetu ad Hepar rueret; quod non sine instituto Naturæ factum arbitror, quæ viscus hoc multis arteriis consulto dotare noluit. Quæ de sanguinis spatiola inter fibrillas implentis & per venam splenicam ad hepar fluentis diversitate in colore, sapore & consistentia referuntur, si præjudicium absit, forte tanta non erunt, ut non facile reliquarum

narum similimus reputari possit: Certe à multis acor ille in Lienibus brutorum esculentis vix ab Apicio hæcenus degustatus fuit: & in vivis animalibus ex splenica emissus à Venæ cavæ sanguine vix notabili aliquo discrimine distinguitur. Aliquot liene magno præditos novi & non perfunctorie tractavi, apud quos nunquam effectus illos, qui acido humori redundantibus tribuuntur, expertus fui. Sed hæc de his obiter; plura hujus generis, ut & de rugis &c. referenda ad Historiam magni Lienis ansa dabitur. Apud *Illustrissimum Dominum Comitem* sanguinis fluidioris & acrioris oscula vasorum vel sua sponte, vel prægressa quadam non memorata violentia, referantis causa felicius alibi quæretur: nimirum ad Chyli confectionem ejusque & sanguinis perminutissima vasorum capillamenta distributionem liquor necessario non exigua quantitate requiritur, unde non minus potulenta quam esculenta appetuntur. Si potulentum suo munere defunctum, aut redundans per vias consuetas & a natura destinatas sc. renes, habitum corporis seu glandulas conglomeratas cuti substratas, quarum notitiam Exc. D. Stenonio debemus, aliasque rite excernatur, sanguis legitimam consistentiam adipiscitur ac retinet; si vero potulenta largius ingurgitentur, nec debita ratione expellantur, sanguis fluidior & aquosior evadit: simul acrimonia aliqua si potulenta sale quodam acido imprægnata sint, aut si cibi sale & aromatibus nimium condiantur, aut in butyro aut oleo frigentur, aut alias sale aliquo abundant, quo nulla esculenta destituuntur, in coctionibus tum in ventriculo tum in massa sanguinea in apricum deducitur, prout manifeste apud Hydropotas observatur, qui non minus Urinam multo sale

turgidam emingunt, quam Vini potiores: & Cuniculos solo foncho, aut Lactuca pastos acerrimam urinam excernere fœtor nares e longinquo feriens probat. Nec solummodo massæ sanguineæ sal volatile, sed etiam fixum immisceri calculi renum & Vesicæ, Urinæ tartarum & arthriticorum tophi evincunt. *Illustrissimus Dominus Comes* potulenta in massa sanguinea cumulavit non propter excessus in potu, nam ipsum temperanter a multis annis vixisse & audivi & vidi, verum potius ob habitum corporis obæsum & vitam desidem & neglectum exercitiorum a juventute consuetorum; quamobrem potulenta seu aquosiora calore motus beneficio excitando non attenuata nec ad excretionem faciliorem disposita fuerunt, nec liberius effluvium nacta, ductulis a glandulis subcutaneis ad cutis poros hiantibus a pinguedine compressis, in massa sanguinea persisterunt. Forte etiam alibi ob victum lautiorum & torpore in glandulæ plures à mucositate & ad secretionem Lymphæ ineptiores redditæ fuerunt. Sanguinem simul acrimonia quadam imbutum fuisse nullus dubito, quia in uno pastu ferculis diversis & varie conditis fruebatur, bibitque vinum Tyrolense generosius. Cur autem sanguis potius sub sternum primò quam in alium locum profusus fuerit? dubium est. Forasan ob frequentem lectionem inclinato pectore effecit ut vas aliquod sanguiferum sub sternovariçi aut aneurismati simile redditum a sanguine stagnante vel ruptum vel aliter reſeratum fuit.

IV. Affectum quo *Illustrissimus Dominus Comes* humi pronus jacuit, Apoplexiam cum Cl. D. D. Hurtero potius, quam Syncopen appello, quia omnibus sensibus & motu voluntario abolitis, adhuc respiravit, atque alia vita superstiti-

stis indicia præbuit, unde quoque ipsi sacris provisum fuit.

V. Apoplexiæ causæ primaria non fuit sanguis copiose sub sterno coacervatus, cum illa post adhuc largiorem hæmorrhagiam non contigerit: frequenter enim experimur per vomitum, secessum, in hæmoptoe, narium hæmorrhagia, per uterum, per vias urinarias, ex vulneribus majorem non raro sanguinis vim citra Apoplexiam profundi, & licet sæpius talibus leipothymia superveniat, restauratis tamen viribus nihil apoplectici supervenire: Senatori cuidam vegeto in vicino nobis oppido a barbitonsore ex vena in brachio secta, ultra quinque libras sanguinis emittebantur, qui primum cum illo de fostro licitus est & ne frustra persolveret largiorem sanguinis effusionem præcepit: nulla quidem apoplexia sequebatur, verum in dyspnœam & paulo post in hydropem immedicabilem incidit. Potius præcipua culpa sanguini seroso ad libram dimidiam intra spatium meningum reperto deferenda videtur, qui cerebrum premendo & spirituum animalium fomite defraudando Apoplexiam produxit: quamvis non negem hanc dimidiam sanguinis libram potentius in cerebrum vim suam exseruisse, quod ante ipsius effusionem intra hoc spatium cerebrum jam a prægressa hæmorrhagia in pectore debilitatum & tanto pondere impar fuerit: nam magna sanguinis penuria illud laborasse credibile est, quia nullum in cordis ventriculis sectione invenerunt. Quando vero intra cranium sanguis exstillarit, incertum est: nullo vero modo demum post obitum effusum credere possum, nisi enim hunc cruorem apoplexiæ causam reputemus, nulli alii adscribere poterimus, cum cætera in cerebro omnia sana reperta fue-

rint: Vita vero citius abrupta fuit, quia insuper cor & pulmones a sanguine sub sternone gravabantur.

HISTORIA XI.

Exc. D. D. Maximilianus Henricus Egermejerus Med. Prof. P. Celeberrimus in inclyta Academia Friburgensi hanc Historiam ad me d. 14. Jun. 1672. perscripsit.

Nuper Studiosus Jurium egregius infra orbitam sinistri oculi, prope nasum, absque ulla læsione oculi, a milite nequitioso ense punctim vulneratus fuit. Paulo post, loquela & ratione privatus, per horas 24. se jectigans, tandem revera cum stertore Apoplecticus mortuus est. Aperto a me cranio vidi vulnus per orbitam oculi & os cribrosum prope cristam Galli factum, dextro quoque cerebri ventriculo inflictum fuisse: ex quo etiam magnam portionem sanguinis atrii grumosi & fibrosi ad crassitiam & longitudinem medii digiti extraxi: basis cerebri & regio cerebelli copioso sanguine extravasato refertæ erant, præterquam quod tota cerebri moles quasi ab inflammatione etiam rubicunda appareret.

SCHOLIA.

I. Ensis apud Juvenem istum per os maxillæ superioris secundum, tenerrimum & os cribri-forme, ambo impetui non magno facile cedentia, adactus, juxta cristam galli transversim e sinistro latere ad dextrum ventriculum usque transiens, procul dubio fauciat ramum anteriorem carotidis insignem & pennæ gallinacæ magnitudini accedentem, de quo supra p. 99. plura memoravi, item ramos anteriores, qui prope cristam galli junguntur ac sursum reflexi pluribus anfractibus prospiciunt, de quibus supra p. 104. nam ensis loca hæc attigit: præterea omnia usque adeo cruore suffusa erant, ut non nisi insignia vasa sanguifera incisa fuisse, necessum sit: denique præter meninges etiam ipsam substantiam cerebri antèrè vulneravit, nam usque ad dextrum ventriculum penetravit.

II. Ab ictu ensis non statim loquelam & rationem amisit, quia cerebrum adhuc spiritibus abundabat & sufficienter ad nervos loquelæ inservientes illæsos influebat; paulo post autem utraque facultate privabatur, non ob ventriculum dextrum vulneratum, cum neque in anterioribus neque in tertio, neque in quarto ventriculo spiritus animales generentur, aut afferuntur, quod pluribus in superiore Exercitatione probavi, nec hæcenus rationes & argumenta Cl. Hoffmanni & mea evertentia vidi: quæ vero regeruntur tanti non esse videntur, ut contrarium suadere possint: nam ad spirituum productionem cavitatem aliquam insignem requiri non universale est; semen, omnium calculo corpus spirituosissimum, sanguine ex arteriis in mi-

nutissima filamenta traducto gignitur, quorum cavitates neque ab oculatissimo animadvertentur atque etiam fere tunc quando jam in vasa ejaculatoria transeunt, adeo ut quidam cava esse negare ausi fuerint, quamvis revera talia sint, & in taurinis videantur & succus manifeste exprimi possit: quorum accuratam descriptionem debemus incomparabili industriæ Cl. D. Reineri de Graef de Organ. Gener. inserv. in Viris, qui videatur. Chymici spiritum vini subtilissimum, & ut loquuntur alkoholisatum paraturi per spongiam oleo imbutam, aut chartam Vulcani beneficio illum adigunt, ceu corpora minutissimis foraminulis & solummodo spirituosissimis pervia. In corde quidem ventriculi, ut creduntur spirituum vitalium officinæ, præsto sunt, attamen quoque tum dexter tum sinister donati sunt apertis ostiis per quæ materia spirituum affertur, iterumque spiritus sanguini immixti magna vi protruduntur: in cerebri vero ventriculos materiam spirituum ex arteriis fundi atque per oscula quædam resorberi, hætenus sensibus nondum constitit nec aliter demonstratum fuit, imo si in illis vel tantillum temporis persisterent, certius vel millies disploderentur per spatia inter duram & piam matrem, quam ut in medullam digerentur, ut alia plura taceam. Quoniam spiritus animales quovis semine & vini spiritu subtilius corpus sunt, quod nervorum minutissimas fibrillas, ex quibus nervos spinalis medullæ compositos esse nemo dubitat & jam idem de cæteris nervis asseritur, ad sensum & motum impertiendum permeat, rectius cerebrum & cerebellum tum quoad corticem, tum quoad medullosam substantiam spirituum illorum officinæ statuentur, imprimis si considerabuntur arteriarum distributio omnem
ad.

admirationem superans de qua supra p. 93. & frequent. earum immersio intra cerebri substantiam ac contentorum communicatio, quæ nonnisi summe tenuium corporum esse potest, cum medullam nullibi inquinant aut candorem lacteum obfuscent. Itaque existimo rationem & loquelam paulo post apud Juvenem istum periisse, quia arteriarum ramis anterioribus vulneratis cerebrum spirituum animalium materia & calore illud vegetante frustratum, quin etiam ipsissimum non leviter sauciatum fuit, nam ensis a sinistro latere ad dextrum usque ventriculum adactus fuit. Jectigatio an convulsivus, anne vero ille motus corporis fuerit, quo non raro alicubi nervoso genere graviter afflicto præ anxietate varie jactantur Ægri nullibique locum aut situm quieti aptum reperire possunt; non mihi certo constat: qualiscunque fuerit, animalis omnino dicendus erit, qui viginti quatuor horis quibus perduravit, a musculis spirituum animalium irradiatione eousque gaudentibus ac molestiam quandam declinaturis perficiebatur: quoniam namque cerebellum & postica pars cerebri adhuc sufficienter per ramos arteriarum vertebraliū & carotitidis posticæ, forte etiam per quosdam anteriores irrorabantur, spiritus animales ad hos motus tantillo temporis perficiendos abunde produxerunt & suppeditare valuerunt.

III. Post 24. horas elapsas cum stertore Apoplecticus factus mortuus est, quia interea sanguis extravasatus eousque accumulatus fuit, ut cerebrum, cerebellum ac medullam oblongatam premeret ac spirituum omnem effluxum interciperet: insignem enim hæmorrhagiam intra cranium fuisse cruor copiosus circa basin cerebri & regionem cerebelli, grumus ex dextro ventriculorum

ex-

extractus & tota cerebri moles ceu ab inflammatione rubicunda indicant. Forsan ad sanguinis intra cranium accumulationem multum contulerunt supinus decubitus & collapsa vulneris labia, quæ nihilominus absque magno emolumento declinari potuissent. Studiosus alius in duello, ictu gladii per orbitam oculi ad basin cerebri profunde penetrante, citius ad lugubrem vitæ catastrophem pervenit, nam post inflictum vulnus ab adversario se ceu hæretico punctum effatus, protinus omni sensu & motu privatus, humi prostratus fuit ac paulo post expiravit. Postero die quidam a Magistratu ut in vulneris conditionem inquirerent iussi, frustulum cranii superne sustulerunt, superiora cerebri lustrarunt, basis vero contemplationem neglexerunt; & quia superne cerebrum absque labe invenerunt, Magistratui imperite ne, an impie? imposuerunt non a vulnere, sed ab ira, vulneratorum peste, extinctum fuisse misellum, nam ultima verba cum magna indignatione & excandescencia effudisse.

HISTORIA XII.

Ab Excellentissimo Domino D. Ludovico
Hermannò Combachio Ludov. Fil. Serenissimorum Principum Hassorum
Medico communicata benevole
cum Scaphusium transiret
16. Dec. 1674.

Vetula quædam, Furiarum non postrema, consuevit maritum sæpius egregie verberari-

beribus dedolare, quod plerunque patienter pertulit. Mense Jul. 1673. cum nescio quas sordes scopis abstergeret indignabunda uxor accurrit ac verbera intentavit, verum patientia tandem aliquando in furorem versa a Marito scopis in tempore dextro fortiter percutitur, adeo ut dissolutis ac avolantibus scopis acuminata scopisque infixi baculi pars tempus transfiret. Sanguine largissime ex vulnere emanante, a vicina amice monita ut illius curam gereret, verum renuit, mire in Virum convitiis debachata est ac se jugulum propediem ipsi fracturum minabatur. In cæna irarum plena cibos devoravit ac potu se ingurgitavit: mox tamen foco assidens omnia assumpta evomit: Postea lectum petiit: surrectura nescio quam ob causam humi cecidit: & juxta lectum mane mortua inventa fuit. Ex Illustrissimi supremi Dicafterii Hassiaci mandato, Exc. D. Combachius cum Chirurgus vulnus contemplatus est: invenitque vulnus primo aspectu exiguum & quod tegeretur apice minimi digiti: verum indito vulnere stilo deprehenderunt baculi acumen altius penetrasse: cujus rei maritus conscius factus, mox sibi fuga consuluit: detracta cuti circa musculum temporalem omnia sanguine suffusa erant: remoto musculo temporali in osse foramen rotundum

ac si sclopeti manuarii, quod Pistolam vocant, globulo pertusum & efformatum fuisset, occurrit: ablato cranio inter illud & duram meningem, item inter utramque meningem, imo in ipsa substantia cerebri plurimum cruoris inventum fuit. Ex Substantia quoque cerebri duo fragmenta a baculo avulsa extraxerunt. Quibus rite expensis merito vulnus lethale judicarunt ac sententiam suam Illustrissimo Dicafterio explicarunt.

S C H O L I A.

I. Vulnus Vetulæ isti illatum gravissimum omnino reputandum, quo arteriæ temporalis ramuli fauciati fuerunt, ut ex larga hæmorrhagia statim eveniente patet, musculus item temporalis, os, meninges ambæ, cerebrum ipsum cum arteriarum ramis anfractus intercurrentibus pertundebantur & lacerabantur, non tantum spirituum animalium deliquium peperit, quin diu post acceptum vulnus plures actiones animales adhuc perficere potuerit & ceu extra periculi aleam posita secure suis manibus indulserit: nam facinus mariti ante hunc diem insolitum phantasiæ obversans, adeo Irascibilem vim commovebat, ut sopito omni Rationis imperio, propriam valetudinem negligeret, in memoria convitiarum & criminationum Ideas divite proventu fidè reconditas concitaret, illas plenis faucibus evo-meret, rabidæ instar ultrices manus viro illatura hinc inde oberraret, cibos ira præcordiis ferventibus

tibus voraret, potum intemperanter ingurgitaret, omninoque se verbis & gestibus ostentaret, qualem se antidhac ad iram concita sæpius furibunda præstitit.

II. Capitis contusionibus fortioribus, imprimis si vas aliquod sanguiferum intus rumpatur, aut cranium findatur, ejusque ut & cerebri vulneribus, Vomitus accidere frequenter observatur, aliquando primo statim die & paulo post vim illatam, aliquando demum post diem unum vel alterum elapsum. Hippocr. S. 6. aph. 50. Cerebro vulnerato necessario bilis vomitus supervenire tradit: quod tamen non omnibus, nec statim primo die contingere Commentatores tradunt; quosdam enim alias ad vomitum minime proclives non vomere, alios vel assumpta solum, vel pituitam, vel bilem multo sero dilutam idque demum quarto, aut tardius vomitu rejicere scribunt. Anus ista, quæcunque irarum plena post inflictum vulnus devoravit & ingurgitavit, brevi rursus evomuit: forte bilis vomitus non emanisset, nisi vitæ filum præpropere abruptum fuisset, quoniam illa abundasse testantur animi motus vehementiores ad quos proclivior erat & a quibus propemodum continue agitabatur. Causa vomitus istius adscribitur consensui ventriculi cum cerebro per nervos insignes non solum illius orificia ambientes, sed etiam per universam ejus struem diffusos, tunicis immerfos ac cum earum fibris coalitos & pene concretos: sed cur noxa quam cerebrum ejusque meninges in his capitis affectibus experiuntur prius in ventriculum redundet, quam in alias partes medii & imi ventris, quæ nervis æque luculenter dotantur, & quædam earum insuper nervorum principio propiores sunt, non sine causa am-

bi-

bigitur. Apud Anum istam cita ventriculi inversio vulnere superveniens adscribi posset nimiae ejus oppletioni a cibo & potu post ictum factæ, a qua ventriculus ob hæmorrhagiam prægressam debilitatus magis aggravabatur, ejus nervi ad contentorum amplexum fortius cogebantur & cerebrum in subsidium accersentes vehementius alias noxa affectum amplius irritabant, unde veluti excandescens hanc excretionem imperavit. Verum quoniam non raro, vacuo stomacho, graviter capite læsi vomunt, nodus his minime solvitur, atque omnino consensus cerebri cum ventriculo major quam cum aliis partibus fatendus erit, ob quem citius quam aliis compatitur; quamvis noxa gravius cerebrum sollicitante nec cæteræ immunes permaneant, unde quoque singultus, convulsiones aliave symptomata tandem superveniunt. Intra cranium vomitus illecebræ, tum sanguis extravasatus exortum paris vagi attingens, tum potissimum segmenta cranii in tempore pertusi, tum baculi fragmenta cerebro ejusque meningibus infixæ apud Anum istam reputari possunt.

III. Surgens humi cecidit, procul dubio Apoplectica, quia obmutescens opem implorare nequit, atque invalescente sanguinis intra cranium effusione, cerebro sanguinis pauperiem majorem experiente, magisque subsidente, compressione accedente, forti Apoplexia exspiravit.

HISTORIA XIII.

Jacobus Spœrlin C.B. cujus mentionem feci supra p. 280. septuagenarius: staturæ pro-

proceræ, pallidus, gracilis, robustus: Victor in laboribus assiduus, industria celeritateque in opera & dexteritate nulli secundus, plures, dum junior erat, superans, nec facile cuiquam jam senex cedens. Mercaturam aliquandiu exercuit, spiritum vini aliaque in castris divendidit, & hujus causa pericula præsentissima crebro subiit, variasque tempestatum injurias in itineribus frequentissimis passus est. Ante plures annos ad carceres perpetuos, nescio ob quas causas, condemnatus fuit: in quibus tenebris & squallore terrificis ultra duodecim annos vixit; tandem Amplissimi Magistratus nostri intercessione libertati restitutus ac Nosodochium nostrum receptus fuit. Huc perveniens totus cachecticus erat, facies & labia pallebant, pedes œdemate tumebant, omnes artus languebant. Tibia dextra ulcere dyssepuloto afficiebatur, quod ichorem flavum acerrimum copiosumque continuo cum summo dolore stillavit, ut plures noctes insomnes duxerit: quandoque etiam sanguinem sincerum profuderat: quamprimum Empl. sine morfu siccantis usum intermiserat, ferpebat ac profundius reddebatur. Fonticulus in tibiæ parte externa interceptionis causa excitatus ad ulceris consolidationem non exiguam opem tulit, sed non fidam, nam sæpe recrudit.

Postquam liberiore aëre, cibis salubrioribus & medicamentis congruis fruebatur, sensim cachexia & pedum oedema evanuerunt, ac strenue pristinos labores adiit, ac vix imitandam in doliis minoribus conficiendis solertiam ostentavit. Paulo post adventum ipsius in Nosodochium, sc. Mens. Augusto 1650. Ischuria omnimoda cum alvi occlusionem per integrum octiduum ægrotavit, utrumque symptoma, imprimis alvi constipationem occultans. Postquam Clysterem emollientem injiciendum curaveram, pluribus scibalis summopere induratis excretis, protinus urina effluxit copiose atque in posterum nihil amplius hujus generis passus est. Urina clara erat: nihil vel sabulosi, vel arenosi, vel mucosi subsidit: nec memini ipsum unquam calculum excrevisse, quamvis sæpe de dolore circa regionem renum & lumborum conquestus fuerit, qui non raro ad alterutram coxarum pertingebant. Quamdiu in Nosodochio vixit, cibis salubrioribus frui poterat, cum talis effæris suppeditetur, ipseque nummis abundabat: & quantum rescire potui, a nocuis Vir prudens & longævitatatis perquam studiosus abstinuit. Sæpe omnem cibum, imprimis carnes fastidivit: Sæpe etiam nec vinum sive rubrum sive album sapuit: non raro amarore quodam omnia imbuta videban-

bantur, quæ assumpserat. Crebro mane jejuno stomacho aquea, quandoque meram bilem non sine violentia evomuit. Alvo suppressa protinus colica torquebatur, quam bis intra novem circiter annos, dum hic commorabatur, Paresis brachiorum secuta est: eandem quoque, antequam huc pervenerat, aliquoties post colicam expertus est, ob quam minimi & auriculares in manibus incurvi permanserunt, ut quamvis flectere, tamen extendere nequirit. A Paresi tum ab Exc. D. D. Ch. Hardero, tum a me non magno medicamentorum apparatu vindicatus fuit. Diarrhæam biliosam iteratis vicibus non incommode sustinuit. Fere perpetuo de dolore quodam compressivo & tensivo præcordiorum conquerebatur. Assidue quoque caput doluit, comite nonnunquam Vertigine. Hæmorrhagiæ narium frequenter obnoxius fuit, quæ non raro profusissima erat. Anno vitæ ultimo, mane imprimis tussire cæpit, & purulenta exspuit: tussis magis magisque crevit ea-que diu noctuque misere excruciabatur: sputum subviride, turbidum, lentum, viscidum, rotundum, plane non fætidum, quandoque cruore tinctum ejecit. Paucis septimanis ante obitum conquestus est de catarrho mane impetuose ad pectus ruente & suffocationem intentante. Febricitavit

lente: emaciebatur; non tamen ita corpus contabuerat, prout in plerisque Phthificis observatur. Ultimis mensibus sævissimum dolorem perpeffus est in utroque interfæmineo, ut attractum minime perferre potuerit: incipiebat ab osse pubis ac definebat in medio fœmoris, ductum musculi tripitis sequens: in loco dolente, nullus tumor præter paucos quosdam & exiguos ac concolores cuti nodos, nullus rubor videbatur. Paulo ante obitum loquebatur & corpus præ languore & impotentia immobile, verti petierat: quamvis nondum omnis motus animalis perierat, D. 10. Maj. 1657. ringentibus malevolis, cadaver cum Exc. D.D. Hardero aperui. Dissectis integumentis imi ventris, Ventriculus & intestina sanis similia apparuerunt. Pancreas & Mesenterii glandulæ duriusculæ, sed non tumidiores erant: ductus pancreatis vacuus: Epar fuit legitimæ magnitudinis: debito mollius, pallidum & tantum non cruoris expers, si venæ majores excipiantur: bilis in ductibus cholidochis vitellina redundavit, pressoque parenchymate copiose profluxit. Vesicula foris albicans simili bile flava implebebatur simulque continuit calculum magnitudine nucis moschatae. Lien fuit lividus, major debito, mollis & divisus, naturali similis. Renes erant pallidi: unius

Carunculæ papillaris extremo apicis exiguum lapilli frustulum immersum fuerat: cætera nec vestigium arenularum ullibi apparuit. Vesica nihil p.n.continuit. Pectore recluso pulmonum lobos superiores utrinque, maxime sinistrum, accretos invenimus, ambo subduri & compacti erant, nondum tamen ad illam duritiem pervenerant, quam alias in phthificis observavi: discissi in suprema parte exulcerati erant ac cavernulas avellanæ capaces obtinuerant, non tamen exacte rotundas, aut æqualiter cavas, sed quasi laceras, ac si a mustela vel glire, frustulatim portiuncula avulsa, pulmones exesi fuissent. Pressa hac pulmonum parte ex bronchiis sputum viride, minus tamen viscidum ac tussi rejecerat, prodiit. Lobi pulmonum inferiores nec pleuræ accreverunt, nec quicquam puris continuerunt. In cordis ventriculis corpora pituitosa parva nec longe per quatuor fontes propagata, at firmiter suis radicibus thalamorum anfractibus immersa & connata invenimus. In pericardio plurimum serii flavi continebatur. In cavo pectoris serum subcruentum copiose redundavit. Remota cranii olla ac discissa dura meninge plurimum serii subpallidi effluxit, quod in spatio inter utramque meningem continebatur, sed non in tanta copia, quanta apud Jacobum Reu-

tingerum videram, nam interstitium angustius erat. Tota anfractuum superficies quasi gelatina operta fuit, qua cultello sauciata aqua exstillavit. Hujus feri quoque plurimum in omnibus ventriculis repertum a nobis fuit. Plexus choroideus palluit ac exsanguis propemodum erat: in illo manifeste glandulas, sed luridas, cænosasque vidimus ac duriusculas tetigimus. Cerebri consistentia mollis quidem & flaccida fuit: minus tamen quam apud prædictum Reuttingerum: nec collapsam aut coarctatam & compressam observaveram. Multum quoque feri, reclinato pectore ex ostio magno occipitis promanavit.

S C H O L I A.

I. Etsi hæc historia non congrue Apoplecticis annumeranda videri posset, nihilominus tamen illam adjungere volui, nam dum in vivis erat Vietor iste plura symptomata experiebatur, quæ principium nervorum graviter sæpe afflictum fuisse significabant, inter quæ præcipua sunt *Paresis* colicam bis sequens, ob quam duo auriculares digiti ad extremum vitæ immobiles & incurvi perstiterunt; *Cephalæa* continuo affligens, quam nonnunquam *Vertigo* comitabatur, unde per plures annos imprimis apoplexiæ subitum insultum summopere timuit; *Impotentia* corpus versandi circa ultimos vitæ articulos: In cadavere vero non pauca occurrebant quæ ad causam A-

po-

poplexiæ proximam illustrandam plurimum faciunt, nam apertum evadet, ad apoplexiæ productionem serum in spatio inter meninges, in ventriculis, inter anfractus sub tenui meninge atque in fistula sacra non parva quantitate stagnans forisque incumbens neutiquam sufficere; nisi ad illam copiam perveniat, quæ cerebrum comprimat atque ita coarctet ut spiritibus animalibus omnis exitus præcludatur.

II. Antequam carceri mancipatus fuit, nunquam vel certe non periculose ægrotavit, aut si aliquem morbum passus est, illum memoria nostra indignum reputavit, semper enim robur & industriam suam nobis deprædicavit, ob quæ omnia tædia facile superaverit, & si qua errorem in victu commisisset, gliscentem morbum feliciter improbo labore excusserit. Postquam carceri inclusus & eo pluribus annis detentus fuit, turmatim morbi ipsum invaserunt, quorum causam præcipue mærori & exercitiorum a puero consuetorum intermissione adscribebat: nam laute alebatur nec unquam vinum subtrahebatur. Plerique affectus quos dum nobiscum vivebat patiebatur, a sero seu Lympha acriore redundante pendebant. Primum enim postquam libertate donatus fuit *Cachexia* vel principio potius hydropis afficiebatur, cum ulcere tibiæ dextræ dysepuloto. Sero superfluo ob ulcus perpetuo inanans maximam partem exhausto, illo insuper paucis medicamentis propinatis amplius evacuato, cachexia imminebatur, hydropis periculum evasit & cum labores ad quos semper anhelavit solito more suscipere & perficere ad lubitum valuit, reliquias penitus sustulit. *Ulcus dysepuloton* diu perstitit & quamvis subinde occluderetur, brevi tamen aliquoties recrudescibat, non ob pinguedinem sub

cuti consumptam, quam recidivantium ulcerum causam quidam reputant, cum non raro cuti cum pinguedine sectione, ambustione, aut gangræna penitus sublatis ulcus firmissima cicatrice nihilominus obducatur, verum ob continuum feri abundantioris affluxum ex vasis sive sanguiferis sive Lymphaticis erosis: nam postquam sero per fonticulum in tibia alibi exitus paratus fuit, ad extremum vitæ consolidatum mansit. Forte tamen quia non sufficienter per fonticulum ejus copia exhauriebatur, alibi postea serum stagnavit, nam non raro observatum fuit, ulcerum hujusmodi, imprimis si annua fuerint, intempestive occlusorum damna in pectus & caput redundasse. Serum, ulceris hujus causa & fomes, acerrimum fuit, nam sævos dolores diu noctuque excitavit & nisi edulcorabatur sine morfu siccantibus, carnem in fundo & cutim vicinam instar corrosivi depascebat. *Lumbaginem* frequentem, quæ nonnunquam ad alterutram coxam inclinabat, non calculis in renibus latentibus, quorum nulli, qui alicujus momenti erant, reperiiebantur, sed sero in fistula dorsali stagnanti adscribendam sectio manifestum fecit, nam feri multum reclinato pectore ex ostio magno ossis occipitis promanavit: doloris situs & diffusio, dum adhuc vivebat indicio erant & fidem faciebant a sero potius illum dependere quam a causa stabili fixamque sedem obtinente. *Cephalæa* a multis annis prope modum continua, totum caput occupans & quandoque cum vertigine juncta, potius sero meningibus largius affuso, quam sanguini intra arterias illarum ob motum impeditum stagnanti, vel flatibus meninges distendentibus attribui potest, cum sanguine pulsans dolor excitetur, qui nec tam diu nec continuo citra graviolem noxam

toleratur; a flatibus vero tensivus & brevi evanidus producat, & plerunque citra vertiginem, cum medullam, spirituum animalium sedem, non attingant, nec intra meninges diffusi spiritibus permisceantur: & revera serum hanc effecisse ex sectione constitit, quod copiosum inter utramque meningem, & sub tenui intra anfractus repertum fuit. *Vomitus matutinus aqueus* non fuit superstes quidpiam ex hesternæ cænæ, potulenta enim citissime distribuuntur, & quæ evomit non potulenta sapiebant: Ergo potius soboles feri redundantis in massa sanguinea fuit. An vero aqueum hoc ex capite per vias occultas, aut ex membranis pituitosis anterioribus & posterioribus? num vero ex osculis ductuum salivarium effusum, ad fauces delapsum & per gulam ad ventriculum fluxerit? dubito, cum non meminerim illum unquam conquestum fuisse de catarrhis fauces petentibus atque ad crebram deglutitionem stimulantibus, sine qua nihil ad ventriculum vel omnino quantitate paucum pervenit, Verisimilius videtur a copioso feri penu sanguini admixto ex arteriarum capillamentis in cavum ventriculi hiantibus, largius liquorem effusum fuisse: nam omnibus se naturaliter habentibus continuò liquorem aliquem in cavum ventriculi exstillare, sæpius experimento didici, si enim vel centies linteo sicco ventriculi cavum deterfi, protinus leviter, aliam ob causam versus atque duriusculè attrectatus intus rursus ventriculus maduit, aquâ non ex vasis Lymphaticis quibus quoque dotatus est, cum a Ventriculo contenta sua avehant, sed ex arteriis quæ advehunt, exsudante. Nervos liquorem adportare nunc amplius dubito, postquam cognovi illos etiam in ventriculo omni canaliculorum forma

amissa in membranas expandi, vel fibris densis uniri. *Phthisis* quæ Victorem tandem prostravit atque lecto affixit, sero acri & mordaci etiam suam originem aliquo modo debere videtur: variis enim modis pulmones ad tussim vehementem & diu inanem stimulavit, sc. in pectoris cavitate effusum, non secus ac alias in hydrope pectoris fieri solet, externam tunicam continue vellicavit: cum sanguine arterioso per arterias pulmonicas in vesiculas & extremos bronchiorum ramulos exsudans, aut per glottidem in asperam arteriam stillans acrimonia sua internam bronchiorum tunicam, omnino sensu exquisito præditam, titillavit atque ad tussim proritavit, unde pulmones post multas successiones tandem pleuræ accreverunt, & quoniam accreti non amplius rite se contrahere & liquorem imbibitum exprimere valuerunt, imprimis superiores lobi induruerunt, inflammationem aliquam conceperunt ac suppurati veræ phthisis causa proxima evaserunt. Verum de his plura referenda erunt ad alias observationes Phthisicorum a me sectorum. *Catarrhus suffocativus* quandoque mortem intentans quoque sero aut Lymphæ tribuendus, siue foris nervos diaphragmatis & pulmonum paralyti quadam affecerint, siue impetuose, quod Æger sibi persuadebat, catarrhus in pulmones ex capite irruerit: utriusque enim invasionis rationes apparuerunt. Influxum se sentire Æger dicebat: genus nervosum undique sero perfusum sectio manifestum fecit. *Impotentia* ob quam corpus de latere in latus versare nequit, non imputanda videtur soli spirituum vitalium defectui, quamvis febris lenta, phthisis comes, plurimum horum consumpserit, nam quia in toto habitu æqualiter ad extremum vitæ fere calebat,

ad-

huc influebant. Forſan inſuper ſpīritus animales muſculis non debita quantitate & ad hunc motum requiſita, ſuppeditabantur, ob principium nervorum undiquaque a ſero inundatum, quæ irradiationem imminuit, non tamen ſuſtulit, nam adhuc motus aliquis cum ſenſu in artubus ſupererat & loquebatur. Colluvies equidē ſeri ingens inter meninges & in iſſis cerebri ventriculis ſeſtione reperta, vix non quemlibet perſuaſiſſet quin gravioreſ noxas actionibus animalibus, imo ipſam Apoplexiam attuliſſet, niſi diligenti obſervatione contrarium animadverſum fuiſſet, nam ad ultimas uſque horas omnibus ſenſibus valuit, ſana locutus eſt, manuum & pedum digitos, ipſoſque artus aliquantulum movit: atque manifeſte docuit, nervoſ medias intra undas nantes nunquam ita emolliri aut ſtructuram ipſorum eoſque deſtrui, quin ſpīrituſ integre conſervent liberumque tranſitum concedant, niſi premantur, aut a circumfluo humore corrodan-
tur & ſphacelo enecentur. Idem antidhac in Hydropicis fieri annotaveram: plureſ patiebantur ventris tormina, imprimis poſt propinata purgantia, mediocriter appetebant, ſitiebant, egerant, pedes movebant, imprimis ſi funeſto ple-
riſque eryſipelate rubebant, quamvis in abdomi-
ne nervi & plexuſ nervoſi non ſolum ſero copioſo inundati fuerint, ſed etiam illoſ ipſoſ, aqua tenui membrana coërcita, veluti gelatina, incruſtarit, ut ſeſtione inveni; in pedibus vero a planta ad coxam, ipſoſque lumbos œdematoſis viderim cutim, pinguedinem, membranaſ, imo ipſoſ muſculoſ inſtar ſpongiæ aquâ turgidiſſimæ maduiſſe, quæ largiſſime vulnere factō exſtilla-
vit. Imo ne Lethargum quidem peperit, licet ob pulmonum ulcuſ febricitarit & cerebrum aquæ
im-

immersum fuerit, quod forte propterea factum, quia cerebri ventriculos & corticem intra anfractus vestiens tenuis meninx ab omni aquæ irruptione medullarem substantiam immunem præstitit. Nullos insultus Epilepticos, aut alios motus convulsivos serum cranio inclusum peperit, quod vellicando alias efficere valet, quia procul dubio multâ lymphâ dilutum minusque acre, salinis aculeis in percolatione non transeuntibus, fuit, quam illud quod ulceris dysepuloti & depascentis causa fuerat; etiam meninges longe assuetudine, veluti callo obducto, aquam facilius tolerarunt.

III. Serum ceu vehiculum necessario sanguini etiam in sanissimis permiscetur, cui accedit Lympha ab *Exc. D. Thom. Bartholino* primum detecta, ex artubus & partibus membranosis reflua, quam vasa peculiariter ipsi concessa non solum in receptaculum Chyli, sed etiam in venas axillares & forte alias quoque exonerant: vidi enim in brutis lymphatica vasa ab uteri cornibus, tenuibus exordiis, in ductus insignes excrefcentia liquorem suum in venas majores hypogastricas per ligamentum uteri membranosum diffusas aliquot in locis facile deposuisse; quem frustra digitis versus cornua repellere conabar, obortis nodulis ob valvulas liquoris regressum remorantes. A liquore aqueo irrorari superficiem ossium, membranarum, ligamentorum, cartilaginum, etiam interstitia musculorum in animalibus recenter mactatis manifeste videtur; imo semper ventres omnes madidi reperiuntur, idque non sine providentia naturæ, nisi enim partium harum superficies udx aliquantulum forent, ad actiones & usus destinatos ineptæ forent. Serum & lymphæ copia & qualitatibus peccantia gravissimorum mor-

morborum causæ fiunt. Apud Vietorem serum & Lympha redundarunt, non quod potulenta largius ingurgitasset, nam temperanter vixit; neque etiam renum culpa, quos quidam in serosa colluvie nimium & sæpe satis temere culpant, etiam tunc quando ægri copiose mingunt, nescio quam falsuginosi emulsionem impeditam causantes, quamvis urina falsuginem spiret atque feri percolatio, solo appulsu citra attractionem fiat, ob peculiarem partis conformationem qua sanguis retinetur, urinosum vero extruditur. Renes apud Vietorem ideo innoxios fuisse credo, quia optime conformati & molles undiquaque erant, unica caruncula papillari excepta, cui lapilli fragmentum inhæserat: quod ob molem exiguan, cæteris salvis non magnopere feri excretionem impedire valuit. Accumulationi feri primam ansam carcerem dedisse arbitror; consueverat enim a puero calorem exercitiis validioribus excitare, a quo Lympha & serum attenuabantur atque ad felicioris excretionem parabantur. Postquam otio obtorpuit, Lympha segnior facta, intra glandulas per plures annos stagnavit ac primum cachexiam peperit: & quamvis postea libertate donatus ad solitos labores rediret, multumque serosi feliciter expelleretur, nihilominus tamen in glandulis vitiosa dispositio, tenuibus particulis propulsis, crassis alte porulis infixis, permansit, quæ cum malum annosum & inveteratum esset, invalescente senio inemendabilis perstitit: & progressu temporis factum ut glandulæ conglomeratæ, quales sunt subcutaneæ, pancreaticæ aliæve per ductus suos parum vel nihil excernerent, & proinde serum cumlaretur, vel serum in ventres effusum non resorberent, ut intra illos necessario redundarit: nam manifeste

in

in imo ventre pancreatis & mesenterii glandulae duriores & ductus pancreaticus liquore vacuus erant: in cerebro quoque glandulae plexus choroidei veluti canosae & durae fuerunt. Qualis vero glandula pituitaria & pinguedo cordis fuerint, fateor nos non animadvertisse, quoniam usus quos *Exc. D. Lowerus de corde* ipsis tribuit, tunc nobis ignoti erant. Praeter aquam quae in medio & supremo ventre fluctuabat, memini quoque in imo ventre redundasse, quam tamen de pulmonum & cerebri constitutione imprimis solliciti, non magnifacimus. Acrius serum apud senem istum evasit, non ob errores in victu, nam neque valde salitis, neque aromatibus impense conditis delectabatur, sed ob particularum salinarum excretionem cum sero impeditam, non tam renum, qui ambo sani erant, quam aliarum glandularum excretoriarum, culpâ, quae induratae nullas vel exiguas suppetias in sanguine depurando renibus contulerunt.

IV. Bile dum vivebat senex iste quoque abundabat, nam frequenter os ipsi amaricabat; carnes fastidivit, atque aliquoties diarrhoea biliosa magnam ejus copiam egresserat: quamprimum alvus supprimebatur Colica affligebatur, quod quoque bili tribuebat. An autem bilis in cavum intestinorum effusa tormentorum Colicorum causa sit praecipua, jam a multis annis dubitavi, cum bilis acrimoniâ suâ villas intestinorum instar medicamenti purgantis vellicans potius ad dejectionem irritet: novi plures, quibus alvus est difficilior, qui quam primum bilis effluvium constipationi accedit, quod nonnullis 5. aliis septimo die evenit, protinus scybala copiose, mox liquida biliosa spumosa, tandem mucosa largissime egerunt citra tormina molestiora. Colica ve-

to hæc a purgantibus etiam mitioribus exasperatur, curatu difficilior redditur, paresis, convulsiones & apoplexia accelerantur & non raro ægri præpropere enecantur: Quidam non infimi nominis Practicus Croci metallorum aliquot grana in petia ligata decocto pro Clystere infudit, quo injecto Colicus terribili epilepsia correptus sibi frustulum linguæ morfu præcidit diuque rigidus instar Schidii, omni sensu & respiratione privatus, jacuit, ab alio Clystere autem ex mero lacte cum pauxillo butyri ad mentem rediit ac sensim convaluit. Solutâ pertinacissimâ, huic morbo nimium familiari, alvi suppressione fæces excernuntur sæpissimæ lutosæ, cineritiæ & si quæ biliosæ sint, nullo tamen cruore aut ramentis mucosis inquinatæ, quod necessario fieret, si ab humore acri diu intra cavitatem intestinorum contento originem traheret, prout quotidie in dysenteria evenire observamus, quamvis plerunque humoribus non tanta mora concedatur, quin potius crebris dejectionibus magno nixu continuo propellantur. Animadverti in aliquot Monasteriis plures temperamentis prorsus diversos & quosdam minime biliosos a Colica ista crudeliter afflictos fuisse, quæ merito adscribebatur Vino vel nimis austero, vel fumo ex tæniis, sulphure, bismutho aliisque concinnatis & accensis imbuto; nam propinato vino salubriore nullisque inquinamentis propemodum venenatis adulterato, saniores vivebant rariusque cruciatus istos postea perpetiebantur. Puellus Illustris familia natus Pleuriticus ultimis vitæ diebus sævissima tormina patiebatur, quæ, supervenientibus convulsionibus, lethifera erant: in cadavere vidi aliquot portiones intestini, ilei præcipue, superne & inferne arctissime constrictas partemque

intermedia flatibus distentas, quas vix ulla vi vel fursum vel deorsum pellere valui. Postea apud alios Colica biliosa dicta affectos nunc in dextro, nunc in sinistro epigastrio, nunc in hypogastrio pluries tetigi tumores rotundos & oblongos instar farciminum, nullam certam & fixam sedem obtinentes, quos itidem a flatibus intra portionem intestini coercitis ortum ducere merito credidi. In pluribus umbilicus dorsum versus trahitur. Jam tunc convulsivi quidpiam intestina in hoc affectu pati, ac causam doloris extra intestina quærendam existimavi, qua in re me postea amplius confirmavit *Exc. D. Willis in Patholog. nova Cerebri*. Ipsa paresis Colicæ superveniens genus nervosum valde affligi indigitat. Præcæteris Colicos istos juvant quæ convulsam laxant & spasmi causam dissipant: novi quendam ante aliquot annos sævissima tormina cum paresi sustinentem solo decocti sassafras potu per tres menses continuato, abstinendo a vino, & ejurando omnia medicamenta, imprimis purgantia, à quibus semper pejus habuit, integram valetudinem recuperasse, qua adhuc fruitur. Viotor equidem bile abundabat, verum quoque humoribus serosis acribus scatebat, qui plexus nervosus Mesenterii alluentes profundiusque se insinuantes vellicando spasmum intestina affecerunt, ex alvo pertinaciter occluso retentis flatibus & bile, atrocissima tormina excitarunt; quoniam quoque ob dolores die noctuque excruciantes vigilasque continuas simul aditus aquoso latici ad medullosam substantiam in cervice imprimis paratus fuit, Paresis brachiorum post aliquandiu exantlata symptomata sequuta fuit. In ultima senectararius Colicam experiebatur, quamvis coluvies serosa non exhausta esset, nam occipienti con-

constipationi mature medebatur oleo amygd. dulc. aut butyro assumpto & Clystere anodyno infuso: Insuper latex spinæ inclusus aliorum deflectebat atque ultimo anno dolores in interfoemineo cum nodis concoloribus peperit. Pori choledochirami per universum hepar dispersi Bile vitellina, referti erant, quæ pressio foris hepate ex ductu bilario emanavit: eadem Vesicula biliaria impleta erat, nam illam ex pori bilarii ramulis bilem accipere quidam solerti indagine invenerunt: ipsemet casu non ita pridem ramulum pororum istorum prope collum Vesicæ biliaris oblique insertum ureterum vesicæ urinariæ more implantatum reperii, qua ratione ingressus facilitatur, regressus vero penitus impeditur: dum enim hepar bubulum perscrutabar, in omnibus ramis pori bilarii vermium, quos hirudines vocant, quamvis vulgo notis prorsus dissimiles sint, congeries occurrit, nullis prorsus in venæ portæ & cavæ ramis apparentibus: Vesica biliaria secundum longitudinem incisa plures quoque bili innatantes vidi: evacuata bile prope collum vesiculæ, ubi hepatis accretum est, caput vermiculi prominuit, quem dum blande extraxi integrum foramen satis patulum perstitit ac stylo indito in cavitatem manifestam perveni, caute remoto hepatis parenchymate deprehendi cavitatem hanc esse ramum pori bilarii oriundum a vicino poro majore: ducto stylo usque ad majorem ramum, rursusque versus collum adacto manifeste vidi insertionem prorsus ureterum in vesicam similem esse, quæ forsitan causa est quamobrem hætenus de bilis in vesicula generatione & collectione scriptores sententiis diversi & ambigui fuerint. Bilis apud Vietorem copiosior & flavior producta fuit ex sanguine per ramos portæ mesentericos, gastricos

cos & splenicos allato & ob febrim lentam magis adusto.

V. Vesicula biliaria foris albicans apparuit, quamvis bilis vitellinae plena esset, quia ejus tunica crassior debito erat, ut bilis color transparenere nequirit, quod alias fit, si legitima consistencia prædita sit. Crassitie ansam dedit Calculus nucis moscatæ magnitudine, non secus ac a calculo vesica urinaria ob continuum attritum sæpe quadruplo crassior evadit. Idem Calculus causa erat doloris a longo tempore circa præcordia gravantis & tensivi, cum in Ventriculo circa pylorum, & in duodeno nullum vitium animadversum fuerit. Icterus non effecit, quia ex poro bilario ad ductum in duodenum hiantem nullum obstaculum invenimus, nec forte calculus globosus majusculus & levis penitus aut continue collum vesiculæ obturavit.

VI. Hepar pallidius erat, ob sanguinis paupertatem in vasis sanguiferis, nam febris multum depascebat & ob inappetentiam consumptus non restaurabatur: imo ultimis mensibus solis jusculis vitam tolerabat. Secui phthifici cadaver, qui aliquot mensibus ante obitum ab omni cibo abhorrescens, a solis potulentis, sc. nunc Vino aqua diluto, nunc pura puta fontana vitam sustentabat, cujus hepar revera profunde candicans & quasi dealbatum, cætera molle nec magnitudine minus, apparuit.

VII. Corpora pituitosa in ventriculis cordis reperta, non erant mucus demum post obitum concretus, qualis in superficie sanguinis V. S. emissi apud Cachecticos & febricitantes, postquam refriguit, alias videtur, qui sæpe crassus & fere membranæ instar tenacissimus est: non enim sanguinis superficiem corpora hæc operiebant,

APOPLECTICORUM. 357

bant, insuper radicibus suis firmiter ventriculorum anfractibus connata & immersa erant. Generata fuerunt propter cordis debilitatem, ob quam fibris se non arcte constringentibus nec omnem sanguinem exprimentibus, quod alias corde robusto & sano exacte fiet, ibi resedere. Debilitas cordis defectui spirituum vitalium & animalium deferenda erit, nam a febris lenta plurimum sanguinis & spirituum consumptum, ob inappetentiam deficiens non restauratum, nec cerebro sufficiens materia spirituum suppeditata fuit. In pericardio plurimum aquæ stagnavit, secus ac apud hecticos hic colligi posse vulgo putatur: materiam aquæ præbuit abunde serosa colluvies massæ sanguineæ, cumulabatur procul dubio ob glandulas induratas aquosum non amplius resorbentes, vix enim pancreatis mesenterii plexusque choroidei glandulis duriusculis pericardii glandulæ ab hoc vitio immunes esse potuerunt, quod eo lubentius credo, quia calor hecticus aquam non consumpsit, neque etiam valuit, quamvis enim in auram tenuem dissolvisset. non tamen corruisset, quia densitas pericardii obstitisset. Non memini unquam Vietorem de cordis palpitatione conquestum fuisse, quam tamen corpora pituitosa & aqua in pericardio redundans excitare solent, quod forte ideo factum fuit, quia longo tempore decubuit & ob quietem placidius sanguis cor transit; sicuti quotitidie observamus cachecticis cor, si tranquilli maneant, raro palpitare, a motu vero, maxime in acclivium ascensu fortiter subsultare.

VIII. Ischuriam non renum infarctus nec calculus Vesicæ pepererunt, nam neque sabulum neque calculos soluta ischuria, neque postea unquam excrevit, neque huiusmodi quicquam ad

urinam suppressendam sufficiens in cadavere repertum fuit: neque illa propter sphincteris constrictionem aut fibrarum vesicæ tonum deperditum effecta fuit, remoto enim obstaculo urinam naturali similem libere & copiose excrevit. Sola scybala dura intestinum rectum implentia & collum vesicæ in postica parte prementia, antèrèus osse pubis neutiquam cedente, culpanda erant: illis enim copiose subductis Clystere emolliente, absque impedimento minxit.

IX. Cordis motus sensim magis magisque elanguit, tandem plane substitit, spiritibus animalibus ad motum hunc necessariis deficientibus propter spirituum vitalium & sanguinis penuriam & principio nervorum sc. cerebro ac cerebello ab ingenti feri intra cranium illuvie non impune diu afflicto, itaque exspiravit.

HISTORIA XIV.

Ursula Aberlin Wolfachensis, Virgo 23. annorum: Plethorica, staturæ mediocris, carnosæ, robusta: famula apud Cauponem ad Solis insigne Æstate 1667. semel magnam graminum farraginem ac pondere gravem capite gestatam ex agro domum deportavit: Sub hoc onere sensit manifestè aliquid intra cranium ruptum fuisse: paulo post cibaria cum supellectili capiti imposita ad messores in loca montana Wolfachio vicina detulit: cum ab hoc onere summo pere gravabatur, ut sibi sub illo occumbendum putaverit, nemoque præsto esset qui

qui ipsam hoc onere levasset, magna contentione etiam per acclivia ad locum destinatum properavit, unde denuo fragorem intra cranium editum animadvertit. Ab illo tempore minus urinam detinere valuit: nihilominus officia servilia solito more præstitit: strenua alias nec ob patrem duriores labores fugiens, nec unquam de ullo alio symptomate conquerens. Menses semper rite fluxerunt. d. 22. Decembr. 1667. nihil mali præsentens ad templum ita currit, ut inde incaluerit: in templo perfrigeratur: mox animadvertit se pedi sinistro non posse firmiter insistere, unde in genua decubuit, vix inclinato corpore, nisi a vicina sustentata fuisset, humi prostrata fuisset: Totum sinistrum latus motu & sensu privabatur: labia torquebantur ac maxilla inferior dextrorsum abripiebatur: primum loquebatur ut intelligi potuerit, paulo post vero ægerrime. Astantes leipothymiam morbum ratæ, quamvis vividum faciei colorem non amiserit, ipsam frigida large conspergunt. Hemiplectica domum demum deportata per dies 14. deliravit: conquerebatur de syncipitis dolore sævissimo, quasi summa vi sursum capilli ibidem raperentur continue: oculus quoque dexter intensissime doluit ac videbatur ipsi ac si ex orbita evelleretur. In sinistro latere toto

plectico neque in capite neque alibi præter motus ablationem nec vel minimam moleſtiam experiebatur. Primis diebus creberime & copioſe mingere cogebatur, nunquam tamen lectum perminxit. Cephalalgia diu continue afflixit atque hanc unice cauſabatur. Medicamenta nulla, præter aquas quasdam cephalicas, pauperculæ exhibita fuerant. die 12. Febr. 1668. cum Wolfachii apud Illuſtriſſimam Dominam Annam Magdalenam, Comitiffam de Furſtenberg eſſem, ad ipſam vocabar, ſcilicet poſt octavam ſeptimanam ab inſultu hemiplectico. Tunc temporis Carnoſa & bene colorata fuit: os non amplius diſtorquebatur, loquebatur ſana & expedite; non multum de capitis dolore conquerebatur: Brachium ſiniſtrum movere ſua ſponte nequirit: at uno alterove digito incurvo fortius a me compreſſo brachium aliquantulum attraxerat: Pedi ſiniſtro aliquandiu inſiſtere, verum antrorſum ipſum promovere non valuit. Tum brachium tum pes ſiniſter ſæpe motu quodam convulſivo ſuccutiebantur. Appetiit & cætera ſatis bene habuit: menſes quoque ſtato tempore ceu ſanæ hucusque legitime manarunt. Suaſi tunc temporis decoctum roriſm. aliarumque herbarum cephal. purgantia per vices ſumenda & Linimentum nervinum: imperata ſimul congrua

grua victus ratione; qua in re suppetias Illustrissima Domina Comitissa, erga pauperes benignissima, luculenter contulit. His aliquandiu, sed non satis sollicitè continuatis, sensim viribus pedi sinistro redeuntibus, scipione suffulta in publicum prodiit tota æstate, templum quoque frequentavit. Subinde tamen Cephalalgia recrudit, quæ a Vini potu exacerbabatur: tota itaque æstate aquam, aut serum lactis caprini bibit: Frigida præ calefactis unice appetebat, unde tota æstate acetariis, fructibus crudis & lacticiniis profuse vesceretur: Sæpe toto die nonnisi mane jusculum comedit. Mens. August. 1668. mane e lecto surrectura sensit motum animale denuo languescere simulque querebatur de dolore in planta pedis dextri alias sani, ob quem nunquam diu posthæc nudo & non prius lintaminibus probe involuto pedi insistere audebat: doloris rationem ipsamet effari nequibat. Rediit quoque tum ante, tum post novum hunc insultum Cephalalgia præcipue dextram capitis partem occupans & nunc occiput, nunc synciput, nunc tempus, nunc frontem misere ex cruciavit: quandoque præ dolore exclamavit abscessum intus sub syncipite latere, imo jam exitum parare; unde quoque non raro ut ille ope chirurgica maturaretur, expetiit. Tunc

quoque de vertigine querebatur, ob quam pronam se casuram verebatur: hujusque sedem dextram potius partem dicebat, cum cerebrum præcipue turbari ibidem distincte sentiret. Incedebat nihilominus subinde: at brachium sinistrum paralyticum tam ponderosum aiebat sæpius fieri, ut casum timeret, pondere corpus antrorsum trahente. Hieme adventante tum ob frigidorum abusus, tum ob vitam sedentariam, tum denique ob medicamentorum neglectum sensim pedes œdematosi facti fuerunt ac intumuit abdomen. Mens. Januar. 1669. primum menses substituerunt. Subinde Catarhi ad pectus ruebant, respirationem difficiliorem reddebant, & tussim excitabant, qua aliquoties sanguinem concretum fabæ magnitudine excrevit, alias cessante catarrho libere respiravit: commodeque decubuit, humilior certe quam cæteri hydrofici. Hydrops indies incrementa sumpsit abdomine prætumido & œdemate etiam lumbos occupante. Doluit summopere pes dexter. Die 23. Mart. 1669. Ipsam moribundam conveni; præter pedes, abdomen, lumbos, brachium quoque sinistrum admodum intumuerat: Facies erat Hippocratica, extrema frigida: lingua arida: pulsus summe debilis: Id pedibus maculæ rubræ apparebant: in dextra tibia gangræna in
pro-

procinctu aderat : delirabat per aliquot dies ; ante obitum ad mentem rediit : Semper & ad ultimum usque halitum accurate vidit & acute audivit. Die 24. Martii 1669. mortua est. 25. Mart. Cadaveris apertionem prece & pretio obtinui. Ante apertionem in cadavere observavi maculas in tibiis latiores & lividas evasisse : alicubi vesicas amplas sero turgidas emerfisse, quibusdam in locis ex poris serum exsudasse, abdomen subsidisse, ex ore humorem viscidum subflavum copiose emanasse. Cuti capillata decussatim incisa tum ex vasis capillaribus faucibus tum ex crânio ipso denudato exstillavit sanguis ichorosus, fluidus, omnibus fibris destitutus, nec in grumos concreescens. Olla ablata, integra dura meninge aliquid serosi excidit. Divisa dura meninge copiosius serum occurrit. Corpore falciformi a crista galli resecto ac retrorsum flexo superficies cerebri ubique ceu gelatina flava transparente tegebatur, illaque alias anfractuosa, plana & lævis conspiciebatur : fauciatâ tenui meninge exstillavit copiose serum flavum, tenue, admodum fluxile. Cerebri portione ad ventriculum dextrum usque ablata, protinus ex illo exiliit aqua turbida : dilatato amplius hoc ventriculo occurrit abscessus ovi gallinacei magnitudine, peculiari tunica, crassitie pennæ co-

lumbinæ vestitus, cujus oppositum latus
versus tempus dextrum exporrigebatur: in-
ciso hoc folliculo aqua turbida subfusca
effluxit, qua evacuata cerebri superficies in
fundo & ad latera inæqualis & quasi exesa
& exulcerata apparuit: nam deterſo in fun-
do muco subsidente manifeste cerebri por-
tiunculæ prominulæ & laceræ videbantur.
In folliculo hoc nullibi foramen nec pre-
mendo ante incisionem, nec postea repe-
rire potui. In sinistro ventriculo ut & ter-
tio quoque aquam, sed pauciorē & lim-
pidam inveni, unde conjeci dextrum duos
folliculos recondidisse, quorum primus in-
caute incisus fuerat. Plexus choroideus u-
trinque glandulis plurimis, minutissimis
albentibus & pellucidis refertus erat. In
toto reliquo cerebro nullum vitium ani-
madverti: in basi quidem sinistra pars mol-
lior primum videbatur: verum postea quam
ipsam cum dextra contuli, discrimen admo-
dum exiguum deprehendi. Cerebellum mol-
lius & flaccidius cerebro fuit. Cerebro &
cerebello e calvaria exemptis, recisa me-
dulla spinali ex orificio calvariæ amplo plu-
rimum feri subcruenti effluxit: simulque
observavi ostii illius spatium multo amplius
fuisse quam ut a medulla impleretur: vidi
medullam hinc inde manantibus quibusdam
fibris alligatam quidem, sed nihilominus
hu-

humoribus descensum concedere. Ex medullæ incisæ superficie guttulæ sanguineæ exsudabant : quæ alias firma & nitida erat : sinistra tamen pars dextrâ minor videbatur. Quicquid sanguinis intra cranium stagnaverat fluidum mansit nec in grumos concrevit. Imo ventre aperto aqua citrina effluxit, sed præter expectationem, quantitate minor. Ventriculus & intestina tum tenella tum crassa flatibus turgidissima erant : Crassa ab excrementis vacua. Hepatis superficies livida inæqualis ceu corpus ex plurimis glandulis conglomeratum apparuit : molle : vastum. Lien non erat naturali major, mollis, lividus. Glandulas mesenterii & pancreatis admodum duras comperii. Videbatur pancreas esse corpus ex multis glandulis conglomeratum : ejus ductus vacuus erat. Uterus ejusque testiculi minores, quam alias in hac ætate inveneram. Nullibi sanguis concrevit. Pectus, quia alio avocabar, nec multum de pectoris morbis conquerebatur, non aperui.

S C H O L I A.

I. Onerum graviorum gestatio in capite abscessibus, seu tumoribus cum folliculo in ventriculo dextro ansam præbuisse videtur, nam prima vice aliquid rumpi, altera fragorem sensit manifeste : quæ indicio sunt, ob maximum nixum
te-

tenuem meningem intra ventriculum dextrum, a medulla quam obtexerat, jam tum avulsam fuisse; aurium enim instrumenta quidpiam passa fuisse neutiquam credibile est, quia ad extremum vitæ acute audivit, neque in reliquo toto cerebro quidpiam visum fuit, cui fragor & sensus ruptionis adscribi potuisset, præterquam in hoc ventriculo: & omnino medullam cerebri tunc temporis afflictam fuisse, testatur urinæ detentio aliquo modo læsa, ob quam urinam non diu in vesica detinere valuit, debilitato sphinctere, quamvis nondum lectum perminxerit.

II. Hemiplegia septimum circiter mensem post perceptam ruptionem & fragorem sub onere gravissimo, evenit, quam tumoribus dextri ventriculi primario tribuere nequeo, quamvis alter qui integer permanfit, ovum gallinaceum superarit, alter quem imprudenter fauciavi, non multo minor fuerit; ut ex aquæ turbidæ effluentis copia divinare potui, quamvis etiam in fundo & ad latera corpora striata & portio corporis callosi exulcerata inæqualia & quasi lacera apparuerint; nam a 22. Dec. 1667. ad 23. Mart. 1669. nullum insultum hemiplecticum primo similem experta est, licet procul dubio in tanto temporis intervallo tumorum moles augmenta sumpsisset & superficies medullosa a liquore acri in ventriculo hoc amplius erosa fuerit: imo tumoribus, utpote folliculo inclusis, integris permanentibus, potissimum naturæ beneficio & usu aquarum cephalicarum primùm pedi sinistro insistere, pressis digitis brachium movere, labia rite conformare & verba ad intelligentiam comparata effari potuit: adhibitis postea medicamentis efficacioribus scipione suffulta obambulare, in publicum prodire & templum frequentare, aliasque actiones

nes animales postliminio reparatus edere valuit. Perstitit quidem brachii sinistri impotentia ad motum, integro sensu, a primo insultu ad vitæ extremum, non tam ob tumores, quam ob labem aliquam particularem nervorum axillarium, qui graciliores & teneriores sunt nervis ex osse sacro ad fæmora & pedes descendantibus: nam auctis tumoribus impotentia brachii post sumpta medicamenta minor erat, quam in primis post insultum diebus. Nec hemiplegiam istam sero intra cranium & duram meningem, aut illi quod intra meninges & in sinistro & tertio ventriculo stagnaverat, aut illi quod sub flavum copiose sub pia matre collectum transparuerat, unice tribuo; nam in utroque latere pari copia, forte ob hydropem, redundavit, neque quicquam apoplectici passa est, nec apoplexia mortua est: quemadmodum quoque Vietor, de quo in prægressa historia, a magna feri intra cranium colluvie ab insultibus apoplecticis, post paresin superatam, aliquot annis ad fatalem diem immunis fuit. Non equidem negotumores istos ventriculi dextri ad Hemiplegiam sinistri lateris symbolum suum contulisse, nam ipsemet cum plurimis aliis observavi uno latere affecto oppositum paralyfi correptum fuisse: verum sociam & forte primariam causam Hemiplegiæ serum exstitisse arbitror, accidit enim postquam cursu contentiore sanguis incaluit & in templo subito per habitum corporis perfriguit, serumque in massa sanguinea despumatum aut segregatum cum impetu ad interiora etiam capitis ruit, atque se porulis cerebri in dextro latere insinuavit, unde porulos jam ante a tumoribus compressos facilius obstruxit, spirituumque meatus occlusit atque hemiplegiam effecit: forte etiam sanguinis attenuati portiunculas secum ad
pro-

profundiora traxit, deliravit enim quatuordecim diebus post insultum: sero namque extra medullarem cerebri substantiam & medullam spinalem fluctuanti, aut tumoribus solis Hemiplegiam adscribi non posse, jam dictum est. Serum vero post antiperistasin & insultum istum segregatum fuisse, crebra & copiosa mictio primis diebus sufficienter probat: & profundius cerebrum subiisse evincit curatio quæ peragebatur serum discutientibus, absorbentibus & evacuantibus. Medulla cerebri in sinistra basis parte mollior, quia dextræ plane non dissimilis neque locum affectum neque causam proximam demonstrat: neque multum ad hujus rei explicationem confert medulla spinalis sinistra minor dextra, si enim præternaturale quidpiam fuisset; æque pes ac brachium ad motum impotens permanisset.

III. Cephalalgia continuo & diu affligens post invasionem Hemiplecticam, in dextro latere, qua cutim capillatam sursum trahi & oculum ex orbita evelli putabat, non solis tumoribus dextri ventriculi adscribenda videtur, quia ante insultum de nullo dolore conquerebatur, & postea permanentibus tumoribus Mense Februario remisit, partim sua sponte, partim a medicamentis serum evacuantibus & absorbentibus: rediit quidem subinde & a vino exacerbabatur, sed non tam vehemens ut pridem, usque ad Mensem Augustum, quo denuo quidem ipsam crudeliter imprimis in dextro syncipite excruciauit, ibique abscessum latere se distincte sentire dixit, ejusque maturationem & apertionem a Chirurgo efflagitavit; Verum ob plurimos errores in victu commissos & frigidorum abusum, quibus serum augebatur, adeo ut nec hæc Cephalalgia recidiva solis tumoribus attribui possit, sed & ipsi quoque

que seu lymphæ seu sero meninges tendenti, idque magis in dextro latere, ob tumores ad hunc effectum concurrentes. Serum autem non solum copiâ, sed etiam acrimoniâ læsit; nam illud quod per meningem tenuem gelatinæ instar transparuit, subflavum erat. Forte quoque serum non impune intra cranium & duram meningem fluctuavit.

IV. Succussio brachii & pedis sinistri Mense Febr. a me adhuc animadversa, erat vere motus convulsivus, nam inopinato & præter voluntatem artus isti agitabantur. Quamvis in Hemiplegiæ principio artus sinistri lateris elanguerint, atque aliquandiu paralytici perstiterint, non tamen ita omnis sensus & motus nervis huic lateri dicatis perierat, quin ad molestiam quandam excutiendam adhuc insurgere valuerint, prout omnino oculis patuit & a me in aliis etiam fortissima Apoplexia decubuis non raro observatum fuit. Quoniam autem uno momento simul artus isti succutiebantur, necessum est molestiam hanc in medullæ spinalis parte quadam exstitisse, ubi nervi brachii & pedis adhuc uniti erant, nam intra cerebrum conclusam fuisse neutiquam credibile est, cum sensibus integris fiebat. Molestiam hanc non arbitror irritationem quandam dici posse, nam succussio brevi tempore durabat & postquam cerebrum, cerebellum ac spinalis medulla largissime sero etiam acriore perfundebantur, non amplius eveniebat: potius cum *Excell. D. Willis* explosionem hic admitterem, nam omnino spatiola sunt inter medullarem nervorum substantiam & membranam illam ambientem, quæ manifeste in funiculis, in quibus plures nervuli colligantur, dextra manu inveniantur: atque hæc succussio tunc solum *Æ-*
gram

gram afflixit, cum adhuc humoribus nitro-sulphureis abundavit; postquam vero illos victu refrigerante quasi suffocavit, penitus cessavit.

V. Postquam Cephalalgia Mense Augusto sævior recrudit, accessit ei *Vertigo*, qua sibi prone cadendum verebatur, cujusmodi casus periculum auxit brachii sinistri pondus ab œdemate. Hujus vertiginis sedem ipsamet dextram partem esse definierat, quia manifeste hanc turbari senserat. Hydatides majores intra Ventriculos jumentorum Vertiginis causa vulgo creduntur, atque hujus causa ad eximendos folliculos aqua plenos trypano cranium perforatur, & Vesiculæ suctione per pennam facta, proliciuntur: ut supra p. 62. memini. Id a Rustico Beroviensi, hujus artis perito Gurtwilæ 1664. præstitum atque aliquot hydatides extractas fuisse vidi: Verum cum pluribus hydatibus, quarum quædam nuce moscata non minores erant, eductis vertigo non cessaret, Jumentum necessario protinus mactandum judicavit, quod plures in profundioribus cerebri partibus laterent eæque lethiferae. In mactati animalis ventriculis cerebri præcipue sinistro & pariete intergerino cerebrum a cerebello distinguente, ubi cerebrum respicit, plurimas inveni plerasque instar ovorum serpentinorum, aut lacertarum cohærentes & tum internæ ventriculorum membranæ medullam operienti, tum parieti dicto accretas. Amicus quidam meus vidit in prædio suo Vitulum anniculum inter armenta sua ob vertiginem semper ad latus inclinare, ab aliquot septimanis: noluit illum Veterinarii dubio experimento exponere, sed protinus mactandum die secundo Mart. 1669. curavit & capite integro me donavit: olla & dura meninge cerebri pars anterior quasi fumo deni-

nigrata apparuit, quamvis nunquam in fumoso stabulo commoratus fuisset: detracta tenui meninge, cerebri superficies sanorum instar albebat. In dextro ventriculo nihil p. n. nisi hydatidis in plexu choroideo, ubi ejus ala cum sinistra jungitur, prope glandulam pinealem, apparuit. Aperto sinistro ventriculo mox grumus sanguinis longior & major ovo gallinaceo secundum longitudinem dimidiato, durus, tenax & granulis minutis rotundis, albicantibus, semini papaveris albi aliquo modo similibus, conspersus occurrit. Ventriculus ad methodum *Exc. D. Sylvii* undique dilatatus triplo amplior ejusque tabulatum superius tenue, verum multo tenuior & quasi membranacea erat pars ejus posterior cranio incumbens, ibidemque superficies interna sordido vulneri similis inæqualis & viridis apparuit: deterfis blande sordibus, secedebant corpuscula lentis magnitudine, viridia, caseo Glaronensi colore & consistentia similia. Plexus choroidei ala sinistra amplior crassior & densior erat naturali aliquot centenis granulis, magnitudine seminis papaveris albi conspersa, ea serie composita, qua semina bombycum aut araneorum conspiciuntur. In nullo ventriculorum lymphæ aut serum redundavit. Processus mammillares ambo cavi erant, & sinistro dexter amplior aqua limpidissima plenus. Grumum sanguinis non demum post mortem concretum existimo, nam citra percussionem capitis necabatur, sinister ventriculus ita distentus erat, ut foris anfractus oblitterati essent; grumus compactior erat, quam ut talem firmitatem statim a mactatione nancisci potuisset, ut taceam granula quibus aspersus erat. Granula ista, quæ ad manus; exsiccata subflava sunt & pellucida instar succini. Apud virginem procul

dubio tumores duo insignes in ventriculo dextro causa vertiginis Mense Aug. evaserunt, qui ante insultum Hemiplecticum & postea demum aliquot elapsis mensibus hanc nondum excitarunt, quia minores adhuc erant & spirituum animalium cursum nondum comprimendo medullosam substantiam, turbarunt, donec ob errores in victu majorem molem acquisivissent. Plexui choroideo utrinque glandulis albescentibus & pellucidis referto, nullam vertiginis culpam tribuere possum, cum ab illo nihil ad cerebrum deferatur, verum sanguis a cerebro refluus per illum ad sinum quartum & torcular deducatur, nisi quispiam velit ob glandulas lymphæ turgidas sanguinis cursum retardatum aliquo modo fuisse. Serum intra meninges, anfractus & ventriculos stagnans forte quoque non in censum causæ vertiginis veniat, quia copiosius apud Vietorem nullam attulit.

VI. Dolor plantæ pedis dextri alias fani, ob quem nudo & non prius linteis probe obvoluto insistere non ausa est, quemque verbis exprimere nequii, non videtur a sero inter cutim & musculos aut intra musculorum interstitia fluctuante, quod in œdemate frequenter sine dolore fieri solet, sed ab humore intra membranas valde nerveas, seu nervos in membranas expansos in planta pedis coercito originem duxisse, atque propterea affinitatem aliquam cum arthritico habuisse. An vero huc ex fistula sacra derivatus; an vero ex arteriarum capillamentis effusus fuerit? incertum est, nullum enim in partibus intermediis ab osse sacro ad pedis plantam dolorem passa est.

VII. Hyeme adventante Hydrops sensim emerfit atque in Ascitem desiit, nam abdomen præ

APOPLECTICORUM. 373

prætumidum evasit & œdema pedes ad lumbos usque occupavit : ventre quidem post obitum aperto aqua citrina quantitate minor quam exspectaveram , effluxit , nam ante sectionem serum imminuebatur , illoque ex poris quibusdam in locis exsudante abdomen subsiderat. Tympanites socia fuit , ventriculus enim atque intestina tenuia & crassa flatibus turgidissima erant : verum ultimis tantummodo diebus illam accessisse existimo , quia nunquam de ventris torminibus conquerebatur & quoniam crassa excrementis vacua erant , a calido nativo jam succumbente potulenta , quæ sola fere ultimo assumpsit , in meros flatus resoluta fuisse credibile est. Colluviei aquosæ materiam abunde subministravit abusus frigidorum diu continuatus ; detinebatur propter otium & neglectum medicamentorum , nam antihac si quem errorem commiserat illum improbo labore emendabat , quos quoniam ob hemiplegiam non amplius peragere poterat , vices ejus medicamenta hydragoga & imprimis diuretica & diaphoretica præstitissent , nam robusta & carnosissima , mensibus usque ad Januar. rite fluentibus , erat , & bene visceribus valebat , hepatisque inæqualitas ac pancreatis & Mesenterii glandularum durities demum effectus hydropis potius quam causa facta fuerunt , neque enim unquam toto ægritudinis tempore calidis & glandulas indurantibus , cum vel a solo vino læderetur , usa est. Jam sæpius experimento didici hepar aliasque glandulas conglomeratas elixando indurificare , quod itidem serum abdomini inclusum , perpetim ad ultimum habitum calefcens , hepati circumfluum , ebullientis aquæ instar , pariter efficere valuit. Hepar me corpus ex plurimis glandulis

dulis conglomeratum observasse 1664. ad *Exc. D. Jac. Henr. Paulli* scripsi, antequam *Cl. Malpighii Liber de structura Viscerum* publici Juris factus esset. Epistola Ejusdem *Cl. D. Paulli Anatomie Bilfianæ Anatomæ* annexa *Argentorat.* 1665. excusa fuit. Colluvies serosa primum in abdomen exundavit, facile enim respiravit & decubitus humilis erat nisi catarrho obrueretur, & dyspnoeam & tussim, qua aliquoties sanguinem concretum fabæ magnitudine ejecit, excitaverat. Brachium sinistrum intumuit sive ob Lympham ad venam axillarem refluam in motu impeditam & stagnantem, sive ob serum fistulæ sacræ inclusum huc vergens: Alias Hemiplecticos novi, quibus brachium paralyticum permanens prorsus contabuerat, quod ob succum nervosum denegatum fieri credebatur.

VIII. Non mortua est apoplexia, nam ad extremum usque pes dexter summopere doluit, accurate vidit & acute audivit; sed sensim cordis motus substitit, quoniam sanguis ob pedis dextri gangrænam corrumpebatur, spiritibus orbabatur, nec instaurabatur, unde paulo ante obitum delirabat, Facies Hippocratica, extrema frigida & pulsus summe debilis aderant: post obitum sanguis ubique ichorosus nec grumescens ex vasis sanguiferis faucibus emanavit. Quomodo vero partis alicujus Gangræna, aut sphacelus, item cancer & ulcus cum ossis carie totam massam sanguineam corrumpere, eandem labem alii parti imprimere aut ipsam mortem inferre possit, peculiarem dissertationem postulat.

HISTORIA XV.

Ursulla Pulcy Frizen/ In Sylva Martiana
 zum Häusern habitans. Habitu corporis san-
 guineo-Phlegmatico prædita. Victu gaude-
 bat lautiore, qualem sc. Rustici melioris
 conditionis hæc loca incolentes nanciscun-
 tur: potissimum fere lacticiiniis, quæ illo-
 rum delitiæ sunt, fruebatur. Aliquot libe-
 rorum mater erat. Menstruus fluxus extra
 graviditatis tempus rite manabat. 1661. cir-
 ca 37. ætatis annum iterum gravida, diu
 continuos eosque sævissimos capitis dolo-
 res passa est cum vertigine. Quarto mense
 conceptionis sc. circa principium Maji,
 mane e lecto surrexit, humi ledit ac caput
 manibus suffulciens de consueto capitis do-
 lore conquesta est atque malum quoddam
 gravissimum sibi imminere prædixit: mox
 oculi pervertebantur: vomituriebat: ma-
 ritum & liberos miserabili vultu intueba-
 tur, at ἄφωνος facta amplius alloqui nequi-
 bat: protinus instar trunci omni sensu &
 motu privata concidit, sola respiratione
 salva manente. In lectum traducta, per
 triduum, eo situ quo locabatur, immota
 jacuit. Juscula & aquas antiapoplecticas
 spiritum vini redolentes absque labore de-
 glutiit. Post diem tertium ad mentem ali-

quantum rediit ; compellata annuit : & paulo post artus sinistri lateris denuo movere valuit. Intra Mensis spatium nullis aliis medicamentis adjuta , a marito aliisque adstantibus suffulta incedere potuit : ita tamen ut dextrum pedem trahere & manu dextra ad opus aliquod perficiendum impotens esset : intellectus semper debilior mansit : Appetitus constitit. Mense Octobri 1661. delirio Melancholico corripiebatur. Circa finem Octobris infantem vivum enixa est. Appetitus ad 14. diem puerperii integer permanfit : hoc die subita debilitate obruta omnem cibum fastidivit, simulque delirium mitius evasit , & ipsa quietior aliquandiu fuit. Rediit delirium cum cephalæa solita atque ad anni 1662. scœnificium usque perduravit. In hoc delirio notissimos & omnia tuta timebat : maxime a fragore lignorum minus aridorum in foco crepantium percellebatur : sæpius in sylvas aufugit, ut vix satis custodiri potuerit : ter violentam mortem sibi inferre nitebatur , jamque laqueum collo sibimet adaptavit totiesque mariti providentia a tanto facinore vindicata fuit : Nullam penitus liberorum curam habebat, nec famelicos vel mica panis refocillasset : non nisi coacta comedit. Delirium hoc plerunque sub auroram incepit : duravit usque ad vespe-

vesperam: hinc minus sibi metuebat, quietior erat nec custodiam sui exegerat. Medicamentorum, nescio tamen qualium, usus frustraneus fuit: Empirici suasu Vere, æstate & autumno singulis mensibus, hyeme vero alternis Mensibus large vena secta sanguis emittebatur, unde delirium propulsatum fuit; quin etiam capitis dolor mitigabatur & vertigo ablata fuit. Ultimo vitæ semestri Venæ sectionem omisit: ob nimiam sanguinis profusionem vividus faciei color periit & Cachectica evasit. Postea iterum concepit fætumque vivum peperit, quem ad terminum suum fatalem usque lactavit. Ab illo tempore quo ab apoplexia prostrata fuit, totum dextrum latus debilius perstitit, adeo ut inter incedendum imbecillitas quædam observaretur: insuper manu dextra corpora crassa & ponderosa facile arripuit firmiterque tenuit, at gracilia & levia apprehendit quidem, verum invitæ & insciæ statim iterum elabebantur. d. 21. Febr. 1664. noctu in lecto horrore concutiebatur, subsequente æstu cum dolore lateris dextri punctorio: Pleuritidem neglexit: Vinum bibit: Venæsectionem distulit ad signum Zodiaci gratius & magis ex superstitione valetudini commodum: singulis horis dolor lateris dextri incrementa sumpsit: tussit frequenter: ob

doloris vehementiam sputi subcruenti parum excrevit: dolor a latere dextro quandoque ad collum usque pertigit, qui tamen nec continuus, nec una sede fixus permanfit, d. 25. Febr. expectatus Venæsectionis dies advenerat, verum ob virium languorem & delirium omittebatur. d. 26. Febr. mortua est. d. 27. Febr. indultu Réverendissimi Domini D. Francisci Chouloti Abbatis Monasterii S. Blasii optime meriti, Viri judicio acerrimo & rerum agendarum dexteritate apud omnes laudatissimi, cadaver secui, cum Cl. D. D. Joh. Ludovico Silbereisen Bada-Helvetio, Physico Laufenburgensi & Collega dum vivebat suavissimo. Remota cranii olla dura meninx tumida & elata erat ac si flatibus distenderetur: ejusque arteriæ sanguine turgidæ. Sublata dura meninge tenuis ita omnes anfractus colligavit & æquavit, ut tota cerebri superficies levis & æqualis apparuerit, crassiorque debito fuerat: illa faucia ex omnibus anfractibus tam dextri quam sinistri lateris copiose serum emanavit. Vasa sanguifera tenuis meningis ubique majora & sanguine pleniora videbantur. In utroque Ventriculo laterali serum subcruentum abunde stagnavit: Simile quoque serum in occipite circa medullam oblongatam invenimus, quin etiam antrorsum inclinato capite ex
fora-

foramine sacro juxta medullam ad unciam hujus feri effluxit Utriusque ventriculi lateralis superficies lutea penitus & quasi rubigine obducta videbatur, oblita enim erat muco croceo, illi simili, qui circa aquas ferratas conspicitur & lapidum & terræ superficiem incrustare solet: Eodem quoque plexus choroideus infectus erat: pertingebat rubigo ista quoque ad tertium ventriculum: quartus prorsus mundus erat. In dextro plexu choroideo plures hydatides, quarum quædam piso majores, invenimus: in sinistro itidem plures aderant, quarum una nuce avellana major, angulosa, instar humoris crystallini perspicua, solidaque a nobis visa fuit. Cerebellum valde flaccidum erat. Medulla spinalis multo naturali gracilior nobis apparebat. Sterno remoto pulmo in toto dextro latere firmiter pleuræ adhæsit, quo avulso in postica pectoris cavitate ad libras duas circiter feri pallidi comparuit: In sinistro latere fibris intermediis pulmo levicule accretus erat. In dextro latere pulmonum lobi omnes magni, duri, tensi, utcunque rubri, vel potius ex rubro variegati: illorum membranæ extrema densa & crassa: incisi intus pleni ichore subcruento, subaqueo, spumeo & in partibus profundioribus purulento adimpleti erant. Sinistri pulmonis lobi erant

molles, flaccidi, albicantes, pauxilla rubedine diluti. In Ventriculis cordis invenimus Corpora pituitosa, quæ ramos in pulmonum vasa spargebant. Ventriculus & intestina flatibus admodum distenta erant, ut gravidam putarent. Epar pallidum & Renes flaccidi erant. Lien naturalis visus. In Utero nihil præter naturam apparuit. Mammæ adhuc lacte niveo abundabant.

S C H O L I A.

I. Cephalalgia sævissima cum vertigine juncta circa principium conceptionis, Mense Januario 1661. incipiens & post sænifecium 1662. perdurans, causam vehementem stabilemque quæ meninges, solas doloris capaces, affligerit, simulque spirituum animalium motum aliquo modo in cursu suo impedierit, adfuisse innuit. Quænam vero illa fuerit, dubium est: Meningem tenuem multa a longo tempore passam fuisse, ejus insolita crassities significat: eoque magis quia anfractuum superficiem æquavit levemque & planam primo intuitu sectio ostentavit: Sero sub illa contento dolor attribui non potest, quamvis enim post obitum multum feri intra anfractus sub illa post obitum repertum fuerit, attamen cephalalgiam nullam vel certe non tam vehementem ab autumno 1662. ad Febr. 1664. effecit, quantam antea pluribus mensibus pertulit. Flatus meninges quandoque distendere ex hac sectione constitit, nam dura meninx tumida & quasi inflata & forte tenuis quoque meninx a cerebro avulsa fuit, unde superficies planior a nobis visa: Verum

rum flatus nec continuum nec tam durabilem
 dolorem excitassent. Mucus croceus tres ventri-
 culos & plexum choroideum tingens itidem cau-
 sari nequit, cum pridem sublata cephalalgia &
 vertigine perstiterit, nec forte tantos cruciatus
 gignere valuisset. Ichorem subcruentum recen-
 tē exstillasse arbitror, cum illum in aliis deli-
 rantibus & febris continua defunctis his in locis
 repererim. Sanguinem in arteriis utriusque me-
 ningis doloris capitis & vertiginis authorem fuisse,
 tum imprimis Venæsectio crebra, qua copia
 & fervor imminuebantur, Vere, sc. Æstate &
 Autumno singulis mensibus, & hyeme alternis
 mensibus largior instituta cum emolumento, do-
 loris sc. mitigatione & vertiginis ablatione, pro-
 bat, tum in cadavere vestigia in utraque menin-
 ge indigitant, nam vasa sanguifera ampliora vi-
 debantur. Effecit autem dolorem dum in vasis
 copiose stagnans, ob cursum liberum ad sinum
 præcipue tertium præpeditum, membranas ex-
 quisito sensu præditas nimium distendit, intus-
 que medullosam substantiam aliquantulum coar-
 ctavit; simulque vertiginem peperit. Quia in
 corde pituitosa corpora, quæ ramos longius pro-
 truderant, reperimus, forte quoque tale vel simi-
 le quodpiam ex lacticiniis progenitum in sinibus
 impedimentum latuit, nisi demum hæc ob ca-
 chexiam post largas sanguinis profusiones in cor-
 de nata velimus, cum alias plerunque in cache-
 cticis inveniantur. Sanguinem copiose cumulā-
 vit ob lautiores victum & vitam sedentariam,
 nam incolæ horum montium maximam partem
 fila trahendo traducunt & in hypocaulis præfer-
 vidis commorantibus sanguis incenditur, atte-
 nuatur & ampliatur, unde vasa nimium dilata
 instar aneurismatis vix ad pristinam gracilitatem
 redeunt,

redeunt, & pertinacis mali causa fiunt. Sanguinis abundantiam auxit mensium suppressio post conceptionem.

II. Mense Majo 1661. vera Apoplexia correpta fuit, nam humi sedens, post oculorum motum convulsivum, ἀφρον facta, omnes sensus & motum animale, respiratione & deglutione exceptis, amisit, & trunci instar in lectum reposita immobilis jacuit. Causam hujus insultus non possum consternationem quandam reputare, quamvis ob sævitiem doloris humi sedens grave malum sibi imminere prædixerit & miserando vultu suos intuita fuerit, nam apoplectica vere ad diem tertium permansit, artuum dextri lateris impotentia toto mense Majo perduravit, & postea toto reliquo vitæ tempore, sc. ad quartum annum, imbecillitas in incessu atque apprehensione rerum leviorum & minutiorum observata fuit. Sanguinem extravasatum hanc fecisse omni probabilitate caret, nam vel centies ipsam enecasset: nec vasa distendendo illam produxit, remisit enim ante Venæsectionem & postea vasis longo tempore admodum turgidis & cephalalgiam sævam cum vertigine parientibus, nullam recidivam experta est. Serum in ventriculis & sub meninge tenui conclusum, post obitum repertum, minus erat quam ut cerebrum comprimere valuisset, & revera nihil Apoplectici attulisse ex mortis genere constitit, quo cor ob dextri pulmonis inflammationem insignem, spirituum vitalium corruptelam & animalium immi-nutionem in motu substitit & veluti suffocata obiit. Verisimilius est ob vehementem capitis dolorem cataclysmum quendam feri in medullosam cerebri substantiam irruisse, non secus ac alias dentium, articulorum aliarumque nervosarum

farum partium doloribus tumores serosi sæpe ocyus superveniunt, quem promptius debilitata, ut ex vertigine constat, sensibus omnibus & motu animali sopitis, admisit; nam principium imprimis noctu in somno contigit, unde mane surgens calamitatem imminuentem, forte ex signis quæ effari nequirit, prædixit. Serum interiora cerebri subiens apoplexiam produxisse Juvantia evincunt, motum enim & sensus recuperavit usu aquæ antiapoplecticæ & parciore cibo, quibus serum absumptum fuit, quod soli huic humori proprium esse sæpius non sine ratione *Carol. Pissò de serosa Colluv.* inculcat: quo penitus dissipato sensus & motus magis magisque adeptæ est, relicta quadam imbecillitate, cum raro humor iste a peregrina mistura immunis sit. Doloribus perseverantibus non rediit apoplexia, quia fætu indies incrementa fumente multum feri aliorum abreptum, in partu cum lochiis portio profusa & dum infantem lactavit aliquid etiam sublatum, denique post tot tantasque Venæsectiones cephalalgia sopita, nova feri irrumpendi causa præcisa fuit.

III. Delirium ante & post partum aliquot mensibus Fæminam hanc exagitans Melancholicum fuit, nam omnia tuta timuit, non sine desperatione quadam. Id in delirio hoc notatu dignum quod a summo mane ad vesperam ipsam perterruit: noctu vero quietem indulxit, ut remotis custodibus acquieverit. Causam in sanguine delituisse Juvamen ex Venæ sectione, frustraneis medicamentis, clarum facit. Ventriculorum lateralium & tertii ut & plexus choroidei superficies mucro croceo oblita non parum me perturbavit & varias suspiciones apud me moverunt, cum Ventriculorum superficies, imprimis for-

nix

nix splendescant & lucis alicujus participes sint, verum posteaquam tot Venæsectionibus Melancholiam expugnatam fuisse, illamque placide vixisse perpendi, necessario Melancholiæ causam in massa sanguinea concludi, arbitratus sum.

IV. Hydatides insigniores in plexu choroideo nullas turbas in cerebro excitasse testantur auxilia, quæ illis permanentibus, symptomata sustulerunt; nisi quis autemet ignavius aquam a meninge tenui & e ventriculis ab illis glandulis propter hoc vitium resorptam fuisse.

V. In pleuritide alterutrum pulmonum lobum inflammationem *Platerus pluresque Italorum* hoc seculo, rationibus & sensibus permoti, statuerunt, quibus quoque hæc Anatome calculum præbet. Nonnulla hic annotanda forent; verum nolo illa hoc loco inferere quæ commodius cæteris pleuriticis a me sectis adjungentur.

HISTORIA XVI.

Juvenis quidam, annorum circiter 24. staturæ mediocris: macilentus, cute fusca & strigosa præditus; quantum ex vestitus semilaceri forma conjicere licuit miles profugus, ex morbo aliquantulum convalescens; (nam circa illud tempus plurimi Gallorum ad Rhenum in Marchionatu Badensi inferiore Febre Ungarica, dysenteria aliisque gravibus morbis ægrotabant, ac quotidie tum sani tum reconvalescentes non pauci huc venerant, per Helvetiam

Pa-

APOPLECTICORUM. 385

Patriam repetituri) in vicino colle extra urbem nostram propemodum frigore ene-ctus d. 14. Nov. 1673. repertus moxque traha circa 10. antemeridianam in Xenodochium deportatus fuit. Statim accersitus fuit Exc. D. D. Henricus Scretæ a Zavorziz:prehendit ægrum, quamvis in hypocaustum calefactum delatum & lecto plumeo fotum, toto corpore non solum in capite & artubus, sed etiam pectore, dorso & abdomine attactu frigidissimum esse. Artus rigeabant adeo ut nec brachium, nec pedes flecti potuerint: brachium tamen sursum facile tollebatur: ore hiabat, verum aquarum cordialium ne guttulam quidem deglutiit: pulsum nullum invenire potuit: nulla inclamatione, vellicatione aut frictione excitari valuit, ut vel minimum alicujus sensus superstitis indicium præberet: oculos semper clausos tenuit: respiravit cum stertore: in lingua maculæ rubræ videbantur ac si illam convulsus momordisset. Vesperi circa quartam vivere desuit. Die sequente cum D. D. Scretæ, D. D. Hollandro & Chirurgis aliquot Cadaver perlustravi. Foris in pectoris latere sinistro duo ulcera rotunda, dimidii bazii amplitudine aliquousque sinuosa, ultra cutim sed non ad pleuram penetrantia, pus coctum continentia, invenimus: In dextro latere
cir-

circa costam tertiam cutis palmi latitudine
sugillata erat: omnia sub cute ad pleuram
usque sanguine suffusa visa sunt, sive a per-
cussione, sive a casu contigerit. Abdomi-
ne aperto omentum pertenuē & macilen-
tum occurrit: Ventriculus & intestina,
præcipue tenuia, flatibus & fæcibus liqui-
dis subflavis plena erant: iisdem fæcibus
quoque Colon infarctum fuit. Foris, a
Colo imprimis papillæ plurimæ, aqua lim-
pida turgidæ pendebant. Hepar fuit rubi-
cundum: Vesicula biliaria tumida & quasi
inflata: Pancreas album: Lien lividus, ma-
ior debito, nam duos palmos longus, pal-
mo latior, crassitie dimidii palmi erat: ali-
quotque in locis quasi fissuris præditus,
sed non perviis. Renes consistentia & co-
lore naturales, sed omni pinguedine desti-
tuti erant: ubi vasa emulgentia renes sub-
eunt loco pinguedinis humor aqueus sub-
flavus in gelatinam concretus sinus imple-
verat. Vesica distendebatur ab urinæ reten-
tæ copia. In pectore pulmones dextro &
sinistro lateri per fibras oblongas hinc inde
laxe, non toti nec firmiter accreverant. In
dextro latere pulmonis lobus inferior debi-
to rubicundior & paulo durior fuerat, ita
tamen ut inflammationem nec magnam nec
pridem enatam credere potuerimus. Omnes
pulmonum lobi aëre pleni & turgidi erant.

Cor-

Cordis dexter & sinister ventriculus, venæ item cavæ & arteriæ aortæ rami superiores & inferiores sanguinem prorsus fluidum, neutiquam fibrosum continebant & fundebant, adeo ut ne minimus grumulus a nobis inveniretur. Extravasatus in pectoris cavum, diu post effusionem grumescebat, ita tamen ut maxima pars fluida perfliterit. Cranii superiore parte dempta antè sub fronte dura mater admodum rugosa apparuit, ac si ibi a flatu vel aqua distenta fuisset. Prope cristam galli, incisa dura matre in sinistro latere protinus multum aquæ promanavit, quod itidem incisione in dextro latere facta contigit. Dura matre a crista galli utrinque juxta finum tertium ad sinus laterales incisa, vidimus in sinistro latere sub ossè syncipitis versus tempus duram matrem tenui meningi, fere dimidii daleri amplitudine, præter naturam intermediis fibris validissimis firmiter accretam fuisse. Sub pia matre intra cerebri anfractus aquæ plurimum undique fluctuabat. Reflexo corpore falciformi, ducto cerebro vidimus insignem arteriam super corpore calloso incedentem sanguine vacuam: & quamvis arteriæ & venæ finum tertium adeuntes sanguine plenæ essent, nihilominus tamen sinus tertius & laterales non usque adeo sanguine implebantur. Ce-

rebro cum cerebello e cranio exempto, separata dura meninge circa sellam equinam ostendi utrinque arteriam carotidem tortuosam esse, prout supra p. 35. depingitur, neutiquam vero ut in brutis in plexum seu rete mirabile dispesci, quod aliis quoque vicibus feci: nec hactenus aliam arteriæ faciem in his locis inveni, ausimque dicere talem semper apud homines reperi-
tum iri; ut quoque tandem aliquando fatebuntur Retis mirabilis patroni, si modo & ipsi quoque rei periculum facient. Inversa cerebri & cerebelli mole vidimus quoque arteriarum vertebraliū & carotidum conjugium, ramosque varios hincinde per universam machinam dispersos; cujus distributionis historia plenior supra p. 93. extat. In dextro ventriculo multum aquæ limpidae continebatur, minus in sinistro: multum quoque aquæ ex fistula spinalis medullæ sublato trunco emanavit. In glandula pituitaria duplo majore solito, sinum inveni plenum muco qui in gelatinam subflavam pellucidam concreverat. Meningem tenuem citra cerebri lacerationem longe lateque avellere potui, evulsis simul innumeris fibrillis arteriosis substantiæ cerebri immerfis: qua sublata in superficie denudati cerebri rimulæ innumeræ conspectæ fuerunt, e quibus presso levicule cerebro sanguis

guis exsudabat. Id aliis vicibus præstare potui, quoties madidius cerebrum debito fuit, aut si per biduum aut triduum cerebrum frigido & humido aëri exposui. Cerebri pars cineritia flaccidior medullosa, utraque flaccidior debito: quin etiam Cerebellum mollius quam in aliis observaveram. Non tamen cerebri substantia tam flaccida erat ut in se conciderit ac subsiderit, aut pultacea evaserit, quamvis undiquaque aquæ immersa fuerit, nam etiam extra calvariam exemptum cum cerebello figuram suam retinuit, etiam sublata tenui meninge in locis plurimis: adeo ut spectatoribus cætera Cerebri & Cerebelli curiosa demonstrare potuerim: ut taceam, imprimis cerebrum intra cranium corpus falciforme fibrasque & ramulos arteriosos tum ab ipso, tum alibi a dura matre profectos suspensum tenuisse. Intestinis a sordibus mundatis, in medio Jejuno invenimus tumorem juglandis majorem inter intestini tunicam externam conclusum, proprio folliculo circumdatum, continens corpus mire fibris & vasis sanguiferis intertextum: In principio Jejuni reperiimus quoque valvulam seu circulum membraneum, coli valvulæ similem, ascensum impredientem: In recto plurimos scrobiculos superficiarios dimidiati pisi capaces vidimus, ac si non ita pridem

dysenteriam passus esset, quæ tunc militibus epidemica fuit. Certe diarrhææ vestigia clinici in indumentis invenerunt; cujus quoque indices fuerunt fæces intestina implentes. Vesiculæ seminales continebant humorem copiosum gelatinum concretum: utraque ductu insigni & proprio prædita qui ambo quoque osculo proprio ad latus monticuli in urethram capacioremi habant, Quæ insuper circa partes generationi dicatas in hoc cadavere observaverim & num in lithotomia saucientur? alibi commodior differendi locus erit.

S C H O L I A.

I. Affectus qui Militem istum e medio sustulit Apoplexia fuit, nam sensibus omnibus & motu ipsaque deglutiendi facultate abolitis respiravit adhuc cum stertore a decima antemeridiana ad quartam vespertinam. Tetanus comes non incommode diceretur, omnibus artubus rigidis existentibus, nisi brachium attolli potuisset; atque os hiaffet. Convulsivi tamen quidpiam ante apoplecticam invasionem passum fuisse, maculæ in lingua, morsu procul dubio illatæ, probabile faciunt. Syncopen vero neutiquam appellaverim quamvis totus habitus perfrigerit, nullusque pulsus indicium tactu inveniri potuerit, respiravit enim cum stertore sex integris horis, sc. ad ultimum vitæ momentum usque.

II. Frigus præcipuam hujus Apoplexiæ causam fuisse existimo, nam intensissimum tunc e-

rat, præcipue in colle edito, nivibus obtecto & libere ventis exposito: dum enim ex itinere licet brevi & morbis prægressis fessus quieti intempestivæ indulgit, tandem nemine expergefaciente, somno, æterni parario, obrutus fuit, frigus sanguinem, cerebrum & spiritus animales ita congelavit, ut nec spirituum animalium materia supeditaretur, nec, si forte aliquid sanguinis arteriosi accederet, in cerebro & cerebello percolaretur, nec si spiritus confecti adhuc fuissent, nervi ad loca debita detulissent. Frequenter id viatoribus Alpes Helveticas tempore hyberno trans-euntibus, etiam robustissimis & sanissimis evenit, nisi soporem, plurimis per loca nivosa molestissimum, omni nixu excutiant. Ad congelationem, caloris & spirituum extinctionem a frigore facilitandam plurimum fecerunt morbi prægressi. Affectus graves non ita pridem Juvenem hunc perpeßum fuisse non obscure patuit: *Febrim continuam* prodiderunt, absentibus phthisis signis, habitus valde extenuatus, cutis strigosa, omentum & renes omni pinguedine privata: renum sinus ubi vasa emulgentia inferuntur gelatina loco pinguedinis occupans: duo *ulcera sinuosa* ampliora quam post furunculos relinquuntur, quæ non anthracis reliquias dixerim, cum pus laudabile & coctum continuerint: forsan ab inflammatione febris comite vel sequela hæc supererant. Dubium an pleuriticus fuerit nec ne? Sugillatio in sinistro latere non est signum pleuritidis, cum foris cutis atrorubescens fuerit, quod alias non observatur; potius casus alicujus effectus, quia in valle per quam huc proficisceretur via proclivis ad casum ob gelu copiam, apud Juvenem gressu minus firmo utentem. In dextro latere pulmonis lobus inferior rubicun-

dior & duriusculus aliquid inflammatorii passus videtur, nisi interceptæ subito sanguinis Circulationi circa ultimum vitæ articulum in pulmonibus hunc ruborem & apparentem inflammationem adscribere velimus. *Dysenteria* perpeffæ vestigia in intestino recto erant scrobiculi pisi dimidiati capaces, & diarrhæa biliosa superstes. Sanguinem in Cordis ventriculis & vasis majoribus fluidum nec post obitum grumescentem in cadaveribus febris continua defunctorum aliquoties & nonnunquam Venæsectione emissum febre maligna ægrotantibus observavi. An ob febrim continuam talem consistentiam apud Juvenem hunc adeptus sit, num vero frigus spiritus & calorem extinguens illam effecerit? dubium est: Febris enim continua perseverante iter pedes perficere nequivisset, etiam brevius: quin potius antequam ditionem nostram attigisset, in via periisset. Ad promptiorem congelationem & spirituum ac caloris extinctionem intra cranium plurimum quoque contulit aqua intra meninges, sub tenui meninge, in ventriculis & fistula sacra redundans, nam quoniam immobilis stagnavit, facilius frigoris vim recepit, ac efficacius sanguini & spiritibus impressit. Forsan tam copiose Aqua intra Cranium collecta fuit ob febrim continuam & cephalalgiam, quam procul dubio sævam diu sustinuit, ob tenuis meningis concretionem cum dura matre dimidii Dahleri amplitudine sub sinistro sincipite. Propter aquæ abundantiam sub tenui meninge detentam, illam haud difficulter longe lateque a cerebro abstrahere potui cum fibrillis arteriosis, remanentibus rimulis ex quibus presso levicule cerebro sanguinis guttulæ prodibant. Cerebrum flaccidius detracta meninge non pultis fluidioris instar diffluit, quam-

quamvis forsitan diu irroratum & veluti inundatum ab aqua & a frigore quasi congelatum fuerit, figuram enim suam integre servavit. Alias cerebrum per aliquot horas elixum aliarum glandularum more firmitus & durius evadit. Glandula pituitaria duplo major naturali, in medio sinu prædita, qui muco subflavo gelatinæ simili plenus erat, ad aquæ cumulationem symbolum contulit, dum nec serum intra cranium stagnans allexit; nec aliorum excrevit ob conformationem vitiosam.

III. Retis mirabilis, sub dura meninge, juxta latera ephippii, ubi in plerisque quadrupedibus situm est, in Homine hoc Gallo ne minimam umbram inveni: ibidem loco hujus retis spectatoribus arteriam anfractuosam, prout supra p. 33. depingitur, ostendi, eamque solam, citra accessionem ullius rami arteriæ vertebralis. Supra duram matrem in basis cerebri parte posteriore demonstravi canalem ex arteriis carotidibus & vertebralibus unitis resultantem, de quo supra p. 105. qui tamen nequaquam rete mirabile est, quale a Galen. l. 9. de Us. part. c. 4. describitur, de quo supra p. 25. videatur; multoque minus retis nomen meretur; quam arteriarum ramuli qui intra anfractus cerebri feruntur. Proinde Reti mirabili in homine nullum unquam usum, ceu non-Enti tribui: in Quadrupedibus quidem quoniam prono capite incedunt putavi sanguinem aliquantum remorari, ne impetuose in cerebrum ruat, quod tamen non universale esse Equi monstrant, quos reti mirabili carere Exc. D. Willis in præclara Cerebri Anatome scribit.

IV. Tumor intra duas tunicas intestini Jejuni nucis juglandis magnitudine, conclusus, proprio folliculo præditus & continens corpus ex

fibris & vasis sanguiferis contextum, non impedivit chyli & fæcum protrusionem, ut ex contentis Ilei & crassorum intestinorum patuit.

V. Vesica ob paralyfin Urinam propellere nequit, nullum enim impedimentum circa ipsius collum reperiiebatur, cui retentio imputari potuerit.

HISTORIA XVII.

Bartholomæus Feer Triboldinga-Turgovius: Adolescens novendecim annorum: Sartor: Circa principium Nov. 1656. capite doluit: assumpta evomuit: hujus causa carnificem consuluit, qui purgans propinavit & Venæ sectionem suavit: an præterea aliis medicamentis & qua diæta usus fuerit, rescire non potui. Indies morbo in deterius vergente 11. Nov. ad Nosodochium delatus fuit. Febricitare mediocriter videbatur: dormivit plurimum, expers factus stupidus quasi erat & delira loquebatur: nec cibum nec potum petiit: oblatum & intrusum deglutiit: cibandus erat instar infantis. Urina naturali similima d. 15. Nov. quo ipsum cum Exc. D. D. Christophoro Hardero conveneram, profundissime dormivit, ut ipsum nulla ratione excitare potuerimus: agebant adstantes ipsum interdium dormire; noctu vigilare: atamen inscius lectum perminxerat: In respira-

spiratione nullum adhuc dum vitium observatum fuit. d. 17. Nov. hora 10. noctis mortuus est. Ex ore demortui plurimum cruoris effluxerat. Dum ceu sanus adhuc vivebat odontalgia obnoxius erat : cujus causa fumum Tabaci hauriebat : an crebrius id fecerit ? non constitit nobis. d. 18. Nov. Caput aperuimus : Sublata cranii olla, per duram meningem vasa tenuis meningis in syncipite ad sinum tertium meatia vidimus valde cruore oppleta & triplo ampliora, quam alias existunt, adeo ut primo intuitu circa verticem omnia sanguine suffusa apparerent : verum incisa dura meninge nihil extravasati invenimus, ipse quoque sinus tertius sanguine turgidissimus erat. Remoto corpore falciformi primo cerebrum ad ventriculum sinistrum incidimus, protinus serum flavum satis copiose effluxit. Sublato prorsus fornice conspeximus utrumque ventriculum cerebri lateralem, maxime sinistrum humore purulento, viscido, instar pultis fluidioris turbido copiose imbutum : hic quoque ad ventriculum tertium defluxerat. Ventriculus quartus plane mundus nec vel minimum conspurcatus erat. Superficies utriusque ventriculi aspera & inæqualis & insuper flaccida fuit, dum enim blanda manu & levicula pus detergebam, successit statim medul-

dullosa substantia candido suo nitore privata, corticis cerebri instar flavescens aut subfusca apparens. In dextro ventriculo observavimus superius tabulatum seu fornicem, imæ ejus parti, humore hoc purulento intermedio, aliquomodo agglutinatum fuisse. Plexus choroideus iisdem for-
dibus inquinatus fuerat. Aperto pectore, inciso pericardio effluxit aqua limpida flava. In corde nihil morboſi viſum fuit. Pulmo in dextro latere leviter pleuræ accrevit: minus rubebat: in sinistro latere firmiter pleuræ adhæſit undique, admodum cruore suffusus. In abdomine Venter, intestina, Lien, pancreas, hepar & cæteræ partes a naturali dispositione non desciverant, quantum quidem oculis usurpare licuit. Vesicula biliaria bile coloris fusci plena fuit.

S C H O L I A.

I. Quali morbo primum Juvenis iste affectus fuerit, ignorabatur, cum II. Nov. ad Nosodochium delatus jam *lethargicus* esset, multum dormiret, expergefactus deliraret, stupeſceret, obliſceretur Ciborum & potus assumendorum, ut infantis instar cibandus esset. Quamvis urina naturali similis, non tamen prorsus a febre immunis erat, licet intensa non fuerit. Die 15. Nov. quo ipsum cum Cl. D. D. Hardero conveni, *Lethargus in Carum* degenerasse quidem videbatur,

tur, quia a somno excitari nequibat, verum & tunc temporis Adstantes fidem faciebant illum interdiu alto sopore obrui, noctu autem vigilare, sed omnium immemorem; nam inscius lectum permungebat.

II. In Cadavere plura occurrerunt: quibus tum febris tum propemodum fere inseparabilis dormiendi necessitas deferri possent. In imo ventre nihii quidem visui præternaturale apparuit, nisi vesicula fellea bile subfusca distenta, qualem in puero aliquando sævissimæ cephalalgiae & paraphrenitidis, subsequente tandem sopore, mortis causam fuisse reperii, nullo ad sensum vitio in cerebro animadverso. *Chifflet. Singul. Observat. 10. p. 8.* memorat Puellæ undecim annorum Lethargum quadraginta horarum spatio funestum fuisse. Aperto cranio cerebrum sanum citra inflammationem & Ventriculos mundos repertos; in Intestino vero tenui Vermes duodecim oblongos conglobatos & intestinum cum insigni rubore inflammatum inventum fuisse: frustra injectis Clysteribus, cauterio futuræ coronali applicito & cucurbitulis affixis. In medio ventre pericardium aqua limpida flava plenum fuit, verum cordi nihil præter naturam inerat, quod manifeste febrilem fomitem sanguini inesse, proderet. Pulmones in dextro latere cum pauxillo rubore leviter accreti erant, firmitus in sinistro latere simulque admodum cruore suffundebantur, ut vel pleuritidem secundum *Plateri* sententiam vel Peripneumoniam ostentarent: verum hanc suffusionem sanguinis vel nullam, vel non nisi recentem inflammationem dixerim, natam a sanguinis motu subsistente, ob cordis motum in Juvene plethorico subito abolitum, nam fere ad ultimum halitum nunquam attactu valde æstua-

æstuavit, facile respiravit ultima ante obitum vespera, nunquam iussit ac urinam consistentia & colore naturalem excrevit. Intra cranium per duram meningem tenuis quasi inflammata transparuit, verum illa discisa, vasa tenuis meningis ad sinum tertium tendentia triplo ampliora citra inflammationem ipseque sinus tertius sanguine plenissimus apparuerunt, quod evenit a sanguinis Circulatione impedita vel prorsus intercepta. Pridem hoc factum fuisse credere non possum, quia cordis motu & respiratione integris vix inflammatio cerebri, vel vasis teneri ruptio in tenui meninge emanassent: non tamen negarim hanc sanguinis stagnationem mortem accelerasse. Potissima Lethargi causa in Ventriculis cerebri lateralibus & tertio lauisse videtur, in sinistro enim Ventriculo plurimum feri flavi minus in dextro continebatur, quia tabulatum superius infernæ parti agglutinabatur; insuper amborum ventriculorum lateralium superficies humore viscido, purulento, turbido instar liquidioris pulvis farinacæ, quo etiam Ventriculus tertius & plexus choroideus inquinati erant, ventriculo quarto mundo, quia glandula pinealis huius humoris descensum eousque impediabat, denique deterso pure manifeste superficies ventriculorum exulcerata erat, nam aspera, inæqualis & flaccida fuit, & a blanda quoque deterfione medullosa substantia secessit suumque nitorem candidum aliquousque amisit, subflavaque & cortici cerebri similior apparuit. Exulcerationem hanc cerebri procul dubio effecit serum flavum, aqueo limpidiore, acrius forte non nisi prævia inflammatione quadam. An Tabacci fumus, quo contra odontalgiam utebatur aliquid ad exulcerationem contulerit, certo non constat, nam quomodo

modo illo abusus fuerit nescitur, nec in reliquo cerebro fumi illuc penetrantis vestigia observavimus. *Chifflet. Sing. Observ. II. p. 9.* refert, Puerum quatuordecim Annorum duobus Mensibus ante obitum caput casu ex alto allisisse & in dolio a literarum commilitionibus rotatum fuisse, postea in febrim incidisse & primum Empiricorum opera usum, hinc ipsum vocatum fuisse: Invenit Puërum leviter febricitantem, stupidum, instar ebrii incedentem, non sitientem, conquerentem de dolore capitis absque rubore aut inflammatione: postea oculis clausis obmutescentem, dentibus stridentem, frustraneis Clysteribus, cucurbitulis aliisque remediis; & licet locutus sit mox tamen obticescentem: Paulo post morientem. Aperto cadavere invenit pulmonem dextrum & Hepar accrevisse & Ventriculum cerebri dextrum aquæ libram continuisse, cui lethargum imprimis adscribere videtur, forte non sine ratione, cum in hac ætate tantum Aquæ cerebrum premendo actiones animales plurimum affligere valuerit. In Juvene tamen isto serum non ceu primariam causam accusarem, cum plus aquæ intra cranium contentæ apud Virginem *Histor. XIV.* & apud Fœminam *Histor. XV.* nihil Lethargici, nec apud senem *Histor. XIII.* pepererit, omnesque alio mortis genere obierint. Igitur plus tribuerem ulceribus in utroque ventriculo laterali superficiem depascentibus, idque satis profunde, nam non solum magnam stragem spiritibus animalibus inferre illorumque cursum intercipere & communicationis filum abrumpere valuerunt, unde dormiendi quædam necessitas & rerum oblivio enata est; verum etiam inquinamenta putrescentia ad substantiam medullosam sanam altius penetrarunt, deliriumque excitavunt,

runt, quædam massæ sanguineæ intra cerebrum admixta febris lentæ causa evaserunt.

III. Apoplexiâ potius quam syncope extinctus videtur, nam vesperi ante obitum adhuc bene respiravit, nihilque minus Adstantes cogitarunt quam ista nocte illum extinctum iri. Ad producendam Apoplexiam nimia vasorum repletio in cerebro, aquæ redundantia & Ventriculorum ulcera conspirarunt.

IV. Post mortem multum cruoris ex ore emanavit, qui non ex cranii cavo effluxit, cum nihil cruenti ibi, secto cranio, visum fuerit, verum prodiit e faucibus, ob venam aut arteriam aliquam in illis sedibus reſeratam, quod non raro accidit fermentante sanguine post obitum, quibuslibet mistis particulis, sublato rectore, ad sua principia tendentibus, aut ad prædominantis jussa aliam formam affectantibus.

SOLI DEO GLORIA.





*Nobilissimo, Experientissimo Celeberrimo-
que Viro Domino*

D. JOHANNI JACOBO WEPFERO

*Medicinæ Doctori & Scaffusianorum Polia-
tro Primario &c.*

J O H A N N E S O T T

*Philosophiæ & Medicinæ Doctör Scaffu-
sianus*

FELICITATEM PRECATUR.

EA qua soles, Vir Experientissime, co-
mitate, me nuper ad edendum scri-
ptum illud, (quod superiori anno Bernæ
Helvetiorum conceptum, Scaffusii vero
ad umbilicum fere perductum est, una cum
versione, binorum Anglicanorum Tracta-
tuum, viz. *Holderi Clarissimi, de Elementis
Sermonis, & Generosissimi Morlandi de Tuba
Stentorophonica*, qui duo libelli, mole qui-
dem exiles sunt, multiplici vero curiosi-
tare

tate refertissimi) vehementer hortatus es: Nulla quidem ratione humanissimæ Tuæ petitioni, Vir Experientissime, refragari potuissem, nisi me nonnulla experimenta, ad ratiocinium meum penitus determinandum defecissent, & ad quæ sumenda fere nec otium nec occasio suppetunt. Equidem non sine gaudio me necessaria omnia experimenta, jam capta, in libro Rever. Patr. Athanasii Kircheri, e S. J. quem de *Phonurgia* nuper edidit, deprehensurum speravi, exinde enim ego sumtibus & labore ea capiendi sublevatus fuisset; summo igitur cum in finem studio, librum evolvi, & revolvi denuo, sed in cassum penitus, nec præter picturarum varietatem, & tædiosam repetitionem, quibus libri ipsius scatent, quidquam deprehendi, res autem ipsæ si spectentur & ad vivum resercentur, jejunæ ut plurimum comparent; sed cum mihi hac vice propositum non sit, in alterius errores curiosius inquirere, hoc unum videtur, principiis & hypothefibus à Kircheri positis, rem confici non posse; quantumvis conclusiones nonnullæ ex meis, cum Kircheri ex parte assertionibus coincidunt, utut diversis viis institerimus; is tamen Morlandianum problema omnibus eruditis propositum, ne quidem attingit fere, & ubi attingere videtur, misere deficit.

cit. Istud autem Generosissimi Morlandi problema, stimulum mihi addidit, ut quid valeant vires & quid ferre recusent, duce experientia & Geometria experirer: Sic autem se habet modo laudatum Morlandi problema:

What is that Rhight-lined, Curvi-lineal, or mixt figure? And what are its exact Dimensions? And what the sphere of its activity? That best and most magnifies Humane voyce, in Syllables, words and Sentences?

Hoc est:

Quenam est Rectilinea, Curvilinea aut mixta figura? Quæque ipsius accurata Dimensio? Et quanam illius Sphæra activitatis? Quo omnium optime & distincte Vox humana, in syllabis. Verbis ac Sententiis intendatur.

Hoc certe problema, a Patre Kircherō nullo modo solutum est, & qui leviter saltem Phonurgiam illius evolvere studebit, is sine ordine & judicio, confarcinatum opus, & ex Musurgia illius descriptum deprehendet, adeoque verum judicabunt, virum istum ultra sua propria monumenta, vix quidquam sapere. Cum autem, Vir Experientissime, scriptum meum aliquantum

prolixius sit, quam ut occupationes Tuæ multiplices permittant, ut integrum perlegas, brevibus & scopum, &, quousque modulus epistolii permittit, ipsius rei compendium Tibi luculenter enarrabo: Nosti Vir Experientissime, ea quæ visui offeruntur clarius nobis adparere, & accuratius a nobis dijudicari posse, quam quæ per alios sensus nobis obversantur: ac proinde si actio illa, quam nos auribus sub ratione soni haurimus, visibilis redderetur, distinctius eam concipere & exactius discriminare possemus: hoc autem in scribto isto tam studiose perfecisse, mecum reputo, ut vix clarius modo alio fieri possit: Etenim Veterum comparisonem illam, qua naturam soni explicare studuerunt assumpsi, viz. Undulationes aquarum, earumque generationem ex turbato aëris & aquæ æquilibrio curiose notavi, unde circuli illi seu undæ, ex frequentioribus itibus ac redivisibus seu subsultu aquæ insequuntur, ac quasi jugiter sese protrudunt: symptomata autem harum undulationum, & mutuum occursum, ac eorum causas, si non veras, saltem verisimiles enumeravi, & quousque explicando sono inservire queant diligenter descripsi, huic autem observationi aliud, ex eodem fundamento agens, tritum experimentum adjunxi, nempe tremulum illum liquo-

liquoris in scypho contenti motum, a digiti prius madefacti, super margine scyphi satis celeri circumductione ortum: quibus ambabus comparationibus, ceu hypothese-
sibus, omnia illa experimenta, & observationes, quæ hætenus circa sonum habitata sunt, clarissime explicari possunt, & ex parte quoque, quousque viz. instituti ratio id a me requisivit, factum est, (& qui plenarie sonorum rationes & auditus modum brevibus, solide tamen videre cupit, is Clarissimi Dom. D. Scretæ dissertationem de auditu, Heidelbergæ Typis exscriptam adeat, & paucis in pagellis plenius sibi satisfaciet, quam vasto Kircheri volumine Musurgico & Phonurgico unquam fiet:) non quod ubique ex amussi omnia quadrent, habent enim similitudines illæ suos quoque defectus, qui cum natura soni non compatiuntur, quos pariter studiose annotavi: Undulationibus autem & earum consequentibus in genere ita consideratis, proprietates & accidentia soni ad numeros revocavi, & juxta allatas rationes discussi. Quia autem sonorum ratio ex reflexionis lege ad angulos æquales peragitur, ordine inquisivi, quænam ex figuris parabilioribus a Geometris hætenus consideratis, propagando sono aptiores existerent: cum autem natura unam præ altera

in specie non determinaverit, ad hanc rem unice peragendam (id est natura reflexionis non præcise hanc vel illam lineam requirit, sed ea peragitur in omnibus figuris, modo tamen suo) dispiciendum mihi fuit, quænam ex infinitis huic rei aptis, ea foret, quæ proposito quam maxime conveniret: Observandum autem hic merito putavi, naturam soni, a natura luminis quam plurimum differre in hoc, quod sonus tantam radiorum suorum distinctionem non requirat, quantam luminis, colorum, &c. ratio postulat: etenim si luminis radii inter se misceantur & confundantur nullum objectum absque fucō seu finire pingunt: cum contra radii sonori etiam si confundantur, inde tamen nullum detrimentum patiuntur, imo si rem ex æquo æstimaverimus, confusionem istam ad intensiorem soni quam maxime requiri deprehendemus: Sed Vir Experientissime, nosse tandem cupis quorsum Geometria & calculus me tandem perduxerint: verbo rem aperiam, *Spirales lineas ac superficies huic quam accommodatissimas esse*, scias; non quod spiralis illa Archimedeæ, aut ex infinitis aliis una præ altera, prærogativam aliquam sortiatur, sed perinde est, sive sit intorta, circa cylindrum, sive conum; aut conoides aliquod Parabolicum, Hyperbolicum

El.

Ellipticum, aut Parabolastrum, Hyperbolastrum Elliptoidem primi, 2. &c. gradus; five etiam serpentis in morem, aliove modo, cæteris tamen paribus, incurvetur; neque huic negotio minus commoda erit spuria illa spiralis, qua Mechanici uti consueverunt, ex descriptione duorum circulorum vel concentricorum vel eccentricorum, continuata serie ortum trahens, five ea cochleæ, aut helicis cujuscunque modum, vel forma serpentina, circum torqueatur, modo radiis soni liber pateat aditus, nec transitus illorum præcludatur, aut intercipiatur via, ac spirarum gyri numero plures fuerint, hac enim ratione radii reflexi sæpius sese unire & quasi confundere possunt, atque ita demum viribus unitis, quasi ex foco quodam, ex largiori orificio exire poterunt. Tandem denique vim & sphæram activitatis Tubarum Stentorophonicarum harum positam esse, *in ratione cuborum, orificii majoris & minoris*, inveni, id est *sonum nudum ad sonum armatum esse, ceu cubus semidiametri minoris orificii se habet, ad cubum semidiametri orificii majoris*: cui tamen rationi ex accidenti, varia augmenta aut detrimenta accidere possunt, uti distinctius & exactius hæc & similia alia ex scripti mei serie patent.

Verum enim vero Vir Experientissime,

hisce ita generatim ostensis, ratiocinium meum cum phænomenis Tubæ Stentorophonicæ Generosissimi Morlandi comparavi, illudque quam maxime cum illius experimentis convenire deprehendi, ubi simul admirabundus cogitare coepi, qui tandem fieri potuerit, ut Vir ille, qui tot jam retro annos eandem inventionem, & quod mage est, ipsam inventionis praxin sibi vendicans, scrupulosius easdem conditiones particulares, in scripto centuplo prolixiore non animadverterit, cum tamen Generosissimi Morlandi curiositas, ad minutula nonnulla (uti nonnullis videri possent) animum adplicuerit in scripto tam conciso, quæ tamen tam sedulum inventionis anticipatorem latere minime potuissent, vel saltem debuissent. Non me fugit Vir Experientissime, quin tandem me interrogaturus sis, annon gloriosa Patrum Societatis Jesu gens, maximas inde per totum orbem literarium turbas concitatura fuisset, non hodie (ubi utilissimum juxta ac curiosissimum Generosissimi Morlandi inventum, per totam Europam percrebuit) demum, sed jam a viginti & amplius annis retro, eadem hæc Phonurgia iidemque Kircheri conatus prodiissent, præsertim cum vix quidquam a Patribus Societatis in lucem protrudatur, quod non plurimi

exasciare conati fuerint. Verum ut ingenuè & liberrime quid hac de re sentiam, fatear: puto Nobilissimam istam gentem, usque adeo gloriosam mihi videri, ut alios nullos in arte sua utcumque claros ad partes vocandos putet, sed omnia in agro omnis scientiæ suæ, jam olim fata esse, & proinde ex illo demetenda esse, adeo ut Monarchiam quandam scientiarum & artium inter se conficere & stabilire satagant, illis etiam posthabitis, qui cætera ejusdem in religione fœderis cum ipsis participes sunt: Sed Vir Experientissime, mones, video ut ad nostra redeam, quod equidem libentissime facere studebo, postquam animadvertero, Kircherum ne quidem ullum novum, Generosissimi Morlandi experimentis addidisse, & conditiones quasdam omisisse, quibus neglectis, errores non contemnendi ab eodem in hoc materiæ genere commissi fuerunt.

Cum autem Vir Experientissime, Tubam Morlandi, cum experimentis illius & ratiocinio meo, felici cum eventu comparassem, ad quæstiones deinceps quasdam a Generosissimo Viro propositas responsiones si non veras, saltem tales, quæ ex verisimilibus hypothesibus ortum trahunt, subjunxi, quæque verisimilium loco haberi possunt, donec vel veræ vel magis verifi-

miles afferantur. Hisce autem in rebus per totum scribtum meum, ab omnibus præjudiciis, quam potui studiosissime abstinui, reinque ita plane consideravi, quasi de novo omnia invenienda forent, egoque primus essem, qui de hac materia unquam cogitaverit, nec ullos hoc in negotio, vel vivos vel mortuos præceptores consului, quos etiam si ad partes vocare voluissem, ob penuriam tamen tam horum quam illorum, in loco ubi tunc degebam, laudabilem aliquem profectum facere nullo modo potuissem; nam præter paucos nonnullos Viros Clarissimos pariter & Amicissimos familiariter nullum noveram, quique hac de re, antequam ego illis summa capita exposuissem, vel fando nihil audiverunt, adeoque ab illis in hoc studiorum genere adjuvari minime potui, utut propenso in me animo & sincero in conatus meos affectu ferrentur.

Scribtum autem hocce, more meo, Physico-Mathematico stylo adornavi, (methodo, meo quidem judicio, unica, quæ nos tandem ad veritatis arcem deducet, & quæ via nisi diligenter calcetur, in Philosophia solidi nihil præstabimus, quæque si Medicis quoque familiaris foret, dubio procul, ars ista, generi humano utilissima, & majora incrementa sumeret, & certiora fundamenta nancisceretur, nec male sperare
ju-

jubent specimina ista a diversis diversa jam in lucem edita) calculo & figuris illustravi, ut conceptus cuivis paterent. Mirum autem cuiquam videri posset, quod Pater Kircherus & ego, ad eandem spiralem devenerimus; cum tamen ex libro ejus Musurgico nihil delibaverim: quod eo lubentius coram Te Vir Experientissime, commemoro, quod ejusdem Kircheri Phonurgia prætendat, Morlandum Tubam suam Stentorophonicam ex Musurgia mutuo sumfisse, imo tot jam retro-lustra eandem inventionem ipso facto exercitam fuisse, totisque viribus, undiquaque conquisitis suffragiis, mundo illud persuadere conatur: certe si ad leges a Kirchero descriptas, Morlandus Tubam suam adornare voluisset, loco canalis recti, spiraliter, vel alio modo inflexum tubum adhibuisset. Et si quis more Phonurgiæ encomiastarum arguere vellet, quidni eodem jure Kircherum spiralem suam ex Illustrissimi Baconis de Verulamio novo Atlante hausisse inferri posset; cum is ibidem clarius loquatur fere, quam Kircherus in sua Musurgia. Sed ad mea ut revertar jubes Vir Experientissime, Tu ipse nosti, me Tibi exemplar scribti mei statim post reditum in patriam ostendisse, quamprimum enim in patriam redii, primas meas cogitationes

Cc 5

(quas

(quas Bernæ conscripsi, easque conventui Theologorum ibidem recensendas exhibui, quorum judicium suo tempore sequetur) Tibi tradidi, qui illas statim expoliendas judicasti, ut publici juris fierent: Sed & pariter Vir Experientissime, ipse nosti, quod (quæ mea est oculorum imbecillitas) a lectione librorum tam vastæ molis, ceu est Kircheri *Musurgia*, semper abhorruerim; nec etiam quid giganteum istud Kircheri volumen in se contineret novisse Clarissimus & profundæ Eruditionis Vir, Dominus Stephanus Spleissius, Gymnasii Rector edicere poterit, qui ad libri istius lectionem vel saltem superficiariam inspectionem faciendam hortatus est, simulque me inventurum, quæ proposito meo inservirent, monuit; sed tamen librum in manus sumere, donec scribtum meum secundis curis examinasssem, & quousque experimenta quædam permitterent, emendasssem, nolui, nec prius Kircheri *Musurgiam* vidi, quam scribtum meum istum quem habet perfectionis gradum affecutum est; iidemque illi Viri in quorum consortio res initium sumsit & incrementum, testari poterunt, quibus adminiculis scribtum istud conceptum fuerit.

Methodi igitur illius, Vir Experientissime: qua uti soleo, beneficio, experimentis, suffultus, omnia illa, quæ in libro meo exstant, inveni; nec ea in re quidquam ulterius optandum, quam ut peritus quidam artifex, spiralem ejusmodi Tubam fabricaret, fabrica enim ista non est cujusvis artificis, nec tam facilis, quam primo intuitu cuiquam videri posset. Particularia omnia commemorare necessum non duco, ea enim si videre cupis, Vir Experientissime, in meo scribto ordine, quando lubet, legere poteris, & si Tibi Tuique similibus, amplius visum fuerit, ut publici juris fiat, tum Holderi Clarissimi liber de Elementis Sermonis, quo in rerum genere (quantum quidem novi) hætenus curiosius nihil prodiit, tum Generosissimi Morlandi de Tuba Stentorophonica lectu dignissimum libellum, tum denique scribtum meum de propagando, & multiplicando sono, edere non refragabor, modo commodam necessaria experimenta faciendi occasionem nanciscar. Verum enim vero Vir Experientissime, ingratum Tibi futurum existimo, si pariter eodem in scribto publice protester, quam inique illi mecum agant. qui juratum me Cartesii asseclam, & mancipium, hic & alibi locorum proclamant; Equidem non paucos esse scio, qui cognomen istud honori sibi ducerent, quos genio suo indulgere permitto, mihi autem aliter visum est, libere enim Philosophando, ab omni partium studio abstinere soleo, eamque solam philosophandi Methodum probo, quæ ex fide experimentis ratiocinari consuevit, quæque in subsidium adsciscit Geometriam: absque duabus enim lampadibus hisce, mens nostra, in rerum naturalium cognitione misere cæcutit; nec tamen hæcce ita interpreta-

ta velim, quasi Cartesii aliorumque monumeta, non præclara, egregia & satis, suo tamen modo, solida sint; sed hoc unum volo, ex libro potius naturæ, cujus dictata non fallunt, quam ex scribtis Aristotelis, Cartesii &c. philosophandum esse; cum autorum quorumvis libri ex variis passionibus animi & præjudiciis diversis componantur, illique fidæ & multiplicis experientia defectu, rem non uti in natura sua est determinare conentur, sed potius ex ingenii sui modulo variis opinionibus & respectibus nonnunquam politicis &c. fascinato judicent. Ducem aliquem eligere expedit equidem, sed junioribus, illisque, qui proprio Marte in veritatis inquisitione pergere nequeunt, verum quam primum ex vagæ mentis ejusmodi serperastris egressi fuerint, ducum eorum ratiocinia ad experientia facem ab ipsis sunt examinanda, atque ubi tandem eos deserit veritas, protinus & ipsi deferendi sunt; imo expedit magis auctori creare præjudicium quam veritati, cum ita veritatis inquisitioni, nec repagulum aut ullum præjudicium sistatur, resque cum homine, non cum veritate, aut illius investigandæ ratione habeatur. Quamobrem si Cartesius, si Gassendus, si Plato; imo si Aristoteles, Epicurus alique Viri utique de Philosophia optime meriti a naturæ phænomenis & ipsa experientia erroris convincuntur, Viri illi potius emendandi, quam ex prætenfa illorum omniscientia, naturæ vis inferenda, dum illius Phænomena, in gratiam auctoris miris modis torquentur, atque experimenta hypothesis, etiam ingratiss illis, accommodantur, obtorto collo, quæ eidem stabiliendæ inserviunt, omnia arripiendo, & elevando ac extenuando ea quæ subvertere eandem possunt, undique etiam conquisitis fucis &

& Rhetorum flosculis, quibus veritati præjudicium creatur; quare contraria via incedendum puto, nempe ex numero plurimis experimentis (imo quo plura fuerint de una eademque re, siue jam trita & nota, siue demum inquirenda sit, parum refert, eo melius ad scopum pervenimus) hypotheses esse exsculpendas, easque (vel docendi vel etiam discendi gratia) tam diu retinendas, donec vel ipsimet instantiam aliquam fecerimus, vel aliunde acceperimus, quæ cum hypothese ista non congruat; ac tum demum ubi plurimæ instantiæ & experimentorum multitudo, hypothesin aliquam firmaverint, de illius probabilitate pronunciandum, imo diligenter discantibus inculcandum, nonnisi hypotheses eas esse, quas illi forte pro ipsius rei veritate acciperent, sic enim periculum deceptionis nullum subesset; secus vero si sit, & ex paucis experimentis formetur hypothesis, fieri non potest quin facillime reperiatur instantia, quæ eandem penitus subvertat. Hoc autem negotium, iis quæstionibus protinus simile est, quæ ab arithmetice & Geometris vocantur infinitæ solutionis, ubi nimium, una vel altera conditio deficit quo minus illæ penitus determinatæ existant, quæ conditiones instar datorum in Geometria, in Physicis vero ceu experimenta considerari possunt, quamobrem istis conditionibus datis ipsa quæstio penitus determinatur, ut etiam experimentis quæstiones naturales ulterius ab incertitudine liberantur.

Quocirca partium studia omnino sunt abjicienda, quæ certa pestis Philosophiam in ipsis incubulis suffocare continuo studuit, vel saltem illius incrementum retardare laboravit, nec cogitari quidquam poterit deletorium magis quam

præsentaneum ejusmodi venenum. Quid enim in veritatis tabem directius collimat, quam si omni conatu tentetur autoritas Gassendi, Aristotelis, Cartesii, Epicuri &c. in arce collocari? Quæ non molimina & conatus istorum in gratiam perpetrantur, quamprimum Virorum istorum vel similium autoritas quemquam demontavit, ut cogitet, nullum absque gravi & fontica causa, verbum ab iisdem vel scriptum vel dictum fuisse; illosque ubique genuinorum naturæ interpretum provincia probe functos? Quæ quæso non inde tragædiæ oriuntur, pro aris enim & focus quasi pugnatur, ratio intenditur, & cum illa in utramque partem propendeat plerumque, fides hinc inde experimentorum sollicitatur, nec quidquam intentatum relinquitur, & ubi rationes deficiunt, ibi cavillationes & calumniæ in pleno abundant: passionibusque homines isti, ceu impetuoso turbine in transversum abripiuntur, ut (etiamsi veritatem cernant, cum tamen eam a partibus suis stare non videant) oculos claudant, aures obturent, & potius Aristotelici, Cartesiani, Hobbiani, Epicurei &c. audire malint, quam veritatis sectatores. Et utinam hæcce temporanea essent, id est cum sectarum autoribus interirent; sed secula labuntur, & annorum myriades transeunt, nec tamen bella ista sopiuntur, imo quo veritas altius caput adtollit, eo magis partialistæ tumultuantur, & si rem extra partes constituti, ex æquo æstimemus, non pro veritate, sed pro autoris omniscientia prælia conferi videbimus: horum autem finis sperandus nullus, nisi ad experimentorum lucem omnia dijudicentur, bellumque non pro ingenio, sed pro veritate suscipiatur. Ingeminandum itaque & ad ravim usque inculcandum, neque desistendum,

dum, viam philosophandi rectam non nisi per multiplicia experimenta iniri posse: auctoritatem omnem, nisi in sæpius repetita & fida experiundi ratione (quæ a quolibet, qui de ea dubitaverit, repeti possit) seponendam, imo radicitus eliminandam; & quidem eo magis, quod ratione uti, cuivis quasi sit innatum: quam ob rem ægre ferunt homines, si in ratiocinio suo redarguantur, cum jure quasi naturæ rationem ad se spectare præsumant: e contra vero experimenta, cum ad certum quasi modum alligentur, quem nisi quis rite & ad præscriptum modulum ineat, facile decipi poterit, neque ei tot & tanta subterfugia patent, in quibus se abscondat, quam si mera ratione utatur, ubi ex notionum varietate, quas sibi quivis ex proprio cerebro confingit, nescio quas chimæricas consequentias deducit; nec unquam sese veritas per tenebras istas manifestabit, sed magis ac magis abscondet. Dubium certe Vir Experientissime, mecum nullum est, quin omnes illi, qui procul a partium studio remoti sunt, ex quorum numero Te non postremum certe scio, me vera dicere ultro concessuri sint, quare denuo hæcce inculcanda sunt, ut ad Academiæ subsellia usque pertingant, quibus omni conatu fastus ille eximendus erit, *Artes istas & scientias, quas profitentur, eousque jam perfectas esse, ut emendationem nullam requirant, sed omnia jam ad summum perfectionis fastigium evecta esse, neque quidquam restare quam methodi diversitatem & facilitatem, qua ea tradantur; sed potius ab illis esse laborandum, ut artium defectus atque nævi (qui non possunt non esse magni & fontici) detegantur; quo eo studiosius in remedia inquiratur, quibus obprobria scientiarum & artium removeantur.* Scio equidem Vir Ex-

pe-

perientissime, surdo narrari fabulam, præsertim cum plurimi utile magis, quam verum persequantur, ac nemo facile illis in locis sedem figere possit, nisi se in arte & scientia sua omniscium & omnipotentem fingat; verum enim vero si ex æquo rem putemus, publico literario bono non minus necessarii sunt Professores docentes ea quæ scimus (quos igitur Professores scientiæ nominabo;) sed non minus necessarii & utiles essent, Professores docentes ea quæ ignoramus (qui proinde titulo Professorum ignorantiae a me insigniuntur:) Ut tandem non solum juvenus, sed & ipsi Doctores videant, quam exiguum sit illud quod scimus, & quanto fastu ac animi elatione nobis blandiamur; hac certe ratione supercilium multi dmitterent, & fastus nonnullorum insolentium valide reprimeretur, plurimique viderent, quid æra lupinis differrent, nec facile a thaumaturgis sibi imponi sinerent: Imo nisi me ipsum vehementer fallam, uti non fallor, mecum omnes ingenui confitebuntur Professores istos ignorantiae peritiores longe futuros, id est scientiores, quam professores vulgares scientiæ, qui consummatam scientiarum & artium professionem simulant: nam præterquam quod Ignorantiæ professores necesse non habeant, meram ignorantiam profiteri, sed & modum, quomodo illa quæ nescimus ignoremus, insuper docere deberent, quid & quousque sciremus, ea quæ scimus: cujus nominis professor Illustrissimus Verulamius, magno scientiarum & artium augmento, fuit. Ars certe inveniendi hætenus a plurimis ignoratur, vel saltem non adhibetur, id est, vera Logica vel non inventa putatur, vel saltem non adhibetur, adeoque illa quasi nondum inventa est, nec unquam invenietur,

nietur, nisi aliter quam hætenus factum est res computetur, non quod Logica inveniendi nulla sit, aut nondum inventa, sed quod ea nondum debito modo a plurimis observata sit, monstrata illa jam est ab Illustri Verulamio plures jam retro annos, sed hætenus repudiata, monstratur adhuc a Regia Societate Anglicana, & Magni-ducali Academia, Londini & Florentiæ, & utinam non in vanum, sed putandum non est Logicam istam in capiendis experimentis solummodo esse sitam, sed illa ex duabus partibus quam maxime concinnatur, nempe ex experimentorum debita institutione & ratiocinio ad hanc vel illam hypothesin vel dubium per alia nova experimenta examinandum, aut etiam si fieri potest determinandum, atque ex hisce experimentis tandem hypothesin aliquam, ad tempus saltem durabilem exsculpendi modus, & si quæ ex his & similibus adhuc addenda sint, de quibus suo tempore, Vir Experientissime, pluribus, vel privatim tecum disserere, vel publice declamare instituam. Instrumenta autem Logicæ istius præter Mathesin, non abstractam illam, sed concretam, quæ in consideratione motuum, figurarum, positione &c. partium collocatur, sunt Chemia & Anatomia, sub quarum artium nomenclatura omnes istas artes comprehendo, quæ ad experimenta capienda idoneæ existunt; verum instrumenta illa subjectum exercitatum & longo usu in investigatione veri versatum requirunt: Generales quippe corporum notiones (de rebus enim naturalibus jam mihi sermo est, non de immaterialibus, illæ enim altioris & alterius sunt conditionis ac considerationis) equidem absque experimentis possunt determinari, iisdem vero in subsidium vocatis, accuratius & ad sensum quo-

que determinari poterunt: verum enim vero notiones istæ generales, si ad particularia adplicentur, vel nihil omnino vel parum admodum valent: quare Geometria opus, quæ notiones istas, quousque pertingere possunt, dirigat; Chemia & Anatomia & similibus artibus, ut experimenta ex rebus particularibus particularia capiantur, ac Geometrice dirigantur opus est: Hoc sane monitum nisi probe attendatur, solidi certe in scientiarum & artium emendatione nihil expectandum.

Felicibus igitur sub auspiciis Regia Anglicana Societas & magni-ducalis Florentina Academia, Logicæ hujus leges & regulas, non verbis solum, sed & exemplis & facto ipso exercent, quorum cœptis Deus, Principes & ingenia Practica faveant opto. Sed quorsum tandem, Vir Experientissime, digredior? & quorsum ine veritatis amor abripit? Cartesianus non sum, Aristotelicus non item, imo nec Hippocraticus, Galenicus, Gassendianus, Hobbianus &c. hoc est, in Virorum horum, utique laude dignissimorum auctoritatem nullo modo juravi, ubi illos deserit veritas, per experimenta & illibatum ratiocinium adq̃uisita, ibi ne quidem comites eos, multo minus duces agnosco, imo ne integram Academiam, & vel totum mundum sequi vellem: interim Viros illos de arte sua optime meritos veneror & Galenicus, Hippocraticus, Aristotelicus, Cartesianus, Hobbianus audiri volo, id est, Virorum istorum existimationi aut auctoritati ne quidquam aliquid salva veritate detractum volo, nec ut ab aliquo aliquid iis detraheretur permetterem, quantum quidem in me est. Credendum enim puto plurimos, qui acriter, in Aristotelem, Platonem, Cartesium, &c. aliumve celebriorum

briorem Philosophum invecti sunt, ideo fecisse, quod potius omnibus artibus sectam suam extollere, alteram vero deprimere in animo habuerint, quam veritatem incorrupte servare, etiamsi veritatem ubique crepent, cum tamen illi potius viri autoritate teneantur, & utinam res eousque non processisset, vel demum ingenia ista medellam ferrent.

Ego sane, Vir Experientissime, in favorem Cartesii, Aristotelis, &c. aut contra ipsum calammum non stringerem, imo ne quidem contra quemvis: nisi per latus præcipue Cartesii aut similium præcellentium Virorum veritati præjudicium crearetur & quidem Celebrem istum Philosophum in scribto meo eo libentius defendo, quia homines nonnulli satis iniqui & maligni apud Magistratum potentes, & idcirco iniquiores, eo nomine mihi nocere cupiverunt, & omnem philosophandi libertatem coercere & subprimere propriamque suam tyrannidem in arcem collocare sategerunt: Et certe si iis in paragraphis vel cum Cartesio aut alio quoquam sentirem, Vir Experientissime, in scribto meo ostendere vellem, neminem ita sentientem a quoquam merito redarguendum esse, multo minus coram Magistratu indicta causa condemnandum: hoc certe si sentirem & perciperem ulterius, prout ex parte jam sensi, & Cartesii, Gassendi, Hobbii, & quorumvis istorum quousque veritatis ratio permetteret, defensionem in me susciperem, nec desisterem quousque spiritus hos regeret artus, iisque arma fycophantiæ eriperem, quantum quidem possem. Eos itaque qui nocendi animo me vel Aristotelicum, Gassendianum, Cartesianum &c. proclamant, illos ego calumniatores, nugatores, conviciatores, fycophantas, &c. proclamo,

clamo, & ubi conatus istorum hominum tyrannicorum genio suo inservientium cavillandi & calumniandi, bonisque insidias struendi deprehendero, eos monitos cupio me Cartesium Gassendum &c. contra illorum molimina defensurum, & quidem eo alacrius, quo magis constabit, cum infectores istos, ad passionem magis suas exsequendas, Magistratum opè & autoritate abuti; præsertim cum certus sim fratres istos ignorantiam ne quidem autorum istorum monumenta vidisse, multo minus legisse, imo etsi legissent minime intellexisse, adeoque inculcandum illis Apellæum istud vetustissimum,
NE SUTOR ULTRACREPIDAM.

At enim Vir Experientissime, Tu fessus legendo & ego scribendo, ut tandem manum de Tabula removeam rogas, & quidem ego eo libentius id faciam, quo percipio epistolium in Epistolam mutatum esse, alias enim ne epistola in librum excrescat vererem, quare merito prolixitatem humanitati Tuæ commendo, & hoc unum rogo, ut si similia Tibi non displiceant, scribendum meum adeas, adeo enim Te veritatis studiosum & amantem novi, ut veritatis amori, quo me fervere novisti omnia condonaturus sis, quare Vir Experientissime, cum in posterum aliis curiositatibus veritatis avidam & curiositatis amantem mentem tuam delectare laborabo, præsertim cum res dioptricæ satis ex voto cedant, si enim oculum in longinquum & propinquum armatum (modis iis hæcenus non tritis) habuero, nunquam deerit materia Tibi Tuique similibus & curiosa & nova enumerare, cui studio dioptrico eo lubentius jam & deinceps incumbam, quod sciam Philosophiam eximie per
in-

inventum istud promotum fuisse, & fere tantissimus Philosophi, quanti sumus oculati, quid enim experientia aliud? tum etiam ideo quod Mercurius proximo vere per discum Solis pertransiens Astronomorum vigilantiam, quæ absque optimis Tubis opticis manca & mutila est. sollicitabit: Sed vale, Vir Experientissime, & omnia ex veritatis zelo profecta esse judica, eumque qui Te amat ac honorat, quæso redama, sum enim

Vir Nobilissime & Experientissime

Scaphusii 1673.
d. 3. Xbris.

Tuus ex asse totus

JOHANNES OTT, Philos.
& Med. Doct.

OBSERVATIONES
CELEBRIUM
MEDICORUM
DE
APOPLEXIA.

OBSERVATIONES
CELEBRIUM
MEDICORUM
DE
APOPLEXIA.

OBSERVATIO I.

Dn. D. JOHANNIS CONRADI
BRUNNERI.

*De Apoplexia fortissima ex Hydrope Cere-
bri, cum ejusdem Anatome.*

Christophorus Weiler, Silesius, claustrarius
in arte strenuus, 64. annorum, capillitio
molli, cano atque simplici, colore faciei palli-
do, & qui huic vitæ generi esse consuevit luri-
do, staturæ & habitus medii, vir cæteroquin in-
geniosus; varios casus expertus est in bello, tan-
demque superatis variis periculis ad nostras oras
appulit. Panem suum manuum operâ lucratus
est; nec nisi mane atque vesperi vesci contigit,
circa meridiem pane & vini haustu, siquidem
præsto fuerit, contento: viduus à duodecim an-
nis egenam duxit vitam, & officinæ suæ atræ

speluncæ inclusus, Vulcanum egit solertem. Diebus festis Baccho litavit strenue, nec vino irrigua viscera satiabantur, donec pene inebriata mero permaduerint. Potu potius & liquidis, quam cibo victitavit; nonnunquam sitibundus frigidam affatim hausit. Olim febris quartanâ diu laboravit; verebatur tum temporis hydropem, propter habitum cachecticum, subtumidum.

Anno 1687. stridente modo autumno, udo atque humido, defluxionum feracissimo, febris; quæ olim afflixit denuo gliscere videbatur: hanc eludere conabatur frequenti crapulâ; torcularia quotidie adiit vinumque hornum immodice bibit: increpatus à quodam ebrius, febrim se hâc ratione abarcere reposuit.

Die 7 Octobris 1687. mane postquam surrexit, officinam suam adiit ac strenue laboravit, idem in opere atque sermone qui pridem: nullius infirmitatis mentionem fecit; jentavit circa septimam domi cum appetitu, abhinc ad officinam suam rediit. Circa meridiem pransurus cum filio *συνέχρω* panem apposuit, vini que heminam afferre iussit. Inceperunt ad incudem duram prandium Diogenicum: bolum panis ori ingessurus modo in hæc verba erumpit. Was wil das werden? statimque attonitus humi concidit & cum stertore animam efflavit. Vicini ad lugubres filii clamores accurrentes jam extinctum invenerunt; Forte fortuna in vicinia agebam, percepto nuntio adfui haud cunctanter, & apertionem capitis à filio, qui ipsi unicus supererat, flagitavi, concessamque non diu post administravi. Bihorio nempe abhinc ascitis laborum fociis, cutim capillatam detraxi & revulsi in formam crucis incisam. Pericranium undique albicabat; multumque feri exsudavit; circa occiput venulæ rutilabant.

bant. Ad auferendam ollam circumcirca inciso pericranio, carotides externæ vulneratæ atque discissæ fuerunt; inde sanguis serofus effluxit copiose. Serrâ satis caute inciso cranio, scalproque effracto, dura mater circa frontem lacerata fuit leviter: revulsurus ollam, satis firmiter sinui longitudinali adhærentem, observavi piam matrem aquâ limpidâ turgidissimam, instar hydatidis proruere, & vix cavi, quin dum auferbam cranium, subinde effluerit aqua. Incisa dura matre nihil feri inter hanc & piam matrem inveni, quippe jam effluerat. Sinus longitudinalis amplus, nihil humoris aut sanguinis continuit, sed omnis refluxit versus sinus laterales fluidus. Corpus falciforme hinc inde, præsertim prope torcular mediante glandulosâ substantiâ cum pia matre cerebroque coaluit. Ablatâ durâ matre serum perpetim exsudavit & effluxit limpidum. Ad latera utriusque hemisphærii arterias peramplas, pene inanes; venas quoque insignes, & in his flatus inveni. Totum cerebrum non flaccidum sed firmum fuit; diducto utroque hemisphærio, corpus callosum candidissimum apparuit. Assulatim substantiam cerebri abstuli & ad ventriculos usque resecai, vasa sanguifera hinc inde notabantur punctulis cruentis: uterque autem ventriculus aquâ scatebat turbidâ, quin omnes recessus & cerebri cavitates hæc inundatæ & repletæ fuerunt. Plexus choroidei submersi albicabant, qui aliàs rutilare conspiciuntur: hydatides aliquot in his numeravi; glandulas quoque miliares, sed flaccidas hisce irretitas videbar mihi videre. Glandula pinealis cineritii coloris & flaccidior reliquâ cerebri substantiâ apparuit. Corpora striata, thalami nervorum opticorum, protuberantiæ orbiculares omni vitio

caruerunt, firma fuerunt & quasi callosa. Infundibulum aqua plenum, & reliquæ cerebri cavitates aquarum illuvie inundatæ fuerunt, præsertim quartus ventriculus, ut immissus stylus ad spinam dorsi usque dilaberetur. Ad proram cerebri conversus, nervos olfactorios (quos male in homine processus mammillares dixeris) diligenter examinavi. Nullam in his cavitationem vel flatui perviam invenire potui, neque in exortu, nec medio, nec insertionem: striati videbantur ceu nervorum fasciculi. Reliqua paria nervorum fulgebant pulchre. Ductus ex infundibulo ad glandulam pituitariam ducens exilis. Carotides aquis mersæ albicabant. Cerebellum minime flaccidum, sed sicuti reliquæ cerebri partes firmum apparuit. Tota basis cerebri & ipsa spinalis medulla aquarum illuvie inundata fuit. Inter membranam duræ meningis sobolem, quæ spinalem medullam investit & ipsam medullam laxa cavitas, aqua plena reperta fuit: Stylus huic commissus ibat in profundum per spinam dorsi. Dum forte adstantium quidam pectus compressisset, sanguis serosus, instar loturæ carniū, per sinus laterales abscissos se gurgitavit: remota manu fluentum quod eructaverant resorbuerunt venæ: compressis denuo præcordiis idem phænomenon iterato observavimus. Glandula pituitaria firma erat, hinc inde venulæ hanc circumdabant, per quas abscissas compressis præcordiis sanguis quoque exundavit. Pondus aquæ in cerebro repertæ certo definire vix possem; multum namque inter disseccandum effluxit & visum subterfugit; certum tamen est omnes cerebri recessus & cavitates fuisse repletas & distentas aqua; ipsam quoque spinalem medullam in suo involucro hæc penitus submersam observavimus.

SCHOLIUM.

I. Qui in tenella ætate Hydrocephalum, hic in adulto homine apoplexiam excitavit hydrops cerebri. Nec enim hoc nomine defraudandus erit uterque affectus, siquidem partes omnes & recessus cerebri aquarum illuvie inundatæ, omnesque cavitates repletæ fuerunt in hoc casu. Nec aliam notare est morbi differentiam, quam quod in membranosa compagine vi aquarum cessit, & in majorem molem excrevit caput; in hoc autem ceu compagine solida, cedere nescia, intus coacta fuit vis & illuvies aquarum, conclusa immotis limitibus.

II. Diu fuit dubium inter eos, qui de causis apoplexiæ commentati sunt autores, utrum ex compressione cerebri apoplexia quoque oriri possit? Contrariæ namque qui fuerunt sententiæ existimârunt serum suo frustratum exitu in cerebri ventriculis cumulatam, substantiam medullosam plus nimis irrigare & perfundere, donec permascescat, flaccidum evadat, tandemque actiones animales pessundentur. Contrarium autem egregie demonstravit Venerandus noster Senex Wepferus in tractat. de Loc. affect. in Apoplexia, quibus hæc succenturiare fert animus. Firmum demortuus noster cerebrum obtinuit, & actiones omnes vegetas habuit; fuit namque in opere suo strenuus, & vir aliàs ingeniosus, quique pollebat judicio, quod plures mirati fuerunt in homine plebejo literarum nescio; quod evidens est *τεμπήριον* non aquarum illuvie substantiam medullosam cerebri perfusam, spirituumque effusum in organa sensuum hac ratione interceptum fuisse;

fuisse; quippe procul dubio magis tunc madida & flaccida observatur in demortuis cerebri substantia, secus atque in nostro cadavere videre fuit.

III. Mirari autem subit, qui tam cito subitoque hominem cætera sanum jugularit lethoque dederit morbus iste attonitus? Equidem sensim sine sensu colluviem feri factam fuisse in cerebri ventriculis nihil impedit, quo minus credamus: illæsis enim functionibus animalibus hanc fieri posse vel hydrocephalus indicio esse potest. Si vero eousque accreverit feri copia in cerebro, ut jam omnes cerebri cavitates & anfractus hac sint repleti, nec amplius cedere queant, novus si tunc fiat feri affluxus, jam illud cerebrum opprimit, poros ejus occludit, spiritus perturbat, & dicto citius hominem perimit & pessundat. Causæ autem huic effectui pares sat enumerantur in historia morbi; magis nempe liquidis, quam solidis victitavit pauper per annos; sitibundus frigidam affatim ingessit; diebus festis Baccho litavit; tempore autumnali frigido-humido, defluxionum feraci, quotidie fere, etiam tunc temporis, quo jamdum morbi senserat præludia, sese ingurgitavit vino harno, cujus in hoc casu noxam pluribus ostendit Vener. Wepferus noster, adeo ut de feri abundantia nullum fuerit dubium, quam prodidit quoque habitus cachecticus, qui hydropis metum fecerat. *Ὁργασμὸν* feri ac despumationem frequens horripilatio, quæ febris metum renovârat palam fecit. Binis hisce causis positis quam confertim feri effusio partis-que alicujus inundatio fieri quæat repentina intumescencia hydropicorum, tonsillarum &c. de quibus pluribus doctè differit Venerand. Wepferus noster, ostendunt. Huic si accedat subita
spi-

spirituum animalium perturbatio à causa nempe valide agente, actum est de hominis vita dicto citius.

IV. Seri abundantiam cum in toto corpore, tum imprimis in massa sanguinea testatur ejusdem fluxibilitas: tantum enim abest, ut secundum ingeniosam Bayle opinionem contra Vener. Wepferum coagulatus fuerit sanguis circa cerebrum, ut vel potius fluidus etiam post mortem manserit, cujus clarum satis experimentum cepimus in nostro casu. Compressis enim præcordiis, sanguis serosus atque fluidus per abscissa vasorum orificia exundavit; remotis autem manibus resorptus fuit ab iisdem; indicio luculento floridum & debito serosiores fuisse, non autem coagulatum sanguinem, apoplexiæ causam, id quod subsequens quoque observatio de Apoplexia sanguinea docet, qua sanguis itidem plane fluidus, nulliusque consistentiæ repertus fuit.

V. De fonte seu scaturigine tantæ illuviei res est obscura. Hydatides equidem plures observavi in plexibus choroideis, sicut etiam in alio casu, quas in hydrope cerebri plerumque reperiri meminit Doctiss. Thom. Willis de Anatom. cerebri: Magna autem est dubitatio, quod jam supra monui, utrum ex consequenti in stagnante aqua submersæ vitientur glandulæ plexibus his intertextæ, an vero primario affectæ hydropis causæ existant? Utrumque fieri posse verisimile est. Glandulas enim corrumpi tandem in ventre hydropicorum nemo practicus dubitare potest; has quoque labefactatas hydropis causam existere frequens observatio testatum facit. Etenim si sint obstructæ, aut quomodocunque vitiatæ, ut motus humorum minus prompte in
his

his perficiatur, confestim serum restagnat, & quod experimentum Clariff. Loweri palam facit, vasis suis excidit; illæ autem intumescunt, & quæ miliares, fabæ nunc magnitudine conspiciuntur, quin & in hydatides degenerant, tandemque ultra modum distentæ crepant, unde feri depluvium in ventriculos cerebri, minus forsitan proportionati, quam ut philtiri, glandulæ pituitariæ porulos trajiciat, stagnat proin, congeritur & accumulatur.

VI. Sed & feri perpluvium per ipsam cerebri substantiam & destillationem in ventriculos cerebri symbolam contulisse videtur. Certe cavitates in cerebro ampliores sunt & spatiosiores, quam ut nonnisi à glandulis his miliaribus deciduas suscipiant & colligant humiditates; quum autem per totum cerebrum extendantur ventriculi, ex toto quoque cerebro humiditates colligere verosimile est, & hujus excretoria, papillulas nempe prominentiores hinc inde in parietibus ventriculorum ostendi; quæ etiam si in præsentī casu visum subterfugerint, malo tamen loci & temporis incommoditati, quippe jam vesperascebat in obscuro, quam forte earundem absentię causam tribuere; etenim jam pluries has in morbofis cerebris observavi, de quibus viderint & alii, siquidem nascatur occasio.

OBSERVATIO II.

Dn. D. JOHANNIS CONRADI
BRUNNERI.

*De Apoplexia, post quinquennium recurrente
fortissima à sanguine extravasato, cum
capitis Anatome.*

ANna Oberhäuser / fabri lignarii, civis nostra-
tis uxor, 47. annorum, staturæ justæ, ha-
bitus pleni, colore faciei albicante, tempera-
menti sanguineo-phlegmatici, olim cuticulam
egregie curavit: nupta viro, primo puerperio
tres (quorum unus adhuc superstes,) abhinc se-
decim alios enixa est infantes: partus plerum-
que fuit laboriosus, & lochia enormiter mana-
runt. Rem domesticam probe administravit,
frugi fuit & attenta ad rem, cūrta dum fuit sup-
pellex & res angusta domi. Anno 1680. mense
Decembr. gravem insultum apoplecticum passa
est: ἀφρονς facta, totumque latus dextrum mo-
tu ac sensu privatum fuit. Accersitus è vestigio
adfui venamque secari, vesicatoria variis parti-
bus ad moveri, frictiones administrari, & quæ-
cunque revellere à capite & spirituum influxum
in organa sensuum juvare potuerant, sedulo per-
fici curavi. Die septimo exhibito purgante, ner-
vos quoque splanchnicos sollicitavi; quibus tan-
tundem profeci, ut quæ antea loquelam amise-
rat, pedem brachiumque dextrum movere non
poterat, nunc balbutire & artus movere quo-
modocunque valuerit: tandem benedicente Deo
integram horum usuram recuperavit, excepta in-
firmi-

firmitate quadam lateris affecti, quæ tamen non impedivit, quo minus munia sua obierit. Concepit abhinc & filium sanum enixa est. In actionibus principibus nulla menda apparuit, nisi quod ante insultum tenax & attenta ad rem, satis negligenter nunc rem domesticam habuerit, liberalis nimis & prodiga: bibula fuit & subinde plusculum sese invitavit, quapropter sæpius à marito increpata, tandem verberibus excepta fuit; quin nuper adhuc vulnus capiti inflictum fuisse referunt. De cephalalgia multum querebatur, vertigine item titubante lapsumque minitante, ad quæ averruncanda mala crebro sanguinem mittere solita fuit: fonticulum excitavi & ita rei domesticæ reddidi matrem familias. Ad reliquias morbi dissipandas præter consilium medici, thermas adiit Helveticas, quibus per aliquot septimanas citra sanitatis emolumentum usa fuit. Sed & spiritum ceraforum nigrorum ad ebrietatem usque forbillavit, & pulvere sternutatorio abusa est, spe freta morbum hac ratione sublatum iri. Anno 1685. ipsis vindemiis (quo tempore lautius vivere & genio indulgere solet apud nos vulgus) postquam vertigo diu multumque affligerat, fortissimâ apoplexia tacta, subitoque enecta fuit: ipsis (quod probe notandum) fluentibus menstruis, propter quæ venæ sectionem, quæ sæpius opem tulit ante, differre coacta fuit, surrexit equidem mane horâ solitâ, & ad munia diurna rediit. (Retulit quædam ex vicinis hora nona matutina cadum portasse capiti impositum ad condendum mustum, insignis lassitudinis mentionem fecisse, incedentem vacillasse nec levem ebrietatis suspensionem dedisse.) Domum reversa conquesta est de frigore, lectum proin petitura in ipsis scalis concidit supina, cum actionum ani-

ma-

malum eclipsi, concurrerunt confestim vicinæ mulierculæ à misero infantum ejulatu, prostratamque invenerunt, in scalis inconcinnè ac misère hærentem; eam proin sublatam in lectum in hypocausto stratum composuerunt. Accitus presso pede aefui. Tremebant artus & ceu rigore concutiebantur: respiratio erat inæqualis cum stertore; nec acclamationibus nec vellicationibus excitari poterat, ut sensus aut intellectus indicia præberet: contentius dum vellicabam, incondito motu agitabatur membrum quod vellicaveram, modo in dextro, modo in sinistro latere. Pulsus erat citatior ab initio, mox tardus & rarus, tandem debilis & languidus. Respiratio sensim quoque sufflaminari videbatur, Ori infudi liquoris excitativi nonnihil, qui ad fauces asperamque arteriam defluens tussim bis terve excitavit: caput de pulvinari sustulit inter tussendum, sed mox recidit: sulphuratum, dum alia vix suppetebant, accensum naribus admovi, cujus nec odore, nec unctione morti vicinam commovere potui: vix enim dimidiâ horâ post insultum respiratio cessavit, pulsu nihilominus perpetuante. Venæ jugulares mire agitari videbantur, quemadmodum in omnibus, quibus circulatio in pulmonibus intercipitur, morti vicinis, observavi. Sensim autem sensimque debilior pulsus & rarior, tandem quoque substitit, horâ circiter decimâ matutinâ, ut anima è suo ergastulo migrare necesse habuerit. Horâ sextâ vespertinâ caput cultro meo cessit. Incisâ decussatim cute capillatâ & revulsâ, serum subcruentum exsudavit, ex dissectis autem vasis sanguiferis sanguis serofusus effluxit. Ablatâ capitis ollâ circa occiput ubi firmissimè hæc corpori falciformi annectebatur, ex divulsis venulis & arteriolis futuram coronalem

perreptantibus innumeras vidi exsudare sanguinis guttulas. Ad latus hemisphærii dextri, dura mater scalpro vulnerata fuit, nihil tamen sanguinis nec feri effluxit, nec quicquam horum inter duram piamque matrem collectum fuit. Ne autem importunis confanguineorum sollicitationibus impedirer aut turbarer, cerebrum pia matre obvolutum, discissis nervis & arteriis, quæ quidem rite sese habuerunt exempti & clanculum iis, quorum intererat, domum portari jussi. Pressis volâ præcordiis, sanguis adhuc fluidus copiose per sinus laterales, venasque è spina dorsi emergentes abscissas regurgitavit & exundavit in calvariam, ut cranio reposito & cute desuper consultâ ejus effluxum affusis in loculo cineribus inhibere necessum fuerit. Cerebri superficies integra fuit, nulla menda foris, nisi quod rubicunda apparuit. In venis ad sinum longitudinalem spectantibus flatum inveni, & hinc inde pepuli digiti apice. Arteriæ carotidi tubulum indidi, ligata altera lateris oppositi, & ope siphonis ceram, quæ virore mire reficiebat oculos, infudi: pervasit hæc omnes arteriarum cerebrum perreptantium mæandros ad capillaria usque vascula, donec parte qua meninx scalpro vulnerata fuit, exitum invenit; ad cerebellum autem nullibi pertigit. Ad scrutandam apoplexiæ causam, hemisphærium dextrum caute & suspensa manu ad ventriculum usque assulatim abscidi: in parte postica supra ventriculum dextrum, cavernulam oblongam, quæ nucem myristicam cepisset, offendi conniventem, in qua nonnihil humoris stagnavit: hæc cum vicina cerebri substantia fusci & subflavi coloris extitit, ægre secabilis, & dudum in hanc firmitudinem occalluisse visa fuit. Ad latus ejusdem hemisphærii, qua parte carotis

tis in varios abit ramificationes in aliam incidi cavernulam; in hac itidem nonnihil humoris aquei stagnavit, & ceu membranacei quid ægre secabile occurrit. Tertia quam vidi prioribus similem cavernula sub corpore striato ejusdem lateris reperta fuit: connivebat hæc, & jam iterum mediante glutine coaluit, ita tamen, ut facile hanc iterum separare potuerim: flava & ista fuit & ægre secabilis instar priorum. Dexter ventriculus sanguine seroso plenus fuit, exin in sinistrum is quoque redundavit. Locus quo erupit, fuit intermedius inter thalamum nervi optici corpusque striatum in dextro hemisphærio, ubi rimam egit. In ipsa nempe thalami substantia amplum hiatus seu fissuram, vi & impetu sanguinis factam, & in hac grumum sanguinis ovi columbini, aut gallinacei magnitudine inveni. Substantia cerebri, eluto cruore, circumcirca lacerata, & ad bifurcationem usque nervorum optico- rum divulsa ac dirempta fuit. Alibi arteriolas ægritudine ceu aneurismate affectas conspexi, quæ tantam sanguinis vim fudisse videbantur. In sinistro hemisphærio inveni arteriolas in medio corpore striato cera viridi fulgentes, alibique in ipsa medullari cerebri substantia easdem conspicatus sum. Corpus striatum dextrum nec tam floridum, nec tam firmum uti sinistrum, sed flaccidum, obscuri, subflavi coloris & emarcidum apparuit, ceu atrophiam laborasset. In parte postica dextri ventriculi hinc inde papillulæ capitellorum acicularum magnitudine, instar pororum cutis, frigore perstrictorum prominulæ conspiciebantur, dum aliàs interior ventriculorum superficies perpolita & levissima appareat. Plexus choroidei rite sese habuerunt, nisi quod dexter cavernulæ primæ supra descriptæ annexus

fuit: microscopio subjecti per plurimas, quin innumeras glandulas miliares exhibuerunt. Quartus ventriculus sanguine quoque scatebat, infundibulum eodem plenum, pervium fuit usque ad glandulam pituitariam, qua parte abscissum fuit. Reliquæ cerebri partes manifesto vitio caruerunt. Processus mammillares nulla cavitatē præditos esse observavi, nec à ventriculis cerebri, sicut in brutis quibusdam cavi, sed à substantia medullari sub corporibus striatis, (ubi nulla cavitās) utrinque oriuntur cœci & impervii.

SCHOLIUM.

Duplicis in hoc cerebro apoplexiæ, recentis nimirum-fortissimæ, & jam olim factæ causas spectare, variorum quoque symptomatum à primo insultu superstitum causas ac rationes discere licet. Ut autem à prima & olim facta apoplexia ordiamur, in tantum hæc, tum artis, tum naturæ beneficio emendata fuit, ut olim, munia sua obire commode, & re domestica iterum fungi potuerit defuncta. Nullum est dubium, quin superstitis membrorum dextri lateris infirmitatis, & animi negligentioris causa extiterit cruris medullofi dextri flacciditas & atrophia: nec enim tam firmum hoc, nec floridum fuit, quam sinistrum, sed luridum, obscurum, flaccidum & marcidum, ac si atrophîa laborasset. Quemadmodum autem fibrillarum cerebri firmitudo & tensio ad acumen ingenii confert, ut ii qui attentius rem pensitant, nervos quasi seu fibrillas cerebri intendere soleant; quippe iudicio qui pollent firmioris cerebri observantur; ita hujus flacciditas officit & stupiditatem arguit. Spiritus enim nec tam vegete, nec tam prompte
in

in udo cerebro & flaccidiori moventur, nec animæ ideas tam claras atque perspicuas repræsentare queunt, quam in cerebro sereno, firmo nullis nebulis obscurato. Quoniam vero in ipso cerebro, ceu fonte non expeditus fuit spirituum callis, non mirum est, si in derivatis inde emanationum viis non tam promptus fuit influxus, unde membra quævis robur suum accipiunt; quæ nimirum negligentioris animi & superstitis in latere dextro infirmitatis causæ videntur.

II. Causam flacciditatis corporis striati prope spectare licuit: tres nempe cavernulæ jam olim factæ, nunc quasi callosæ ac cicatrice obductæ circumcirca corpus striatum apparuerunt. Nul- lum est dubium quin canaliculorum & fibrillarum rectitudo deperdita hac ratione ac devastata fuerit, unde nec spirituum effluxus, nec sanguinis ac succi nutritii affluxus tam liber atque olim fuit; genio ita defraudatum suo corpus striatum atrophîâ laborasse suamque firmitudinem amisisse, non est mirum.

III. Utrum cavernulæ in primo apoplexiæ insultu ab exundante sero, an sanguine extravasato excitatæ fuerint, non adeo in promptu est dicere: factas autem jam olim fuisse exinde apparet, quia callosæ, ceu cicatrice obductæ & glutine iterum coaluerunt. Serum fuisse arguunt, quia in quibusdam earum adhuc aliquid humoris serosi repertum fuit; deinde, quia à sanguine extravasato facta apoplexia plerumque & extemplo enecare solet. Sanguinem contra fuisse testantur. 1. Quia juvenis adhuc & plethorica fuit, quam ætatem rarius apoplexiæ serosæ manent. 2. Quia Venæsectio tum à primo statim insultu administrata opem tulit; tum symptomatum abhinc urgentium, cephalalgîæ & vertiginis

unicum ac ceu præsentaneum fuit remedium: à multis quoque puerperiis, lochiis copiose manantibus sanguis fluxibilior & acrior factus, facilius arteriolarum extremitates erosit & erupit: subito denique apoplexia facta fuit, quæ à sero sensim aggesto intra substantiam cerebri non tam subito ac de repente accidisset, quin prævios capitis affectus effecisset. Nec enim hydatides in cerebro brutorum repertæ apoplexiam induxisse ex supra recensitis videre est. Non exundavit tam copiose sanguis, uti in ultimo insultu, quia firmitus tunc temporis adhuc fuit cerebrum, sanguinisque impetus venæsectione aliisque à capite revellentibus tempestive & ocyus infractus fuit.

IV. Quicquid sit, saltem apparet vulnera & solutiones continui in ipsa quoque substantia medullari cerebri tum artis tum naturæ beneficio posse consolidari. Digerente nimirum calore atque spiritibus humorem aut sanguinem extravasatum (cui operi nihil invium observatur) & intercepto affluxu, sensim fibræ pristinam rectitudinem recuperarunt, & mediante lymphæ, quæ in nonnullis cavernulis reperta fuit, ceu glutine naturæ conjunctæ, spiritus animales utcumque in partes resolutas transmittere potuerunt, ut suis muniis obeundis par fuerit per quinquennium adhuc mater familias.

V. Fortissimæ denique & lethalis apoplexiæ causas sequentes observavi. In ipsa substantia medullari seu mediotullio cruris dextri amplum hiatum seu fissuram, & in hac sanguinem concretum ovi columbini aut gallinacei magnitudine inveni; superius rimam egit crus medullare, per quam sanguinis concreti pars serosior in omnes cerebri cavitates effusus easdem opplevit & oppilavit. Alibi arteriolas ægritudine affectas con-

spi-

spicatus sum in ipsa medullari cerebri substantia, quas sanguinem emisisse facile colligere licuit. Instante nimirum menstruorum fluxu, tota massa sanguinea effervescente & exagitata, postquam pridie sese plusculum invitaverat, venæsectionem quæ sæpe sæpius opem tulerat, & forsitan graviora mala averruncarat, differre coacta fuit. Nec mirum proin, quod sanguis in vasis effervescens (occlusis forsitan propter frigus venulis uterinis) per loca maxime debilia eruperit, & dirutis arteriolarum jam ante labefactatarum aggeribus exundarit confertim, tantoque impetu profilierit, ut & ipsam cerebri substantiam fiderit, omnesque cerebri anfractus oppilarit, tandemque oppressis spiritibus animalibus & occlusis emanationum viis misellam letho dederit. Nec ille motus, quem à fortioribus vellicationibus edidit, spiritibus à cerebro influis deberi videtur, potius iis, qui in organa sensuum atque motus emissi, quemcunque irritati motum ediderunt inconditum & anomalum, nam vix dimidia horâ elapsa & horum vis evanuit, & exspiravit ægra,

OBSERVATIO III.

Dn. D. IMMANUELIS WEIS-
MANNI.

*Tortura Oris spasmodico-Apoplectica, ob
senium valde periculosa, in integrum
sublata.*

FOemina nobilis, pene octogenaria; sterilis,
primis matrimonii annis multoties in thermis
E e 5 ultra

ultra definitas horas balneans, fervidiorem sanguinem & calidam humorum diathesin, ac contumacem alvi constipationem sibi adscivit: mensibus ordine purgata fuit ad 50. annos; defuncto ante tria lustra marito, in solitudine vixit, terrenis quidem omnibus opibus, sed insimul ventris supra modum tumidi ampliorisque ac in gravida mole sibi ipsi onusta, quæ increfcere diu videbatur, una alvus fere omnino exficari voluit, tamen sine torminibus, vel aliis cachexiæ aut hydropiseos symptomatibus. Suasu medicorum conservam Spagyricam Disp. Aug. nobilem hydropicis, tympaniticis, hypochondriacis & apoplecticis medicinam, insigni quantitate & pretio devoravit, pruna item laxativa, pillulas F. F. aliasque aloeticas, absque crebriori aut majori ventris stimulo: Etiam clysmatum myriadibus parum effectum, imo fistula intestino vix intrudi potuit. Tum inuri passa utrique brachio fonticulum, qui sanguinem ferum & pus largiter fudit. Biennio abhinc supra malleolum externum dextri pedis exorta lichenosa cutis asperitas, dolorosa & serum salsum substillans, quæ frictionibus ob pruritum irritata in herpetem degeneravit, cinguli instar 4. digitos lati pedem quasi hemicyclo cingentem, exterius saltem & in superficie urentem cutemque erodentem, qua squamosa decedente vel manu detracta, tenuis humor exsudavit. Inopinato clauderantur fonticuli, & pedis ichorosus fluor intra biduum quoque exaruit, irruente una majori abdominis flatuoso torminoso-tensiva intumescencia, pectoris angustia veluti præcordia contorquente, capitis gravedine & turbulencia vertiginosa, oculorum obnubilatione atque violenta clausura, superciliorum tremore, sinistri lateris stupefactiva

lassi-

lassitudine & insensibilitate, maxime autem labiorum spasmodica tractione contorsioneque horrida, quamvis indolente. Hem inde quantum clamoris, miseriæ & anxietatis? una quantum amoris & desiderii in medicum, qui ægre morituræ spasimum ocyssime tollat, ac fortio rem apoplexiam declinet? Data diaphoretico nervina, acrem ulceris lympham jam in glandulas iterum resorptam nervisque ex aliqua parte affrictam, novo fluore extrapellendi ac temperandi unaque tensiones spasmodicas relaxandi: data analeptica, antispasmodica & antapoplectica specifica ac pretiosa: immissa fonticulis suppressum ichorem alias revocare potentia varia, ulceri siccato superimposita Emplastra renovativa rubefacientia vesicantia &c. aspersum etiam alumen &c. illita cervici, vertici, nuchæ, temporibus ac pulsibus balsama & linimenta balsamica, ac caput & contorta facies cucuphis munita. Dubitabatur inter amicos, an convalitura sit, ob ætatis gradum & symptomata periculosa: tamen continuatis convenientibus remediis intra decendium quamoptime D. G. restituta, nec minimum tam horridæ contorsionis faciei que inde misere deformatæ vestigium relictum fuit.

OBSERVATIO IV.

Dn. D. GOTHOFREDI HELDII.

*Calculi in Cystide fellea reperti, Apoplexiæ
Auctores.*

Christianus Ernestus, Serenissimus Marchio
Brandenburgicus Culmbacensis, gloriosæ
Me-

Memoriæ, Princeps meus dum in vivis erat, longe Clementissimus, Anno 1712. die 20. Maji, summo cum luctu & planctu fidelium suorum domesticorum, omniumque subjectorum, Apoplexia cum Lethargo exanimatus, post beatam Mortem, Anatomix ad subsequenter Pollincturam sive Balsamationem, traditus, primariam mortis causam nobis quidem in capite offerebat: in hoc enim inter duram & piam seu tenuem Meningem, ut & in anterioribus Cerebri ventriculis insignis feri extravasati quantitas inveniebatur, nec non ex processu duræ matris falcato, inprimis ejus sinu os tenerum digiti longitudine usque ad cristam Galli, ubi processus falcatus annectitur extensum, protrahebatur; alia vero causa, non minus attendenda, ad Apoplexiam inducendam apta, in infima Ventre occurrebat, scilicet in Cystide fellea conspiciebantur quinquaginta Calculi biliosi, tot nimirum, quot Serenissimus ac optimus PRINCEPS Annos regnaverit, coloris flavo-nigricantis, tam glabri ac splendentes, ac si arte essent politi, varix magnitudinis, majores & minores, quorum illi undecim, duodecim ad tredecim, hi quinque grana, omnes vero septem drachmas pondere æquabant, quod pondus tamen successive imminutum, dum Calculi ficciores & leviores redditi; linguæ admoti biliosum saporem imprimebant, & digitos colore flavescente tingebant.

Quilibet horum lapidum biliosorum majorum imprimis, quorum quadraginta fuerunt, est figuræ pyramidalis; cujus basis est quadrangularis, non tamen quadratum, sed trapezium representans: ex hac basi assurgunt superficies quatuor in fastigium quasi abituræ, sed apex hic, quemadmodum etiam quatuor reliqui anguli ad basin

basin detriti sunt, adeo ut pyramis quadrangularis truncata dici queat figura hujus lapidis, referens tesseram hexaëdram sed irregularem, ob sex superficies, quarum tamen superior basi opposita minima est; Minores vero decem lapides forma triquetra præditi. PRINCEPS noster ter beatus, alias in adulta ætate quandoque Podagræ obnoxius, ad senilem vergens, ea non nisi rarissime corripiebatur, unde cum arthritica illa acris biliosa & viscidior acida materia Critico naturæ motu non amplius ad artus infimos propelleretur, ea cum bile in vesicula fellea sedem fixit, & bile hinc simul inerti reddita & exsiccata, calculi numerati successive concreverunt, qui per allisionem & exactam quoad latera conjunctionem tam læves redditi, quasi artificiose sic efformati; cum igitur Motus naturæ, Podagra ordinarie non redeunte, plane inverteretur, ac Chylus, sanguis & serum bilioso Balsamo non sufficienter imbuerentur, serum stagnatione acrius redditum, vasa lymphatica perrodendo, & extravasatum quantitate majori Cerebrum implevit, exinde nimia aquæ copia Arterias carotides & vertebrales, ac sinus ubi cum jugularibus coalescunt, premendo, & sanguinis affluxum & refluxum prohibendo, nec non propter Meatus Cerebri medullares hinc obstructos & oppressos, atque cohibitam spirituum animalium energiam elasticam, lethargicum soporem cum Apoplexia induxit. Hoc nostrum assertum ulterius alio adhuc parallelo exemplo confirmabo, quod mihi Excell. & Celeb. Dn. D. Daniel Nebelius, Medic. Prof. P. & primarius in antiquissima Germaniæ Academia Heidelbergensi, singularis meus Amicus, in literis responsoriis ad meas, occasione præcedentis observationis eidem

dem perscriptas, die XIII. Decembris 1712. datis communicavit: Nimirum Illustrissimus Generalis Campi Mareschallus, Comes de Thungen, Spiræ Apoplexia forti beate defunctus, alias summe podagricus, post mortem Anatomico Cultro subjectus, cruorem in duobus Cerebri anterioribus Ventriculis extravasatum, & multas arenulas subflavas in valvulis cordis utriusque ventriculi, in folliculo autem felleo calculum glabrum nigrescentem duriusculum & alium molliorem cum nonnullis minoribus conjunctim drachmas tres pendentibus, obtulit.

Ex quibus duabus observationibus vir Celeberrimus, D. D. Nebelius concludit, in Podagra intemperiem humorum tartaream etiam bili communicari, hancque ad coagulum sic redactam, Apoplexiam causari. His duabus observationibus adjungo adhuc observationem Borelli, qui Cent. III. Observ. Med. 22. pag. 217. refert, in Cystide fellea Nobilis Apoplexia mortui, decem calculos nitentes, coloris flavi subobscuri, & aliquo modo triangularis figuræ, fabæ magnitudine, repertos esse; & Baglivii de fibra motrice pag. 214. qui in obesi Apoplexia correpti vesicula fellis Calculos duos, duros, nigros, & veluti scintillantes, quorum unus magnitudinem Ovi Columbini habebat, alter vero paulo minor erat, invenit. Sic & Philippus Hœchstetterus Observ. med. Decad. X. Casu VI. pag. 415. seq. scribit de Quæstore Comitum cujusdam Fuggeri, symptomatibus apoplecticis demortuo, quod inter alia in ejus cystide fellea lapilli duo maximam partem triangulares, quorum major atricoloris, alter coloris subcineritii, fuerint inventi. Plura egregia huc facientia afferuntur in Dissert. inaugur. Dn. Salzeri, sub Præsidio Celeber-

leberrimi, nunquam satis laudandi, D. D. Nebelii, Heidelbergæ, currente hoc 1714. Anno, de Coagulo bilis in vesicula fellea, habita.

OBSERVATIO V.

Dn. D. JOH. GEORGII GRUBELII,

*De Apoplexia fortissima cum Epilepsia
desperata feliciter curata.*

NE Hercules quidem contra duos: vulgare Nadagium, sed duos sæpius imo plures in perniciem hominis conjuratos se conjungere hostes videmus in dies, quod ipsum satis fuit expertus Centurio quidam hic Dresdæ vir strenuus alias & quadrati pectoris, annorum 56. qui in circumvallatione Stetinenfi Anno 1677. globulo plumbeo in fronte ita vulneratus fuit, ut plane impossibile judicatum fuerit, illum restituere in integrum, qui tamen præter omnium spem ita fuit sanatus, ut officium suum militare sine ulla molestia aliquot annos administrare potuerit. Hic locum mutans cum officio, die 11. Januarii 1693. hic Dresdæ ex aula domum regressus, tantis afficitur convulsionibus, ut sine stupore atque commiseratione maxima patientem aspicere nemo potuerit. Quibus remissis tantus stertor cum sudore frigido & sensuum omnium abolitione succedebat, ut nulla reconvalescentiæ spes videretur esse superstes. Fortissima enim apoplexia cum dicta epilepsia ultra dies tres & noctes patientem ita affligebat, ut ne momentum quidem illum in vivis esse posse videretur. Huic cum omnia incassum essent adhibita, ex Sereniss. Ele-

Electoris Saxoniae ac Domini, Domini JOHANNIS GEORGII IV. singulari clementia olei sancti guttæ tres aliquoties patienti fuerunt adhibitæ, quibus quarta vice usurpatis statim remisit epilepsia cum remanentia stertoris maximi & sensuum omnium abolitione. Usurpatis ergo per medicos cephalicis, apoplecticis, clysteribus, venæsectione, vesicatoriis aliisque remediis optimis, nec quicquam commodi efficientibus, spiritus tandem apoplecticus noster in variis ejusmodi casibus sæpius probatus tanta cum efficacia fuit adhibitus, ut statim se movere patiens atque erigere fuerit conatus, ejusque adhibitione continua per tres septimanas ita per Dei benedictionem convaluit ægrotus, ut postea suum officium sine ullo incommodo non solum administrare, sed & cum Serenissimo Electore Saxon. & Domino, Domino FRIDERICO AUGUSTO Domino meo clementissimo (qui vivat, vivat diu ac felicissime triumphet!) An. 1695. & 1696. in Hungariam proficisci ac castra sequi optime valuerit, de cujus reconvalescencia desperabant omnes Medici & quicunque ejusmodi horrenda aspiciebant symptomata: quorum sententiam confirmabat magis, quia talis affectus per essentiam oriri atque ex læsione cranii suam habere originem apparebat. Sic in Medicina nonnunquam fiunt miracula, & proximus in tantis periculis absque remediis relinquendus non est tam diu, quam diu ille suam non exspiravit animam.

OBSERVATIO VI.

Dn. D. JOH. GEORGII GRUBELII,

De Apoplexia in sene curata.

AD Cantorem Neostadiensem virum antiqua virtute & fide, & annorum 60. die 29. Martii 1682. vocatus illum sine sensu pedeque sinistro claudicantem offendi, cui præmissa Venæsectione mox hoc vomitorium præscripsi:

℞. Sal. Vitrioli emetic. ʒss.

Hoc assumptō ne conatum quidem vomendi persensit patiens, tantum abest, ut operationem exoptatam excitaverit, de quo valde fui admiratus, cum ex Helmontio, Fabro atque Langil Miscell. Curiosis p. 12. satis constat, secretum curandæ Apoplexiæ certissimum in vomitoriis consistere. Hoc ergo ad votum non operante ad sequentia ut transgrederer cephalica, patientis status me jubebat pessimus:

℞. Conservæ rorismarin. ʒiij.

Specif. cephal. Mich. ℥j.

Spec. diamb. diamosch. dulc. an. ʒij.

Sirup. beton. flor. tunic, an. q. f. f. l. a.

Electuarium spissum in os patientis sæpius detrudendum, adhibitâ tamen prius hac potiuncula cum clystere acriore.

℞ Aqu. salv. c. vino, lavend. c. vin. apoplect. opt. an. ℥j.

Essent. lil. convall. salviæ an. ℥j. Essent. castor. ℥℥.

Spir. Sal. Ammoniaci ℥j. Ol. succin. destill. gutt. viij.

Sirup. stœchad. beton. an. ℥℥. M. quæ potiuncula cochleatim patientis ori fuit infusa non sine maximo commodo.

Post felicem clysmatis applicationem & ad materiam magis resolvendam electuarium sequens à me fuit præscriptum:

℞. Rad. pyrethri, ireos Flor. an. ℥j. Sinap. ℥℥.

Zingiber macis an. ℥j. Caryophyll. ℥℥.

Probe pulverisatis adde mellis anthosat. q. s. f. l. a. Electuarium sæpius assumendum & in ore tenendum. Ad linguam curandam sequentia fuerunt ordinata:

℞. Spir. ligni guajaci, Essent. lil. convall. an. ℥j.

Ol. still. majoran. rorismarin. an. gutt. vj.

Sirup. de beton. ℥vj. M. & per interval-la patientis linguæ adhibe.

Externe vertex, tempora, cervix & pulsus Oleo succini destillato diligenter fuerunt inuncti, cui curæ colophonem imposuit clyisma sequens:

℞. Herb. rutæ, salviæ, organ. cent. min. an. mj.

de APOPLEXIA. 453

Flor. salvix, lil. convall. prim. ver stœch.
an p. ij.

Rad. aristol. rot. ꝯß. cyclam. min. rut.
an. ꝯij.

Coq. in f. q. Aquæ colat. R. ꝯviiij in quibus
dissolve.

Elect. hier. c. agaric. ꝯj.

Fellis tauri inspissat. ꝯj.

Sal. rutæ ꝯj. mellis anthosat. ꝯj. M.

Hoc applicatō bene se habuit patiens cum sum-
ma liberorum suorum octo & uxoris lætitia,
Deoque pro tanto beneficio gratias egit maxi-
mas.

OBSERVATIO VII.

Dn. D. UDALRICI STAUDIGELII.

*De Apoplexia bis curata, tertio redeunte
lethali.*

NOlim, dum hæc à me communicatur ob-
servatio, cogitari à quoquam, ea mente
communicari, ut, quasi singulare quid in bina
cura fuisset præstitum, insinuem; vel, ut ad
ipsam curam aut adhibita remedia respiciatur,
contendam. Remedia in usum tracta, fuerunt
pauca, in practicis obvia, pretio mediocria,
quædam propemodum vilia. At vero, cui locum
in suis Ephemeridibus non ingravate concedent
Excellentissimi Naturæ Curiosi, Symptoma est,
quod in tribus paroxysmis exeruit se, nec audiu-
tum, nec lectum à me, fortassis nec ab ullo
alio.

Degebat in nostra vicinia vir quidam egregius, annos ætatis quadraginta quatuor numerans, genio Jovialis, at obesus & vasta corporis mole vix non sibi met ipsi gravis. Hic dum An. 1697. mense Aprili post aliquos officii sui labores ad cubitum se parat, viribus derepente destitutus in lectum toto pondere prolabitur. Audito ingenti strepitu lectissima conjunx accurrit; maritumque sine voce, sine sensu, sine motu, si respirationem excipias, reperit, trunci adinstar in lecto extensum: Quid ageret hoc tristissimo casu deprehensa? Nox erat, & jam medietati proxima: nemo vero, qui consuleret, nemo, qui auxilium præberet. Sumpsit demum in arena consilium, & recordata multæ cum consuetudinis, tum familiaritatis, quæ mihi cum D. Marito intercesserant, ut amicum inviserem, impensissime per submissum nuntium exorat. Veni, vidi, & visis obstupui. Quoniam autem adfectûs atrocitas moram recusabat, curavi, per pharmacopolam, quem comitem sumpseram, ocysus clysterem injici, ex aqua salita Mynsichti; tum tardante operatione, venam secari, demum interpolatim tria cochlearia aquæ apoplecticæ ori instillari. Nondum media decesserat hora, rursus rediêre motus, sensus, adstantium agnitus, vox, vires, ut urgentem clysterem ipse surgens dimitteret: & sequentibus diebus etiam ipsa Sanitas. Reliquum erat, ut futuro prospiceretur. Hunc in finem præscriptæ sunt eidem pilulæ cephalicæ, quas singulis mensibus bis assumeret; Species pro cucupha, quam constanter gestaret; & balsamum, quo quandoque nares inungeret, nec non & tempora, prohibitis rigidissime caseo, lardo, carne suilla, raphanis, alliis, quibus mihi delectabatur, & sæpius indulgebat immodice.

Sed

Sed enim, quemadmodum pericula, quamdiu præsentia, terrent; superata, facile memoriam evadunt: ita Patiens noster, quamdiu funestus casus imago memoriæ obversabatur, sincerissimis monitis meis exactum utcunque præstabat obsequium; elabente illa, cum tractu temporis, etiam hoc omittebatur. Vivebat, quamdiu obtemperans, admodum commode; deterius, à quo præscriptæ cœperat oblivisci diætæ: donec tandem 4. Decembris ejusdem anni post decimam noctis subito cadens, recidivam passus sit, cum iisdem symptomatibus, superius enarratis. Restitutus denuo, licet nonnihil lentius, eadem ferme methodo, quâ nuper; & paululum duntaxat immutatis medicamentis, admoneri cœpit à Patrono suo, Comite N. apud quem erat in serviitiis, alium respiceret Medicum, qui rem curatius perpendat, adfectum ad incudem severius revocet, debitisque medicamentis debellet. Commendatus ipsi fuit ab eodem talis, qui mira facundia adfectum extenuans, constantiam sanitatis stipulate promittebat: Ajebat, adfectum, à quo bis jam esset prostratus, aliud nihil esse, quam convulsiones cerebri, *Es seye nichts als nur ein Hiren=Fraisz*: Cedere tamen facile medicamentis, dummodo ex arte præscribantur: Consideret solummodo, talia se præscripturum, quibus radicitus evellatur morbus, per totum vitæ decursum non rediturus amplius. Pomposa verba, sed quæ luctuosam post se, lethalemque trahebant effectum. Relictus enim appetitui suo pristino, cauteque cum emolumento aliquamdiu vitatis excessibus, die 15. Junii 1698. male se habere cœpit. Mittitur ocyus ad Doctorem cum equo nuntius, significatur indispositio, sollicitantur remedia; quæ dum per integram anxie su-

spirat diem, & de hora in horam ardentem exspectat, paulo ante septimam vespertinam, præcedente quadam vertigine, à viribus in momento derelictus, in terram prostratus, ac extinctus fuit: modo, quo jam tres ante menses, sortem lectissimæ Conjugis miseratus, prædixeram. Hæc enim ex amplissimis promissis, contempta, irritaque, quam ego rigorosissime contendebam diætâ, nihil boni præfagiens, præcedente mense Martio me convenit, quidque cum Marito nunc agatur, prolixè narravit: Veniam simul commixtis & verbis & gemitibus deprecata, quod me derelicto nunc alterius utantur Doctoris consilio & opera: factum id à se admodum gravate, & nonnisi metu, perdendæ apud patronum gratiæ. Reposui jam tum vehementer afflictæ, precibus ullis opus non esse, quibus venia rogetur ad alium Medicum transitus; Sanitatem Domini Mariti tam mihi cordi, quam propriam: lætaturum me summopere, si promissis eventus respondeat: vereri tamen vehementer, ne grande malum fuerit stipulatum: Contemptum tam atrocis affectus, irrisionemque præscriptæ diætæ, indicia mihi videri, in diagnosi trabaliter decipi promissorem: & hinc parum conformia præscripturum remedia: quapropter ominari, quin etiam prædicere pronum esse, tam præcipiti fato rumpendum iri vitæ filum, ut nec Lucis ipsi queant, nec Crucis adferri solatia. Audiit tristis, & profundo cum gemitu excepit hæc verba: at effusissimis lacrimis & ejulatibus eventum, quibus etiamnum quandoque cogitur indulgere.

Jam vero quod admirationem mereatur, putem esse, quod quemlibet paroxysmum secuta sanguinea corporis suffusio: primum quidem, pectus & tergum occupans, intra cordis scrobiculum,

culum, humerorum juncturas & cervicem tam exacte coërcita, ut filo circumducto nec adcuratius potuisset, nec præcisius definiri. Secundæ suffusionis jam amplior erat ambitus, corporis truncum ad umbilicum, insuper utrumque brachium ad cubitum usque rubore incingens. Tertia, cum repentina morte conjuncta, totam corporis molem à cervice ad coxas usque in dorso; à jugulo autem totum pectus cum infimo ventre continuate involvebat, insuper etiam utrumque brachium, solis manibus exceptis: rubedine in juncturis, ubi brachiis manus innectantur, desinente.

OBSERVATIO VIII.

Dn. ALHARDI HERMANNI
CUMMII.

De Apoplexia lethali ex scabie retropulsa.

NOtus mihi pastor quidam Ecclesiæ, qui cum scabiem siccam topicis curare vellet corpore non præparato, sub noctem quarta circiter ab inunctione hora, Apoplexia corripiebatur, & intra horam moriebatur.

OBSERVATIO IX.

JOH. GEORGII GREISELI.

De Apoplecticorum Anatome.

QUotquot Apoplexia aut Catarrho suffocativo mortuos aperui, in omnibus corpora illa callosa viscida ac glutinosa aut in corde, aut in Cerebro, aut in ambobus aliquando reperi, de quibus scribit *Job. Jacob. Wepserus* in tract. de Observat. ex cadaveribus Apoplexia extinctorum.

OBSERVATIO X.

D. GABRIELIS CLAUDERI,

De Sanguine Apoplecticorum frigido.

QUANTAM caloris innati ventilantis, ac virtutis balsamicæ consuetæ depauperationem, quantamque incrassationem, præter ordinarii circuli sui impeditionem patiatur sanguis Apoplecticorum, inter alia è sequentibus clarescit: In duabus Matronis violento paroxysmo apoplectico correptis observavi, dum pro sanguinis ventilatione, ac in circulum ordinarium reductione statim venam aperiri curaveram, eundem emissum mihi adstanti improvise in manum profiliisse actuali præditum frigiditate, non sine animi stupentis alteratione. Ambæ tamen cum

Deo

Deo sunt restitutæ, alternatim, ac successive exhibendo essentiam castorei volatilem, essentiam meam alexipharmacam è sale fuliginis, liquorem C C. succinatum, sal volatile C C. & succini, cinnabarim meam nativam fixatam succino mixtam; elæosaccarô item succini & extractô theriacali linguæ impositis; non minus capite, nuchâ, ac spinâ dorsi inunctis spiritu salviæ, rutæ, juniperi, salis armon. camphoratis; spirituque salis armon. naribus admotô. Deinde, post vires quodammodô reductas, non omissa laxantia, repetita sudorifera, purificantia ac balsamum massæ sanguineæ ordinarium reddentia v. g. Essentia mumie aloëtica, Elixir proprietatis alcalicum, Essent. Terræ catechu; Fonticulus etiam cruri inustus &c.

OBSERVATIO XI.

D. EMANUEL KONIG.

Amuletum è cranio hominis violentâ morte extincti, adversus atrophiam Paralyticorum.

Qualiter atrophia pressô pede subsequatur membra paralytica ex denegato libero spirituum animalium (quos noviter quidam, ut in macrocosmo alias de globulis æthereis & materiâ subtili statuit *des Cartes*, ex globulis vitalibus & horum minutiis abrasis constare asserit) formale nutritionis contribuentium influxu. Practicis notum: Simile quid hîc ante aliquot annos expertus est in Nosodochio bajulus, qui

ex apoplexiâ forti, quâ in Templo verbum Dei prædicare audiens, pro ebrio falso primitus ab adstantibus judicatus, corripiebatur, hâc vero in paralyfin terminatâ brevi in latere affecto, sinistro scilicet, insignem atrophiam incurrit, ad quam abigendam intus poros referantia & coagulum lymphaticum solventia varia adhibita; verum, etsi ætatis nondum adeo provectæ esset, omnia incassum. Contigit forte fortuna, ut ipsum in prato paralytice incedentem offenderem, deque ipsius valetudinis statu præsentis inquirendi daretur occasio, hic se satis bene habere retulit, præterquam quod per aliquot menses mirum in modum ipsi extabuerit membrum seu latus paralyticum, quod nullô modô à Medico ordinario restitui potuerit, hinc se à Villico quodam vicino sibi noto, quem pro gratiis agendis jam visitârit, remedium accipere coactum fuisse, quo etiam radicitus omnis partis affectæ extabescencia brevi cessârit; qualenam hoc sit inquirens, monstravit nodulum de collo pendentem ad usque scrobiculum cordis, quem contrectans, durum osseum quid ipsi inesse facile percipere datum, hoc vero de osse hominis suspensi esse tandem ingenue confessus est, quæ nodulo huic inserta à Villico amico suo acceperit, qui in atrophiiis curandis aliisque nihil præstare valentibus, exinde certissimum remedium habeat, sibi-que etiam omnem ariduram morbum subsequenter inde mox abactam fuisse, id quod animadvertere haud difficulter potui: Verum id quod superaddidit summopere notatu dignum, nimirum quod ab initio mire corpus universum vexârit & inquietum reddiderit, ut fere in lipothy-miam per dies tres inciderit, id prout sancte testatus est, in mentem revocavit homogeneitatem

tem & symbolifmum fpirituum animalium ipfius corporis & eorum, qui in cranio tali refidui erant, dum forte hi extra fphæram illos corporis irradiantes, effluviis mirâ fubtilitate afficiebant, ficque in parte affectâ torpidos exfufcitabant, ut reliqui quoque in motus extraordinarios, leipothymiâ id indicante, difpofiti fuerint. Quanta vero vis naturæ fuperftes maneat in cranio ejusmodi, indicare poterunt Pharmacopœorum nonnulli, qui illud ad fpiritum eliciendum in laboratoriis deftillant, vel etiam philofophice calcinant, fragor enim inſignis & tumultus, quaſi ſpectrorum omnia (niſi ſpectra inde quoque excitari poſſe dicendum eſt) eſſent plena, excitatus, etiam cum valvarum apertione, ceu præter exemplum mihi notum, de his ſimile refert Magnificus & Ampliſſimus Dn. Præſes noſter, Celeberr. D. D. *Joh. Georg. Volckamerus in Decad. II. Ephemer. Ann.* ut hinc & ille, qui Dn. *Balzacio* (ut habet in literis ad Dn. *Conrart* Conſil. Reg.) phantaſma ſine ope Diaboli ſe fiſtere poſſe retulit, haud adeo irridendus fit, adeo namque in naturæ poteſtate hæc *vander Becke Experim. circa Natur. Rer. Princip. L. II. p. m. 310.* radicata eſſe videntur, ut dubio nullus locus eſſe poſſit, nimirum non ſaltem in deſtillatione ſanguinis humani varias interdum humanarum partium ideas viſas & obſervatas eſſe, ſed &, ut *Borellus* habet, poſſe in phiolis, licitâ Necromantiâ, patrem, avum, atavum totamque proſapiam, imò antiquos Romanos, Hebræos & quemcunque volueris, umbratili quâdam reſurrectione in lucem revocari cum propriis figuris, modo eorum cineres oſſaque reſerventur: Nos præterquam & noverimus ex *Monconnyſii Itiner.* celebrem *Burrhum* ex terrâ cœmeteriorum deſtillata

lata phantasmata ejusmodi excitare potuisse, sistemus hîc nobis aliquando pro heroico medicamento ad insultus apoplecticos & epilepticos communicatum sequens ex Cranio humano remedium: Sumatur Caput hominis non sepulti vel violentâ morte extincti, contundatur & destilletur, & ad ℥j. hujus aquæ add. Perlar. præparat. ʒss. rad. Pœon. Castor. aa. ʒj. Diamosch. dulc. Mell. anacard. aa. ʒiſs. Destilla: Exhibe patienti in paroxysm. cochl. j. Ter reiterato, mira videbis.

OBSERVATIO XII.

D. JOH. GEORGII GRUBELII.

Apoplexia lethalis ex bregmatis hiatus, in septuagenariâ majore, coalescentia oborta.

AD matronam nobilem Sibyllam à Meusebach septuagenaria majorem d. 20. Octobr. 1680. requisitus, ut in apoplexia fortissima auxiliatrices illi porrigerem manus, eques eo properavi, illamque in pago Götterlit; omni sensu ac motu privatam vixque respirantem inveni. Inde omnia remedia in illa adhibenda esse frustranea judicavi, quod prognosticum meum tertio die post, quô diem obiit supremum, fuit impletum, licet varia adhibita fuerint remedia. In qua notatu maxime erat dignum, quod bregmatis hiatus illi semper fuerit apertus, qui procul dubio genuina fuit causâ, ut ætatem illa tam grandævam fuerit adepta. Semper enim se bene habuit, nul-

lumque capitis dolorem observavit unquam. Brevis tempore vero ante illius vitæ terminum hanc partem membranaceam concrevisse & in osseam fuisse mutatam, tantamque calamitatem patienti attraxisse filia illius cum domesticis fatebatur natu maxima. Notatu erat ulterius dignum, quod post hanc bregmatis occlusionem materia serosa aliquot dies ante ejus obitum per os tanta in copia effluerit, ut non cubilia tantum eadem fuerint maxime madefacta, sed & ex eadem feri copia rivulus quasi quidam fuerit formatus, quæ tamen materia parum molestiæ creavit patienti, sed quo minus in domo hinc inde ambulare potuerit, non fuit impedimento, sicut & inter ambulandum, at apoplexia fuit ex improvise correpta; post obitum etiam maxima feri copia inde effluxit, quæ nervos comprimendô atque obstruendô vera hujus mali causa extitit, quam feri tamen copiam nullô in apoplectico alio me offendisse memini, nisi in muliere quadam juvene, ex qua ob collisionem capitis antecedentem eandem quantitatem feri foetidissimi incredibilem effluxisse recordor, quæ tamen Deo benedicente, adhibitis in tempore remediis ab hoc malo feliciter fuit liberata.

Multo minus hanc partem capitis (quam fontanellam dicunt) in adultis membranaceam offendi, nisi in hac matrona, de qua tamen fateatur Th. Bartholinus Anat. Reform. l. 4. c. 6. se semel tantum in viro 40; Bauhinus in fœmina 26 annorum hanc capitis partem adhuc membranaceam ne dum osseam se invenisse dicit.

OBSERVATIO XIII.

D. DANIELIS WINCLERI.

De Deglutatione ablata in Apoplectico.

Senator quidam Bregensis apoplexiâ subitâ corruit, rediens ad se, omnes quidem sensus recuperavit, iudicium erat accuratum, memoria integra, paralytis in brachio non usque adeo insignis. At musculi deglutationi inservientes resoluti, adeo ut nihil fere deglutire posset, imo ne guttam quidem bibere sine metu suffocationis præsentissimæ, in quo statu permansit, donec labascentibus de die in diem viribus extingueretur.

S C H O L I O N.

Platerus l. i. Obs. p. 208. casum ejusmodi, sed cum loquelæ amissione, recenset, ubi ægrota saltem collutionibus oris sanitatem recuperavit; & putat id vitio 6. vel 7. conjugationis nervorum accidisse. Contra *Riverius in Obs. comm. à Pacheco Obs. 26. p. 335.* deglutationem ablatam pro lethali signo habet, & à resolutis œsophagi musculis procedere putat. Fortassis *Plateri* casus saltem à vapore stupefaciente inductus, *Riverii* vero à materiâ. Quod ad partem affectum attinet, unum & idem dicunt, cum 6. nervorum conjugatio ramulos suos in œsophagi musculos immittat. Tristissimum ejusmodi casum in matre propriâ summo cum mœrore videre contigit, subito enim apoplexiâ tacta, cum dextri

tri lateris paralyfi, fenfibus omnibus ablatiſ, & reſolutiſ muſculiſ iſtiſ, ita ut ſine ſuffocationiſ periculo ne guttulam quidem aſſumere potuerit, ſecundâ die è viviſ ſublata.

OBSERVATIO XIV.

D. SAMUELIS LEDELII.

De Apoplexia cum Epilepſia.

DE combinato hoc affectu, ſubnectam hanc Observationem. Nobiliſ matrona 67. annorum, 1690. de cephalalgia intercurrente conqueritur, & tamèn comedit & dormit, muniaque ſani hominiſ obit. Initio menſiſ Maji circa vèſperam relicto Gerlicio, ſororem ad tria milliaria diſtantiem, inviſit, idque die Sarurni. Sequenti die Dominico templum frequentat, & adhuc bene valet. Menſæ autem dum poſt ſacra aſſidet, derepente corripitur aphonía, quæ tamen facile cedit adhibitiſ aqiſ ſpirituofiſ. Ingruente nocte redit, cum apoplexia forti. Advocantur exemplo Agnati propinquioreſ, & tandem die lunæ, circa meridiem noctiſ, Medicuſ. Dum ad volo, invenio, apertiſ oculiſ ſtertentem, abſque intellectu, cum leni convulſione muſculorum palpebrarum interpolate invadente. Manuſ & pedèſ frequenter commovebat & attollebat, quod æque convulſioni adſcribebam: dumque hi actiſ feriáſ agebant, leniſ tremor eodeſ occupabat. Applicabam ſtatim quæ attuleram interna & exter-

terna remedia , ulla tamen sine medela: siquidem sola externa huic gravi affectui non satis faciebant , interna autem omnia prout erant infusa , ita effluebant absque deglutitione , ob læsos laryngis musculos. Ne tamen aliquid intermitterem , quod Artis esset , accersebam suppositorium acre , & huic nihil operanti , substituebam Clysterem ex aqua salita , consilio Mynsichtii constantem , qui educebat excrementa foetidissima. Urgebam Clysteris iterationem , quam mediculosæ foeminæ dissuadebant , dum autem utilitatem prolixè indicabam & explicabam , corripiebatur ægrota nostra Epilepsia non levi , quæ aliquot paroxysmis continuo urgentibus , dum vesperascebat , vesperam mortis introducebat. Plures Apoplectici Curæ meæ subfuere , tum Grunebergæ , tum alibi , nunquam tamen talis mihi obtigit casus , per viginti aliquot annorum praxin. Raygerus autem in Centuria Observationum Medicinalium Spindleri , Observatione nona , exempla adducit Apoplectico-Epilepticorum. Adi etiam , Rollfincii Method. Consultator. Consultat. XV.

OBSERVATIO XV.

D. GEORGII FRANCI,

*A mensibus diu subpressis maxima Cordis
palpitatio, tandem Cachexia,
Apoplexia & Mors.*

FEmina xxxvii. annorum, temperamenti cholericici, Ianionis vidua Argentorati auf dem Gerber Graben A. C. cio dcc lxxviii. conquerebatur de mensium subpressione ultra duos annos cum dimidio, atque inde oriunda molestissima Cordis palpitatione, ut cordis vibrationes & foris interdum audiri ab adstantibus potuerint, hæcque miseram ob summam anxietatem præcordiorum, tantum non ad desperationem adigeret. Utebatur V. S. scarificatione, balneis, suffitibus, aliisque, qua internis, qua externis remediis, sed omnibus frustra. Tandem meo suasu abiit ad acidulas Grisebacenses, quas per quatuor septimanas integras largissime bibit; ita ut malum mitesceret; per vices tamen redire minabatur. Paupercula per hyemem & parciores & minus salubri utebatur victu, verno vero tempore catarrhis vexata, & cachexia imminente tandem Apoplectica obiit.

OBSERVATIO XVI.

D. PETRI ROMMELII.

De Aphonîâ rarâ.

UXor Dn. H. Senatoris in Urbe Imperiali, Leofano, Matrona honestissima, 52. annorum, ante septennium, post V. S. proprio, ut multorum perversus mos est, non Medici consilio celebratam, in leve delirium, hinc post deambulationem (quam convivium aliquod excipiebat) & motum concitatiores, in Apoplexiam levem, in dextri lateris, præsertim brachii, resolutionem desinentem, incidit, simulque loquelam omnem amisit, ita ut præter: *Sa / & : Und /* nullum aliud verbum, imo ne syllabam quidem pronunciare vel eloqui valeat; exceptis Oratione Dominica, Symbolo Apostolorum, dictis aliquot Biblicis, aliisque Precationibus, quas sine difficultate verbotenus & absque hæsitatione, sed aliquantulum properanter recitare potest; sed quod notandum, ordine à plurimis annis illi consueto, ita ut si prædictus ordo interrumpatur, precatiunculam vel dictum aliquod Biblicum extra hunc sibi consuetum ordinem recitare jubeatur, illud vel prorsus non, vel post longam temporis intercapedinem, & non sine difficultate efficere queat. Ego ipse periculum fieri curavi, & cum admiratione aliquot precationes recitantem audiui, sed postquam ex jam recitatis unam repetere jussissem, nullo modo, licet omni conatu id tentârit, præstare potuit, donec ab ancilla, cui à longo tempore ordo precum

cum innotuit, preces immediate antecedentes recitatæ fuere, & sic deinceps propositam precationiunculam, sed difficulter admodum recitavit. Jussi pariter ut nonnulla à me prolata verba eodem ordine repeteret, ex. gr. Gott wird helfen / sed irritò conatu, licet pluries tentaverit, & propterea propriæ miseriæ impatiens, lachrymas præmoestitia profuderit. Tentatum insuper fuit, utrum, si formulæ quædam loquendi brevissimæ, ex iisdem saltem verbis in Precationibus ipsius occurrentibus compositæ, proponerentur, illas pronunciare valeret? Sed quoque sine successu. Interim memoria optima est, omnia quæ videt & audit, capit & intelligit, & ad interrogata, etiam de rebus longe præteritis, ab vel adnuendo respondet, bene vel male facta in ædibus modo suo aut carpit aut adprobat; Templum frequentat & conciones audit, magnumque inde solatium se habere profitetur. Domi etiam sacrum Codicem aliosque Theologicos legit libros, sed conqueritur, ea quæ legit, ipsam minus afficere, nec ita memoriæ infixæ manere, quam quæ auditu percipit. Digni manus dextræ contracti, totumque illud brachium motu & calore destitutum est, non autem sensu: Cæterum optime valet, appetitus viget, bene dormit, menses, non obstante ætate, raro huic lunari tributo amplius obnoxia, rite fluunt; fatetur se jam, cæteris paribus, longe saniores, quam antea esse, pluribus medicamentis ab excellentissimis Medicis iterato præscriptis usa est, spe semper frustrata, & re in eodem statu manente, unde à longo jam tempore ab omnibus abstinet pharmacis, suâque nunc, qualiscunque sit, forte contenta vivit.

SCHOLIUM.

Mirabilis hæc Aphonia in memoriam mihi revocat illam, quam ab Amicis nonnullis ad me perscriptam, in *Anno X. Ephemer. Nat. Curios. obs. 183.* postea etiam propositam deprehendi; Juvenis nempe muti, ab hora tantum meridiana duodecima usque ad primam loqui valentis. Ubi præter melancholicam imaginationem sive imaginariam mutitatem, consuetudini primas esse tribuendas; autumo Quamvis enim nulla defunctione jam conqueratur, sensusque tum interni tum externi sint integri, perpeffa tamen antea satis diu symptomata, Aphoniam istam immediate præcedentia, in spiritibus animalibus quandam ejusmodi tenebricosam & vitiosam dispositionem vel errorem relinquere potuerunt, difficillime eradicandam; atque rusticam gentem minora mala ut plurimum non attendere aut magni facere, imo melancholicis sæpius nihil ad sanitatem possidendam deesse, nisi quod sani ipsimet esse nolint, nemo ignorat. Aphoniam autem istam, licet momentaneam tantum, à quadam nervorum adfectione primitus ortum habuisse, vix dubitare licet, quam spasmodicam fuisse, sensus ille, quo è ventriculo sursum fauces versus aliquid repere percipiebatur, arguit; nervorum etenim par vagum dictum, præter alia viscera, tum ventriculum inprimis, tum linguam & laryngis musculos ramis suis copiose accedens, si alicubi lædatur, passionem istam reliquis etiam partibus facile communicat; atque ita ab infesta in stomacho materia nervi stomachici laceffiti contractiones suas convulsivas ulterius in laryngem & linguam propagant, sicque una
&

& partes constringendo, & liberum spiritibus transitum denegando Aphoniam, eleganti exemplo ab Exc. D. Casp. Kölichen in *Act. med. Hafn. Barthol. Vol. 2 obs. 86.* demonstratam, inducunt; idque eo magis, cum & alia partes inter illas adfit communio, ob plexum ganglioformem nervi intercostalis cum simili paris vagi plexu; cui nempe præfocationis in gutture sensum in hystericis adfectibus & quibusdam hypochondriacis adscribere libuit. Cl. Thom. Willisio cap. 26. de *nerv.* Ut experimentum illud, quo canis ligatis nervis recurrentibus vocem amittere perhibetur, taceam; ut & quod læsis iisdem nervis mutos quosdam fuisse redditos, Galenus lib. 1. de *loc. aff. cap. 6.* testatus fuerit. Atque hæc loquelæ interceptio cum satis diu duraverit, tractu temporis eam spiritibus animalibus, sive animæ, si ita loqui cum Willisio liceat, brutali impressionem facere potuit, ut sensim magis magisque ad longiores ferias adsuæfacti, influere se non semper posse ad loca illa, quasi persuasi fuerint, vel potius, licet influxerint, in istam tamen se expansionem & motum amplius non resolverint, quo fibræ musculorum loquelæ inservientium carneæ in debitam tensionem vel inflationem adigerentur; quæ etiam à prægresso morbo debilitatæ leviori spirituum impulsui non promte cedunt, imo fortiori eidem quodammodo interdum resistunt, adeo ut mense Novembri, in præsentia Exc. D. D. Gmelini, balbutiem illam & linguæ in motu tarditatem causaverint, quo nempe tempore vigor sanguinis, ad motum utique necessarii, minor existens partibus etiam minorem calorem largitur; eodem vicissim vernali tempore, quo Celeb. D. D. Wepseri examini Juvenis dictus sistebatur, magis redintegrato

istud linguæ impedimentum emendante. Quod vero statuta adeo horâ loquela redeat recedatque; non sane alteri alicui causæ, quam soli consuetudini, à longiori imaginatione, quâ in hac hora tantum, & postea amplius non loqui se posse delirabat, acquisitæ possum adscribere; quâ spiritus quieti isti 23 horarum jam longo tempore adsuæfacti, & quasi obdormiscentes, statuto momento expergiscant, moveantur, iterumque in somnum solitum labantur. Quamvis enim nunc, horarum etiam transpositione aut horologiorum silentio falli Juvenis istius sensus horologicus nequeat, primo tamen tempore, & antequam observationes de casu illo Curiosi sumerent, ab horologiorum indicio temporis illius determinationem cum desumpsisse, interea credam, usque dum evidentiora fuero edoctus; qui hæc omnia conjecturando tantum proposita volo. Nec silere hîc possum historiam à laudato *Willisio part. 1. tr. de anima brut. cap. 16.* memoratam, Morionis nempe, qui utut futilis & ineptus, horarum tamen intervalla, sine quovis indice exactissime dignoscebat, & quoties integræ horæ elapsum esset spatium, quasi vivum fuisset horologium, illico totidem numeratis bombis, istius horæ numerum talem personabat, nullâque circa res alias occupatione in hujus pensi omissionem seduci poterat; cum enim ab initio horologii sonantis singulos ictus altâ voce obstrependo imitari soleret, quotiescunque nimirum campanæ horologicæ sonitum audivit, statim inclamando: unum, duo, tria &c. evenisse hinc judicat *D. Willis*, quod spiritus animales à diuturna imitatione tali motu juxta statuta temporum intervalla citari assueti tandem sponte suâ nulloque ducente, quasi rotis dentatis spatia

spatia labentia emetirentur, easdem periodos distinguere potuerint. Ut autem ad Nob. *D. Rummeli* observationem revertar, in ea spirituum animalium quidam defectus itidem esse accusandus mihi videtur, quos nempe à Venæsectione improvida (qua sanguis intempestive commotus & rarefactus, serumque una copiosius in cerebrum instillatum, spiritus cerebrales in consensum traxerat,) in confusionem vel inordinatum motum in cerebri penetralibus actos, ac ita delirium inducentes, superveniens tandem apoplexia penitus ab influxu retraxerat, usque dum materia morbifica serosa in dextri lateris nervos translata paralytin excitaverit; quâ ipsâ metastasi quandam ejusdem particulam ad nervos etiam, musculos laryngis irradiantes secessisse, & eorum tonum relaxasse, sicque spiritibus liberiorum in illos influxum præclusisse, autumo. Unde cerebrum præternaturali isto humore liberatum munia quidem sua in judicando, imaginando, memorando & intelligendo obire, spiritusque suos per nervos sinistri lateris absque impedimento dispensare valet: loquelæ tamen libertas inhibetur, atque spiritus, quamvis à cerebro suppeditati, ob viarum obstructarum & conniventium obstaculum, ad vocis instrumenta ulterius non feruntur, imo longiori hac exclusionem refractarii quasi facti ad principium suum recurrunt; nisi quandoque omni conatu adacti pauci eorum per vias impedimentum quidem obicientes, non tamen penitus occlusas, persuadente id sensu in partibus adfectis superstitie, irruentes pro simplicium istarum vocularum: *Ja* & : itud enunciatione potentiam partibus loquelæ destinatis largiantur. Dum vero spiritus illi cerebrales, sive, juxta *Willisium*, anima sensi-

tiva, talem organorum vocis sentiunt vel percipiunt motum, ad quem obeundum longo annorum exercitio olim fuerunt adfuefacti, mox, accedente Voluntatis imperio, collectis quascopiis insurgentes vi percurrunt, & solitum decursum magno conatu & impetu peragunt; hinc deproperatâ precum notarum recitatione opus est, ne cunctando spirituum motus continuus & per materiam morbificam nervosque relaxatos transitus impediatur cessetque; quos alias novo denuo stimulo suscitare & impellere necessum foret. Quare etiam ordo precum si invertatur, sicque motus inconsuetus spirituum requiratur, illi neutiquam obtemperant, nec obstaculum in viis præternaturaliter adfectis percurrere tentant, nisi quandoque magnâ sollicitatione & nixu ad id impellantur. Et tandem consuetudini eo probabilius adscribi id poterit, quo magis indubitatum est, magnam ipsi vim esse tum in vitalium animali facultate, (vid. Celebr. *D. Erasmi Bartholini Quæst. academ. de Consuetud.*) unde etiam altera natura adpellari meruit; prout inprimis somni exemplo, pluribus statâ horâ advenientis & recedentis, clare ostenditur *l. c. à præfato Wil- liso*. Quin imo devotis etiam cæteroquin hominibus, quæ naturæ humanæ est depravatio, magnum sæpe animæ dolorem imprimens, multoties accidit, ut consuetas precandi formulas (exemplo historiæ analogo ut liceat uti,) v. g. Orationem Dominicam, absque hæsitacione ulla recitent, non intellecto tamen & perpenso rerum atque verborum in eadem sensu, sed cogitationibus interea alibi circumvagantibus; quæ sane inanis battologia & sine mente sonus non succederet, nisi spiritus motui isti vocali obeundo jam longo exercitio adfuefacti monstratum iter decurrere sponte scirent.

OBSERVATIO XVII.

Apoplexia à retentis mensibus.

HOnesta femina, tertium tunc puerpera, XXXVII. annorum, in ipso partu à domesticis perterrita, fœtu excluso, *lochiae* habuit retenta. Hinc eâdem nocte fit *apoplectica*. Vocatus subito, præmissò acriori clystere, circa primam noctis *saphenam* jussi incidi, mane circa nonam *cephalicam*, non neglectis aliis, quæ in hoc rerum statu commoda & tuta videbantur, & adhuc, Dei gratiâ, vivit feliciter.

OBSERVATIO XVIII.

De Apoplexia ex ebrietate.

EXemplum mortui ab Ebrietate vidi Bregæ in adolescente forte 19. ann. Tobiâ Neandro von Jägendorff. Is conquestus est subito de vehementissimo dolore capitis, præsertim circa dextrum tempus cum vertigine. Sinistrum crus illi co fiebat paralyticum, & deinde etiam reliquum corpus, accessit aphonía & stertor cum levi spumâ. Intra duas horas obiit. Dextrum brachium quandoque attollere potuit versus caput. In agone oriebantur in corpore maculæ latissimæ sanguineæ, quæ mox evanescebant, & ex naribus prodibat pituita tenacissima copiosissime.

S C H O L I O N.

Apoplexiam hanc sanguineam fuisse & Obser-
G g 5
vatio-

vationem hanc similem Cl. Wepferi historiæ primæ puto. Et procul dubio, si caput apertum fuisset, eadem reperiissent. Nam, à nimia vini ingurgitatione, quantum sanguis inflammetur & spiritus agitentur, notum est. Quid mirum, quod venæ & arteriæ, nimium repletæ, ac magis magisque distentæ, amplius sanguinem continere non potuerint, sed furculo quodam disrupto in ventriculos cerebri vel cavitatem inter Cerebrum & membranas sanguinem fuderint, & ita compresso & obstructo Nervorum principio Apoplexia orta? Cum etiam venæ capillares in habitu corporis idem fecerunt, quod satis luculentum evadit ex maculis sanguineis in agone incute obortis.

OBSERVATIO XIX.

Excessus momentaneus Serenissimi Ducis Saxo-Isnacensis, JOH. GEORGII, conjecturaliter delineatus.

Q Metellus Macedonicus de Q. Cornel. Scipione, optime de Rep. merito, cum interentum conclamari audivisset, mœstō vultu, æmulus licet & voce confusā, in publico exclamavit: *Concurrite, concurrite cives, mœnia urbis nostræ eversa sunt!* Vix annus jam effluxit, à quo communis Patriæ miseria eadem verba mihi & omnibus extorsit *Concurrite, concurrite cives, mœnia urbis nostræ eversa sunt! Palladium nostrum creptum est: Pharos nostra diruta est; columna nostra cecidit! corona capitis nostri ablata est: Paxillus, qui fixus erat in loco fideli, periit! Scitis enim, ô Mei! quam bene,*

ne, quam fideliter, quam prudenter Vobis imperârit Serenissimus Patriæ Pater, JOH. GEORG. Dominus cheu! quondam noster Clementissimus, post fata tamen quoque, maximô suô meritô, humillime & æternum à nobis omnibus colendus. At scitis etiam, ô Boni! quam subito conciderit, quam pusillum momentum illustrem animam æternitati reddiderit. Næ pium non tantum æquumque, sed etiam valde curiosum erit, abstrusam *momentanei* istius *excessûs* causam *conjecturaliter* indagâsse. Dixi: *conjecturaliter*. Cum enim Illustre Optimi Principis cadaver non licuerit inspicere, Serenissimâ Viduâ id vetante, utique præter *conjecturas*, ratione tamen & experienciâ munitas, à me nihil præstolabimini. Vellem equidem, ut eruditiores Magistri, & qui longius consenuère, in Arte, hâc me fasce levâssent. Gloriosius enim mihi doceri, quàm docere. Interim nemo, nisi malus, boni Civis meditatiunculam, placidæ Curiosorum censuræ modeste subjectam, roserit: sed potius, monente S. Augustino L. I. de Trinit. c. 2, §. 3. quisquis hæc legeris, *ubi pariter certus es*, perge mecum, *ubi pariter hæsitas*, quære mecum, *ubi errorem tuum cognoscis*, redi ad me, *ubi meum*, revoca me. Monitus meliora sequar. *Morbô attonitô* succubuisse Optimum Ducem, una omnium vox est. Surrexerat mane hilaris vegetusque, cantârat hymnos, more suô, matutinos: viderat devotô cum stupore reatum in feretro viduæ in Nain filium, pransus erat pancratice, consultârat de arduis Provinciæ suæ negotiis, Consiliarium, quem alio missurus erat, adhuc plenius instruens. Verbô: cuncta *apparenter* bona, sana, robusta. Nihil molestiæ, nihil questuum, nihil de adverso periculi! Sed
audi,

audi, quid in fatis fuerit ! Excurrenti tandem circa quartam Vespertinam in sylvam, *Eccardsbusæ* proximam, (ibi enim cecidit generosa anima) occurrit forte cervus, quem plumbeo globulo ille trajecturus, in momento, in ictu oculi, corruit pronus in faciem, vere ἀποπληκτὸς, nullò sensûs motûsve signò amplius nobis datò. Accurrunt attoniti, qui forte aderant, ministri, cruentant venam, sed erat irrevocabile fatum. Heu mihi ! quanta, & quam universalis, & quam momentanea Tanti Herois ἀποπληξία ! Quæ similitudo desumpta est à victimis, ad aram prostratis. Cum enim antiquitus animalia sacrificanda securi in fronte tam valide percuterentur, ut repente conciderent, dicebant ea ἀποπληκτὰ, homines vero, eodem modò concidentes, ἀποπληκτες, ipsumque morbum ἀποπληξίαν. Quam si cum Cortnummio αἰμοσασίαν in cerebro dixerò, recte me dixisse reor. Duo *Senex* noster in sanguine expendit maxime, σύσασιν, & κύνησι, seu περίοδον, ut ipse interpretatur *L. I. de diet.* Utraque quamdiu secundum naturam se habet, ὁρδοσάδιοι sumus. Sin : ἱλίας κακῶν. Σύσασιν amittit sanguis, (1) per rei alienæ mixturam, (2) per propriam in seipso alterationem, & corruptionem, ob qualitatum dissidium & exuperantiam, quod commodè vocamus διάρῃσιν & φθοράν. Περίοδον vero amittit sanguis, vel cum plus solito movetur, & cum emoveretur, & motus fit præter solitum non consuetus, tunc nascuntur plerunque deliria; vel cum decantatissima fit φλεβῶν ἀπόληψις, quam cum Pergameno recte dixeris venarum repletionem, à copia factam. Copia ista purus putus sanguis est, late sumtus, qui nimium auctus, seu concitatus, sibi ipsi fit noxius, liberumque motum occludit. Hòc vero denegatò, quid nisi

nisi πινδμάτων ἀπόληψις? quam Senex noster belle vocat εἶσιν Αἰμοσασία igitur nobis idem quod sanguinis sufflaminatio. Cum vero plures αἰμοσασίαι diversos creent morbos, generi addidimus specificam differentiam, quâ certus, & quidem *attonitus* (ut *Celsus* vocat) *morbis* tantum significatur. Illam denotat *substantia* illa *alba*, quam proprie dicimus *cerebrum*, totum pro parte sumentes. Est igitur pars affecta, seu *subjectum* in hoc morbo *mediatum*, organon animale, i. e. cerebrum cum medulla spinali & nervis ab eodem propagatis. *Immediatum*, arteriæ eò in loco, ubi in cerebrum descendunt. Si exit officio suo cerebrum, i. e. quando nec sensum, nec motum voluntarium præstat, apoplexia succedit. Pertinet igitur ad functiones læsas. Læsiō est, quando functio prorsus non fit, aut aliter, quam decet. Hic prorsus non fit: num *abolite*, vel *intercepto*? ajo posterius. Hæc autem fit vel spiritu non influente, aut influere prohibito. *Secundus* ignis à corde exiens (quem *Hippocr. L. I. de diet. text. 33.* ἄσρων δύναμιν habere dixit) ille est, interprete Elegantissimo *Lindenio L. II. Med. Physiol. c. 15. §. 47. p. 764.* qui per arterias forporales ascendit in cerebrum, & hinc per nervos decurrit in musculos, & hinc cum sanguine per venas redit ad cor. Ideo autem hunc πρὸς αἶσιν ἄσρων δύναμιν habere asserit Senex, quia spiritus animales omnium sunt defecatissimi, subtilissimi, agillimi, & minime calidi. Hi spiritus quando ad nervos, ubi officio suo animali, sensum scilicet motumque voluntarium, ex animæ mandato, præstando fungi debent, decurrentes in via sufflaminantur, intercipiuntur, conculcantur, & influere prohibentur, quid nisi ἀπολήψια? Hinc Cl. *Langius*, in Alma Lipsiensi Prof.

Prof. olim Celeberrimus, in *Miscell. Med. Curios. V. p. 11.* apoplecticum hoc malum unice assignat *enormi circulationis sanguinis impedimento*, seu sanguinis iste motus in ipsa *cerebri substantia*, seu in *venis*, *arteriisque jugularibus ac carotidibus*, seu etiam in ipso *pectore*, cohibeatur. Causa morbi antecedens *solus sanguis* est, *late sumtus*, adque partem affectam ruens. *Late sumtus*, dixi, i. e. quem latitudo sanitatis permittit, *phlegmaticus*, *biliosus*, *melancholicus*, aut *flatulentus*, non quidem iste, qui jam obstruit, sed qui decurrit ad cerebrum, inque via ac procinctu est, ut obstruat. Hoc Excell. D. *Cortnummius*, Professor Reg. in Equestri Danor. Sorana, Medicus $\kappa\tau\ \phi\acute{\upsilon}\sigma\iota\upsilon$, ($\& \kappa\tau\ \nu\acute{o}\mu\epsilon\upsilon\omicron\nu$) ut accuratus, ita sane fortunatus, Hospes ac Præceptor meus (ipsò *Hipp. juramento*) etiam *post fata Parentis locò semper habendus*, in aureolo suo de *Morbo attonito* libro c. 24. p. 89. venustò illustrat $\phi\alpha\iota\nu\omicron\mu\delta\acute{\rho}\omega$, è *Macrocosmo* petito. Sicut enim *Luna*, terrâ inter hanc & *Solem* interpositâ, necessario *ecclipsin* patitur, hoc est, *lumine* suò, à *Sole* accipiendo, privatur, ita, ut *lucem*, *tenebrarum* istud solatium, animalium generi præstare non possit, neque influxu suò, sapientissime à Creatore instituto, *generationum & mutationum* vicissitudines obire: ad hunc modum *Cerebrum* in *Microcosmo*, sanguine inter hoc & cor interposito, quasi *ecclipsin* patitur, h. e. omnibus suis operationibus privatur, ita, ut omnia corporis membra *lucis*, spiritus animalis, indigentia extremis obruantur tenebris, cum neque *oculus* tum videat, neque *auris* audiat, neque *manus*, neque *pēs* ullum suum officium faciat, & quod maximum est, ne *ratio* quidem ipsâ tantum possit, ut ægritudinem suam agnoscat.

Idem

Idem sensisse *Hippocratem*, patet ex *Lib. de morb. 2. text. 6.* & *L. de acut.* ubi causam in sanguine, locum affectum vero non nisi in *vasis* quærendum esse asserit, idque laudatissimus Vir ibidem accurate probat, & contradicentibus egregie satisfacit. Exempli prostant apud *Plater. L. I. obs. 13.* ubi *plethorica* femina, cum in macellum prodire vellet, pecuniamque in mensa depositam acciperet, subito corrui, humique prostrata & tota resoluta maximam sanguinis copiam ex ore naribusque effudit, & mox extincta est. Adde *Borell. C. II. observat. 34.* *Bonet. L. Sect. XVII. c. 4.* *Tulp. L. I. observ. 7.* *Hildan. C. III. observat. chirurg. XI. seq.* *Bartholin. C. II. hist. 60.* *Laurent. L. IX. anat. contr. 18.* *Rhod. C. I. observ. 67.* Causa apoplexiæ primitiva, seu *αἰσθητικὴ*, est omne id, quod sanguini, ut obstruat, occasionem, seu initium largitur, vel potentia, seu actu, ut sunt sex res non naturales, quos inter aër. In frigido, austrino & uliginoso, qui sanguinem figit, hunc affectum notavit *Holler. L. I. de morb. int. in schol.* cum aliis, qui tamen causa saltem occasionaria. Cibi *ἐνυμνοί*, vinum generosum & crassum, cerevicia crassa, & multæ nutritionis copiose ingesta. Observatum quoque, qui Vinum *Absinthites* crebrius usurpant juvenes, concitasse sibi apoplexiam. Ex Spiritu Vini *Bonet. Med. Sept. collat. L. I. Sect. XVI. c. 8.* à fungis *idem p. 165.* Ebrietas frequens hujus mali causa, *Forest. L. X. observat. 76. in schol.* & passim alibi. *Plat. L. I. observat. 13.* *Bonet. lib. 5. Sect. cit. cap. 7.* nec non tabacus, quo de vide *Barbett. L. I. Prax. cap. 2. pag. 27.* & *Cl. Decker. in not. pag. 30.* ac *D. Helwig. in observat. num. 45.* Suo enim tempore in Galliis Massiliæ duo fratres mercatores

Hol-

Hollandi, voluptatis gratiâ, certârant, quis eorum plures fistulas tabaci exurgeret, sed dum unus ad XVII. alter ad XVIII. assumsisset, ambo subito *apoplecticorum* instar deciderunt. Rationes subnectit *Celsus* noster in erudito suo Scholio pag. 167. quod vide. Venena inconsiderate assumpta, ut *hydrargyrum*, secundum quorundam opinionem, trahentium hûc *Fernel. de lue venerea cap. 7. & Ferd. Pozeti L. II. de venen. cap. 21. ac Hildan. C. VI. observat. 22.* Idem contingere potest in excessu, vel defectu laboris, teste *Ballon. L. II. Consil. Jackin. in IX, rhas. 9.* Adde animi *παράματα*, quæ inter excellit ira, brevis iste furor. Exempla dat *Forest. L. X. observat. 70. in schol. & terror. Vid. Amat. Lusit. C. III. curat. 22. Forest. L. X. observat. 75. Fabr. Hildan. C. VI. observat. 12.* accedit immoderata feminis excretio. Historiæ liquidem docent, quosdam inter amplexus animam prurientem ejaculasse. *Forest. L. XXVI. observat. 20. Hildan. C. I. observat. 19. Harsdörfer im grossen Schauplatz jämerlicher Mord-Geschichte P. I. hist. §. 11. seq. Plin. L. VII. cap. 53. Pontan. in opusc. de obedient. Henric. ab Heer observat. 9. c. f. Bonet. lib. cit. pag. 165. a.* Suppressiones mensium, lochiorum, hæmorrhoidum suum addere possunt symbolum, testibus *Lusitano C. V. curat. med. 3. Ballon. in paradigm. pag. 318. Font. in respons. & curat. pag. 35. & pag. 29. in prior. fascicul observation. near. Med. Phys. num. 115. Dec. II. Ephemer. Curios. Ann. V. observat. 225.* nec non balnea intempestive usurpata, *Hildan. C. VI. observation. 96.* Adde suppressionem hæmorrhagiæ narium, *Hildan. C. III. observat 11.* immoderatum acidularum usum, *Francisc. Hildesheim. Spicil. TI. pag. 526.* Scabiem retropulsam, *Dec. I. Ephe-*

*Ephemerid. Curios. Ann. I. observat. 58. Vermes, Holler. Scholiast. in L. I. de morb. int. cap. 19. & Zacut. L. II. Prax. admir. 12. Pinguedinem finistri cordis ventriculi, Bartholin. C. I. Epist. 2. A causis violentis, ictu scilicet & casu, sæpius quoque accidisse; exempla loquuntur apud Beniven. L. de abdit. morbor. caus. cap. 110. Forest. L. X. observation. 79. Tulp. L. I. observat. 3. & 6. Adde Cortnumm. cap. XXXII. §. 27. seqq. ex tumore in capite apud Bartholin. C. IV. hist. 86. exque capitis vulneribus, ut, præter Hippocrat. L. II. de vuln. cap. 2. text. 27. passim testantur exempla. Quid? quod ex solo sanguine extravasato notârunt affectum hunc Wepfer de loc. aff. in apoplect. pag. 229. Plater. L. I. Prax. cap. 2. à fulmine patrem cum filio tactum scribit. Beniven. Lib. de abdit. observat. 23. Plurcula exempla ab abscessu, epilepsiâ, polypo cordis &c. collegit Clarissimus Bonet. L. I. anat. Pract. Sect. 2. de duobus ossiculis in cerebro mulieris apoplexiâ extinctæ repertis vid. curiosam disputationem D. D. Scheidii, Profess. Argentinenf. habit. An. 1687. Mens. Jun. Addi demum potest ætas senilis ut plurimum, in prima siquidem unicum tantum hujus tragoediæ exemplum vidit Cortnummius, D. D. Wedelius vero annô ætat. XVIII. D. Rôslér annô XIX. ex ebrietate. Bonet. Lib. I. Medic. Septentrion. Section. 17. capit. 7. habitus *εὐταρκος*, temperies calida & modiciter humida. Princeps noster *plethoricus* erat, & *catharro suffocativo* (quem jamdudum metuebant alii,) obnoxius. Multa tulerat in castris, sudans algensque; domi etiam vigiliis, curis & mœrore attritus, aliis serviendo seipsum consumebat, adeo ut magnam *scorbuticorum humorum* colluviem, jam olim sub alio Sole collectam,*

adhuc in corpore circumferret. Quo de vitio ipse mihi questus, cum superiori ætate (consilio aliorum) *acidulas* biberet *Pyrmontanas*. Magna *catoches* cum apoplexia affinitas! una utriusque pars affecta & causa, & gradu saltem differunt, consentiente Cl. *Barbette L. 1. Prax. c. 3. p. 31. D. Schrock. in schol. ad obs. Helwig. 59. & D. Bonet. L. 1. anat. pract. Sect. 4. obs. 1.* adeo, ut, iudiciò *Argonautæ* nostri, & illa commode dici queat *attonitus morbus*. Cum igitur tam rarò exemplò, sanus, hilaris, vegetusque corruerit Princeps noster, inque momento illustrem efflârit animam, nullò signo pathognomicò præviò, nullo etiam vitæ retiduæ indicio amplius à lapsu nobis datò, quid impedit, si cum non nemine excessum hunc *apoplectico-catalepticum* dixerò? erat siquidem ὅλα τῆ σώματος, καὶ τῆς αἰσθησεώς τε, καὶ γνώμης, καὶ κινήσεως παράλυσις, totius corporis, sensus, & mentis, motusque (omnimoda) *resolutio*, eaque momentanea, verus ἀσπρεξολισμὸς, seu *sideratio*, aut repentina *congelatio* spirituum, forte à vapore, quales in *fulmine*, & è *terræ specubus* aliquando exhalare videmus, quæ subito rigida reddunt animalia, ut testantur exempla apud Cl. *Major. de serpent. petres. & 26. p. 22. Aventin. L. 7. hist. Boajar. p. 480. D. Sachs. in dissert. de mirand. lapid. nat. p. 68. Bartholin. C. 2. b. 100.* Quid vero *catalepsis*? certe, censente D. *Fischero*, Archiatro Anhaltino, in *corp. Medic. Imperial. L. 3. Tit. 10. p. 221.* nihil aliud, quam *soboles succi melancholici nimis fermentati*, casibus externis non neglectis. Prudenti pauca & omnia. Ego nullum apoplexiæ exemplum, quod cum nostro exacte conveniat; vel apud *Schenck. Forest. Donat. Hochstett. Fernel. Tulp. &c.* adhuc reperire potui, nisi unicum istud *Plateri L. 1. obs.*

obs. 27. quod *equaliter* huc quadrare videtur de Candidato scilicet, qui in cathedra purpurâ Doctorali jamjam vestiendus, cum A. 1595. in antiqua Basiliensi peroraret, subito corruit, totus attonitus, sine sensu motuque, in quo paroxysmo è brabeuterio in conclave delatus aliquantulum permansit, donec admotis refocillationibus ad se rediret. Cum de morbo diu anceps quæstio foret, recte censuit *Platerus*, esse *catalepseos* speciem, cujus causam dicit, (1.) *nimiam animi intentionem in orationem*, quam memoriter recitabat, (2.) *prægressa studia assidua*, (3.) *capitis imbecillitatem*, & (4.) *humorum melancholicorum copiam*. Quæ si locum habent, proh! quam pusillam musculam cum aquila contulero, si contra expendam continuos labores molestias, pericula, vigiliæ, mœrores, curas, verbô: assidua studia, æstus inter & gelu, ab ipsa juventute Cæsari, Imperio, & Patriæ, domi forisque, fide & constantia, impigre ab Augusto nostro Saxone exhibita. Inde non tantum capitis, sed totius corporis imbecillitas nata, & magnus humorum melancholicorum proventus. Puella ista apud *Sal. Divers. de affect. particul. c. 4. p. 216.* passa erat *cephalalgiam*, *vertiginem* & *anxietatem*, antequam altero die subito caderet. Nihil horum in Serenissimo nostro. An vero in cadavere ejus in arteria magna, inque vena cava etiam sanguis *concretus* inventus fuisset, & sic quidem, ut, ceu *gladius ex vagina*, integer educi potuerit, *αὐτοψία* edocuisset. In omnibus, quotquot *Greiselius* vel *apoplexiâ*, seu *catarrho suffocativo* extinctos aperuit *Dec. I. Eph. Curios. Ann. I. obs. 74.* corpora illa *callosa*, *viscida* & *glutinosa*, vel in *cerebro*, seu *corde*, aut in *am-*

bobus aliquando vidit, de quibus *Wepfer. in tr. de apoplecticis.* Et *Jacotius Comm. ad aph. 7. L. 2. Coac.* in anatome catalepticorum venas in capite *crasso* sanguine plenas vidit, non secus ac *Bartholinus* noster omnes cerebri ventriculos *concreto* sanguine in apoplectica turgentes, ut ne guttulam amplius exciperent. *C. 2. hist. Grumos* sanguinis *spissos* in utroque ventriculo cerebri offendit *Dn. van Flemmerding in disp. sua de apoplexia.* Sanguinem *actu frigidum* in apoplecticis notavit *D. Clauder. Dec. II. Eph. Cur. Ann. IV. obs. 138.* In venis adhuc calentibus nonnunquam concrevit, & in apoplexia adeo *concretum* notavit *Haydochus*, ut, cum venam phlebotomando divisisset, divisum quoque sanguinem concretum in ea repererit. *Higmor. L. 2. Anat. P. 2. c. 6. p. 158.* qui bellam subnectit rationem. Ut vitium capiant, nō moveantur aquæ, cernimus omni die. Eodem modō, motu sanguinis circulari, vel à crassiore sanguine, aliisve variis causis, etiam abditis aliquando, impedito, seu sufflaminato, coagulatur equidem & grumescit, seu concrevit, ut multis exemplis probat *Phosphorus* noster in *Ocean. Macro-Microcosm. §. 136.* Instar corallii frustorum & ramusculorum in venis inventum refert *Borell. C. 2. obs. 28. & Rioli. Enchir. Pathol. & Anat. L. 2. cap. 27. pag. 142.* instar medullæ sambucinae concretum vidit cum *D. Sim. Paulli de febr. malign. §. 80.* Sic etiam in Serenissimo meo idem fuerit congelatus, concretusque, ut circulo naturali in momento tantus obex, tantumque sufflamen poni potuerit; cujus causæ adjuvantes, præter superius tactas, austrinus, autumnalis, & tunc vespertinus aër, (quem tot annis nebulosum, pluviosum, uliginosum &c. in castris & sylvis etiam, senex
tunc,

tunc, hauserat,) ut tandem compedes quasi injecti sanguini, & funesta ista *σπάσις* subsecuta sit. Non dubito tamen, quin, si prudens adfuisset Medicus, moram aliquam nexuissent fata, & pausam saltem fecissent, si omnino ea devitare noluisset divina Providentia. Sed meræ conjecturæ sunt. Nec grandius quid Tibi spopondi. Utinam, & ô utinam cadaver Optimi Principis curiosius examinare licuisset, reperissemus utique, quod aureos meruisset asteriscos, & canâ æternitate dignos. At cum id non permiserint Superiores, nihil, præter suspiciones à me expectasti. Interim memoria Optimi Principis sit in Benedictione!

OBSERVATIO XX.

D. DANIELIS LUDOVICI,

*De Apoplectico in venerè Extremisque
infantum Epilepticorum Convul-
sionibus.*

VENERI, nec uno modo, immortuos, præter alios recentior quoque *Sinibaldus* refert. Duos & quidem provectiores, statim post solutam copulam, syncope alterum, alterum apoplectice fere fato functos scimus; unum in ipso actu; ut haud boni tituli succuba, quin deprehenderetur, ab eo liberare semet vix potuerit. Quispiam vero, pariter ætate senior, paucis ab hinc annis, cum nimium anniteretur, apoplexia (leviore tamen, & in qualemcunque artuum dextri lateris resolutionem, intra unam alteramve septimanam cedentem desinente) corripiebatur.

Postquam ad se, elapsâ forsan octavâ horæ parte, rediisset, referebat, quod, prius quam sensus ipsum ulteriorque motus ex improvîso, in negotii sui (nec dum tamen absoluti) pertractatione reliquissent, perceperit insignem in occipite tensionem, atque versus nucham in interioribus contractionem, quasi quis, (nec enim indoctus erat, meninges eò cogeret: fallere tamen noluisse uxorem, cum nihilominus fefellerit, homo facetus! cautius interea hinc mercari discens. Confirmationi autem nobis hæc in parte fuerunt, quæ amicorum aliqui & olim, & labentibus nunc annis, consilii quoque causa retulerunt. Eunuchorum Terentianorum modo se agere fatebantur, nec suppetere, quod cum sua post nullos non labores dividant. Dum tamen maxime conentur, parilem sibi oriri tensionem. Et inter hos unus, (meritissimus olim Præceptor) apoplexiâ obiit; alius convulsionibus epilepticis: alius adhuc de vertigine, sub paulo intensioribus animi laboribus queritur. Usque adeo antiquum illud verum est, parvam hic subesse epilepsiam; aut, quod scoticus nuperimus voluit, superiora tantisper pro derelicto haberi, dum anima alibi rusticatur. Sed enim ejuscemodi contractionum manifesta quoque, in externis etiam, videntur in infantum epilepticorum agone indicia, & ut ipsa (futuris nondum satis coagmentatis) cranii ossa agitentur, atque invicem quasi manu compressa collidantur, ultimo simul erumpente spiritu. Vidimus aliquando in serenissimo puello, nondum semestri (fortuito supervenientes) amplius quidpiam, sub parili violentia obitûsque momento è naribus tum semi-erumpens: nî os cribriforme obstitisset, cerebrum dixissemus, adeo crassitie candoreque ei,

ut ovum ovo, erat aspectu simile: pulsem interea eo die non sumserat; nec lactiforme quid, pituitosumve erat; nec epilepticorum spumosa excretio. Abducti à Serenissimi Parente cum rediremus, munda pro more jam erant omnia; nec cruenti quid in naribus, sed nec lactis à stomacho expressi in ore notas deprehendere potuimus, hodieque hæsitantes.

OBSERVATIO XXI.

Verbera imminentis apoplexiæ remora.

DE insigni *flagrorum* usu in Arte saluberrima, erudite differuit olim ὁ Πάτερ Thomas Bartholinus, specialiter in *suscitanda Venere* ὁ Χαρίεστας Meibomius in singulari libello, in debellanda febre, Curiosus noster Oribasius, Amicus colendus, in *addend. ad Dec. II. Ephem. Germ. Curios. Ann. III. Observ. 93.* & in emendanda dysuria ego ante biennium in *Fascic. I. Obs. mearum. 26.* Cyriacus Schönthau / Vir athletici prorsus habitus, facetus insuper & eruditus, tunc castra sequens, de summa lassitudine & torpore universi corporis, dolore capitis periodicò, & vertigine, Medico suo ordinario longas decantans lamentationes, jubetur venam incidi, ut præcaveret, qui familiæ suæ communis erat, morbum attonitum. At ille maluit salutis suæ omniumque bonorum jacturam facere, quam saluberrimò hòc præfidiò uti. Adeo horruit istud, ex terrore à matre in utero incusso. Interim Medicus suæ opinioni tenaciter inhæret, & Cyriacus etiam suæ. Qui illius tandem pertæsus ad alium cucurrit, qui eandem repetens cantile-

nam, pereundum sibi, vel parendum, adeoque
 extimum in mora periculum, serio pronuncia-
 vit. Ille sacrum inter & saxa stans, vitæ lon-
 gioris cupidus, tandem nihil interesse ratus, quâ-
 cunque viâ, sanguis sibi molestior ejiceretur,
monumenta bubula (Plaut. *Stich. a. I. Sc. II. v. 6.*)
 seu *cenfionem bubulam* (*Aulular. a IV. Sc. I. v. 15.*)
 suâ sponte substituit. Abdens igitur se in ere-
 mum domesticam, *cottabos bubulos* (*Trin. a IV. Sc. III. v. 4.*) insigniter in se crepare & sævire
 sivit. Quô exercitio, motu, excandescentiâ
 sanguis non modo ex dorso prorupit, sed etiam
 nares referatæ ad horam & quadrantem fere eun-
 dem largius fuderunt, summâ cum *εισφογία* opta-
 toque levamine, ut nequaquam dubitârim, aspe-
 rum hoc remedium ultro repetiisse. Veniens dein-
 de Hirschfeldiam ad Patrem meum, civem suum,
 inventum hoc speciosius commendavit. Rogat-
 us, cur duram & valde dolorificam istam sele-
 gerit cruentationem? erras, inquit, amice; re-
 catrix mundi opinio. Ecce Capuccinos, aliosve
 strictioris observantiæ Monachos, qui se ad san-
 guinem usque injussi aliquando flagellant, &
 ego, ob tantum lucrum, quod sanitas est, mor-
 tuum bovem formidem?

Scorpius atque fabæ nostra fuere salus.

Intelligens scilicet per *scorpiones* flagella, quæ
 taxilli, uncinuli & aculei ferrei innectebantur,
 aliis *hamata* dicta, (vide *Dionys. Gothofred. not. ad Leg. 2. ff. de pœn. C. de exaction. Tribut. L. 40. C. de Decurion.*) Junio & Vatablo *aculea- ta*, Lipsio *L. II. de cruce cap. 11. taxillata*, de
 quibus post alios Excell. Viri Dn. D. *Saubertus*,
 & Helmstädiensis & Aldorfinæ Academiæ deus
 & gloria, in aureola & judiciosissima sua exer-
 citatione academica de *Vulneribus Christi* §. 124.

seqq. & Dn. D. Casp. Sagittarius, in inclyta Salana Hist. Prof. insignissimus, Amicus honorandus, in venusto suo de *cruciatibus Martyrum* libello cap. V. §. 15. & in dissertatione de *flagellatione Christi* cap. I. §. 12. Horum etiam meminit ipse DEI Spiritus 1. Reg. XII. 14. ubi Rehabeam subditos suos his minis terret: *Pater meus castigavit vos flagellis, sed ego vos castigabo scorpionibus*: Mein Vater hat euch mit Peitschen gezüchtigt / ich aber will euch mit Scorpionen züchtigen / vertunt Luth. & Piscator. Per fabas vero dubio sine innuere voluit Terentianas istas *Eunuch. a. II. Sc. III. v. 89.* quas Cl. Taubmann. in *Comment. ad Capt. a. II. Sc. I. v. 7.* nervosé & optime explicuit, inquit: *Scutica erat quædam corrigia habens in summitate nodos quosdam in modum fabæ, similes fere castuum. Et erat poena servilis.*

OBSERVATIO XXII.

D. PHILIPPI JACOBI HARTMANNI.

Anatome Apoplectici.

TIncitor in suburbiorum aliquo, 50. fere annorum, homo vitæ dissolutæ, *cremato* uti vocant, & *tobaco* nimium quantum *indulgens*, ebrius prolapsus tempore hiberno, frigore in via obriguerat, semivivusque domum delatus ad se demum rediit; *elapso* autem *octiduo* *veluti maniacus* deformi & horrendo obtutu, stridore dentium, manuum concussione, mutus, ac fur-

dus, mentis nequicquam compos; tunc quando
 rogatus, volatiles liquores cum decocto purgan-
 te præscripsi, inquirens simul si qua caput esset
 læsum: licet nullum sese offerret indicium,
 vesicatoria tamen nuchæ applicanda imperavi,
 quæ tamen ex imprudentia Chirurgi studiosi mi-
 nus fuerunt efficacia: succedente vero usu me-
 dicamentorum, Deo propitio, sibi redditus sa-
 crâ synaxi est usus. Verum quod ad ingenium
 rediret, fuetisque potationibus & fumis se ob-
 lectaret illico, mutatio hæc repentina domesti-
 cis & familiaribus suspicionem fraudis suggessit,
 quum antea ad fallendam Uxorem simulando
 morbum varios ludos sæpiuscule dederat. *Inter-*
jectis autem octo diebus in lethargum incidit, at-
 que in consilium adhibitus lethalem somnum
 prædixi, qui omnem simulationem ignoraret,
 fidemque fecit mors somni frater, altero die per-
 emptorio.

ANATOMIE: Cuticula, cutis, pinguedo,
panniculus carnosus in abdomine s. n. *Pinguedo*
subflava: Peritonæum crassum, quod facili ope-
 râ in tres membranas dissolvi poterat.

Omentum parvum & luridum.

Intestinorum Crassorum situs p. n. quippe redup-
 plicatio *Coli*, quæ ad sinistrum hypochondrium
 solet observari, hic ad regionem pubis, ubi co-
 lon in rectum exit, occurrebat. *Rectum* quo-
 que tam amplum quam colon ubi erat amplissi-
 mum.

Hepar subpallidum; minime vastum; *fissum*
 pinguedo lurida obsepserat, cum qua Vena Por-
 tæ

tæ arcte concreverat; *Crepido cum parte globi majoris* diaphragmati adhærebat.

Lien specie externâ. f. n. ad levem autem contactum difflebat, aterrimâ sanie exstillante: *Infra Lienem prope adsitum erat corpusculum globosum* cerasi magnitudine, quod *succenturiati lienis* imaginem gerebat; vasa ab hoc extantia ad magnum *Lienem* abibant; dissecti vero parenchyma solidius texturâ lieniformi, atro pariter intus per omnia liquore.

Renes f. n. *fasciâ* macrâ.

In Ventriculo aqua sordida & feculenta; interiorque tunica prope pylorum flavedine à bile tincta erat; *Cholericus* enim fuit.

Vesica fellis Hepatis & intestinorum adjacentes partes omnes infecerat: atque ex turgida fluidabilis ad incisuram profluebat.

Pancreas f. n. *insertione ductûs memorabili* quod quum in dorso visceris ipsum manifestassem, stiloque adacto orificium anquirerem, parvo foramine, in margine cholidochici ductus duodeno inserti, illud in intestinum hiscere deprehendi; quod foramen dissecto cholidochico ductu egregie ante oculos posui.

Cordis sinister Ventriculus æque amplus ac dexter; hærebatque in ipso polypus albus pennæ olorinæ latitudine, articulorum duorum longitudine: *Cor* parvum, non multâ pinguedine luxurians.

Pulmones cætera s. n. nisi quod imis lobis Diaphragmati annexi, quodque passim in illis puncta nigricantia obvia: *In superiori lobo sinistro* ad palmæ latitudinem durities; exemptâ parte ac difficillâ cartilagine bronchiorum in osseum rigorem obduruisse inspeximus, nullo intus pure aut calculo; difficiliter autem respirarat, & de sinistra parte thoracis conquestus fuerat.

Quoad *Capitis Partes*: Exterius in detonso nihil vitii comparuit; Ubi vero *Cranium* satis crassum diducebamus, multum saniosi sanguinis ex sinistro latere diffuere; *materque dura* cum sanguine concreto ut coaluerat cranio firmissime adhærere: *Per suturam temporalem* inter secandum mador quidam sanguineus exsudare, nullâ fissurâ, nullâ fracturâ intus aut extus obviâ.

Dextrum Hemisphærium illæsum erat.

Sinus falcatus fugillatus; cruorem continebat; obliti autem eramus ipsum disseccare.

Sinistrum Hemisphærium depressum erat ac inæquale, dextro comparatum; *matre piâ* fugillatâ undique.

Præcidi *corticem* utriusque hemisphærii; *ventriculosque* geminos purissima lymphâ stagnantes conspiciendos dedi: Lymphâ decurrente *septum lucidum* patuit, atque simul *Plexum Choroideorum* connexionem inter se, expansionemque per ventriculos, cohæSIONemque cum falcato sinu commonstravi.

Inque illis *glandulam Pinealem* quærendam ubi ostendi, totam Plexuum Choroideorum compagem ex vasis constare monstravi, utut sæpius glandulas mentiatur, quemadmodum cirsoidei ad Testes: Mox *in utroque plexu corpusculum* quod maximi melonis semen adæquabat, durum, coarctatum, oblongum planius quodammodo, ut tamen glandulam præ se ferret, exemptum & luci obversum merum vasorum esse contextum dilucide probavi.

Nervi Optici craffi, pennæ anserinæ majusculæ latitudine; ubi conjuncti duabus olorinis non cedebant.

Cerebelli sectio ex methodo CL. Willisii arbusculum speciose exhibuit.

Rete mirabile nullum ad fellam Turcicam.

Usus ex Anatome Apoplectici.

I. *Trepanationis* summa necessitas & generosus usus ad omnem graviores casum, vel nullo fracturæ aut fissuræ indicio, modo symptomata urgeant.

II. Ex *vulgo* adstantes magno desiderio aperturam cranii præstolabantur, quum propter *tabaci fumum cerebrum exsiccatum atque imminutum* crederent.

III. *An vero à tabaci fumo durities ista ossea in superiori sinistri pulmonis parte, an ab alio quopiam casu?*

IV. *Quod*

IV. *Quod Pulmonum cum Diaphragmate aut pleura connexio difficultatem respirandi in homine causetur, contra Helmontium.*

V. *Lien geminus.*

VI. *Quantum viribus integris, uti sunt in hominibus vitæ dissolutæ, aut aliis robustis, caput sufferre valeat, quum Hic dies lethales evaserit, non obstantibus erroribus Diætæ, incuriâ ac neglectu remediorum in tempore, quod post octiduum demum sim consultus; nullusque exfecti Cerebri cruore foetor exhalabat: Quæ omnia in Obductionibus observanda, uti Amplissima Facultas Medica Regiomontana vel nuperrime ad eadem attendit.*

VII. *Apoplexia & lethargus à stagnante in ventriculis Cerebri fero.*

VIII. *Furoris causa in Cholericis hoc ex Polypo Cordis si non etiam sinus Falcati.*

IX. *Glandula Pinealis non nisi densior par plexuum Choroideorum, quam ex idiosyncrasia subjectorum variare contingit, ut glandulam molliorem, duriores, lapideam denique æmuletur; aliquando nullam speciem glandulæ relinquat; ita ego quidem, salvo aliorum iudicio.*

OBSERVATIO XXIII.

D. JOHANIS GEORGII GRUBELII,

Mulier quinquies Apoplexiam passa restituitur.

MAgnum atque validissimum, imo ut plurimum primâ vel secunda vice lethiferum affectum jam in medium produco, de quô non sine ratione cautelam probe observandam reliquit Mesue, dicens: Cave, ne malarum ægritudinum curationem suscipias, ne mali medici nomen adipiscaris. Apoplexiam vero hunc in numerum referri posse, perspicue innuit medicorum Coryphæus Hippocrates 2. Aphor. 42. ubi: λέγει δὲ πλεονάζειν ἰσχυρὴν μὲν ἀδύνατον, ἀσθενεία δὲ ῥηϊδίον. Apoplexiam fortem discutere impossibile esse ait, debilem vero non facile. Hujus effatô innitens libentius illam apoplecticam (de qua paulo post acturus sum) prognostico reliquisssem, victoque morbo, ut videbatur, non admovisssem manus, nisi ad hoc munus me magis stimulasset Avicenna lib. 4. Fen. 4. tract. 2. c. 10. Ne proportionemur, inquit, ad paucitatem misericordiæ; fortasse salvabitur infirmus quandoque, quoniam multoties aliquis evadit sine spe mirabiliter. Proinde pio magis ac miserabili affectu in patientem commotus, à juvando nunquam abstinere volui, probe reminiscens, quod in praxi mea quali quali sæpius ægros mortis potestati jam annumeratos feliciter rediisse ad vitam, signis omnibus elusis, conspexerim. Ad hanc

hanc ergo, jam tum claudicantem, & quinquies apoplexia correptam cum 3. Novembris 1685. Cizæ à filia illius vocarer, absque mora illam convenio; quam sine sensu ac motu viribusque exhaustam repéro. Hujus igitur statum paulo accuratius mecum perpendens mox me munio prognostico, quod parum spei de salute illius superstit tum ratione ætatis grandioris, tum etiam ratione affectûs sæpius redeuntis, & prima vice illam plane claudicantem reddentis, quam ideo prior medicus ut morti proximam, & nullâ visitatione nullisque remediis ulterius dignam censuit. In hac verò quid valeant medicamenta, quidve ferre recusent, me, Deo benedicente, paucis diebus expecturum dixi. Huic igitur statim tam interna, quam externa antiapoplectica, resolventia atque stomachica præscripsi, inter quæ pulverem etiam cephalicum cum radice ari & caryophyllis aromaticis permixtum, theriacam item diateffaron, ab Hoffinanno in paralyfi linguæ adeo commendatam, ut ipse hanc vocare non erubescat *Sprach-Lattwerge*. Cujus ingredientia si ad examinis incudem revocentur optima sunt resolventia, abstergentia atque stomachum confortantia, quo stomachus teste Helmontio, hujus affectus propria ac genuina est sedes, cui non absque ratione pollicem premit. Langius in *Miscell. Curios. Med.* p. 13. qui remediis stomachicis repente oblatis apoplecticas plerumque restitui affirmat. Hisce itaque per aliquot dies usurpatis iterum rediit ad se mulier, meliusque se habere persensit, quibus mox purgantia, atque successive cephalica atque stomachica adjunxi, quæ omnia Deo benedicente suum ex voto fecerunt officium, adeo, ut trium septimanarum spatiò cum omnium adstantium admiratione

tione plenarie fuerit restituta, quæque ne tantillum apoplexiæ aut hanc consequentis alias paralyfis vestigium ad hunc usque diem persensit, & claudicans maritum suum ad urnam usque fuit secuta. Probe ergo Arethæus atque Soranus auream posteris reliquerunt regulam: Quod pii atque humani medici sit officium excruciato in desperatis quoque casibus subvenire; tum ne deserti spem omnem & animum despondeant; tum quia deplorati quidam ægrotantes præter spem ex maxime lethalibus morbis nonnunquam convalescerunt.

OBSERVATIO XXIV.

D. PHILIPPI JACOBI HARTMANNI.

Anatome Apoplexia defuncti.

ANno 1688. Mense Martio: ex Gallis profugis quidam, spectans incendium in suburbio, ab intenso frigore male affectus, ubi domum rediit, ex vomitione in Paralyfin dextrilateris & motus convulsivos, demum in apoplexiam incidisse, atque cum sanguine vitam tandem effudisse, tradebatur.

Alter à morte erat dies, quando anatomen suscipiebamus rogati, & *Oculi* corrugati licet adhuc virunculum, utut non tam clare, nec tam magnum, conspiciendum præbebant.

Abdomine diviso: nulla *pinguedo*, sub cute
I
merus

500 OBSERVATIONES

merus panniculus carnosus, crassus: *Peritonæa* duplex tunica:

Omenti nihil, præter exiguam membranæ araneosæ portiunculam, rarissimis in eadem pinguedinis arbusculis, atque vix partem, quæ colo proxima, involvendo tegebat, dependebat autem à medio colo, & à ventriculi parte quæ infra medium.

Intestina omnia tumida, inprimis portio recti ano imminens, instar coli turgescibat.

Cæcum contortum, mesenterio annatum.

Colon in sinistro latere tumidum & reflexum: nullâ ad ipsum, vel ad rectum, pinguedine.

Ostendi in hoc subjecto *ad intestinum rectum* & *colon* non solum ampliora sed & numero plura *vasa*, quam *ad tenuia*, manifesto decurrere.

Mesenterii nulla pinguedo: duplici tunica subtili, intra quam *vasa* decurrebant: in areolis vestigia lacteorum deprehendebam.

Jejunum intestinum sponte suâ inflatum & vere jejunum, ad Solem obversum memorabile spectaculum intuentibus offerebat, punctula enim transparebant, qualia in præparata cute balænæ, quam servo, certis orbibus quasi conclusa atque ita à se invicem separata, citra ullam elationem. Animus erat incidere, atque introspicere eadem, ast avocatus ad alia, ipsorum non sum recordatus amplius.

de APOPLEXIA.

307.

Pancreas f. n. infra mollitiem canini; neque tamen ulla duritie aut nodis scrupulum de scirrho injiciebat. Ex gustantibus quidam *subacidum* arguebat; ast cum vino corruptam linguam redarguerem, atque ipse sobrius gustarem, *insipidum mucosum* esse quod sentiret lingua dijudicavi, illique assensum præbuerunt omnes, & is qui ex præconcepta opinione acidum imbiberat.

Ductum inquirens, minimum in extrema parte qua *Pancreas* lieni cohæret, manifestavi, stilum vero abinde propter crepidinem visceris non potui in duodenum adigere penitus: tentavi igitur, si qua *ab orificio cholidochici ad pancreas* penetrare daretur, siquidem nullum peculiaris in duodenum hiatus indicium aderat; ast frustra fui: per minimum itaque istum detectum ductum lac versus intestinum injecimus, quod ex orificio cholidochici exiens aperuit causam negati aditus, nimirum cum *Pancreatici ductus orificium*, prope adsitum isti cholidochici orificio, communi ambitu hiatus, qui in duodeno extabat, comprehenderetur: latiori autem orificio cholidochici, stilus hoc facilius ingrediebatur, atque à pancreatico subinde aberrabat.

Hepar sanum, mole parvum: vitulinum non adæquans.

Vesicula felle magna, anatis ovum superans; plena dilutâ, flavâ tamen bile, quæ & duodenum suo colore infecerat.

Ductus cysticus notabilis, non solum *valvulis conniventibus* sive asperitatibus, quales supra decem erat numerare: hæque à duodeno immis-

sum stilum non nisi ad declinationem ipsius difficulter intromittebant; sed & *insertione in Cholidochicum communem*, ad quem tanquam divaricatum vas, duobus digitis transversis ab insertione cholidochici in duodenum, recta decurrebat.

Cholidochicum communem incidimus ad hepatis usque confinia: verum nullus ad illum ramus descendit, ante ingressum in hepar.

Neque ad *ductum cysticum* ullus aliunde ramus divertebat.

Bilis cum lacte mixta prompte coit, & croceum induxit colorem.

Duodenum apertum colluviem saniosam, æruginosam, subnigro-flavescentem ostendit, qua & *Ventriculus* plenus erat; utut paulo ante mortem omnia evomisset, nec quicquam postea sumferat.

Orificia vasis brevis in Ventriculum hiantia indagavi, verum nulla inveni.

Duodeni rugis velum bombycinum aberat; aberant & *vasorum lacteorum villi* propenduli: glabra omnia, nisi ubi saniosa colluvies hæserat.

Lien parvus, nihil vitii monstravit, palmæ magnitudine & densitate, figura rhomboides, gustui dicebatur *acidum* offerre: ast ubi ipse linguæ admovi, *subacerbum leniter adstringens ex vitriolico* animadverti, suffragantibus cæteris: talemque totius massæ sanguineæ fuisse conjicio, lacti injectus lien nil coagulari fecit.

Recepta-

Receptaculi Chyli, ad sinistri renis vas emulgens & adsitam cavæ portionem, *situs* manifestus.

Arteria aorta descendens ampla cavæ ad renes non erat substrata, sed juxta sita.

Capsulæ atrabiliarie longitudine, latitudine, & cavitate insignes: tres ferme articulos longæ, duos alicubi latæ; singulæ sacculos offerebant geminos; cavitas amygdalæ, aut castanæ erat capax, uti stilo ac flatu distenta promittebat. Manifesto quoque versus emulgentes venas ampla vasa ab illis progrediebantur: vitio autem injicientis diruptæ hæc vasa evadebant varicosa.

Renes s. n. nisi quod nudi, omni fasciali pinguedine destituti.

In anatome abdominis inferioris *parum sanguinis*, vix duorum cochlearium, profusum; macilento corpore, vasisque sanguine parum turgentibus.

Thorace dissecto *Pericardium* aquam effundebat.

Cor parvum, justo situ, paucâ pinguedine conspersum.

In *arteria aorta* sanguis concreverat, altera parte carneâ æmulans polypum; duorum articulorum longitudine, crassitie olorinam superans.

Pulmo dexter, cum asthmaticus toties de anhelatione conquestus fuerat, undique, ad dex-

trum inprimis latus, quod & paralyfi fuerat tactum, diaphragmati, pericardio, pleuræ, mediastino, &c. concreverat: *In supremo globo tartarus multus, minutus licet & friabilis.*

Ex quacunque parte Pulmonum incisorum spumofus sanguis erumpebat, & ad levem incisionem illico spumescens prodibat: jussi itaque; ut commoverent pulmones, si qua per os & nares prodiret; atque dictum factum ex naribus magna copia spuma turgida assurrexit, ejecto prius sanioso mucro albo.

Usus ex anatome Apoplexiæ defuncti.

I. Quid obstipatio pororum ex frigore in male affecto corpore possit.

II. Oculorum in morbo defunctis splendor, ut imaginem quandam, intuentibus reddat, ostendit fallacem rationem præ sagii de salute ægri ex oculorum fulgore. Id quod & *Plempius L. 4. Ophthalmogr. Probl. 68.* contra Plinium, Servium & Cardanum asserit; falsum esse augurium, non timendi mortem in ægitudine, quamdiu oculorum pupillæ imaginem reddunt. Alioquin in fure olim cum *Exc. D. Starkio tertio à suspendio die*, rigentibus palpebris, pupillas tanto fulgore illustres observavi, ut vivam effigiem contemplantibus exhiberent. Inquisivi an hoc idiosyncrasie aut singulari conformationi oculorum deberetur; uti in *Phocis* fulgurantes oculi debentur peculiari inter choroïdeam & amphiblastroïdeam candidæ tunicæ, de qua in *Disquis. de Phoca c. III. §. 5. &c. IV. §. 6.* à me quædam sunt tradita:

data: cum *in felibus & canibus* haud abfimilis tunica peculiarem fulgorem oculis conciliet: ast nil quicquam ejusmodi anatome oculorum in lucem produxit. Sive itaque *in vivacitatem furis* fulgor iste oculorum referendus; sive *lævor tunicarum* splendoris fuerit causa, lævoris autem causa fuerit extensio tunicarum, extensionis vero spirituum ob commotionem ex strangulatione catervatim irruentium copia: qui spiritus quousque fixi à frigore tunicis inhæserunt *per biduum* nativum oculorum splendorem conservarunt: ipsis vero à conclavis, aut adstantium; calore alieno turbatis, subsidere bulbi, flaccescere tunicæ; atque disperire fulgor insolitus abeuntibus una spiritibus: notari tamen meretur quod *fur iste* per vitam fuerit *μελαστής*, adeo ut nec coram judicio à risu temperarit, quando sua recenseri scelera audivit. Atque *sp/en* ipsum ridere fecit, si quid risus hujus visceris magnitudini debetur, vastus enim erat, & in lobos divisus, hepatis alteram partem adæquans.

III. *Peritonæum simplicissimam tunicarum* credidit *Galenus*; tamen ipsam divisibilem exhibui sæpius.

IV. *Pinguedo defecit*, nullâ abundantia ultimi alimenti generosi.

V. *Vulnera tenuibus intestin's inflicta* periculosiora habentur illis quæ *crassis*; hâc ratione, quod plura sanguinea vasa ad tenuia ferri credantur. Huic rationi nostra observatio dubium movet: neque idiosyncrasia in hoc nostro illud adscribendum puto.

VI. *Puncta in jejunio* orificiis lacteorum aut meseraicorum adsigno: neque, quod cum pace Viri dixerō, *Lewenhoekio* fidem habeo, quando Argo oculatior oculorum aciem microscopiis intantum intendit, ut *lacteorum* in intestina propendulas fibras *tubulos cæcos* dignoscere queat. Ratione quidem perspicio, dubitari posse, *an non instar villorum laneorum lactea velo bombycino immersa chylum imbibant*, atque sic nec cæcis tubulis opus esset: oculis vero illud perspicui posse, hoc est quod nego. *Orbes punctorum in hoc intestino*, forte pro conjecturâ nostrâ facerent; si non, quando duodenum incisum, & velo bombycino & villis destitutum, prorsus glabrum invenerimus, jejunum quoque intus eodem modo se habuisse dicendum: ita stigmata hæc, absterfis aut abruptis fibrarum propendularum villis, ductuum patulorum memoriâ ingererent.

VII. *Pancreatis munus esse s. n. mucosum s. pituitosum separare* atque in intestina per ductum proprium exonerare, cum *Herophilo* assero: quâ de re in *Exercit. de Veterum peritia anatom. in specie*, suo loco.

VIII. *Pancreatici ductus in duodenum insertio singularis.*

IX. *Bilem excitasse vomitiones*, copiâ in ventriculum regurgitante: *eandem bilis copiam* intestina, duodenum & jejunum, absterfisse, *lancinationumque causam extitisse.*

X. *Ductus cystici asperitates loco valvularum conniventium.*

XI. *Vesiculam bilis ex abundantia humoris nasci ductûs cystici in cholidochicum insertio subin-
nuit.*

XII. *Non semper extra hepar ramos cholidochi-
co, nedum ductui cystico, inferi.*

XIII. *Vitriolicum illud acerbum in Liene, ad-
eoque in totâ massa sanguinea & bile, motuum
convulsivorum fuerit causa.*

XIV. *Capsularum atrabiliarium amplitudo ex
abundantia feri, sive biliosi, sive lixiviosi, sive
acidi, incertum: certum tamen segregationi hu-
moris à dulcedine sanguinis alieni has capsulas
inservire.*

XV. *Polypus Cordis ex acerbo in sanguine.*

XVI. *Accretio Pulmonum vix sine aliqua noxâ
subjecti.*

XVII. *Pulmones quoque obnoxios esse tartaro,
sive calculo.*

XVIII. *Spuma Epilepticorum ab agitatione san-
guinis in pulmonibus. Nimirum quando vasa
sanguinea ruentem cum impetu ad Pulmones
sanguinem suetâ successione ad cor amandare
nequeunt, hic in vesicularum cribris diverticula
quærit, in quibus compressus ob turbatum & vio-
lentum sanguinis novi affluxum spumescit, spu-
mæque specie vasorum bronchialium poros sub-
intrat, atque per arteriam asperam adactus per
os & nares eâdem specie expellitur.*

OBSERVATIO XXV.

Dn. D. GOTTLOB SCHOBERI.

De Tumore Cranii Cephalalgiae, Guttae Serenae & tandem Apoplexiae Causa lethali.

Scriniarius Revaliensis, August Friderich Hanson. propter conspectum honestarum Personarum, sub dio, maximo dum gelu omnia rigerent, civilitatis gratia nudato ut plurimum capite edolans, in magnas incidit cephalalgias, quas postmodum subsequebatur visus debilitas.

Hoc autem malum ab initio neglectum magis magisque augebatur, adeo, ut non solum Amaurosis, seu Gutta serena, sed etiam motus epileptici quotidie fere ægrotum invaderent, maximeque enervarent. Et quanquam post generosissima tam ex fonte pharmaceutico, quam chirurgico remedia incassum adhibita, salivatio mercurialis & trepanatio cranii quoque institutæ fuerint, effectus tamen voto non respondit, quin Apoplexia & tandem mors exoptata vitæ hæc misérias cum requie commutaverit tranquillissima.

Aperto post obitum Cranio, vidimus in bregmatis osse sinistro tumorem osseum spongiosum inferne conspicuum, in ejusque cellulis substantia medullaris maxima ex parte in gummeam duritiem mutata cernebatur, hujus magnitudo ultra pollicis crassitiem & trium digitorum transversorum latitudinem æquabat. Membranae cerebri carnis luxuriantis faciem gerebant, & fere digiti transversi spatium metiebantur.

In altero bregmate contrarium erat phænomenon; cranium enim adeo tenue erat, ut cultri mediocris crassitiem excedens aëri lucido expositum radiorum solarium transgressum instar cornu pellucidi aut vitri haud difficulter admitteret.

Causa hujus morbi occasionalis fuit dubio sine frigus nimium, quod per cutis substantiam penetravit in tubulos cranii osseos & cellulosam substantiam, quæ diploe vocatur, succumque medullarem & sanguineum congelando eosdem obstruxit: turbato hinc motu circulatorio affluens stagnavit sanguis, hicque in majori sensum copiam collectus, cellulas & poros non tantum adimplevit, sed etiam tenerrimos ossium canaliculos in arcus qf. & fornices compressit atque contorsit, adeo, ut accrescens hæc materia in tophaceam tandem duritiem & magnitudinem sit conversa & mutata. Membras cerebri quod attinet tumidas, earum æthiologiam in hoc consistere mihi persuadeo: Scilicet dum sensibilissimæ hæ cerebri membranæ nervæ, forsitan à frigore ob tenue cranium simul affectæ à tumido cranio premebantur continuo, fieri aliter haud potuit, quin dolorem contraxerint acerbissimum, hinc cephalalgia causa proxima derivanda est; à dolorosa postmodum fibrillarum crispaturâ sanguinis stagnatio, unde illis alteratis & læsis caro luxurians ortum suum traxit. Affectis sic præternaturaliter membranis, nervisque compressis interruptus & nimis impetuosus spirituum motus in partes externas factus est, hinc epilepsia; speciatim vero obstructus à spasmo nervus opticus Amaurosin excitavit, non aliter ac alii nervi ad eundem fere modum læsi & Apoplexiam & mortem ipsam.

OBSERVATIO XXVI.

D. OLAI BORRICHII.

Apoplexia metastasi in crus sinistrum soluta.

Illustris militiæ præfectus sexagenario major, ex motu & deambulatione præter solitum continuata languens subito corripitur apoplexiâ, stupent sensus, hebet motus, ratio cessat. Accersiti Medici plures ex arte admovemus, quæ exterius recreent spiritus, quæ interius quiescentibus nervis restituant tonum. Nec nihil actum: post aliquot enim horas superveniente vomitu lenti glutinis ex alto veluti somno experrectus astantes paulatim cognoscere cœpit, & in verba tertiata prorumpere. Secuti latum omen crebro eadem pharmaca ingerimus, donec ille de lassitudine totius corporis, & præsertim sinistri cruris queritans istuc tertio morbi die oculos nostros convertit. Observamus distentum in tumorem crurum erubescere hinc inde, & præter consuetudinem calere; unde cum chirurgo ad discutientia properantes, ludi operam tandem advertimus: igitur persistentes in suppurantibus brevi abscessum deteximus, unde totis mensibus duobus copiosum pus evacuatum, & corpus paulatim laxantibus, & roborantibus frequentatis in pristinum rediit statum lassitudine tamen & anxietate comitantibus. Qui duo capitales senum hostes ante quidem ægrum affixerant, sed post apoplexiam gravius. Nec licuit nobis, quanquam in omnes verteremur formas, eosdem penitus debellare. Contulere nobiscum mutuas operas exteri quoque
Me-

Medici, quos fama & praxis jam diu nobilitaverant; omnia incassum. Nullum toto anno ab acidis quibuscunque solatium, nullum ab amaris, falsis, alkalicis, mistis, decocto Chinæ, Galenicis, Chemicis, externis, internis, diætâ. Ita, sublato licet malo primario, postquam diu clinicus esse desiisset, mente & animo constans, tandem averfante omnia stomacho defecit, heros longiori vitâ dignissimus.

OBSERVATIO XXVII.

D. MATTHIÆ JACOBÆI.

Somnolentia & membrorum stupor non semper paralyfin vel Apoplexiam denunciant.

HOnestissima urbis hujus matrona, totius corporis torpore, maxime vero brachii dextri stupore cum digitorum formicatione correpta fuit, qui per intervalla nunc remittebat, nunc ingravescebat, maxime vero post captum somnum: linimentis & emplastris frustra adhibitis, venam secare jussi, nonnullum enim metum incussit Hippocaates in Coacis prænotationibus, qui torpores & sensuum depravationes præter consuetudinem ortas, futuram siderationem denunciare dixit; sed sanguis latentem hostem statim prodidit, nempe familiarem scorbutum, qui inveteratus talia symptomata secum trahere solet, quapropter solis antiscorbuticis insistens, aliisque remediis sale copiosiore abundantibus, non omisis etiam catharticis lenioribus intra bimestre spatium sanguis purior factus hostem demisit, stu-
por-

porque remittens & metu & periculo optimam
fæminam liberavit.

OBSERVATIO XXVIII.

Dn. JOANNIS CONRADI.

Apoplectici anatome.

DN. NN. LII. annorum, facie rubicunda,
tubicinis officio apud Electorem Treviren-
sem condigne functus, ob casum dentium fa-
ctus inhabilis, in Italiam missus in arte Musica
ita profecit, ut Magistri munere functus fuerit
per annos cum laude. Duodecima Junii MDCCXIX.
ob insignem æstum sese plusculum invitavit cum
sociis in vino rubello. Noctu apertis ex utraque
conclavis parte fenestris aëri frigidiusculo no-
cturno sese exposuit. Mane surgens circiter
quintam matutinam, vertiginem & capitis per-
turbationem sensit, unde ad captandam phialam
Aqua Reginae Hungariæ plenam, cistam, quam
habuit in Conclavi, capite demisso recluserat. Re-
levato hinc capite vertiginosus hemiplegia lateris
sinistri tactus fuit cum vocis interceptione & ma-
xima capitis perturbatione. Medicus vocatus sta-
tim sanguinis missionem in pedum dextro impe-
ravit, nec sufficienter ob vulnusculi exiguitatem
eo emisso, post meridiem secundam in eadem
parte instituit. Vinum subtraxit & propter ingen-
tem sitim decoctum suavit: Mixturem insuper ex
Aq. Cerafor. nigr. Flor. Til. c. ʒ. diaphor Lapill.
ᶒ. Succin. ppt. Cinnab. ʒ. & Nitr. ʒ to. Do-
lorem capitis ingentem sensit æger ex parte ca-
pitis

pitis dextra, præsertim à motu quocunque, tussi præsertim: cum somnolentia & stertore. Applicata fuerunt vesicatoria Femoribus, Clysteres immissi & reliqua pro rei exigentia administrata fuerunt: quæ tamen non impediverunt, quin tertia ab insultu die cum summo stertore extinctus fuerit, scilicet d. 15. sub auroram. Post meridiem sectionem instituímus: Ablato cranio cerebrum bona specie apparuit, secto ventriculo cerebri sinistro serum cruentum effluxit: Dextro abhinc grumi sanguinis apparuerunt, & causa mortis copiosi. Cæterum immensa siti laboravit vivens, cum halitu oris putreolente, ut intrans cameram odorem vix ferre potuerit Medicus.

Imprimis notatū dignum illud occurrit, dum dextra cerebri parte affecta paralytis in latere sinistro contigit, qua lingua, labium sinistrum, brachium atque pes, universum scilicet latus sinistrum affectum fuit.

Notæ.

- I. Tubicen olim tubam, & cum hac vasa cerebri, teste experientiâ inflavit, unde distenta majorem rumpendi habilitatem nacta fuerunt.
- II. Vina rubra summa & caput petunt præ albo, hæmorrhagiam narium excitant, & apoplexia frequens in locis, ubi vina rubra bibuntur justo copiosius.
- III. Fervore tempestatis sanguis rarefactus, vino rubro incensus caput petiit, percussus frigore nocturno; cui se nudum exposuit, ma-

514 OBSERVATIONES

maiore impetu vasa cerebri distendit, distenta jam olim disrupit & apoplexiam sanguineam excitavit.

OBSERVATIO XXIX.

Dn. Lic. JOANN. MATTHIÆ
MULLERI.

*De sene plusquam octogenario Apoplexiæ
proximo, convulsionibus epilepticis
vehementissimis tacto, ex inspe-
rato sanitati restituto.*

Civitatis hujus quidam ex primariis octoginta tres annos habens, laute alias vivens, per totam fere vitam sanus, nisi quod interdum quasdam podagræ (senectutem (a) sæpius promoventis) sensisset molestias, anno 1716. mense Majo maxima sensuum omnium externorum, ut & singulorum sensus interni (b) effectuum correptus fuit hebetudine, cum adjuncta aphonia, vel potius ἀναυδία, (c) quam convulsionibus epilepticæ exceperet vehementissimæ omnibus

(a) Mich. Ettmüller. Doct. Pract. part. 2. c. 9. p. m. 364.

(b) D. Joh. Bohn. circul. anat. phys. progymn. 29. p. m. 435. seqq. D. Joh. Gotthofr. Berger. Phys. Med. Act. Erud. Lips. ann. 1701. mens. Nov. p. 498.

(c) Joh. Jonston. Syntagm. univ. Med. pract. l. 3. c. 7. §. 6. p. m. 789.

bus adstantibus letales (*d*) visæ, ita, ut secunda vice ipsi ceu agonizanti benedictio impertiretur sacerdotalis. Ast Divinæ clementiæ placuit remediis e. gr. venæsectioni in pede institutæ, vesicatoriis nuchæ & brachiis applicatis, cephalicis, castorinis, volatilibus, externis item balsamicis & spirituosiss &c. ita benedicere, ut præter omnem expectationem sese recolligens ad hunc usque diem sanus vivat. Nonagenarius alius per decennium epilepticus eodem anno solo fontis Kupferzellensis usu malo illo fuit liberatus, cujus mentionem feci in continuatione prima de modo nominato fonte Soterio. (*e*)

(*d*) *Id. ib. t. 2. c. 7. art. 2. p. m. 744. Ettmüll. l. c. c. 7. p. m. 279. Dan. Sennert. Pract. Med. l. 1. p. 2. c. 31. p. m. 606. D. Carol. Rayger. Eph. Nat. Cur. Dec. 1. ann. 6. 7. num. 212. p. 311.*

(*e*) *Cap. 5. obs. 18. p. 23.*

OBSERVATIO XXX.

JOAN. RODOLP. CAMER.
in Sylloge Memorabilium.

Apoplexia tres dies perdurans.

Memoriæ occurrit, olim apud Ferrarienses puellam quandam apoplexiâ detentam fuisse, quæ ab omnibus Medicis pro mortua habebatur. Cæterum, cum Mater puellam summo pere amaret, eam non ita facile sepeliri permitfit, & eo magis, quia ab aliis perceperat, qui subito & repente gravioribus morbis corripuntur, & pro mortuis habentur, non sic facile &

516 OBSERVATIONES

repente clero sint permittendi. Demum Mater puellam per triduum apud se contra omnium opinionem detineri fecit, & tertio die puella quasi ex inferis sublevata, revixit.

OBSERVATIO XXXI.

Ex eodem Camerario ibid.

Apoplexia à casu.

A causa externa violenta, ut cerebri contusione ex casu, potest accidere, etsi cerebri substantia vulnerata minime sit, ut sanguis quoque cerebri cavitates ipsiusque substantiam, iis locis præsertim, ubi contusa est, oppleat: sicuti in taurorum securi percussorum cerebro fieri quotidie vident mulieres, quando cerebrum, antequam coquatur à sanguine grumoso prius repurgant: unde apoplexiam fieri subito necesse est, nisi is per nares, aures, aliasve partes seu vias vicinas, ut quoque interdum fit, statim erumpat.

Plater. de funct. læs. p. 27. Sic Nobilis Marchicus, B. Tubing. scalarum casu caput lapidi allisit apoplexia post horas 4. mortuus. Anno 1603.

OBSERVATIO XXXII.

Ex eodem.

Amuletum in Apoplexia.

Ego puto, si corolla ex corallo collo applicetur, optimam *ἀπορροιαία* fore in Apoplexia:
cum

cum mihi constet dentium dolores à catarrho ortos hoc averti.

Heurn. c. 24. de aff. capit. p. 275. b.

OBSERVATIO XXXIII.

Ex cod. Camerario ibid.

Præservativum in Apoplexia excellens.

Certissimum & longa experientia comprobatum remedium, & præservativum, bis in septimana, stomacho jeuno, masticeetur Mastix, ad unam horam cum Agarico, attrahit materias phlegmaticas & melancholicas, à capite, & ita ab obstructionibus præservat.

Sumat igitur præservandus grana mastichis tria, vel quatuor in os, terantur dentibus in formam latiore: postea recipe agarici, quantitate ciceris, & involvatur in mastichem dilatatam, & ita simul masticeetur per unam horam, & expuatur materia collecta, accuratius enim sic eradicabitur, quam per pilulas.

Pansa 4. part. pract. de pror. vit. c. 30.

OBSERVATIO XXXIV.

Ex cod. ibid.

Cucurbitularum in Apoplexia vis mira.

Apoplexia accidit Ragi Hamech, Filio Hali, & in principio curam convenientem non habuit,

buit, sed dimiserunt eum, sicut erat, & nullus ex ejus Magistris ei aliud præcepit fieri, nisi inungi corpus odoriferis & suffumigari. Quod sufficiens ei non credidi, sed feci ventosam collo ejus apponi, & velociter ab illa ægritudine exivit, & est res, in qua confidentia esse debet.

Hali l. 3. aphor. Forest. l. 10. schol. ad obs. 76. Schenck. l. 1. obs. 149.

Si catarrhus cum impetu descendat, ut Homo ex eo fluxu videatur suffocari, confestim fiant ligaturæ fortes, apud axillas, in superiori parte adjutorii, & ponantur ventosæ magnæ, multum ignitæ ad scapulas, & item una mediocris bene ignita supra commissuram sagittalem, & est secretum admirabile, servans hominem à subita morte.

P. Aponens. in complem. Mes. Jas. de morb. cerebr. c. 17.

Non cessandum, si fieri, potuerit donec æger excitetur, frictionibus & ligaturis etiam adhibitis, aliisque diversionibus, ut cucurbitulis cum scarificatione dorso admotis. *Dodon. l. 2. prax. c. 15.* vel pedibus, ut in Joanne Imperatore Constantinopolitano factum narrat C. Logothet. Scarificationibus autem inditum Ephorbion (forte ἐφόρκιον vel εὐφόρβιον) addit, ut major fieret attractio. *M. Herenlanus Blonck. ib. in notis.*

Hieron. Fracastorius, LXX. major, die VIII. Augusti (A. 1553.) inter prandendum apoplexia correptus est: post multas autem herbas in olfactum balbutiente linguâ efflagitatas, amisso penitus sermonis usu, manu sæpe in verticem exporrecta, iis qui aderant, innuens, ut celeriter cucurbitulâ adfecto & laboranti cerebro succurrerent; quo ille remedio quandam Vestalem

curasse meminerat: sed re ab astantibus non intellecta, leniter sub noctem expiravit.

Vita Fracastor. sub finem l. Neander. in syntag. de Medic. natalit. § c. pag. 165. Heurnius c. 24. de affect. cap. p. 270.

Afferem è tabula cupressi, (vel si haberi non potest placentam dulciariam, German. *Lähenzeltlein*) capiti admove, vel derafo capillo cucurbitulam vertici imponere, utilissimum esse, magnus Medicus experientia didicit. *Crato conf. 36. & 37.*

In Apoplexia, summum & unicum remedium habentur cucurbitulæ capiti impositæ. *Sennert. l. 1. pract. part. 2. c. 33. fol. 680. b.*

Quando tertium meningis sinum, ductusque ejus, quos per foramina cranii, in vertice exsculpta exterius ad pericranium transmittit, considero, hoc in loco, modo prius brachii vena secta fuerit, non inutiliter affigi posse video: ex ipso enim sinu sanguinem trahendo, obstructiones referare, cerebrumque simul in se subsidens, nonnihil erigere valent.

Gr. Nyman. de apopl. c. 39. p. 229.

OBSERVATIO XXXV.

Ex Eod. Camerario.

An & quomodo Corpus in Apoplexia concutiendum?

IN Apoplexia concutere partes superiores maxime colli rectum est. (a) *Æger concutien-*
Kk 3
dus,

(a) *Crato conf. 37.*

520 OBSERVATIONES

dus, agitandus & quantum fieri potest excitandus. (b) Totum corpus concutiat, ut spiritibus via aperiatur, moderate tamen, ne agitatione vehementiore, fusa in corpore pleno materia morbum augeat & foveat. (c) Nam si corpus cacochymicum sit, multisque vitiosis humoribus scateat, ex illa commotione, sæpe & ii, qui in motu nondum sunt, moveri possunt. Sic mihi notum exemplum, quod ejusmodi agitatio ægro aliquando plurimum obfuerit, eique mortem subitanam accelerârit. (d)

(b) *Deodat. de pror. vit. l. 3. p. 127. Holler. l. 1. prax.*

(c) *Sennert. l. c. Heurn. c. 24. de aff. cap. p. 266. b.*

(d) *Nyman. c. 39. de apopl. p. 202.*

OBSERVATIO XXXVI.

Ex eod. Camerario.

Apoplecticorum stertor unde.

STertor in Apoplecticis, ut plurimum fit, musculis gutturis & thoracis resolutis, iisque non amplius ad expirationem concurrentibus, ac propterea magnus stertor, magnam musculorum, faucium, colli & thoracis resolutionem & læsionem, adeoque fortem Apoplexiam indicat.

Nyman de apopl. c. 35.

OBSERVATIO XXXVII.

Ex Eodem.

Apoplexiæ stertor cur lethalis.

AN quia non modo faucium, nariumque meatuum interceptionem, adstrictionemque significat, à cerebri humiditate ad hos meatus defluente, ortam, sed & muscutorum, respiratori dicatorum infirmitatem? nam concidunt musculi, partesque omnes, vi motrice ablata.

Ruland. l. 2. probl. 22.

Quamvis stertor arguat fortem Apoplexiam, non omnes tamen, qui stertunt, moriuntur, ut colligitur ex *Hippocr. aph. 51. Forest. l. 13. schol. ad obs. 74.* cum aliquando & ii, qui magno cum stertore decubuerunt, tandem idoneis præfidiis adhibitis restituti & à morte liberati fuerint. *Nyman. l. c.*

OBSERVATIO XXXVIII.

Dn. D. MATTHÆI BLAW.

De Mira virtute radicis verbasci anti-apoplectica.

Latent subinde arcana certis in vegetabilibus & virtutes admirandæ, quarum effectus nemo aliter nisi ex se ipsis & ab experientia demonstrare aut

explicare potest qualis est mira virtus *antapoplectica*, quæ latet in radice *verbasci maris*, quæ illa die, quando sol ingreditur signum *leonis*, quæ est 28. Mensis Julii, mane ante solis ortum è terra effoditur, hæc probe lota sindoni includitur & collo appensa instar amuleti gestatur, & ab apoplexia præservat. Volunt quidam, radicem auro effodiendam esse & non alio instrumento; sed his nihil attribuo, quia vegetabilium virtutes non instrumento, quo effodiuntur aut abscinduntur, sed potius proprietati intrinsecæ & maturationis tempori adscribendæ videntur. Norunt omnes experti philiatri, apoplexiam ex illorum esse morborum genere, quos hæreditarios vocant, & qui ex parentibus in filios caractere seminali propagari possunt, ita ut certo stemati fatales esse, aut ita natos disponere soleant, ut eidem morbo magis sint obnoxii, in hisce ergo subjectis aut ex aliis causis ac signis ad apoplexiam dispositis ad præcavendum merito adhibentur antapoplectica, inter quæ ab experientia compertum est, maximæ prædictum amuletum esse efficaciæ: præter hoc tamen suadeo alia quoque interna & quæ pro diversa constitutione subjecti aut causæ, à qua apoplexia produci potest, directæ sunt, non esse intermittenda, ut si exemp. grat. sit quidam valde pletoricus, & ad apoplexiam sanguineam dispositus, sanguinis quantitas excessiva per venæ sectionem certis temporibus instituendam detrahi convenienter poterit. &c. Retulerunt mihi viri fide digni, fuisse quendam *Marchionem Badensem*, qui non tantum apoplexiæ erat obnoxius ex stemate, sed etiam ejus insultum perpeffus sed restitutus, hu c, ne recidivam patiatur, pro arcano remedio præservativo sua-

suadebatur hoc amuletum ex radice verbasci maris dicto tempore effossum collo gestandum, quod per plurimos annos ad senium usque portavit, & à veterioribus insultibus apoplecticis immunis permanerat; sed dum aliquando mutaret vestimenta, & amuletum ex oblivione incautius deposuisset, illico apoplexia forti denuo tactus occubuit.

Novi Ego diversos Viros apoplexiæ obnoxios, quibus hoc remedium præservativum pro arcano suasi, nec frustra; quamdiu enim amuletum gestarunt, nil mali ex hoc affectu iisdem obtigit. Quod autem amuleta aliquid valeant, minime negandum, quia experientia multiplici constat & practicis omnibus notum est. Sint alii, qui herbarum virtutes qualitatibus adscribant iisque certos caloris aut frigoris, humiditatis aut siccitatis gradus assignent; Ego tamen experientiâ edoctus, firmiter mihi persuasum habeo, valere in iisdem virtutes appropriatas, quæ qualitatibus prædictis adscribi minime poterunt. In quibus autem virtutes appropriatæ consistent, res est altioris indaginis.

OBSERVATIO XXXIX.

THEODORI CRAANEN.

Medicatio viri Apoplexia correpti.

Vir (a) quadraginta quinque annorum, crapulæ deditus, otiosus, pituitosus, plethoricus, (b) subito, dum domi suæ cum familiaribus colloquitur, magna ruina in terram prolapsus, omni sensu & motu est privatus. Restat (c) sola respiratio, (d) quæ tamen satis est difficilis. (e) Ad nullas voces & inclamationes, ad

(a) *Vir quadraginta quinque annorum.*] Huc spectat sequens Hipp. Aphor. sect. 6. aphor. 57. apoplectici autem fiunt maxime à quadragesimo anno ad sexagesimum.

(b) *Subito in terram prolapsus.*] Hinc distinguitur à comate, caro & lethargo, sed tamen hætenus cum deliquio animi convenit.

(c) *Sola respiratio.*] Et pulsus etiam, vide finem historiæ.

(d) *Quæ tamen satis difficilis est.*] Differt ergo ab epilepsia, quæ habet respirationem satis liberam, atque motus omnium membrorum successive convulsivos.

(e) *Ad nullas voces &c. expergiscitur.*] Hinc differt speciatim à comate vigili & somnolentia simplici.

ad nullas concussiones & vellicationes expergiscitur : (f) sed perpetuo immotus, & nihil percipiens stertit. Pulsus (g) satis adhuc est validus.

(f) *Sed perpetuo stertit.*] Hinc vulgo dicitur differre à quolibet morbo soporoso.

(g) *Pulsus est validus.*] Respectu videlicet illius pulsus, qui in deliquio animi occurrit (à quo deliquio dignoscitur per hunc pulsum) sed si vigor pulsus esset perfectus, aut etiam naturali major, signum est apoplexiæ sanguineæ & non pituitosæ.

Partes affectæ hic sunt cerebrum, & totum corpus: *Cerebrum* affectum esse, patet ex sensus & motus privatione : atque hinc *totum corpus* per sympathiam, secundum sensum & motum, etiam læditur.

Morbus, quo hic æger laborat, est intemperies humida & nimis gravis cerebri, cum ventriculorum ejus angustia vel subdientia, & glandulæ pinealis ac nervorum subjectorum subitanea & valida compressione, conjuncta : quæ, subitam & tam fortem, ut æger nulla ratione excitari queat, omnis sensus & motus privationem, (a) respici-

(a) *Respirationem difficilem inducens.*] A difficultatis hujus gradibus desumitur apoplexiæ gradus.

spirationemque difficilem, inducens, (b) *Apoplexia* dicitur.

(b) *Apoplexia dicitur.*] *Apoplexia* duplex est, nempe *pituitosa* & *sanguinea*, quatenus oritur à pituita vel à sanguine extravasato.

Causa procatartica hujus affectus est crapula, item otium, nec non temperamentum pituitosum nostri ægri. (a) Hinc enim magna copia humorum pituitosorum & sanguineorum, in toto corpore, ac præsertim in capite ejus fuit genita, quæ *antece-*
dens hujus morbi est causa: Magna vero humorum pars, (b) primum circa internas venas jugulares, ubi eadem cranii foramina cum arteriis carotidibus ex collo in caput

(a) *Hinc magnâ copia humorum pituitosorum in capite fuit genita.*] Humores pituitosi non tam in capite gignuntur, (nisi ab injuria aëris externi frigidi & coagulantis) sed in ventriculo & toto sanguine.

(b) *Primum circa internas venas jugulares effusa.*] Potentissimum hic arteriæ in ventriculis cerebri sitæ malum (unde obstructions oriuntur) effundunt, quoties forte fortuna tunicæ earum magis debito dilatantur, & pori nimis aperiuntur, quod facilius contingit, quia cum undique liberæ sunt tunicæ earum arteriarum intra ventriculos positarum, possunt magis dilatari & pori

put transeunt, copiose effusa, easque arctans; ac eo justam sanguinis ex cerebro versus cor tendentis circulationem impediens; atque hinc deinde in substantiam cerebri plexum choroidem, & forsan etiam in ventriculos cerebri, (c) subito profusa, ubique crassescens, & obstructionem inducens, est morbi hujus (d) causa *continens*: quæ *symptomatum* omnium jam commemoratorum est author.

Nam

pori aperiri, quam pori earum, quæ in substantia cerebri sitæ sunt, nam undique premuntur à fibris nervosis cerebri, & hinc obstructio potius est in ventriculis cerebri, quam in cerebri substantia.

(c) *Subito profusa.*] Si hoc de sanguine intelligatur, erit causa *apoplexiæ sanguineæ*.

(d) *Est causa continens.*] Hic morbus oritur ab obstructione in principio omnium nervorum, exceptis vero respiratoriis, qua de causa spiritus in illos non influunt, nam spiritus adhuc mediocri copia generari probabile est, propterea quod omnes arteriæ ita obstructi non possunt, quin multæ apertæ maneant, homo alioquin sanguine regurgitante protinus moriretur.

Causa apoplexiæ à sanguine extravasato ortæ, est apertio vasorum in cerebro sitorum, a quacumque causa cum interna orta, quatenus nimirum sanguis ab ea extravasatur, & principia nervorum obstruendo viam intercludit spiritibus in membra motoria influxuris.

(a) *Nam* ab humore, in cerebrum ita subito profuso illudque gravante & ibi crassescente, obstructionemque inducente, subjecti nervi & sensorium commune, sive glandula pinealis, valde premuntur, (b) & sufficiens spirituum animalium generatio impeditur. (c) Hinc motus, ab objectis, sensoriiis externis impressus, nec in cerebrum, nec ad sensorium commune deferri potest. Atque hinc jacet ille sine sensu, & quamvis concutiatur, vellicetur, & clamoribus incessatur, nil percipit, nec evigilat. Et quia ventriculi cerebri partim sunt compressi, partim humoribus forsitan repleti, vel plexus choroides subito est obstructus; idcirco

(a) *Nam ab humore.*] Humiditas in cerebro minime hunc morbum producit, quin per se nunquam obstructions facit, nisi viscositas, aut crassities, id est, frigus superveniat.

(b) *Et sufficiens sp. animalium generatio impeditur.*] *Apoplexia* non tam oritur, quia spiritus animales defunt, quam quia non possunt influere in nervos, alioquin potius esset *lypothermia*.

(c) *Hinc motus ab objectis impressus ad sensorium commune deferri non potest.*] Hoc fit, quia nervi à spiritibus vacui, propter quod in cerebro sunt obstructi, sua flacciditate non sunt apti, ut motum ab objectis externis recipiant, quamdiu manent non satis tensi.

Sanguinea à pituitosa distinguitur apoplexia,
quia

co subito iusta copia spirituum ibi non gignitur, quo noster æger *omni motu, excepta respiratione* quæ tamen, propter nervos respiratorios, latioribus quidem poris præditos, sed hic tamen aliquantum etiam affectos, est difficilis, *subito privatus, magna ruina*, ob magnam sui corporis molem, spiritibus animalibus, eam sustentare sufficientibus destitutam, *in terram repente concidit.*

quia in *apoplexia sanguinea* vasa sanguinea magis tument, & pulsus sentitur robustior & in facie major rubor apparet, nam tum sanguis nimio suo motu ad externas partes defertur, & vasa ingreditur, in quibus antea non fuerat.

Sed (a) *restat sola respiratio*; quia, quamvis pauci sint spiritus animales, cum illi in alios nervos, utpote ob pororum suorum parvitatem hic valde arcte compressos, nec ad recipiendos spiritus ita aptos, fluere non possint; hinc illi nervis & musculis respiratoriis,

(a) *Sed restat sola respiratio.*] In *Apoplexia* respiratio tantum superest, & non aboletur, quia nervi hi, per quos nocte dieque fluunt spiritus, sunt patentiores, & proinde minus apti ut obstruuntur: nervi autem respiratorii cum valde pateant, vix ita obstruuntur, quin aliqui adhuc pori & fibræ maneant apertæ.

Sed

ratoriis majorem pororum magnitudinem habentibus, alternatim qualicunque modo dilatandis sufficiunt, in iisque viam ad influendum satis commodam inveniunt; huc accedit, quod hi ob motum respirationis, jam inde à prima nativitate, & dormienti & vigilianti, sine ulla intermissione, continuatum, magis, quam reliqui omnes totius corporis nervi & musculi, quippe qui diutine per vices sæpe quiescant, ad spiritus vicissim recipiendos sunt adaptati. *Cumque* hæc causa sit manifesta & sufficiens, *nequaquam, ad miram & occultam naturæ providentiam* respirationis usum, quod ille homini præ reliquis corporis motibus ad vitam maxime sit necessarius, conservantem, *hic confugiendum esse videtur.*

Sed respiratio difficilis est, quia ad respirandum vi opus est, nam cum diaphragma deorsum movetur, necessario viscera sibi incumbentia & resistentia propellit, ad quod vis quædam requiritur; quod licet nos non sentiamus, diminutis tamen spiritibus, manifeste sentiri potest.

Quoniam autem nihil nos cogitare observamus, nisi, à motu objectorum, vel corporeis rerum imaginibus & notis cerebro impressis, mens nostra ad cogitandum exci-

citetur; cumque illæ hic, ob valide compressum sensorium commune sive conarium & defectum spirituum, à cerebro ad conarii centrum deferri, & in eo animam afficere non possint; *idcirco existimandum, & pro certo habendum ægrum nostrum, hoc affectu oppressum, nihil imaginari, recordari, vel aliter quicquam cogitare*: Eoque esse manifestissimum, animam, sive mentem humanam, non in cogitando, sive cogitatione, vel actione cogitandi, sed in sola cogitandi facultate consistere: eamque non semper esse actuosam, sed sæpe ab omni cogitatione, sive cogitandi actione, cessare.

Prognoseos loco, (a) dicimus, morbum hunc periculosissimum esse; quia est apoplexia satis gravis, quod stertor indicat,
Ll
quam

(a) *Dicimus hunc morbum esse periculosissimum.*] Huc spectat sequens Hipp. aphor. sect. 2. aphor. 42. solvere apoplexiam vehementem impossibile quidem, levem vero non facile.

Ratio est, quia humores crassi & visceri in capite per totum cerebrum obstructions efficiunt.

Apoplexia sanguinea periculosissima est, & longe difficilioris curationis quam pituitosa; quia sanguis quam primum extravasatur statim partes aqueæ, vel avolant vel diffuunt, & dum aliæ
par-

quam Hippocrates solvi posse negat : & præterea, si hæc solvatur, metus est, ne in paralyfin totius corporis, vel unius lateris, commutetur. Spes tamen omnis non plane decollavit; experientia enim probat multos à tali affectu fuisse restitutos.

partes a se invicem discedunt, sanguis grumescit, qui grumi medicamenti dissipari non possunt.

Apoplexia aliquando est recidiva, & per periodos hominem invadit: cujus causa hæc est, quod vasa semel aperta facile iterum aperiantur, dummodo novæ causæ sint, cur crassus & viscosus humor, aut sanguis sub ratione sanguinis iterum extravasetur.

Quæritur, quare æger non in totum restitutus sit, postquam paroxysmum fugaverimus, & cur per totum corpus lassitudines, dolores & alia incommoda sentiat postea? respondeo, quia nervi, ut & tubuli partium solidarum non mox ita aperti, & ab omni immunditie depurati sunt, quin reliquæ adhuc aliquæ in iis hæsitant, quæ spiritibus liberum minus transitum, minusque promptum & copiosum concedunt.

Idcirco in acutissimo hoc morbo acceleranda est *Curatio*: quæ *consistat* in causæ continentis in capite, & antecedentis in toto corpore existentis, ablatione, & deinde in intemperiei cerebri correctione.

Itaque (a) primo podici inferatur hoc suppositorium:

Recip. *Pulv. hieræ picræ* ℥ij.
Colocyntyd. scammonii an. gr. iij.
mellis q. s. salis parum. F. sup-
 positorium:

Dum talis præparatur clyster.

Recip. *Centaurei men. salviæ, betonicæ,*
mercurialis,
ivæ arthriticæ an. m. j.
flor. camomil. stæchades an. p. ij.
sem. anisi drag. ij. agarici ℥j s.
pulpæ colocynthid. in pupella li-
gata ℥f.

Coquantur in aqu. commun. ad lib. i.

Colaturæ adde

Electuarii hieræ picræ, diaphæni-
ci, benedictæ laxat. an ℥j.

(b) *Ol. rutacei, camomillor. an. ℥ß.*
sacchar. rubr. ℥j.

(c) *Salis comm. ℥ij.* F. Clyster,
 mox injiciendus.

(a) *Primo inferatur suppositorium, & dum præparatur clyster.*] Suppositoria & clysteres acres applicandi, sed primo tantum lenis clyster injiciendus, ut alvi fæces primo eluantur, quæ actionem clysteris acris inhiberent, formulam cly-

steris acris vide in medicatione tertia, clysteri acri optime etiam adduntur.

Rad. cyclaminis, bellebor. nigri ana ʒj.

Sem. cartham. anis. ana ʒj.

(b) *Ol. rutac. & camomil.*] Oleum perperam hic additur ab authoribus, nam acumina acrium infringit, & acria hic exoptantur, adeoque in *apoplexia* nunquam valet.

(c) *Sal. commun.*] Pro sali communi addi poterunt *salis gemmæ ʒij.* vel *salis sudoriferi herbarum* tantundem.

Post operationem clysteris, vel post unam à clysteris injectione horam, (a) sanguis ex brachio per phlebotomiam, tum ad evacuationem, tum ad revulsionem & derivationem, (b) pro ratione virium, est edu-

(a) *Sanguis per phlebotomiam est educendus.*] Venæsectio in *apoplexia sanguinea* statim absque dubio est in principio adhibenda, quæ etiam in *pituitosa* convenit, si magna intemperies pituitosa adsit, ita ut non satis cito corrigenda sit absque venæsectione, quod cognoscitur quodammodo ex diætâ antea usa, & si in pede venæ satis sunt magnæ, ibi phlebotomiam instituere, longe melius est, quia ibi sanguis non valde purus, sed magis crassus existit: at vero si *sanguinea* est, in brachio potius.

(b) *Pro ratione virium.*] In omnibus subitaneis morbis, excepto vero animi deliquio, judican-

educendus, præsertim quia hic adest plethora: & clyster post 4. vel 5. horas erit reiterandus.

dicandæ sunt vires, non quantæ in præsentiarum videntur, sed quantæ ferint immediate ante invasionem.

(a) Interim fiant extremarum partium frictiones cum spiritu vini calido: & ligaturæ, subinde solvendæ, iis adhibeantur.

(a) *Interim fiant extremarum partium frictiones.*] Frictiones calidæ instituantur in capite, ut pori nervorum aperiantur, & materia peccans loco moveatur: quæ frictiones etiam post paroxysmum continuari possunt, sed tantum profunt in *apoplexia pituitosa*: in *sanguinea* vero absunt, quia poros dilatant, & motum sanguinis accelerant, & proinde causæ sunt, quod sanguis adhuc magis extravasetur.

Clamores alti etiam instituantur & præcipue nominis ipsius ægri.

(a) Sternutatoria etiam, alvo depositâ, ex pulvere euphorbii, ellebori albi, & tabaci facta, naribus inflentur.

(a) *Sternutatoria etiam naribus inflentur.*] Sternutatoria in *sanguinea apoplexia* mortem indubitate inferent, quia concussione illa partium capitis, sanguis cum impetu extravasaretur: sed

etiam valde sunt suspecta in *apoplexia pituitosa*, nam possunt nocere, quatenus valida istâ concussione materia peccans ex arteriis in cerebrum exprimatur: tamen hic admitti possunt, durante paroxysmo (quia vix aliquid pejus ægro per concussionem capitis potest accidere, quam nunc habet) & prodesse possunt, si per nares materiam evacuent, & non exprimant ex arteriis, quare si sternutatoria exhibere velimus, a fortioribus saltem abstinendum est, & fumendum est.

*Tabacum cum ambra & moscho,
Sem. nigellæ, pulv. rosar. rubrarum &c.*

Et hæc sternutatio, quia malum fere est desperatum, in paroxysmo tentetur.

In paroxysmo, & extra eum valet suffimigium, ex *succino & castoreo & assa fetida*, cujus fumus per infundibulum per nares accipiatur.

Si his non excitetur, (a) vena sub lingua vel in fronte erit secanda.

(a) *Vena sub lingua vel in fronte.*] Vena sub lingua & in fronte hic secta non prodest, sed periculosum: venæ enim hæ valde parvæ sunt, & ideo purum sanguinem evacuant; & præterea hoc ægris valde molestum est, nam si ægri plerumque mentis suæ non sint satis compotes, proinde sanguinem non expuendo, sunt in periculo suffocationis.

(a) Ubi

(a) Ubi ad se redierit æger, sive paralyfis supervenerit, sive non, tales pilulæ, ad causam antecedentem & continentem porro tollendam, præscribi possunt:

Rec. *Pil. cochlar.* ℥ij. *pil. fætidar.*
trochisc. albandal. an. ℥ss. *cum*
syr. de stæchad. F. pilulæ.
 No. ix.

(a) Ubi ad se redierit æger, tales pilulæ præscribi possunt.] Si volumus reservare *pil. coch.* & *fætid.* sumatur. &

℞. *Extracti utriusque* ℥ss.
Trochisc. alband gr. ij. aut iij.
Ol. carvi q. s.
 M. F. Pilulæ.

Aut uti possumus pilulis in lethargo præscriptis.

Et (a) utatur hoc decocto quotidie ad ℥iij. vel iiij. semel vel bis, pro ratione operationis medicamenti?

Rec. *Herb. salviæ, majoranæ, betonica an. m. s.*
flor. stækhad, rorismarini
an. p. j.
sem. fileris montani, anisi,
seseleos an. ℥j. ss.

Coq. ex aqua comm. ad lib. j. addendo sub finem decoctionis.

fol. sennæ ℥i℥. rabarb. agarici trochisc. an. ℥ij.

cinnamomi ℥℥. in Colatura dissolve.

syr. de stæchad. ℥i℥. F. Apozema.

(a) *Utatur hoc decocto.] Adde,*

Rad. salsæ parill. ℥j.

Ligni guajaci ℥i℥.

Cort. tamarisci

fraxini ana ℥j.

Baccæ junip ℥℥.

C. c. limati ℥iij.

Tart. alb. ℥℥.

Passul. major. ℥ij.

Post infusionem calidam per noctem aut diutius in vino albo fiat decoctio ad ℥iv. in colat. solve.

Oximell. scill. ℥j. (potens est aperitivum)

Salis card. bened. aut mixti.

Sp. salis ammoniac. an. ℥℥.

Servatis tamen autoris herb. flor. & similibus.

M. F. Decoctum.

Decoctum hoc prodest in *apoplexiâ pituitosa*, non vero in *sanguinea*.

Conferunt præterea omnes *aquæ ant-apoplecticæ* & ant-epilepticæ sic dictæ.

Post debitas purgationes & decocti usum, sit haustus sudoriferus talis vacuo ventriculo sumendus.

Rec. The-

℞. *Theriac. venet.* ℥j.
Sal. card. bened. aut mixti, ℥j.
viperini gr. xvi.
succini vol. gr. vi.
Sp. c. c. sale suo vol. imprægnati ℥j.
Bezoard. mineral. gr. viij.
Antim. diaphor. ℥j.

Dissolve in

Aq. card. benened. ℥i℥.
vitæ matthioli, aut
ant-epilepticæ lang. ℥℥.
 adde *Syr. de stechad.* ℥iij.
Sp. salis ammon. gutt. vi.
 M. F. Haustus.

Tum quoque materia pituitosa apophlegmatismis, ex pipere, pyrethro, sem. synapios, & similibus factis, è capite educatur.

(a) Nucha, & pars, si qua fuerit paralytica, (b) inungantur hoc linimento calido:

Rec. *Ol. camomill.* ℥j. *vulpini* ℥℥.
De lateribus, castoreo an. ℥ij.
Ceræ parum. F. linimentum.

(a) Nucha.] Id est, cervix.

(b) Inungatur hoc linimento.] Bene quidem præcipit in apoplexia pituitosa inunctionem nuchæ, quia ibi principium est multorum nervorum (uti non male inungatur tota spina) sed olea hæc parum possunt penetrare; potius.

R. *Ung. de arthem. maj.* ℥j.

Ol. nucis moschata sive *nucisla* gutt. xv.
tartar. destill. ℥℥.

Balsam. peruvian. gr. vj.

Theriac. Venet. ℥j.

Ol. vulpini,

de later. an. q. s. pro conf. lin.

M. F. linimentum.

Præterea balsamum ant-apoplecticum inungatur temporibus, fronti, sub naso, carpis & regioni cordis.

In *Apoplexia sanguinea* præter venæsectionem exhibenda ea, quæ sanguinis impetum refrenant, ut

Corallia,

Lapides pretiosi,

Terra sigillata,

Bolusarmenus,

Folia auri,

argenti,

Lapis prunellæ,

Camphora,

Saccharum saturni.

Omni mane sumat de sequenti mixtura, ad intemperiei capitis & partium paralyticarum correctionem:

Rec. *Conserv. flor. rorismarini* ℥iij.

Mithridat. theriacæ an. ℥ij. *sp.*

diambra ℥j.

Syr.

de A P O P L E X I A. 541

*Syr. de flæchade, oximellis scil-
litici an. q. s.*

(a) *Misce ad consist. Electuarii.*
vel Rec. *Conserv. flor. anthos, cortic. ci-
tri candit. an. ʒj.*

*Rad. acori conditæ, sp. diam-
bræ,*

Diarod. abbatis an. ʒij.

Cum oximell. scillitic q. s. F.
Conditum.

(a) *Misce ad consistentiam electuarii.] Quo-*
ties nos ægro delicatulo accommodare cogimus,
adde electuario,

Salis card. bened. aut tamarisci,
aut mixti gr. xxv.
aut viperini ʒj.

croci optim. ʒʒ.

Fol. lunæ subtiliss. trit. No. xx.

Ambraë gris. (si vir sit) ʒʒ.

Moschi gr. iv.

Confect. de hyacinth.

aut alkermis ʒiʒ.

M. f. electuarium.

In victus ratione, aër sit calidus. Cibus,
ubi morbus nonnihil remiserit, sit paucus,
calidus, concoctu facilis, & salviâ, thy-
mo, hyssopo, & majorana nonnunquam
conditus. In potu sumatur aqua mulsa: vi-
tetur cerevisia crassa & vinum generosum.

Exer-

542 OBSERVATIONES

Exercitii loco adhibeantur frictiones validae, ac partium extremarum ligaturæ, & humeris effigantur cucurbitulæ.

Quæ sequuntur Observationes excerptæ sunt ex Boneti Anatomia.

OBSERVATIO XL.

Apoplexia oborta occlusione vasorum quæ spiritum vitalem ad cerebrum vehunt, scilicet concursus omnium crassæ meningis sinuum, Torcular dicti.

CUm paulo penitius rem introspicerem, vasaque cerebri singula diligenter perlustrarem, deprehendi tandem locum, quo tanquam è fonte sanguis & spiritus cerebro communicantur, & ex cujus obturatione cerebrum suis spiritibus, si non omnibus, tamen pluribus simul, privari possit: hicque est concursus omnium crassæ meningis sinuum (quem Torcular aliqui nominant, eo quod veluti è torculari sanguis è venis & arteriis in canales istos effusus in universam cerebri substantiam exprimatur) obvius in posteriore cerebri sede, prope apicem futuræ lambdoideæ, ubi tertius & quartus sinus oriuntur: priores vero duo
ad

ad futuram prædictam ascendentes conjunguntur, omnes autem exiguo foramine congrediuntur, quo obturato (ut facile fieri potest, siquidem circa id, etiam in cadaveribus nonnullis violenta morte peremptis, sanguinem, humorem crassum, sæpe & viscida pituita permixtum, concretum & valde compactum, ad obstructionem ejus aptissimum, apprehendi) nil sanguinis spirituumque in tertium & quartum sinum effundi potest, cerebrumque maxima spirituum copia destitutum suis functionibus omnibus privatur & vera Apoplexia proculdubio generatur. *Gr. Nymmanus Tract. de Apoplexia cap. xv.*

Errat doctissimus cæteroquin Vir, quod è Torculari, tanquam ex concursu omnium crassæ meningis sinuum, sanguinem è venis & arteriis in canales seu duplicaturas istas effusum, in universam dein cerebri substantiam sursum exprimi credat: Sanguis, per venas in sinus crassæ meningis sursum non effunditur, sed ille ipse sanguis qui per arterias in sinus prædictos illabitur, à venis jugularibus internis, quæ in sinus illos, maxime vero laterales, à natura in hunc finem inoculantur, rursus absorbetur, atque circulationis lege, non sursum in substantiam cerebri, sed è capite deorsum ad fontem vitalem revehitur: Ac proinde quamvis, inquam, opinio Viri Clar. corruat, nihilominus tamen si assignatus ab authore locus paulo aliter explicetur, funestissimæ apoplexiæ sedem plerumque habebimus:
Nain

Nam venæ illæ jugulares internæ, quæ in dictos meningis sinus, præcipue laterales, ad reducendum è cerebro sanguinem insertæ sunt, si crasso, mucoso, pituitoso sanguine (quod meo iudicio frequentissime in apoplecticis contingit) obstruantur, atque adeo affluxum ex arteriarum carotidum, internarum & vertebraliū ramis sanguinem non resorbeant, tum enimvero debita circulatio sanguinis in cerebro torpescit, & cordis ceu Solis microcosmici ulterior influxus seu irradiatio prohibetur, subsistente nimirum in carotidibus, aliisque rete mirabile & plexus choroideos constituentibus arteriis, vitali sanguine; qui dum ibi turget, non raro in cerebri substantiam lethali vomitu effunditur: Hinc porro cerebri naturalis motus, omnesque animasticæ functiones turbantur, delentur: verbo, concidunt & subsident omnia, & funestam patitur, prout eleganter insinuavit Nymannus, Lunare microcosmi sidus Eclipsin.

Objicies, hanc modo enarratam sinuum duræ meningis obstructionem, à sanguine pituitoso & crasso factam, nonnisi successive & lente contingere, atque adeo agnosci non posse pro causa conjuncta ac formali veræ apoplexiæ, utpote quæ plerumque ex improvviso ingruit & hominem valentem derepente occidit: Respondeo, quamvis non negetur Apoplecticos derepente, mactatæ pecudis instar, in terram prosterni; atque etiam forsân concedi possit subitaneum casum ad essentiam hujus mali pertinere; haud tamen sequitur causas hoc malum efficientes omnes successive non pullulare: neque enim dicitur quod omnis & qualiscunque obstructio sinuum duræ meningis Apoplexiam essentialiter constituat, sed talis demum quæ affluentis vitalis sanguinis

guinis motum totaliter vel maxima ex parte impedit, atque cerebri mentisque operationes omnes evertit, unde præcedentia Apoplexiam symptomata, ut vertigo, capitis gravedo, dolor, & quæ sunt similia, quæque magnam similitudinem cum Apoplexia habent, merito imminentis Apoplexiæ dicuntur præludia: Interim non dico omnem Apoplexiam à tali sinuum in meningibus dependere obstructione, sed certum esse suppono diversis sæpe causis cerebri concidentiam produci &c. *Franc. Ignatius Thiermair consil. med. lib. 2. cap. 2.*

Ex cujus obturatione cerebrum &c.] Apoplexiæ causas omnes ad Neotericorum mentem egregie tradit Clar. Dom. D. Joh. von Flammerdinge, Divi Marci Eques, Medicus Francofurtensis, Disputatione de Apoplexia: Apoplexia, ait, Th. 1. est repentina actionum animalium omnium, sensus scilicet & motus cum facultatum principum læsione ablatio, oborta vel ob aditum sanguinis ad cerebrum denegatum, vel propter spirituum animalium exitum è cerebro & cerebello prohibitum, salvis quadantenus respiratione & pulsu. §. 2. Causa proxima, uti ex definitione patet, est vel sanguinis ad cerebrum affluxus inhibitus: vel spirituum animalium è cerebro & cerebello effluxus prohibitus: Cum enim ad generationem spirituum animalium, cerebrum vivifici hujus nectaris perpetuo appulsu indigeat, illo impedito, nulli generari poterunt: vel sanguis licet ad cerebrum appellat, inque illo generentur spiritus, ipsi interim in nervos ingressus si nullus concedatur, quid juvat illos genitos fuisse? utro quippe modo partes agente suo destituantur, illarum actiones perire necessum est. §. 4. Sanguinis autem ad cere-

cerebrum impulsus arcetur, vel obstructis, vel compressis arteriis, cum carotidibus internis, tum vertebralibus: Obstructio contingit, vel in truncis vel ramis: Truncis potissimum, a corporibus fibrosis pituitosisque, qualia in variis vasis sæpissime reperiuntur & nomine polypi veniunt, quæque vulgo in cavernulas thalamorum cordis radices egerunt, unde ad notabilem magnitudinem excrecentes, altius assurgunt, & in connata cordi vasa longe lateque se pandunt: Sanguine autem quamcunque ob causam vehementius commoto, corpora illa, præsertim si fracidiora fuerint, abrumpuntur, sursumque cum copia irruentis sanguinis per dictas arterias translata, eas vel non procul ab ingressu intra cranium, aut in ipso ingressus vestibulo, simul & conjurato quasi obturant: Eo etenim loci ubi dejecta sunt isthæc obturamenta, vasa inibi distendi nescia penitus offerciunt: Primo quippe *vertebrales arteriæ* per peculiare sibi, apophyses intra cervicis transversas, magnitudini illarum exacte respondens, exsculptum foramen, cerebrum utrinque, os inter occipitale ac petrosum, subeunt: *Carotides vero internæ*, sub ossium petrosi, basilaris & occipitalis confiniis, ventricosiores efficiuntur, quo suo ventre, ceu alveo locum concedunt corporibus illis fibrosis, sanguinisque tenacibus & lentis particulis, inibi & stagnaturis & incrementa capeffituris, donec sanguine vehementius commoto, ulterius adhuc angustiores versus earundem arteriarum introitum, juxta scilicet sellam equinam, compellantur, ubi crassa meninx est densissima simul atque suis ossibus perquam agglutinata, & consequenter cedere nescia: unde liquet isthæc corpora eo semel adacta angustis undique premi, è qui-

è quibus , ceu aviis , nec remeare queunt , nec altius evehi , utpote quibus ulterius omne redditum sit , & invium & ἀνέξεστέον : His si accedat & obstructio , iisdem de causis , jugulares intra venas & sinus cerebri , tanto celerius Apoplexiæ apparatus omnis ille in actum erumpet , morbi enim tales sensim & clanculum fiunt , ac derepente & fulguris more explendescunt. ☉. 5. Tali Apoplexia extinctus videtur Baxius , de quo *Observatione* 36. Talia certe corpora D. D. Franc. Sylvius & Fr. vander Schagen in carotide arteria viderunt , quo retracto , motum aliquem in quartum usque sinum animadverterunt , ut & Wepferus &c. ☉. 6. An arteriæ carotides & vertebrales simul ita comprimi possint ut sanguini fluxum inhibeat , valde dubium , vixque concipi potest , nisi in illis qui à luxatione vertebrarum colli diu paralytici decubuerunt , serumque in eorum cerebro stagnans , subito ac copiose per infundibulum in glandulas pituitarias irruens , illas brevi tumefaciat , atque hac ratione ad illius latera ascendentes carotidas comprimat , sicque fluxum sanguinis ulteriorem prohibeat : In laqueo suspensis etiam Apoplectici quid observare est : Verum non tantum arteriæ carotides in illis comprimuntur , sed & venæ jugulares internæ , unde ingressus & egressus sanguinis perinde arceatur : Illis vero in locis ubi carnifices suspensorum humeris insultant , apophyses cum spinosæ , tum transversales secundæ colli vertebræ abrumpuntur , atque hoc modo vertebrales arteriæ quam arctissime comprimuntur. ☉. 7. Porro vasorum illorum *ramuli* obstruuntur , vel à solis particulis lentis ac viscidis in sanguine præexistentibus , vel accedentibus quandoque ad illas , circulationis ope , particulis fibrosis aliis , jam descriptis :

Hanc itidem obturationem promovebunt cerebri tum constitutio frigida, tum compactior moles: forte enim vascula hæc, ab ipsis generationis primordiis angustiora præexistunt, sicque fiunt obstructioni magis obvia: Illis autem obstructis, cerebri meditullium spiritibus suis orbatur, sicque patitur eclipsim. ☉ 8. Exitus vero spiritibus nullus conceditur, vel oppletis vel compressis substantiæ cerebri, cerebellivè medullosoe poris, utpote spirituum viis, Teste enim Galen. *In Apoplexia corpus cerebri magis afficitur, ventriculi minus*: Imò cerebri ventriculos laterales lædi posse circa Apoplexiæ casum, constat ex illa Galen. historia de juvene Smyrnæo, quem utroque ventriculo cerebri antico fauciatum curavit: Compressio autem, vel oppletio illa, contingit vel a sanguine, vel ab humore pituitoso serosove eo loci eructatis: idque potissimum si tumor quispiam, ceu hostis inquilinus, scelestam illam vim, quæ cerebro infertur, suo compressu eo adjuvet. ☉ 9. Sanguis porro effunditur è suis vasis vel per ἀναστόμασιν, vel per διαίρεσιν vel per διάσπασιν: ἀναστόμασις accidit potissimum à plethora sanguinisque tenuitate nimia; διαίρεσις, vel à vulnere, vel ob vas obstructum, & à sanguine affluente ita distentum, ut amplius distendi nequeat, quocirca appellente ad illud novo sanguine vehementius moto, crepet necesse est: Sic in plethora cerebri vasa usque distenduntur, ut cum simplici tunica constant, levem ob commotionem rumpantur, ut à casu, colapho, inclinatione capitis &c. Tandem est sanguinis aliorumque humorum acrimonia vasa erodens, at rarò hæc causa locum habet: Sanguis igitur quacunque de causa effusus sit, sibi ipsi noxam movet, & hac sua effusione exitium sibi cecat, dum
omni

omni commeatu seipsum interdicat, & vasa sanguinea comprimendo, vel potius constringendo, inhibet ne novus ullus tubulos in compressos constrictosve confluat: ☉. 10. Ab ictu vehementiore in oculum sinistram Apoplexiam fortem vidit *Fernelius*, de qua *Observatione* 19. Apud *Henric.* ab *Heer* mulier pugno percussa juxta intercilium, mox apoplectica concidit, vide *Observationem* 19. Sic, notante *Tulpio*, quidam ab ictu in pectore concedit attonitus, Matrona ira incalescens, apoplectica xvij. post hora obiit. Juvenis dum sese incurvabat, torosus & athleticus intra xv. horas obiit, Apoplexiam quoque à plethora ortam observavit *Tulpius*, ut & *Wepferus* in viro 45. annorum, *Observatione* 20. Idem in septuagenaria apoplexia defunctæ capite singularia observavit, vide *Observationem*. 18. Rursus idem in sexagenaria, quæ ex monticulo prociderat, notavit totam cerebri basin sanguine ofscatam, *Observatione* 15. ☉. 11. Humores serosi sæpe intra cerebrum cumulantur, in illis præsertim quorum sanguis sero scatet; serum enim facile à sanguine secedit, uti ex urina, sudoribus aliisque patet, illis præsertim assumptis quæ effervescentiam in sanguine excitare valent: Infundibulum quoque obstrui & comprimi, atque sic serum intra cerebrum colligi posse existimo, intercluso enim hujus feri ad glandulas pituitarias itinere, & per consequens illius exitu cerebro haud concessio, refluit regurgitatque in ventriculos omnes, quos repentina clade perimet: Si insuper vasis Lymphaticis cerebrum destitutum non est, uti ipsis puto illud non destitui, quidni reliquorum vasorum more hæc itidem sum quandoque humorem affatim effundent subjectasque partes inundabunt? ☉. 12. F. Plate-

550 OBSERVATIONES

rus illum videns humorem aliquando copiosum per os, in apoplexia demortuis effluxisse, eundem copia & loco peccasse concludit: Idem cerebri concamerato opificio diruto, ac incisa cerebri, meninge crassa, copiosum humorem profluentem vidit: Ipsam insuper cerebri substantiam lactis cremoris instar dissolutam per faciem effluxisse observavit, *Observat.* 54. Apud *Wepferum* quingagenarius apopl. extinctus serum pallidum effudit, *Observ.* 47. Quantum autem his in casibus compressio valeat vel ex his innotescat: *F. Platerus* insignem tumorem supra callosum cerebri corpus deprehendit: Vidit & *Clar. Drelinc.* Tumorem steatomatis consistentia.

OBSERVATIO XLI.

Sanguis in Apoplecticis non solum frigescit, sed etiam concrescit.

§. I. **C**onstat refrigerato cohibitoque spiritu sanguinem non solum frigescere sed concrescere, quod in *cataleptics* & *Apoplecticis*, aliisque id genus dissectis observatum. *Hollerus comm. in Coacam. I. lib. I.*

§. 2. Highmori socer Haydocus, in Apoplexia laborante sanguinem in venis adeo concretum invenit, ut medullam sambucinam referret. *Goth. Moëbius Fundam. Phisicologic. cap. xiiij.*

Idem

Idem in hystericis & omnibus affectibus, in quibus cordis motus subito cessat, fieri dicit *Highmorus*, qui addit rationes, Nimirum in Apoplexia, aut hystericis affectibus, aliisque ejusmodi emortuis, subito prosternuntur vires, ablatisque spiritibus cor statim à motu desistit: quiescente verò, sanguis ulterius non movetur, sed statim dum adhuc calidus est uniuntur partes ejus homogeneæ, fibræque incisæ statim concresecunt serumque separatur: In aliis vero qui sensim moriuntur, cordis pulsus sensim etiam languent, adeo ut sanguis in emorientibus, licet non tam præcipiti agitetur cursu, ut in sanis, semper tamen concutiat: & ut calor in corpore sensim debilitatur, sic & pulsus semper languent, motusque in sanguine sensim diminuitur, donec plane nullus sit: Atque hoc modo fibræ dissipantur & discutiuntur & à concretione conservantur.

Sanguinem in venis concretum) Quod sanguis in venis non concresecat *Aristot.* venarum calori adscribere videtur: *Fernelius* vero ab earum ingenua vi provenire existimat, quum in mortuorum venis sanguis non coagulatus, in corpore autem vivente è venis in ventriculum vel intestina lapsus, concretus fuerit deprehensus: Laudatus *Highmorus* Pulsu sanguinem à concretione præmunire; hoc probat, *Sanguis enim*, ait, à coagulatione præservatur dum partes homogeneæ continuo motu ab unione frustrantur & perpetuo separantur; Atque hoc vel mulierculis notum est, quæ ut sanguinem suillum à concretione præservent, crebra agitatione vel manu, vel bacillo illum concutiunt fibrasque dissipant, donec refrixerit, ne ingrumescat. Ad eam rem tamen etiam plurimum spiritus vitales actu calentes facere putamus.

OBSERVATIO XLII.

§. 1. *Apoplexia à grumo sanguinis in carotidibus hærente.*

IN dissectione cadaverum Apoplectico-
rum grumus sanguinis in carotides de-
lapsus repertus est. *l. Crato Consil. xxxvii.*

* **G**rumus Sanguinis in carotides delapsus reper-
tus est.] Non probabiliter à quibusdam
infertur denegato sanguinis influxu ad cerebrum,
illum retro cessurum, ac obruto corde potius syn-
copen quam apoplexiam facturum, sanguis enim
systole è corde exclusus non tam facile in cor re-
labitur (ut de valvulis alias refluxum prohiben-
tibus fileam, quarum usus, aorta ab extraneis
corporibus occupata, forte nullus est) quia à
perpetuo succedente sanguine, dum cor contra-
hitur ulterius pellitur, sique ob obstaculum ali-
quod unam alteramque permeare nequeat, ube-
rior per vicinas arterias ruit, ut fieri necessum
est in illis quibus membrum aliquod resectum
fuit, atque propterea hoc in casu obstructis caro-
tidibus internis & vertebralibus, copiosior per
externas distribuitur: unde certior ratio reddi po-
test quamobrem quibusdam apoplecticis facies ru-
bescat, temporum & colli arteriæ micent, ju-
gularésque, turgidiores conspiciantur; Nolo ta-
men inficias ire hujusmodi ægros præ aliis qui-
busdam apoplecticis citissimè interire, non tam
quod nulli spiritus animales ad respirationis in-
strumenta influant, quam quia progressu tempo-
ris

ris ignavius propellitur, & propter obstaculum prope cranium, impletis reliquis arteriis, in corde stagnat, unde cor alias à pituitosis corporibus gravatum maturius obstruitur atque mors acceleratur: quia autem primum actiones animales sublatae fuerunt, affectum apoplexiæ nomine non defraudandum censeo, licet syncope aut citior mors supervenerit: nisi talem mortis suæ causam duplici affectui debere velimus, apoplexiæ scil. & supervenienti syncopæ.

OBSERVATIO XLIII.

§. *Ab Apoplexia accidentali qui extinguuntur, iis Extravasatus sanguis, aut Abscessus mortis causa fuit.*

DEfunctorum quorundam cadavera dissecui, sed tantummodo fere post magnam capitis læsionem, uti ab ictu aut casu fideratorum, in quibus omnibus sanguis extravasatus aut Abscessus mortis causa fuit. Apoplexia Habituali defunctos ne aperiamus sæpissime ab amicis prohibemur, qui eos redivivos expectantes, prout funus differunt, ita Anatomen prorsus vetant.

Distinguendus est varius hujus morbi insultus, quatenus nempe interdum sine prævia quavis diathesi, aut procatarxi, à causa subita, solitaria & sæpe invincibili excitatus plerumque le-

thalis existit, contra hunc nulla medendi methodus præservatoria institui potest; & quæ iniri solet methodus curatoria, plerumque inefficax evadit, vel 2. paroxysmus apoplecticus causam antecedentem, sive procatarxin præviam habens, propter varias occasiones, sive causas evidentes in actum deducitur. Quod ad prioris generis Siderationem spectat, nempe subitam ac improvisam, causa ejus conjuncta & proxima, aut est magna Solutio continui, alicubi intra, aut prope cerebri meditullium contingens, propter quam poris & meatibus ejus obstructis aut compressis, spirituum emanatio omnis supprimitur: Vel est ingens ac subita spirituum in cerebro degentium profligatio aut extinctio: Solutionem continui majorem intra cerebrum efficere solent Sanguis extravasatus, Abscessus suppuratus & disruptus, atque Humoris serosi copiose inundantis diluvies.

1. A Sanguine intra Cerebrum effuso, sive extravasato, ibidemque aut in grumos concrecente, aut loca affecta sugillante, insultus Apoplecticos sæpe induci autopsia Anatomica comprobatur. Tales autem sanguinis intra cerebrum extravasationes morbificas, vel à causa externa, uti casu ab alto, capitis ictu, aut allisione ad durum, concussione & similibus, vel à causa interna procedunt, in quantum scilicet cum sanguis acris & tenuis, atque vasorum oscula, eorumque interstitia nimis laxa existunt, iste aut sponte aut occasionaliter plus solito effervescens, & per hæc exundans, in mollem & facile cedentem cerebri substantiam irrumpit: Porro, licet huic morbo sedem in *corpore calloso* assignamus, sanguis tamen alibi circa, aut supra ipsum effusus, quia loca affecta intumesciendo medullam substratam comprimit, insultum Apoplecticum inducit.

2. Apostema, sive Ab-

Abscessus, raro intra cerebrum, in meningibus vero sæpe, & propter easdem fere occasiones, ob quas sanguinis extravasatio accidit, excitari solet. Donec suppuretur, cephalalgiam aut torporem fere tantum inducit: verum ubi disrumpitur, sanies ab ipso in cerebri corticem decidens, eum erodit ac putrefacit, & dein particulas putridas, & spiritibus plurimum infestas cerebri medullæ sensim instillans, postremo morbi Attoniti paroxysmum ciet. 3. Serosa colluvies in sanguine in caput suffusa, etsi raro aut nunquam per se, quandoque tamen ob causas evidentes fortiores, affatim adeo in cerebrum incurrit, ut poros ejus medullares mox omnes implens, ac inferciens, aphoniam producat. Id quod quibusdam à nimio vini tenuioris, & aquarum acidularum potu, mox superdormientibus contigisse novi: Similémque effectum à totali & diuturna urinæ suppressione, etiam in hæmorrhagiis subito cohibitis observavi. Denique in febribus malignis, recrementa serosa metastasi critica ad cerebrum translata, aphoniam sæpe lethalem intulerunt. Causarum Evidentium, à quibus fideratio extemporanea inferri solet, genus alterum consistit in spirituum subita profligatione seu extinctione, quod quidem non raro efficiunt Narcotica fortiora, & aquarum ardentium potus immodicus. At præterea observamus hunc morbum quandoque *Habitualement* esse, scil. in quibusdam hominibus diathesin constantem manere, propter quam illos primo velitationes, easque leviores exercent; postea ex intervallis brevioribus accessiones graviores occupant, à quibus plerumque ultimo intereunt. Super his inquirendum, 1. Quæ sit morbi hujus causa conjuncta, ejusque Ratio formalis? 2. In quibus diathesis apoplectica sive

morbi procatarxis consistat; dein 3. Quas insuper causas evidentes habet. Quoad prius, ingruente paroxysmo Apoplectico, supponere liceat materiam quandam in Cerebri ambitu prius aggestam & dispersam, demum in meditullium ejus descendere, ibidemque spiritus omnes adoriri, ac in ipso emanationis suæ fonte suppressere & prosternere, etsi non planè constat utrum illud efficiant aut medullæ poros tantum inferciendo, aut spiritus ipsos profligando, iisque narcotin infligendo, verisimile tamen est utroque simul modo fieri. Et quidem cerebri poros medullares nonnihil obstrui asserimus, quoniam eadem materies quæ primo *corpori calloso* insidens aphoniam intulit, exinde inferius in *corpus striatum* prolapsa, ejusque deinceps poros inferciens, hemiplegiam excitare solet. Attamen haud tantum à medullæ cerebri poris impletis siderationem oriri concludere liceat, quia tunc paroxysmus sæpe paulatim & lente irrepit: in quantum scil. pori non simul omnes, sed successive, & alii post alios à materia influente occupari possunt: quandoquidem vero hæc affectio subito ac instar fulguris insilit, quid minus concipere possumus quam spiritus à materiæ irruentis contactu maligno & velut afflatu prosterni? Videtur enim quod particulæ ejus undiquaque è cerebri ambitu in meditullium, sive corpus callosum descendentes, ipsùmque ex omni parte subeuntes, & meatus, utpote angustiores, protinus opplere, atque spiritus huc illuc fugare atque in arctum cogere solent: quo dein obfessi & in angustias redacti, cum nec diutius resistere, nec in poros alios à materia morbifica occupatos penetrare queant, demum prostrati succumbunt, Animæ cognoscentis functionem omnem dimittentes: dein vero non facile nec cito emer-

emergunt, quia nec è materiæ malignæ complexibus seu vinculis se expedire, nec in spatia ullibi vacua & aperta transire possunt, quapropter diu suppressi jacent, donec tandem aliquando materies ista vel sensim diffusa, aut in sanguinem re-forbetur, aut medullæ populis exudans, in cerebri ventriculos prolabitur: vel demum materies illa paulo inferius sublidens, & corpori striato, nempe uni, aut simul utrique impacta, hemiplegiam aut paralyfin accersit: interim ut spiritus intra corpus callosum denuo liberi, & spatia ampliora nacti, mania pristina resumant, quæ quidem exequuntur, donec materies nova in cerebri ambitus repullulans, & sensim aucta in *corpus callosum* descendens, paroxysmum alium inferat, è quo si neutro ex prædictis modo spiritus evadant, penitus succumbentes sensim dispereunt. Quod si de materiæ hujus morbificæ indole sive natura inquiritur, suspicari licet spiritus animales in Apoplexia plane alio modo ac in passionibus convulsivis affici, nempe siderationi obnoxios copulam explosivæ contrariam, hoc est vitriolicam potius quam nitro sulphuream adsciscere, proindeque ab ea spiritu salina, ipsorum particulas prorsus figi, ac à motibus sive explosionibus quibuscumque ineundis inhiberi, non secus ac cum particulæ *vitriolicæ*, cum *auro fulminante* tritæ & combinatæ, virtutem ejus explosivam seu sclopètariam prorsus adimunt, & tanquam auræ glacialis afflatu particulas alias quasvis activas congelant & immobiles reddunt: Non absimili modo se habere videntur spiritus animales, eorumque copulæ sive diversimoda adjuncta, quorum nempe alia virtutem elasticam & valde explosivam, prout in affectibus spasmodicis, aliæque iis stuporem ac immobilitatem, uti in morbis soporosis, etiam in apoplexia & paralyfi inducunt.

Hæc

Hæc de Apoplexiæ Habitualis causa conjuncta, & Ratione formali; Quod spectat ad causas ejus procatarcticas, simili ritu se habent ac in plerisque aliis ἡ ἐγκεφάλῳ affectibus, nempe & sanguis in vicio est, quod particulas extraneas, atque spirituum animalium texturæ sive constitutioni plurimum adversas, & velut extinctorias, aut in se gignens, aut aliunde arripiens τῷ ἐγκεφάλῳ suggerat; Et deinde cerebri culpa est, quod in crassi imbecillum, secundum poros & meatus ejus, laxum & dissolutum nimis, materiam morbificam à sanguine obtrusam ita facile & sine repudio semper admittat. Utriusque rationes particulares, variosque fiendi modos non opus erit hic speciatim recensere, quin potius huc referri possint quæ de cephalalgia & lethargi procatarxi edisseruimus. *Tb. Willis Tract. de Anim. Brut. par. 11. cap. VIII.*

OBSERVATIO XLIV.

§. *Apoplexia ab arteriæ magnæ orificio summe dilatato, & corde sanguine distento.*

Legatus Florentiæ apud Gallorum Regem, subito incidit in Apoplexiam, omni vita destitutus, qui antea omnino sanus erat.

Aperto cadavere Cor tumebat, & ad sanguinis libras tres vel quatuor apertum emittebat, Arteriæ magnæ ore ita patente ut brachii æquaret amplitudinem. *Andreas*

dreas Laurentius in controversiis Anatomic. pag. 803.

Hinc colligit *Moebius* Arteriarum potius quam nervorum obstructionem Apoplexiam parere, quod non ab eo solum sed & ab aliis observatum firmat exemplo allato à *Fabritio Hild.* cent. 3. Observat. 11 *Simonis Clerici*, hominis sanguinei & robusti, hæmorrhagiæ narium à juventute obnoxii, qui ex ejus crebro recurso periculum metuens, appenso collo amuleto fluxum cohibuit quidem, sed succedente Apoplexia lethali, & XII. ab obitu horis, quum cadaver sepulturæ jam tradendum esset, sanguis copiose è naribus & ore manavit: Videantur & alia exempla allata. Ipsa Apoplexiæ curatio assertionem corroborat. Ea enim icti sæpe sola phlebotomia liberantur: Et hæc inquit *Hollerius* lib. 1. Exerc. 6. nisi juvat, spes in angusto est, actumque fere de vita ægrotantis. Si autem obstructio nervi in causa foret, quem usum præstaret V.S.? certe humor è nervis nec evacuari nec revelli posset semel extravasatus. Ipsa medicamenta apoplexiam curantia idem corroborant: Pituita extravasata si nervo sese insinuasset, certe à nullo medicamento posset emolliri, essetque omnis incurabilis: Vis enim medicamenti solum communicatur sanguini & cum eo circulatur, potestque obstructiones in venis & arteriis solum tollere, non quæ extra venas. *Moebius Fundam. Physiolog. pag. 88.*

Cor tumebat, &c.] Apoplexia non in cerebro semper quærenda, ait *Excell. Bartholinus in consilio de Anat. pract. §. 23.* Nonnunquam in vasis cordis obstructis, intercepto cruore delitescit. Firmat illius sententiam *Clar. Willisus* cap. de Apo-

Apoplexia, cujus verba, commentaria priorum huc adduco. Quod sanguinis, *ait*, in Cerebrum affluxui aliqua tantum ex parte inhibito negamus, id totali ejus exclusioni concedendum erit, propterea námque *ἀναισθησία* excitari sæpe animadvertimus, qui tamen affectus pro morbo Attonito raro habetur, sed Syncope potius aut Leptothymia, vel passio hysterica appellari solet. Si quando enim cordis motus in totum supprimitur, illico sanguine extra cerebrum retento, spiritus animales concidunt, non secus ac lux flamma suppressa evanescit. Cordis actio supprimitur aut imminuitur, vel ob sanguinis incursum improporcionatum, uti in violentis timoris aut tristitiæ passionibus, vel ob spirituum animalium, qui motui ejus inserviunt, influentiam à Cerebello denegatam: Hoc autem ob ipsos nervos cardiacos spásmo affectos, aut alias constriictos accidere putamus: horum autem inordinationes *ἀναισθησία* sequitur, in qua laborantes aliquandiu sine sensu & motu, cum pulsu diminuto & raro velut exanimes jacent: Præterea tamen verosimile videtur cordis motum non raro supprimiti aut inhiberi, ob spiritus animales functioni vitali destinatos, in ipso fonte, nempe intra cerebellum suppressos, &c. Vide de hac Apoplexiæ specie scholia infra.

OBSERVATIO XLV.

Apoplexia raro contigit ob Sanguinem cerebro exclusum; frequentius ab immodico illius excurso.

Licet sanguinis affluxum quandoque cerebro denegari perhibemus, non propterea Apoplexiam semper oboriri credimus: Alibi ostendimus Arterias cephalicas, scil. carotidas & vertebrales, omnes inter se invicem ita variis in locis communicari & mutuo inosculari, ut si contingat illarum plurimas simul obturari aut comprimi, sanguinem tamen unius tantum arteriæ, sive carotidis sive vertebralis, ductu ad ἐγκέφαλον admissum, statim illius partes omnes, tum exteriores tum interiores pervadere; quod quidem experimento satis probavimus, in quantum atramentum unius vasis trunco injectum, brevi ductus omnes sanguiferos implevit, ipsumque cerebrum ubique tinxit. *Olim Tabidi Cadaver aperui, in quo arteriæ dextræ, & carotis & vertebralis, cranio superato, ossæ ac imperviæ factæ, sanguinem ab isto latere præcludebant, nec tamen Æger morbo Attonito unquam obnoxius fuit. Quare dubitare subest utrum sanguis ob arterias quasdam obstru-*
ctas,

ctas, aut compressas, à cerebro exclusus morbum istum pariat. Certe longe plus periculi est à nimio ejus incurſu & intra cerebrum extravagatione. At vero quod sanguinis in cerebrum affluxui, aliqua tantum ex parte inhibito negamus, id totali ejus exclusioni erit concedendum. *Willis cap. de Apoplexia.*

Sanguinis affluxum quandoque cerebro denegari &c.] In defectum sanguinis aliquando referuntur apoplectica symptomata, quæ melius in ejus multitudinem in cerebrum effusam referri deberent: Sic *Wepferus* abolitionem functionum animalium in iis qui suspendio extinguuntur contingere ait, quia arteriis valida funis constrictione compressis, sanguinis ad cerebrum fluxus prohibetur: Verum præterquam quod impossibile est ut arteriæ vertebrales comprimantur, funis illa constrictione, ipsæ carotides non possunt ita facile comprimi ut omnino occludantur, cum in profundo deliteſcant, & sint venis longe duriores ac magis aptæ ad resistendum pressioni quam venæ: quare magis vero consentaneum est venis jugularibus funis valida constrictione compressis occlusisque, & sanguinis ad cor refluxu prohibito, cerebrum obrui sanguine: Cujus rei non levis ducitur conjectura, ex eo quod in strangulatis facies & reliquæ circa caput partes sæpe sanguine extra vasa effuso liveſcant. *Bayle Tract. de Apopl. cap. 4.*

OBSERVATIO XLVI.

Apoplexia ictum capiti inflitum & casum sequuta, ob sanguinem per cerebri anfractus & in ventriculos effusum, ex disrupto torculari, aliisque vasis finitimis.

Claudius Finalis, Calmuntiosegusianus, Limbolarius Textor, annos natus 28. Calendis Junii anni 1673. Genevæ circa horam noctis ix. in declivis vici descensu, dicti *le Perron*, Lapidis ictum supra supercilium sinistrum excipit, ubi vulnus contusum transversum inflitum, quatuor digitos transversos longum, pericranium attingens: Ictus vehementia prostratus in latus dextrum fuit: à casu vulnusculum in auriculæ lobo excitatum, circumsitaram partium livore & ecchymosi ad synciput usque protentâ, maxime temporalis musculi. Ictus, & casus vehementia impedimento non fuere (animos incendente vindictæ cupiditate) quin promptè exsurrexerit, quanquam sanguis per nares & aures prodiret, domum properaturus, gladiumque, in illatæ injuriæ ultionem, arrepturus. Scalam descendens, in ejus ultimo gradu sistitur, ubi deprehensus, ventriculi saburra, qua per vomitum se liberaverat, circum-

N n

fusus:

564 OBSERVATIONES

fusus : post octodecim horas fit aphonos :
Tertio die lethalis apoplexia succedit.

Cadavere in Nosodochium delato, primo vulnus supercilio inflictum stylo exploravi, num alte pervaderet : Hinc animadversa insigni ecchymosi, totum capitis latus dextrum occupante, monitos volui Mag. Dav. Dentand & Benjam. Noel, collegas & Nosodochii Chirurgos, ut res ad Senatum deferretur; Ex primi Consulis jussu cadaver à me dissectum, quo interitus causa pateret, præsentibus Clar. D. D. Alexandro Diodati, Facultatis Medicæ Decano, & Francisco Cailleo Medico Jurato; Sublata superiore cranii parte, in conspectum se dedit dura meninx non livida solum sed & nigricans; qua resecta Pia semiputris & foetens deprehensa est, cum insigni sanguinis extra vasa effusi, ac in grumos concreti, tum per anfractus tum in ventriculis copia, inter quos unus insignis, ovum gallinaceum mole æquabat. Torcular enim ejusque rami, per duram matrem disseminati, necnon venarum jugularium aliquot propagines, laceri & disrupti erant : Dempta cerebri ad corpus usque callosum parte, vitium & labem id contraxisse comperitum est; Ecchymosis parti capitis dextræ impressa, partes interiores non attigerat. *Ex communicatione M. Bailly Chirurgi Genev. peritiss.*
OB-

OBSERVATIO XLVII.

Apoplexia à Sanguine ventriculos cerebri infarciēte.

§. I. **I**Ob. Chiffletius pater meus, ut patet ex ipsius observationibus, anno 1600. vidit in D. De Lesseii ex Ictu sanguinis ventriculos cerebri sanguine farctos, unde in quatuor horis mortua est. Talem exitum ei dudum prædixeram, quia sectionem venæ recusabat. *Iacob. Chiffletius Dædalmatum lib. 1. cap. 4.*

Ictu sanguinis] Ego pro certo habeo per *Ictum sanguinis* nihil aliud intellexisse veteres quam Apoplexiam, ortam à sanguine cerebri meatus impediēte, quod ipsum videtur sensisse *Chiffletius*. Inter antiquos scriptores *Eutropius* lib. 8. Breviarii de L. Antonino hæc narrat, *Obiit tamen cum à Concordia civitate Altinum proficisceretur, & cum fratre in vehiculo sederet, subito sanguine ictus, casu morbi, quem Græci Apoplexiam vocant, &c.* Itaque suspicor hanc *Eutropii*, & aliorum scriptorum phrasin [*Ictum* scilicet sanguinis] ansam postea dedisse plebeie de cadente gutta sanguinis, opinioni; Si quidem facile fuit ut hunc *Ictum sanguinis* haud aliter quam Guttam sanguinis versus cor delabentem, illudque unico quasi ictu interimentem, interpretaretur subsequens historicorum, vel etiam medicastro- rum vulgus, rei Anatomicæ inexpertum. *Franc. Ignatius Thiermairus consil. med. lib. 2. cap. 2.*

566 OBSERVATIONES

§. 2. Frequenter in iis qui Apoplectici moriuntur cerebri ventriculos sanguine refertos deprehendimus. *Warchon Adenogr. cap. 24.*

Accidit frequenter in Apoplexiâ arterias & venas, ipsasque glandulas plexus choroidei intumescere; quo casu facile fit ut sanguis glandulas dictas infarciens, cum permeare non possit, cumque novo subinde affluxu ab arteria impellatur, glandulas dictas dirumpat, aut venarum capillarium orificia divellat, atque in cerebri ventriculos effundatur, Et nonnunquam fortè fit, ut consimilibus morbis occumbentes, largam sanguinis copiam, etiam post obitum ex naribus profundant. *Idem.*

§. 3. Anno 1644. Januarii 23. feminæ subito extinctæ ventriculi cerebri sanguinis gelati copia erant pleni. *Rhodius cent. 1. Obs. 61.*

OBSERVATIO XLVIII.

Apoplexia à cerebri ventriculis concreto sanguine turgentibus, ex rupto plexus choroidei vase expresso.

IN cadaveris muliebris à Cl. Vesslingio Patavii 1644. nostram in gratiam aperti, ex Apoplexia, illique succedente Paralyti-
tan-

tandem defuncti, aperto cranio repentinæ mortis innotuit causa: omnes cerebri ventriculi concreto sanguine turgebant, ut ne guttulam amplius exciperent: *Th. Bartholinus cent. 2. historia 60.*

Sanguis iste ex rupto plexus choroidis vase expressus concretusque, liberum spirituum animalium com meatum impediendo Apoplexiam excitavit, quam deinde paralytis sinistri lateris ad finem usque vitæ pertinax, insequuta est: Hanc igitur causam apoplexiæ sine causa negat Nymanus, quam & Chiffletius observavit. (vide Observ. anteced.)

Repentinæ mortis &c.] Nova suborta apoplexia, cum ex hac in paralytin, & vicissim, facilis sit *idempoplex*: Priorem vero alteri causæ adscriptam velim, nec enim sanguinem è vasis effusum diu impune fert pars princeps, sed citò succumbit, præsertim si insigne vas disruptum sit, quale statuendum in præsentî casu, cum omnes cerebri ventriculi sanguine oppleti reperi sint.

§. 2. Evenit interdum ut quidam qui obmutescunt, nullo alio auxilio quam Sanguinis missione releventur, in quibus vas aliquod in cerebro, aut in partibus internis est disruptum: Prioris exemplum vidi in *Tribuno ærario*. Et in alio qui etiam repente interiit, *ventriculis cerebri sanguine refertis*. *L. Botallus de Curatione per f. m. cap. 11. §. 4.*

Ventriculis cerebri, &c.] In theatro tamen Anatomico *P. de Marchettis* anno 1652. advertit in Apoplecticorum cerebro se nunquamprehendisse ventriculos materia refertos, sed venas & arterias per cerebrum sparsas, quibus repletis fit apoplexia, quod & Anatomicus *Molinetti* in publico demonstravit anno 1656. *Joh. Rhodius cent. 1. Observ. 67.*

Ventriculis cerebri sanguine refertis.] Dubitat *Clar. Caspar Hofmannus*, An sanguis in ventriculos irruere possit? Quis, ait, ventriculos, *l. 3. Instit. cap. 92. in aberrat. p. 439.* sanguine op-pletos in apoplexia vidit unquam? Id tamen possibile esse patet attendendo ad sanguinis motum, vasorum naturam ac partium intra cranium con-formationem: Sanguinis enim, præsertim in ar-teriis, continuus est motus, nisi quid obstat: hinc aperto vase brevi tempore copia sangui-nis effunditur: quod intra ventriculos fieri po-test per hiatus ambos lateralium ventriculorum, ubi prope basin adaperiti sunt: descensui quid obstat, si intra spatium, quod inter utramque meningem est, impulsu novi sanguinis ascendat?

OBSERVATIO XLXIX.

Apoplexia à Sanguine effuso & concreto in u-troque cerebri ventriculo, plurimo sero cruen-to devoluto in tertium & quartum, Ar-teriis duræ meningis sanguine tu-midis, Plexus choroidis rami ruptura, &c.

Illustris matrona octoginta annorum plethorica valde, à multa diæta & exercitio nullo, exeunte Decembri, ipso plenilunii die, hora nona vespertina, mensæ accumbens, protinus ira incaluit, ac duriusculum quid intra dentes diffringens, cecidit sensus & motus expers, cum stertore multo, oculis rubris atque clavorum more defixis, manibus resolutis ac frigidis, postridie febre correpta fuit, & xviii. ab insultu horis vitam exhalavit.

Aperta calvaria, arteriæ tumidæ erant, tum in dura meninge exterius, tum circumcirca cerebri gyros omnes. In utroque cerebri ventriculo majori aderat grumus sanguinis, isque spississimus, & ad ovi anserini magnitudinem concretus: Insuper plurimum serum cruentum devolutum erat in tertium & quartum ventriculum, ac spinam medullarem usque: Plexus autem choroïdes juxta suarum alarum concursum, eo scilicet loci quo sanguinem suum in *venam magnam Galeni*, seu in *quartum cerebri sinum* effundit, crepuerat medius, atque nihilo secius per omnem suum, intra ventriculos illos anteriores decursum, vesiculis aqueis tumidissimis adunatis, & conglobatis refertus atque summe decolor erat. *Ex observationibus Clariss. Caroli Drelincurtiz*

Lugd. Batavorum Professoris Practici & Anatomici.

Plethorica valde] Præter stationem sanguinis, à qua proxime apoplexia dependet; præter humorem melancholicum, Hippocr. 4. acutor. aliisque locis insinuare videtur plethoram, tanquam causam Apoplexiæ, quæ facillime potest venarum interceptiones efficere & motum sanguinis sistere præterea quæ antecedunt & subsequuntur signa plethoram manifesto indicant; ac denique medela per sanguinis vacuationem: At plethoram per se solam non posse inferre Apoplexiam ex ipsa rei natura & consuetis plethoræ effectis demonstratur; ob plethoram quidem sanguis minus facile & tardius suum circulum perficit in vasis, sed ejus motus non sufflaminatur omnino: à plethora necessario prohibetur, aut saltem minuitur transpiratio, retentisque fuliginosis recrementis, quibus sanguis effervescentiam præternaturalem concipit, febris excitatur, quæ Apoplexiæ medela est interdum, ut docet Hippocrates. *Franc. Bayle Tract. de Apopl. p. 72.*

A multa dieta & exercitio nullo) Inter causas replentes & dispositionem ad apoplexiam adjuvantes numeratur *Otium*, quod apud lautius vitantes suave vitiosorum humorum sustentaculum est, unde etiam desides à spiritu vini & similibus magis læduntur quam rustici aliique quotidie graviores labores subeuntes.

OBSERVATIO L.

§. 4. *Apoplexia à sanguine per cerebri gyros diffuso, ex diffractis arteriosis vasis, caroticis & vertebralibus.*

SEptimo Martii 1671. Lunæ nondum impleta falce, juvenis armiger, lautè viçtitans, torosus & athleticus, statim post prandium, dum sese incurvabat, derepente corruit sensu motuque privatus, utpote Apoplecticus, nonnihil tamen universè convulsus est & intra quindecim horas animam expiravit.

Dirutis cerebri muniis, nigerrimi sanguinis quantitas ingens, ab arteriosis tubis, & caroticis & vertebralibus, gyros cerebri naturaliter perreptantibus, ibi denique præternaturaliter passim diffractis, ubique reperta est, sub meninge scilicet dura, à cerebri basi ad verticem, & ab anteriore cerebri lobo in posteriorem usque, juxta utrumque illius hæmisphærium, ventriculis ejus quaternis illæsis & intaminatis. *Ex Observationibus Clariss. D. Caroli Drelincurtii Professoris Practici & Anatomici. Lugd. Batavorum.*

Derepente corruit.] Apoplexiam ratione habita causæ à qua dependet, dividit *Franc. Bayle* Tr. de Apopl. cap. 6. In veram ac exquisitam, quam sola melancholia efficit; Et in spuriam, ad cujus generationem alii humores cum melancholia aliquatenus concurrunt, ejusque invasionem aut accelerant aut remorantur, & symptomatum pro sua quisque natura, quasdam varietates inducunt: Apoplexiam spuriam iterum dividit in duas species: ad alteram efficiendam simul concurrere ait plethoram, alteram promovere pituitam, uberius in vasis sanguineis & in toto corpore collectam. Advertendum autem monet eam impotentiam, quam efficit melancholicus humor, vel solus, vel cum plethora Apoplexiam simpliciter appellari ab *Hippocrate*: Eam vero ad cujus generationem pituita concurrit, speciali nomine designari, & eos qui illa impotentia conflictantur appellare non ἀπληκτικὴς sed βαίτης: In duabus prioribus apoplexiæ speciebus corpus statim sensu & motu privari ait, qui in hac posteriore in principio adhuc conservantur, *Nam & dolor ab ægrotante persentitur, oculisque videt etiamsi non æqualiter.* *Momma* tamen *Baxius* (de quo obs. 36.) cujus cerebrum pituita perfusum repertum est, occisus repente à morbo attonito, ait *Tulpius* lib. 1. observ. VI.

OBSERVATIO LI.

Apoplexia ab atro sanguine cerebrum occupante.

IUvenis Lutetiæ Apoplexia cum periisset, illico caput ipsius fuit apertum, ex quo quamplurimus sanguis ater atramenti instar effluxit. *Ex observ. Georgii Baubini.*

OBSERVATIO LII.

§. 2. *Apoplexia à repletis sanguine Sinubus cerebri orta.*

NAscitur Apoplexia aut quia spiritus animalis exitu, aut vitalis aditu ad cerebrum prohibetur: Spiritus animalis exitu prohibetur, cum cerebri sinus repleti sunt nimia abundantia pituitæ, nigri humoris aut sanguinis: *Ac dum replentur, nec dum repleti sunt, symptoma est convulsionis epilepticæ, quam excipit resolutio apoplectica, ut ipsi vidimus in Episcopo Nivernensi, & in Quæstore Ballomo, quibus vita defunctis inventa est repletio Sinuum à sanguine illuc prorupto. Ludov. Duretus comm. in Coac. Prænot. p.m. 366.*

Nymannus lib. de Apopl. cap. 15. omnem veram Apoplexiam oriri contendit ob Torcularis angustiam subito contingentem, ob quam & cerebro & cerebello spiritus vitales denegantur: Torcular autem vocatur concursus omnium crassæ meningis sinuum, in quos canales, venæ & arteriæ, sanguinem pro universa cerebri substantia, exprimunt. Harvejanis ex principiis, & circulationis sanguinis fundamentis, sinuum hic usus est, ut superfluum tum à cerebri nutritione, tum à spirituum animalium elaboratione sanguinem recipiant, & per venas jugulares cordi reddant. Nymanni *sententiam speciosam magis* quam solidam, refellit Clar. Rolfinkius meth. cognosc. & cur. cap. affectus diff. 9. p. 21. Quatenus possit admitti ejus sententia. Vide Notas ad Observ. 1.

Ac dum replentur nec dum repleti sunt] Epilepsiæ & convulsionum Apoplexiam vel præcedentium, vel illius comitum, causa non in ventriculis quærenda est, sed in meningibus cum nondum obstupuerunt, sanguisque incensus aut acer illas pungit, ut principium nervosum, spiritibus abundans, viis ac meatibus nondum interclusis, insurgat, corrugationes motusque convulsivos violentissimos ad molestiam meningibus illatam excutiendam instituat. Epilepsiam autem in dicto Episcopo & Quæstore Ballomo, sequuta est Apoplexia, sanguine largius intra cranium effuso, tum quia fluxibilior à violentissimo motu redditus fuerat, tum quia corrugato cerebro fortius superne exprimebatur, & inferne ascensu liberiore prohibebatur

Aut quia spiritus animalis exitu, aut vitalis aditu, &c.] Dubium tamen an spiritus Animalis

lis à Vitali distinctus detur? *Hippocrati & Aristot.* hic fuit ignotus: *Galenum* eum adstruentem omnes sequuntur, quem impugnant *Argenterius, Zabarella & Jac. Scheckius*. Etsi enim parenchymatum diversitas coctiones diversas supponere videatur, eam tamen necessariam non esse apparet ex hepate & corde, in quibus diversa sunt parenchymata, non tamen specie differentes coctiones, cum in utrisque sanguis secundum magis & minus differens elaboretur: non itaque sequitur è cerebro & corde diversum spiritum emergere. 2. A cerebro diversi canales quidem prodeunt, sed probandum quod provehendis spiritibus sint fabrefacti: 3. Quanquam dissecto nervo tollitur motus, hinc tamen inde infertur solum nervos motui inservire, non verò vehere peculiares spiritus. 4. Objicitur, si pereunte motu & sensu vita tamen in parte manet superstes, sequitur quod spiritus animalis, inserviens motui & sensui, differat à vitali, quod in apoplexia & paralyssi manifestum. Resp. inforti apoplexia ubi motus & sensus omnis perit, vitam omnino salvam & integram esse adhuc probandum: Partes paralyssi affectæ si amittunt motum & sensum, tandem contabescunt, adeoque de vitæ integritate gloriari nequeunt. Hæc verò provincia spiritus animales elaborandi si cerebro esset demandata, læsionem notabilem sine motus & sensus interitu non facile ferret, sicut corde vulnerato vita periclitatur: Testantur tamen historiæ cerebrum sæpe in quibusdam insigniter fuisse læsum, salvis sensu & motu. 2. Sicut læso hepate vel liene in hydrope nullus laudabilis sanguis generatur, ita in hydrocephalo spirituum animalium elaboratio, adeoque motus & sensus debebat periclitari. Contrarium tamen testatur experientia &

& exemplum ab *Hildano* adductum cent. 4. observ. 10. 3. In paralyfi si partis cujusdam sensus & motus perit, tandem ipsam partem quoque contabescere videmus, non ex defectu spirituum animalium, quorum partes non sunt nutrire, sed ab influxu vitalium male se habente, qui nutritioni, simul sensui & motui præfunt. Objicitur, Si spiritus vitalis præstat sensum & motum, cur dissecto nervo perit motus? 2. Nervi revera motum juvant, sed solummodo trahendo articulum sive partem cui inseritur, & quidem imperante anima. 4. Ante accessum paralyseos vel apoplexiæ plerumque homines conqueruntur de partis, quæ deinceps afficitur, aliquali frigidityte, id quod indicium spiritus vitalis influxum impediri, à nervis enim nullum calorem ad partem venire certum. 5. Visi apoplectici quibus vel in agone, vel statim post mortem sanguis cum impetu è naribus, ore & faucibus profiliebat, quod haud obscurè arteriarum non nervorum obstructionem arguere videtur. 6. In Apoplexia forti & motus & sensus in toto corpore perit, omnes ergo nervi debebunt simul obstrui, quod quàm difficile sit factu, Anatomia demonstrare potest. Pituita inquit, obstruit istos nervos. At catarrho laborantes, quibus totum cerebrum pituita perfusum, præ cæteris apoplexiā incurrere deberent, si pituita nervos ingredi posset. *Nymannus* his difficultatibus commotus aliam apoplexiæ causam, sanguinis nimirum arteriosi obstructionem constituit, &c. *Moebius Fundam. Physiol. p. 84: & seq. ubi plures rationes.*

OBSERVATIO LIII.

*Apoplexia à sanguine ventriculorum cerebri
sinistrum replente.*

Dixit *Fernelius* Apoplexiam fieri posse à sanguinis effluvio in cerebrum, cum copiâ venarum anastomoses aperit: at ut plurimum aqua tantum in iis post dissectionem, ex *Columbo* reperitur; Quare cum Apoplexiam à sanguine viderim, illam tacere non potui. Post Apoplectici enim obitum, aperto cranio, sinister cerebri ventriculus sanguine plenus repertus est: *Sanguinis igitur missione* plethorici talia accidentia præcavere debent. *P. Borellus Cent. 2. Observ. xxxiv.*

Sanguinis missione] Quæ simili in casu necessaria est, nedum utilis, cum à sanguine vel redundante vel fervido ortum ducat. Hinc *Capivacc. Pract. l. i. c. 17.* in paroxysmo apoplectico tres venas, intra horas XII. tundi jubet: 1. in brachio, 2. in pede, 3. in fronte vel naribus: Imò quidam, ut *Nymannus*, omnibus convenire, sive plethorici sint sive non, statuit, obejus efficaciam incomparabilem in revellendis humoribus à capite; susque deque habitis viribus, quæ oppressæ, non exhaustæ. Inutilis tamen judicanda, imò noxia, si à fero intra ventriculos & cavitatem cranii effuso oriatur, cum nihil de
causa

causa proxima dematur, viresque ulterius attenuantur. Nec momenti alicujus si fibrosa corpora arterias vertebrales & carotides occupent, vel torcular à simili corpore obstruatur. Quæ vas ruptum sequitur apoplexia, à venæsectione non solvetur, quippe quæ incurabilis est, cum sanguis intra ventriculos, imò & ad basin effusus inde remeare non possit, ubi statim in grumos concrevit. Si serum intra substantiam effundatur, fortè utilis erit s. m. quæ feri orgasmum, à quo sanguis in motum concitatur, sedat: Cum arteriolæ sanguinem per cerebri substantiam vehentes ab eo obstruuntur, V. S. ejus motum p. n. inhibebit, unde minore copia eò confluet; nam v. g. aperta brachii vena, non parva sanguinis portio per axillares, ad refarciendum illum quieductus fuit, brachia petit. Deinde reliquo ex corpore, atque ex cerebro, sanguis protinus ad cor, [quod per V. S. illo destitutum] properat, depauperato suppetias laturus: hoc verò sarcina liberatum, remeantem sanguinem avarius ad cerebrum transmittit, eaque quantitate quæ oneri & impedimento futura non sit; hinc demum, qui obstructionem in minimis vasis efficit, robore cerebri expellitur.

OBSERVATIO LIV.

*Apoplexia à sanguine in cerebri basin effuso
& concreto, arterias retiformes &
plexum choroidem
premente.*

IPse sæpe ac multum de Epilepsiæ, quemadmodum & de Apoplexiæ causis dubita-

bitavit cum enim aliquando vidissem virum viribus integram, sinistri oculi ictu vehementiore, repente attonitum corruisse, moxque sensu ac motu privari, cum spiritu difficili ac stertore, & cum aliis *fortis apoplexiæ indicis*, eumque nec venæ sectione nec alia potuisse ratione servari, quin horis XII. interiret, mortis causam investigatione dignam putavi: Discisso apertoque capite, neque ossis neque substantiæ cerebri quicquam confractum divulsumque, sed duntaxat interiores oculi *venas contusionis vi disruptas* animadvertimus, è quibus sanguis, cochlearium duorum mensura, in cerebri basin procubuerat, qui concretus arterias eas obstringebat quæ retiformem contextum faciunt, & quæ illinc in cerebri ventriculos propagatæ choroidem alterum constituunt: Cerebri autem ventriculi prorsus illæsi inanesque cernebantur: *Fernelius de abd. l. 2. c. xv.*

OBSERVATIO LVI.

Apoplexia à sanguine in ventriculos cerebri illabente, ibique concreto. Plexu choroideo quasi contuso.

MAttrona 73. ætatis anno subito extinguitur: Reperti in cerebri ventriculis tres grumi sanguinis, amygdali mole:
 O O G.

580 OBSERVATIONES

G. Hofmannus in Animadvers. Comit. Montani & Erasti de morbis c. 14. par. 73. inquit, *Quis ventriculos sanguine oppletos in apoplecticis vidit unquam?* & Institut. lib. 3. c. 92. in Aberrationibus p. 439. quærit qua via, & qua de causa, citra causam externam sanguis à superioribus ad inferiora descendat? Verùm considerato sanguinis motu, vasorum natura, & partium intra cerebrum conformatione, id non adeo difficulter fieri posse putat *Wepferus* p. 220.

OBSERVATIO LVII.

Apoplexia à sanguine supra & infra membranas cerebri effusa.

IUvenis ictus in pectore concidit repente attonitus in terram, spuma ex ore manante &c. Causa fuit partim evidens calvariæ rima, partim sanguis effusus ubertim supra & infra cerebri membranas: Pulmo habebat plurimas lividas maculas. *Vide Lib. 2. Tit. de Suffocatione.*

OBSERVATIO LVIII.

Apoplexia à vasis cerebri & meningum sanguine turgidis, Aqua limpida totam compagem inundante.

DOmina Illust. per multos annos affectibus spasmodicis obnoxia, convalescentiæ spem quandam concepit. Interea tamen conquesta erat de capitis dolore & gravi-

gravitate insigni: post in paroxysmum convulsivum valde horrendum incidit, qui statim in Apoplexiam cito lethalem transiit: Calvaria exempta, vasa meninges & cerebrum perreptantia, sanguine plena & distenta apparebant; cum in reliquo corpore inter disseccandum vix quicquam sanguinis effluerit: Meninge crassiore amota, per alteram tenuem & pellucidam, aqua lim-pida cerebri anfractus implens, ejusque quasi compagem totam inundans cernebatur &c. (*Vide Tit. de Convulsione.*)

OBSERVATIO LIX.

Apoplexia, vulnus sequuta, ab humore ventriculos cerebri replente, & sanguine putrente circa os cuneiforme fractum.

SEptuagenarius delapsus ex altiore loco contraxit in calvaria amplum vulnus: postridie rediit ad se, sed die 4. excreatis prius sputis purulentis, periit ab inopinata Apoplexia: Interiora capitis perscrutantibus, obtulit se primò frequens humor replens ventriculos cerebri: mox ingens ossis cuneiformis fragmentum, à reliquo osse sejugatum, supra quascunque partes circumpositas: in quarum remotiori recessu plurimum

582 OBSERVATIONES

rimum delitescebat sanguinis coagulati: Sed morbus attonitus traxit originem partim ex obstructis processibus spinalis medullæ (qui sunt verum nervorum principium) partim ex angustia retis mirabilis, quod constat ex intricato venarum jugularium, arteriarum carotidum & cervicalium concursu: Quibus nobilissimis partibus impeditis, homo sensu, motu & vita privatur: juxta illud Celsi. S. 26. Servari non potest cui basis cerebri percussa est. *Tulpius lib. 1. cap. 3.*

OBSERVATIO LX.

Apoplexia sequuta fracturam laminae secundæ cranii, integra prima.

Nobiliss. ictus est in bregmate, alioqui casside armato: 6to die apoplecticus interiit: Fracta erat lamina secunda, testam ex se remittens, quibus tanquam aculeis cerebri substantia pungebatur, illæsa prima. *Vide lib. 4. titul. de Vulneribus.*

OBSERVATIO LXI.

Apoplexia & paralysis post vulnus capitis, à cruoris copia intra cranium effusa.

Qui-

Quidam venabulo supra tempus finitrum ictus, brachio dextro resolvitur: nam in illa capitis parte, non in sinistra, venæ disruptæ multum cruoris effuderunt, unde sine sensu, mente, voce, in tertiam diem supervixit. *Vide ibidem.*

OBSERVATIO LXII.

Apoplexia à repletis sero ventriculis, & sanguine obstruente processus spinalis medullæ.

Septuagenarius ebrius, delapsus ex altiori loco, contraxit in calvaria tam amplum vulnus, ut commodè per ejus hiatus educeretur quicquid inhæreret extimæ cerebri membranæ: Invadentibus ipsum nihilominus illico vertigine, vomitu ac stupore, sive à residua crapula, sive à confusso cerebro, sed postridie rediit ad se, expers febris & immunis omnium aliorum symptomatum: Verum die 4. excreatis prius sputis purulentis, periit præter omnem spem, ab inopinata apoplexia.

Cujus ergo interiora capitis penitus perscrutantibus, obtulit se primùm frequens humor replens ventriculos cerebri: Sed mox longissima rima excurrens continuata

584 OBSERVATIONES

serie, per frontem oculique foramen usque ad sellam equinam, prope ossis cuneiformis medium: quo loci animadvertimus (quod jure in omnium oculis fuit rarissimum) ingens ossis cuneiformis fragmentum, ita sejugatum à reliquo osse, ut manifestè elevaretur supra quascunque partes circumpositas: In quarum remotiori recessu cum delitesceret plurimum sanguinis coagulati, verisimile est ex ejus putredine prodiisse, postremo vitæ die quod excreavit pus: Sed morbus Attonitus, qui ipsum occidit, traxit originem partim ex obstructis processibus spinalis medullæ (qui sunt verum nervorum principium) partim verò ex angustia *retis mirabilis*, quod constat ex intricato venarum jugularium, arteriarum carotidum ac cervicalium concursu: Quibus nobilissimis partibus impeditis privatur homo, non modo sensu ac motu, sed ipsa vita, juxta illud Celsi lib. 5. cap. 26. Servari non potest cui basis cerebri percussa est. *Nicolaus Tulpus Observat. lib. 1. cap. 3.*

Septuagenarius ebrius] Pr. *Martianus* comm. in lib. 4. de di. Acut. tres præcipuas facit Apoplexiæ species, quarum potissimum differentiæ sint à Medico considerandæ, quia quælibet specialem postulat curandi rationem: Alia enim conveniens cum sola melancholia hunc morbum producit, alia cum plethora sua simul profert symptomata, alia cum suas auxiliatrices copias melan-

melancholiæ commodat pituita : Dicet autem aliquis eam apoplexiam quam inducit *Ebrietas*, ad nullam illarum specierum reduci posse, ac proinde quartam speciem constituere ? Respondeo hanc apoplexiæ speciem à reliquis nec essentia distingui, nec ratione causæ proximæ, sed tantum ratione causæ externæ & remotæ, ac proinde referendam esse, vel ad apoplexiam exquisitam, quam sola melancholia efficit; vel ad eam quam ex parte infert aut concitat plethora. Etenim vinum uberius sumptum præternaturalem effervescentiam in sanguine excitando, humorum acrium fluxiones efficit, de quibus locis citatis loquitur Hippocr. qui humores acres non alii sunt à melancholia : vel uberiores sanguinis materiam suppeditando plethoram inducit. *Bayle Tract. de Apopl. p. 75.*

Plurimam sanguinis coagulati] Quæ dicta sunt (vide Scholia ad §. 2, Observ. 31.) ad refellendam eam quæ fit à sero aut pituita compressionem, demonstrant impossibilem esse compressionem quæ à sanguine extra vasa effuso fieri vulgo creditur : Nec dicat aliquis validiorem eam esse quæ fit à sanguine compressionem, saltem postquam concrevit; quia coagulatione durior factus sanguis in corpora mollia adigi facilius potest, eaque in parte aliqua premere, aut etiam dissolvere : Ad hæc enim respondeo, sanguinem, cum è vasis erumpit, fluidum esse, suaque fluiditate in spatia in cerebro aut circa cerebrum vacua diffundi, ac proinde cerebrum ab eo æqualiter comprimi, & sine noxa, ut demonstratum est, aut nullatenus comprimi : postquam vero sanguis concrevit, non magis quam antea cerebrum comprimit, imò minus, quia minus quam antea spatium occupat. *Bayle p. 54. Tract. de Apopl.*

OBSERVATIO LXII.

§. *Apoplexia, diuturnum capitis dolorem sequuta, à sanguine circa cerebri basim effuso.*

UXor D. D. N. (vide Observat. i. sect. i. lib. i.) capitis dolori à pluribus annis obnoxia, tandem eo ingravescente Apoplexia gravi corripitur, quæ intra paucas horas lethalis fuit. Ablato defunctæ cranio, venæ duram matrem irrigantes dilatatæ ultra modum, nigræ & varicosæ repertæ sunt, sanguine distentæ, cujus portio in cerebri substantiam basimque decubuit.

OBSERVATIO LXIII.

§. *Apoplexia meningum phlegmonem suppuratam sequuta, post gravem cephalalgiam.*

Quidam post diuturnam Hemicraniam in apoplexiam incidit: capite aperto phlegmon juxta locum dolentem in meningibus accreverat: hinc sanies decidens substantiam cerebri livore & putredine affecerat. *Vide Tit. de Dolorè capitis.*

OBSERVATIO LXIV.

§. i. *Apoplexia à viscido humore, cerebrum opplente genita.*

Diffecui non semel qui ob fortem Apoplexiam obierunt, in quorum cerebro magnam aquæ copiam reperi, perspicuam quidem sed glutinosam. *Realdus Columbus Anat. lib. 15.*

Antiquitas humorem crassum frigidum afflignavit, obstruentem cerebri ventriculos & meatus, atque adeo spirituum animalium influxum in nervos prohibentem: Quam sententiam ego non æquè ac multi hodie faciunt, sine discrimine explodendam esse censeo. Nam posita sanguinis in cerebro circulatione, quid facilius quàm in cerebro, & cavitatibus illius, succum crassum subfrigidum cumulari? In cerebro, inquam, ubi videtur sanguinis ab arteriis in venas non adeo prompta transumptio? Ubi extrema vasorum minutissima; major arteriarum quàm venarum copia; ipsum parenchyma partis respectivè frigidum, ne dicam pituitosum sit: Mortale peccatum est in cerebro si motus ille sanguinis retardetur, retardatur autem facillimè in vastis corporibus, ac præcipuè in quibus calor debilis est, parenchymata viscerum effœta, impulsus languidus, instrumenta annosa, sanguis viscidus & ad circulationem lentus: Atque hinc porro est quod in venas (vel etiam in vasa lymphatica si quæ sunt) recipi minus aptus, viscosus latex, & respectivè frigidus cruor, in cavitatibus cerebri, in sinibus duræ meningis levi negotio subsistat, vasa, meatus, ventriculos, & basin seu nervorum principium successivè repleat, ductus coarctet, atque ipsum denique cerebri motum, pro causarum magnitudine, impediat sistatque. Confirmantur ista experientia & autopsia: nam humida & austrina tempestate, capita pituitosis humoribus repleti, & plurimos apoplecticos fieri observamus sæpissime, & rectè annotavit *Forestus* lib. 10. Observ. 70. Porro probabile est antiquos, dum unam solùm apoplexiæ causam, nempe ventriculorum obstructionem proponunt, ad eam saltem apoplexiam, quæ sine causis evidentibus

ac violentis, à sola causa interna accidit & senibus familiaris est, respexisse, ut recte *Sennertus* lib. 2. Institut. part. 3. sect. 2. cap. 6. notavit. *Franciscus Ignatius Thiermairius cons. lib. 2. cap. 2.*

§. 2. Cur stante tanta aquæ copia in Hydrocephalo, cerebri ventres replente, apoplexia non invadit? Causam quis posset assignare, quod aqua tantum cavitates cerebri oppleat, non autem parietes & substantiam ipsius, quod in apoplexia requiri docuimus; Dic potius quod aqua illa tenuis est, & non crassa & glutinosa, ita ut transitum spirituum animalium in iis admittat, Eam enim aquam, seu potius humorem aquosum qui in apoplecticis, quorum capita secuimus, inventus est, glutinosum fuisse observavimus. *Marc. Donatus histor. mirab. lib. 2. cap. 6.*

Cur stante tanta aquæ copia in Hydrocephalo &c.) Hercules Saxonia Pract. Med. p. 1. c. 12. opinatur apoplexiam puellæ Augustanæ (de qua obs. 6. sect. 16.) non obvenisse quod materia aquæa fuerit, apoplexiam autem factura pituitosa, crassa, secundum Galeni effata, esse debeat; at si Galeni autoritate cum *Saxonia* agendum sit, objici poterit illum Apoplexiam credere ab humore confertim ventriculos implente fieri, nulla obstructionis facta mentione: quod æque à fero ac ab alio quovis humore præstari potest, ut satis Vesalii historia docet. Deinde, summe dubium est adhuc num ventriculi cerebri unquam humore

re

re frigido crasso confertim impleri possint? vel an unquam eo repleti visi fuerint? unde enim tanta copia & *ἀδρόως* irrueret? imo adhuc ambigitur pituitam viscidam, qualis sæpe vel emungitur, vel exspuitur, intra cerebrum colligi, cum adnotante Carpo, excrementa intra cerebrum sint aquea, atque hac consistentia frequenter in cerebri sectione reperiuntur, ac lentorem & visciditatem suam extra cerebrum elapsa demum acquirant: nam si tam viscida ac lenta essent, nec per infundibulum nec per *Riolani* canales, ad palatum & canales expurgari possent: Denique fallitur *Saxonia* serosos humores non posse sive foramina, sive poros, spiritibus animalibus (si qua omnino in ventriculis vel generarentur vel colligerentur] transitum largientibus obstruere, cum enim omnino exigui sint, ac propterea oculorum aciem effugientes, quis non cogitabit illos æque ab aqua quam ab alio humore obturatum iri? Imò viæ pertinacius occludentur, quoniam humores aliquo usque se hisce meatibus insinuare possunt, cum viscida ac lenti in superficie persistant.

Cur stante tanta aqua copia in Hydrocephalo?] Accuratè compressionis nervorum examen instituendum, inquirendumque utrum ea possit Apoplexiam inducere? Certe quæ de hydrocephalis dicta sunt, contrarium manifesto evincere videntur, cum tanta feri quantitas in ventriculorum cerebri cavitatibus collecta fuerit, ut sensim cerebrum comprimendo illud ad membranæ exilitatem redegerit; atque ipsis etiam ossibus cranii emollitis, aut eorum compage soluta, totum caput in molem ingentem dilataverit, quod arguit quanta fuerit compressionis vis, quin tamen ullum apoplecticum symptoma intulerit: Dicet aliquis memoratam feri collectionem contigisse in pri-

prima ætate, cum ossa cranii adhuc tenera, impellenti præ quantitate sero, obsequuntur facile, eoque facilius quo futurarum cohæsiōe nondum valde firma, ossa levi de causâ ab invicem facile divelluntur, quibus fit ut cerebrum nullam in infantibus à sero intra cranium collecto patiatur compressionis violentiam; sed hi non advertunt ut in infantibus ossa teneriora sunt, ita cerebrum esse mollius, atque proinde dispositum ut à levi causa compressione atteratur, dissolvatur aut laceretur; in adultioribus vero cerebrum, ut pote firmius & durius, validioribus agentibus resistere: Demonstrandum itaque est ab humoribus intra cranium effusis cerebrum non posse ita comprimi ut cursus spirituum animalium intercipiatur: Etenim supponatur humor vel in ventriculis cerebri contentus, vel circa cerebrum effusus, ea quantitate quam potest capere tum ventriculorum cavitas, tum quodcunque spatium in cranii cavitate vacuum, novus adhuc humor continuo impellatur, qua vi potest impelli, per arterias motu cordis; his positis, quid fiet? proculdubio cerebrum undique æqualiter pressum illæsam suam servabit figuram: ut enim vi compressionis cerebrum, conteretur, deberent partes loco quem occupant pelli, sed quo abibunt? cum fiat undique pressio, cum nullus detur locus ad quem partium pressarum aliquæ secedere possint, necesse est ut omnes in pristino statu perseverent, nec possint inde dimoveri: hinc fit ut urinatores, quamvis ingenti aquæ incumbētis pondere premantur, quia æqualiter undique premuntur, nullam partium patiantur divulsionem, nullum sentiant dolorem, ne premi quidem se percipiant: Si quacunque causa humor in solis ventriculis continueatur, nec possit per rimas, satis latas ad cerebri

bri exteriora diffundi, expandet procul dubio cerebrum, donec ipsum inter & cranium spatium nullum relinquatur vacuum; quod ut fiat non opus est magna cerebri dilatatione, si cerebrum molem debitam, & ossa cranii naturalem habeant consistentiam: Cum cerebrum in ambitu firmiore cranio fulciatur, non magis patietur ab humore in ventriculis contento, quam si is esset etiam per totum ambitum circumfusus, ut urinator nihil patitur incommodi ab aquarum pressione, seu ea undique involvatur, seu in parte aliqua corporis, quæ terræ innititur, ab aqua non prematur, quia qua parte terræ innititur, in ea æque ac in aliis premitur: Si quacunque arte pars aliqua à pressione liberaretur, in eam magno impetu humores detruderentur, unde consequeretur partis insignis tensio, dolor, aut etiam particularum divulsio, si in reliquo corpore esset valida compressio, ut contingit in applicatione cucurbitularum, prout pars cucurbitulis subjecta magis aut minus ab aëris pressione liberatur: Ex his patet, quod supra asserui, majus periculum impendere à compressione, fero intra ventriculos contento, cum cranium mollius nullum aut parvum exhibet cerebro fulcimentum, tunc enim metuenda est partium ab invicem divulsio & laceratio, quæ cum in memoratis ægris [Observat.] non contigerit, multo minus metuenda est in iis quibus cranium solidius est & firmitus: Ex urinatoribus manifestum fit corpus aliquod nihil pati detrimenti à quacunque pressione, dummodo ea æqualis sit in toto ambitu: Sed adhuc à pressione satis magna, etiam si in toto non fiat ambitu, modo multæ partes æqualiter à corporibus undique prementibus fulciantur, nihil detrimenti contingere corporibus non admodum firmis

mis patet ex magnis uvarum acervis, inter quas quæ ultimum locum occupant, licet superiorum pondus sustineant, manent integræ, nec ullatenus conteruntur, quia singulæ à circumstantibus uvis fulciuntur variis in locis, quæ tamen statim disrumperentur si in duabus partibus è diametro oppositis æqualis pressio vis adhiberetur: Dicet aliquis, cum medulla spinalis non impleat illam in qua continetur, cavitatem, cum nervorum è dura matre involucrum sit laxius, in ea spatia propelli posse mollem cerebri substantiam, si ab insigni feri copia vehementius urgeatur? Respondeo 1. piam meningem arcte adeo complecti, & fulcire totum cerebrum, medullam spinalem & minores nervos, ut minimè metuendum sit quod objicitur periculum. 2. Si exigua sit feri copia, esse debilem quæ fit ab illo compressionem: Si vero serum sit copiosius, atque adeo valide quaquaversus nitatur, facilius ipsum in medullæ fistulam defluet per vias satis patentes, quam cerebri substantiam eò propellet: præter ea quæ attuli urinatorum & uvarum exempla; alia passim occurrunt, quibus evincitur à pressione, cum æqualiter fit, in universam corporis alicujus superficiem, non tantam inferri vim quantam vulgo creditur: circa cerebrum hallucinatio facile contingit ob summam illius mollitiem, qua docemur quàm parum firma sit partium insensilium, quibus constat, inter se cohæsiō, ex qua vulgo inferunt singularum insensilium particularum parem esse mollitiem, cum tamen innumera sint corpora mollitie non vulgari prædita, quorum non solum elementa, sed etiam partes sensibiles consistentiæ sunt non mediocris, inò valide adeo sunt inter se connexæ ut non nisi magna vi adhibita discerpantur: facile discerpi-

tur

tur substantia cerebri, quia particulæ illius insensibiles per exiguam suæ superficiei partem se contingunt, nec protensis hinc inde fibrillis multum implicantur: talem decet esse illius partis substantiam, per quam ad functiones & excellentiores, & magis necessarias obeundas, tenuissima spirituum substantia continuo percolatur: nec enim in nervis sunt spirituum ductus conspicui, sed ii per spongiosam medullam, tanquam per filtrum, influunt in organa sensus & motus, quod ut facile fiat, insensibilibus particulis quædam inest soliditas, cujus vi compressioni quidem facile resistitur, non divulsioni, cohæsionis defectu, hinc fit ut à compressione etiam levi, si fiat in unica tantum parte, cerebrum dissolvatur. *Bayle Tract. de Apoplexia pag. 47. & seq.*

OBSERVATIO LXV.

Apoplexia à pituitosis humoribus spinalis medullæ principium occupantibus.

AΤροψία post obitum, à pituitosis humoribus supra spinalis medullæ principium, ejusque caudices collectis, id subortum ferale symptoma bis docuit. *Rolfinkius Dissertat. natom. lib. 1. cap. 13.*

Car. Piso lib. de colluvie serosa, tres Apoplexiæ species constituens, fortissimæ causam statuit mucosum humorem sive solum, sive potius sero immixtum, sed ea proportionem ut ille hoc multum superet: Levem à sero solo, sive mucori permixto, sed in pauca admodum quantitate, aliàs in paralyzin non desineret.

OBSERVATIO LXVI.

§. *Apoplexia à pituita crassa & viscida quarti ventriculi foramen obstruente.*

Certum est ac indubitatum, multis experientiis confirmatum, in Apoplexia obstrui ventriculos cerebri, sive in choana; sed potissimum *quarti ventriculi* foramen, quod apophysi scilicoide clauditur, à pituita crassa & viscida ibi hærente, quæ si non discutiatur & removeatur, vacuata per choanam, lethum infert. *Riolanus Enchei- rid. Anatom. & Patholog. lib. IV. cap. 2.*

Quarti ventriculi foramen) Ventriculum medullæ nobilem vocat Excell. *Thomas Bartholinus*, quem locum generationis & elaborationis animalium spirituum constituit; quod eo loco situs sit, ut undique circa se in omnes nervos spiritum animale effundere possit, cum cæteri ventriculi excrementorum sint tantum receptacula: Vide *Anatom. Reform. lib. 3. cap. 4.*

* Sed & hunc ventriculum è censu nobilitatis expungit *Wepferus*, pag. 150. quia si hic cisterna nuncupandus sit, spiritus animales vel ex anterioribus ventriculis, vel ex ipsius cerebri & cerebelli substantia huc ablegandi erunt, nam aliunde proficisci nemo, ut existimo, credet: ventriculi nihil spirituosum suppeditare possunt, cum spiritibus animalibus in cavo ventriculorum nullus locus sit, ut abunde demonstratum: Cerebrum vero aut cerebellum spiritum in hujus ventriculi cavi-

cavitatem effundere ex cruribus medullæ oblongatæ, ut pote quæ ejus latera formant, quis opinabitur? cum paulo post illis in eadem crura redeundum sit ut per nervos quoquoersum distribuantur: ut taceam ingressum & regressum tenuem meningem remorari: Proinde ventriculus iste spirituum animalium cisterna & promus condus esse non poterit. Ergo si hic ventriculus cæteris cerebri præstare debet, in eo spiritus generabuntur, quod æque ac prius à veritate alienum videtur: Nihil dicam de opifice horum spirituum, quem difficulter quisquam in has oras, exulem à cerebro & cerebello condemnabit: nihil de ejus ortu, quem ex accidenti casuque resultare quidam affirmant: nihil de excrementorum in eo collectione, quam ipsi cum reliquis ventriculis communem esse ajunt, nihil de impossibili ad omnes nervos distributione, cum æque ac alii ventriculi pia matre vestiatur, & vix ad nervos opticos & processus mammillares spiritus hic generati perventuri sint: sit ille purissimus, sit ad recipiendos spiritus capacissimus, sit denique eo in loco situs unde quoquoersum spiritus diffundi possint; solum ex hujus ventriculi patronis quæserim, ex qua materia spiritus animalis hoc in loco producendus sit? cum nec millesima arteriarum, sive vertebralium, sive carotidum, ad hunc ventriculum pertingat; nec in æternum probabitur vel minimam *ἀπομὸν* spirituum vitalium in ejus cavitatem effundi: quem verò ob finem immenso numero arteriæ per cerebrum & cerebellum dispergentur? an nutritionis solum causa? frustra igitur tantæ molis opus creatum erit, atque eo animal citra actionum animalium jacturam carere potuisset: Deinde credibilius est spiritus animales potius per canalem ad tertium redituros, ut

pote manifeste apertum, quam insensiles poros crurum medullæ ingressuros, atque ad cerebrum & cerebellum, ut actionibus animalibus inferviant, abituros. Ad tertium autem ventriculum si spiritus perveniant, quid eos maneat supra dictum est; atque ita frustra spiritus in hoc ventriculo generabuntur. Quidam pro asserenda hujus ventriculi nobilitate adducunt illud laniorum experimentum, quo cultro in cervice ad hunc ventriculum adacto jumenta protinus apoplectica concidere dicuntur, at id fit quia medulla & vertebrales arteriæ abscinduntur antequam ad hunc ventriculum perveniant.

A pituita crassa & viscida &c.) Subita insultus apoplectici invasio, & subita ejusdem solutio, quamvis per obstructionem, & obstructionum apertionem contingerent, non video quomodo eæ in pituitam crassam & viscidam referri possunt, cujus humoris necessario tardus est motus, cum ob crassitiem meatus exilissimos vix possit pervadere; cumque ob visciditatem vicinis corporibus glutinis instar adhærescat: Cum perpendo locum in quo pituitosa illa excrementa colliguntur, & vias per quas inde evacuantur, & quas in partes confluunt, vix adducor ut credam ea esse mera excrementa: hic enim ut in quibuscunque aliis partibus corporis, naturæ providentia vias parasset per quas extra corpus potuissent amandari, nec reliquisset ductus illos manifestos, per quos in venas jugulares defluunt, ut iterum sanguini misceantur: Ex his mihi videtur non levi conjectura deduci posse humorem illum, qui in cerebri ventriculis colligitur; esse alicujus utilitatis, & magis naturam redolere feri concrevisibilis sanguinis quam puræ putæque pituitæ: Huic conjecturæ favet, quod humor ille non solum in cere-

cerebri ventriculis, sed etiam circa cerebrum gelatinæ instar concretus reperitur, (*vide scholia ad observ. 47.*) verosimillimum est spiritus cum separantur à sanguine, feri concrefcibilis secum aliquid deferre, cujus quod superfluum est secundæ filtrationi abjiciunt, & in ventriculos cerebri deponunt. *Franc. Bayle Tract. de Apoplex. cap. 4.*

OBSERVATIO LXVII.

§. *Apoplexia à crasso & viscido humore ad retiformem contextum invento.*

ALterum qui citra causam externam apoplexia extinctus esset, dissecare visum est, in quo *crassus & viscosus humor* ad contextum retiformem inventus est, cerebri ventriculis nec oppletis aut obstructis: Hinc ergo ratiocinatus, consentaneum putavi iis *arteriis vel obstructis vel compressis, apoplexiam gigni.* Quod tum cerebrum nihil spiritus è corde per subjectas arterias recipiat, sitque necesse illius motum sensumque perire: *Quidam hæc, opinor, animadvertens, rectè dixit fieri apoplexiam interceptis viis quæ sunt cerebro cordique communes. Fernelius. l. 3. c. 15. de abd. rerum causis.*

OBSERVATIO LXVIII.

Apoplectici Caput, Pectoris regio, stomachus, pulmones, materia pituitosa referta erant.

CEllarius quidam in collegio Pazzmaniano, assumptis à circulatori floribus Antimonii, incidit in Apoplexiam, qua durante in validissimum ptyalismum incidit, ita ut per aures & os spumosi phlegmatis facile mensuras sex exspuerit.

Corpus defuncti apertum fuit, & pulmones, tota Pectoris regio, stomachus caputque materia ejusmodi plena fuere reperta.

Ex hoc colligere licet, quod sicuti Antimonium diaphoreticum optimè præparatum est Pulmonum singulare remedium, ita suo nondum sulphure arsenicali & mercurio, calcinationum & dilutionum vi, exutum, summum est venenum. *Paulus de Sorbait in Miscell. curiosis anni 1673 Observ. 270.*

* *Spumosi phlegmatis*) Thiermair. lib. 2. Consil. medic. cap. 2. pag. 24. Apoplexiæ causas efficientes enumeraturus, crassum humorem non sine discrimine explodendum demonstrat, *Posita sanguinis in cerebro circulatione, quid in cerebro & cavitatibus illius facilius quam succum crassum subfrigidum cumulari? in cerebro, inquam, ubi videtur sanguinis ab arteriis in venas non adeo prompta transumptio? ubi extrema vasorum minutissima, major arteriarum quam venarum copia, ipsum partem parenchyma respectivè frigidum, ne dicam pituitosum sit?*

Phleg-

Pblegmatis) An à pituita potest fieri Apoplexia? Hippocr. enim lib. 2. de morb. 8. expressis terminis asserit sanguinem congelari aliquando, quia à pituita refrigeratur? Respondeo & plethoricos & pituitosos Apoplexiæ esse magis obnoxios quam quibus moderata est humorum laudabilium quantitas, aut pauca pituita sanguini permisceatur: At à plethora aut pituita solis induci Apopl. nego, quamvis in plethoricis & pituitosis symptomatum diversitate distingui videatur Apopl. id non solius hujus morbi proprium est, sed omnibus aliis accidit, ut pro vario ægrotantium temperamento, pro varia ætate &c. varia producant symptomata, ob quorum diversitatem nemo dicet diversas esse morborum species, nec causas diversas: Quod attinet ad Apopl. à Pituita, inductam, tanquam à causa seu totali, seu partiali, seu adjutrice, advertendum est Hippocr. non appellare eos qui illa corripantur ἀποπληκτικὲς sed βλῆες, ut eorum impotentiam distinguat à vera & exquisita Apoplexia: Præterea pituitam non esse præcipuam Apopl. causam ex eo satis insinuat, quod Hippocr. in eodem textu doceat præcedere debere venarum calefactionem, aut, ut aliis locis docet, inflammationem & resiccationem, ut pituita in illas attrahatur, aut potius retineatur; nec enim pituita, quæ frigida est & humida, venas calefacere potest aut inflammare, aut exsiccare: Denique Hippocr. 4. acut. insinuat sanguinis stationem esse causam perfrigerationis, non contrà, cum dicit perfrigerationes fieri ex statione sanguinis, quamvis commota atra bile perfrigerationes per sanguinis coagulationem citius contingant cæteris paribus, quando humores frigidi abundant: Quare recte hæc dicit Hippocr. *Postquam venæ pituitam in seipsas traxerint, necesse*

præ pituitate frigiditate sanguinem magis tunc sisti ac perfrigeratum esse quam priori tempore: Unde patet sanguinem ante pituitæ in venas affluxum sisti ac perfrigerari, ac proinde ab alia causa quam à pituita, quamvis pituitæ adventu aut stagnatione citius perfrigeretur, imò ideo pituita in venis retinetur, quia sanguis incipit coagulari, cum ipsa, quamdiu sanguine diluitur, sit valde fluida, ut patet ex ejus filtrationibus & percolationibus per ductus exilissimos, in iis qui pituitæ crassæ & viscidæ ingentem copiam exspuunt, emungunt, per sedes & urinas ejiciunt. De Apoplexia & plethora, vide Observ. 12. Bayle Tract. de Apopl. pag. 73.

OBSERVATIO LXIX.

Apoplexia ob cerebrum pituita perfusum, ejus venarum ab eadem obstructionem, ventriculos sero repletos, & Polypus cordis fibris adnatum.

Momma Baxius, homo torpidus ac hebes, occisus repente à morbo attonito, obtulit secanti Chirurgo cerebrum flaccidum, & membranas ipsas tam frequenti pituita perfusas, ut opus fuerit eam spongia detergere: Qua eadem pituita replebantur utique & venæ per cerebrum dispersæ, nec minus Sinus falciformis, & quidem utrobique tanta copia ac lentore, ut inde potuerit extrahi instar longioris alicujus fili. Movente hac concretâ pituita non levem poly-

polypi suspicionem, sed quem id temporis frustra quæsitum ivimus in naribus, illum offendimus deinceps inscii in sinistro cordis ventriculo: Sed redeundum ad pituitosum hoc cerebrum, in cujus ventriculis invenimus, non tantum plurimum aquæ (quod attonitis familiare,) sed spinalem medullam ita humidam, imò udam, ut necesse fuerit exuperantes liquores prius spongia absorbere, antequam licuit inquirere in naturam nobilissimæ hujus partis. Constabat autem is Polypus *ex alba ac concreta pituita*, inclusa membraneo involucro, & inhærens suis radicibus carneis Cordis fibris, assurgebat bifido trunco, obturans non minus aortam quàm venosam: quarum nobilissimarum viarum obstacula impedimento fuisse, ne deinceps vel aërem liberè attraheret, vel fuligines debitè expelleret Cor, nedum exactè se clauderent valvulæ post egressum spiritus vitalis; cui tamen usui illas ibidem loci destinavit sollicita natura, unde factum ut partim ob exclusum aërem, partim verò ob retentas fuligines, & spiritus plus æquo dissipatos, infirmaretur usque eò cordis robur, ut nequirit amplius officium facere; multò minùs spiritus vitales quibuscunque partibus impartiri: quorum calore ac fotu ubi carendum fuit, refrixit inde confestim corpus, emarcuit animus, &

torpuit tam vehementer cerebrum, ut tandem perierit à gravissima Apoplexia. *Nic. Tulpius lib. 1. Observ. cap. xxvii.*

OBSERVATIO LXX.

In plurimorum ab Apoplexia extinctorum cerebri aut cordis vasis, reperta corpora viscida, glutinosa, Polypi dicta.

§. 1. **Q**Uotquot Apoplexia aut catarrho suffocativo mortuos aperui, in omnibus corpora illa callosa, viscida ac glutinosa, aut in corde, aut in cerebro, aut in ambobus aliquando reperi, de quibus scribit Wepferus, &c. *Joh. Georgius Greisel Miscellan. Curios. anni 1670. Observat. 74.*

§. 2. Vidi & ego, præsentibus viris magni nominis, corpus tale ex corde, & truncis ac ramificationibus, cum arteriæ tum venæ pulmonalis, uti & ex finu duræ matris longitudinali, in homine quinquaginta annorum, apoplexia demortuo, eductum. *Joh. Von Flammerdinge, Eques Divi Marci, Medicus Mæno-Francoff. Disput. de Apoplexia, Thesi V.*

* Apoplexiæ sunt obnoxii quibus in cordis ventriculis aut in vasis pulmonis aliisque, Polypi, aut glutinosorum corporum concretiones exci-
tan-

tantur; ex iis enim fit manifestum magnam inesse sanguini, aut ejus sero, dispositionem ut coagulentur, & per sanguinem fusam esse coagulationis causam, melancholiam, ita ut si vel hic humor, vel illa dispositio augeantur, in apoplexiam facile incidant qui hæc patiuntur. Hallucinantur ergo qui corpora illa glutinosa albida, gelatinam referentia, è pituita compingi putant, quod impossibile sit pituitam in loco calido & humido ulla arte ita coagulare ut ejusmodi corporum consistentiam acquirat, quin potius concreta pituita in liquore quocunque calido dissolvitur diffunditurque: Jam vero cum variis innotuerit experimentis sanguinis serum facile concreescere acidorum affusione, in gelatinæ formam, se ridendos præbent qui horum corporum in cordis ventriculis concre scentium materiam esse putant pituitam: certe materia concretionum illarum, aut Polyporum, quando colore & substantia aliqualem habet cum carne affinitatem, non potest existimari pituita. *Bayle Tract. de Apopl. p. 96.*

OBSERVATIO LXXI.

In Apoplectici sinistro cordis ventriculo pinguedo reperta.

IN sectione Apoplectici cujusdam nuper, observata fuit in sinistro cordis ventriculo pinguedo in arteriam venosam ascendens, ubi cum ejus orificium clausisset, in duo cornua dividebatur, ad similitudinem literæ Pythagoræ: Si, ut volunt, à

causa frigida concrefcatur pinguedo, mirum
certè in calidiffima regione adeo luxuriare.
Thomas Bartholinus Centur. 1. Epiftola 2.

OBSERVATIO LXXII.

Apoplexia ab humore aquoso per cerebri substantiam diffuso, ventriculos replente, cum sanguine atro & crasso in arteriis temporalibus.

EGO multum magnificæ Dom. Mariæ Justinian. de Arrivabenis Dispensatorem, forti Apoplexia peremptum fecare jussi: Totam cerebri substantiam aquoso humore perfusam & oppletam reperimus; quæ etiam & in cerebri ventriculis redundabat: Et (quod mirum fane fuit) dissectis arteriis temporalibus, tanta copia sanguinis atrii & crassi effluxit quantam vix in toto corpore reperiri credidiffem. *Marcellus Donatus Histor. mirabil. lib. 2. cap. 6.*

Tanta copia sanguinis atrii, &c.] Meminit Ful. Alexandrinus Salubrium lib. 24. c. 2. Attoniti morbi qui interceptis venis arteriisque à multitudine fit, quas usque adeo infarctas obturat, ut expletas ad plenum, quum nec supersit vacuum, nec recipere extrinsecus quod refocillando nativo calori necessarium est, ulterius valeat, sed suffocato repente calore animal illico concidat: Hujus quoque sententiæ fuisse Rasum constat, quippe qui

qui venas Guidez, seu Jugulares, in apoplecticis fecandas mandat, ut pote quibus oppletis affectio oriatur, inanitis vero solvatur. Quare si corpus sanguine plurimo redundante apoplexia deprehensum, sed non validissima, nobis occurrerit, audacter ad arteriarum temporalium sectionem devenire operæ pretium futurum maxime crediderim &c. *Idem ibidem.*

Cerebri substantiam aquoso humore. &c.] Apoplexiæ causam in dicto Dispensatore refert M. Donatus ad oppletionem arteriarum, nec meminit cerebri aquoso humore perfusi & oppleti, & in ventriculis redundantis, cum tamen à sero & humore aquoso apoplexiam induci certissimum sit: Adeo ut à duplici causa originem duxisse hæc videatur, sed revera simplici; Sanguini enim arterioso copia peccanti, cum liber aditus per arterias in cerebrum non patuerit, in iis crassitiem adeptus est, imò penè concrevit, serumque, quo plurimo abundat sanguis arteriosus, ab eo secretum est, quod in cerebri substantiam ejusque ventriculos exundavit; adeo ut apoplexia hæc ortum ducat, tum à negato influxu spiritus vitalis ad cerebrum, ob dictam arteriarum oppletionem: tum à spiritus animalis exitu prohibito, ob serum in cerebro redundans.

OBSERVATIO LXXIII.

§. *Apoplexia à seri & pituitæ copia in toto cerebro & ventriculis.*

IN Anatomia Serenissimi Principis Apoplectici I. H. L. cui præfuit D. Buncius

cus 4. April. 1652. Cerebrum magnum & grande, sero & pituita plusquam refertum repertum est, maximè in ventriculis. *J. D. Horstius Observ. Anat. iij.*

OBSERVATIO LXXIV.

§. *Apoplexia ab aqua limpida cerebri plicas implente & totam compagem inundante.*

DOmnia Ill. diu affectibus spasmodicis obnoxia, post capitis dolorem & paroxysmum convulsivum in apoplexiam lethalem incidit. Mortuæ vasa meningum & cerebri sanguine plena apparebant: Omnes cerebri cavitates colluvies serosa impleverat. *Vide Tit. de capitis Dolore.*

OBSERVATIO LXXV.

Apoplexia levis à seroso humore in cerebro stagnante.

VIr Ill. Febre tertianaria prehensus: quinto die oblivio, desipientia, aphonia, sensus sepultura, motus abolitus sequuntur. Reperta aqua plurima in toto capite stagnans &c. *Vide Tit. de Febris. lib. 4.*

OBSERVATIO LXXVI.

§. *Apoplexia à seri ingenti copia inter cranium
& duram meningem, In falce & illius
reduplicatione, omnibusque cranii ca-
vitatibus.*

ANno 1667. Anicii Vallesiorum, in
Gallia Narbonensi, sequutus Præto-
res Regios capitales, vocatus fui cum
Dom. D. Meyronnetio & Coralle Medicis;
Magistris Nicolao, & Vicario, primariis
Regis Chirurgis, & Odonnetto, Chirur-
gorum Decano, adstiturus Matronæ No-
bili, Dominæ de Fernois, proxima con-
sanguinitate conjunctæ Generosissimo Vi-
cecomiti à Polignac, urbis Gubernatori,
Apoplexia tactæ: Præsidia ex arte à dictis
Medicis fuere præscripta & administrata,
tam Pharmaceutica quàm Chirurgica, sci-
licet Venæ sectio utriusque brachii, Cu-
curbitulæ scarificatæ, Sinapismi, Vesica-
toria, Errhina, totius corporis succussa-
tiones; cauterium actuale summo capiti,
ad normam H. Fabritii ab Aquapendente;
quorum remediorum ea fuit efficacia ut in-
tra xv. horarum spatium sensus deperditi
fuerint restituti, tam interni quàm exter-
ni, superstitè tamen *Paralyfi* brachii fini-
stri;

stri : Elapsis autem 7. diebus de novo ingruit affectus, quem mors statim excepit, nec animadvertentibus qui ægræ assidebant : Teneræ autem constitutionis fuerat, lubricæ valetudinis, macilenta, fluxum hæmorrhoidalem passa ab anno ætatis XVIII. à quo tempore vixit obnoxia *hemicrania*, totam capitis partem anticam & sinistram occupanti, adeo molestæ ut plerumque decumbere cogeretur & ab omni consortio abstinere : fatigabat dolor plerumque semel in hebdomada : usu purgantium pilularum xv. interdum dierum inducias concedebat dolor, quandoque mensis integri : quò remittente copiosas lacrymas fundebat oculus lateris affecti, quod illi certum erat indicium affectus ad declinationem properantis. Interdum naris è directo multo stillabat sero. Si id accideret per menses integros, ferebatur dolor; cujusmodi vacationem lætissima ferebat. Febris præterea quartana frequenter eam prehendebat, præsertim hyeme. Vultus aliàs non omnino erat decolor *μελανόφθαλμος* Naribus ferè siccis sed sputatrix, multasque emittens urinas. Appetitu pollebat vegeto, cibum sat copioso diluens potu, vino scilicet, sed temperato : In diætâ non delinquebat quanquam saporatis & aromaticis gauderet, ut & fructibus omnigenis; à dulcibus abhorrebat &

fac-

saccharo conditis, nisi acidiuscula essent: Musica organica illi erat in delitiis, cujus erat peritissima, præsertim citharæ & monochordi, In actionibus omnibus moderata: Menses illi per sanitatem modicè fluebant, qui anno 47. desierunt: Obiit autem vidua, annos nata LVI.

Rogantibus consanguineis, & Doctoribus Medicis nominatis, Capitis apertio à me instituta, præsentibus Chirurgis, quò, tum recidivæ, tum mortis causa innotesceret, Adstabant Viri Illustres Domini Catalanus à Porta & Pugetius, Regis Consiliarii magnæ Cameræ Parlamenti Tolosani, & alii. Inter duram matrem & cranium, Item in hujus cavitatibus, tam anterioribus quàm posterioribus: Tum & in falce ac reduplicatione duræ matris (abscissis prius fibris, quarum interventu futuris alligatur.) inventa aquæ flavescens, mediocriter salitæ, Pinta una, seu libræ medicinales circiter quinque: Actum 22. mensis Januarii anno 1667.

Ex communicatione D. Baylly Chirurgi Genev. peritiss.

OBSERVATIO LXXVII.

*Apoplexia à Serofo humore cerebri anfractus
alluente & ventriculos replente.*

Virgo post cephalæam immanem, intra triduum apoplectica interibat: Capite aperto *latex flavus* cerebri anfractus profundiores, ejusque cavitatem anteriorem, seu ventriculos inundabat. *Th. Willis Anat. cerebri cap. XII.*

Latex flavus] Ab omni humore induci posse Apoplexiam ostendit *Wallisius* comment. in historiam Androthali, 7. *Epidem.* cui lingua sicca erat, plerumque admodum amara, aliquando cordis dolore afficiebatur, tandem post decubitus duorum aut trium dierum mortuus est: unde colligit humorem qui occupare cœpit & obstruere cerebrum, biliosum aut atrabilarium fuisse. An bilis apoplexiam parere possit, videbitur infra. Cephalæa immanis virginem prædictam affligens, cui successit apoplexia, humorem acerrima vi præditum supponit.

OBSERVATIO LXXVIII.

Apoplexia à plurima aqua cerebrum diluente.

Apoplecticus concidit Sereniss. & Celsi.
Princeps Wilhelmus Lantgravius Hafsæ,

fiæ, ex acidulis redux : aperta calvaria ,
aqua plurima diluebat cerebrum. *Casp.*
Rolfinkius Meth. special. p. 144.

Ex acidulis redux) Henr. ab *Heer* refert vi-
rum sexaginta annos natum , ex potu aquæ spa-
danæ in Apoplexiam incidisse, cui paralyfis fuit
succedanea, & qua defunctus, cùm acidulas re-
forpsisset, novo apopl. insultu fatis concessit :
Plures alios senes intempestivè illis aquis uten-
tes consimili morbo sublatos vidit.

OBSERVATIO LXXIX.

Apoplexia ab abscessu seroso in cerebro.

MAria N. post contusionem sincipitis
vertigine afflicta fuit, tandem Apo-
plexia fortissima subito obiit. Inspecto ce-
rebro, in sinistro latere tumorem, ovi ma-
gnitudine, cerebri tertium ventriculum
comprimentem, aqua limpida repletum re-
peri. *Vide tit. de Vertig.*

OBSERVATIO LXXX.

*Apoplexia epilepsiam sequuta, à sero acri in
cerebro, inter meninges & in ventriculis
stagnante.*

VIr annorum 30. (*Tit. de Epilepsia*)
occubuit Epilepsia terminata in apo-
plexi-

plexiam: Inter piam & duram matrem, ubique, uti & in ventriculis, magna sericopia stagnavit &c.

OBSERVATIO LXXXI.

Apoplexia à vesicis rotundis aquosis corpori calloso incumbentibus.

Sacerdos quidam in fine consecrationis stolidus cum magna admiratione factus, & paulo post tempus apoplecticus brevi mortuus est: Secto cadaveris capite, *vesicæ aliquot rotundæ* albidæ, humore pituitoso repletæ, supra corpus callosum inventæ fuerunt, quas hujus lethalis morbi immediatam causam fuisse existimatum fuit. *Dom. Panarolus, Pentecoste 1. Observat. 17.*

Vesicæ aliquot rotundæ) ὀδονδὲς vocatæ, de quibus supra. Si humor lymphaticus per vasa propria liberè non excurrat, inde fit ut pars illius in transitu hærens, exudet in cavitatem ab initio perexiguam, efformatam in membranosa partis substantia: eademque ex novo materiæ affluxu paulatim, cellula quædam in tunica obo-riatur: Humor autem eo confluxus, initio tenuis, postea crassescit, & pituitæ formam induit. *Vide Barbette Pract. lib. 4. cap. 4. § 9.*

OBSERVATIO LXXXII.

Apoplexia ab abscessu in dura matre disrupto, cum corrosione meningis tenuis & corticis cerebri, à pure inde manante.

NOvi abscessu in dura matre excitato, & postea disrupto, cum à pure foetidissimo meninx tenuis, os & cerebri cortex exederentur, ægrum primo in stuporem, & demum in Apoplexiam lethalem incidisse, qui tamen in toto morbi decursu symptomate quovis Epileptico immunis degibat, *Thomas Willis Pathol. cerebri cap. 2.*

Inde infert Excell. Vir meningas in Epilepsia primario non affici: Idem autem pus, à quo meninx & cerebri cortex exesa, ad originem nervorum decumbens apoplexiam induxit, compressione aut obstructione facta; immediate aut mediante cujuspiam vasis erosionem, unde sanguinis effluxus: Sic variolis apopl. in puella supervenisse narrat Excell. *Wepferus Exerc. de Apopl. p. 230.* vase aliquo ab interna variola eroso; Eas quippe interiorum partium, non secus ac exteriorum obsidere membranas comperitum est.

OBSERVATIO LXXXIII.

Apoplexia à Tumore steatomatico inter cerebrum & cerebellum.

VIdit Clariff. Dom. *Drelincurtius* Tumorem steatomatis consistentia, pugnique magnitudine, cerebrum & cerebellum inter, eò præcisè loci ubi conarium utrique substernitur choroidis plexus alæ, spatio semestri à sensibili læsione, cæcitatem primò, surditatem subinde, omnium denique sensuum & functionum animalium abolitionem, & necem ipsam intulisse. *Joh. von Flammerdinge Disputatione de Apoplexia, Thesi 12.*

OBSERVATIO LXXXIV.

Apoplexia à cerebri subsidientia, dissolutione & fluiditate, ob pituitam ejus molem irrigantem.

SI pituita cerebri substantiam longo impulsu adeo irriget, ut magna illa cerebri moles mollior laxiorque facta subitò diffluat & subsidat, nervorumque principium in basi calvariæ à cerebro prodientis premat, & spirituum animalium transitum præcludat,

cludat, Apoplexiam gravem parit: uti quando ventriculos seu cavitates cerebri puita subitò adimplet, *non obstruendo*, cùm spiritus animalis non in ipsis, sed in cerebri substantia undique & nervis sedem suam habeat, nec per ventriculos transeat, sed eodem modo cerebri basin gravando, apoplexiam quoque inducere potest: Quæ tamen, *si humor ex illis descendens nervorum ductum sequatur*, in paralyfin potest desinere: Hæc omnia sic se habere in *Caro* apoplexia mortuis, ex eo quod copiosus *hic humor* per os tunc illis effluxerit, aliquandoprehendimus, & sectione quoque diligenti aperta crassa cerebri membrana, in quibusdam copiosum humorem mox profilientem per capitis regionem ad thoracem usque descendisse, ipsam adeo cerebri substantiam in Anu quadam defluxisse observavimus Monspeffuli, quæ subitò apoplexia tacta expiravit: hujus calvariam cùm aperimus, cerebrum illius in meninge crassa hinc inde fluctuareprehendimus, Quod & dissecta apertaue dura dicta matre, liquoris alicujus spissioris & albi pulstem referentis per faciem universam defluebat, & hinc inde in pannos dispergebatur. *Platerus Pract. lib. I. c. 2. & Observat. lib. I. p. m. 16.*

Ut magna illa cerebri moles mollior &c) Quæ fit causa radicalis hujus universalis resolutionis, magna est apud Viros doctos disceptatio : Credo ego substantiam, seu corpus totius cerebri perpetuo motu, systole & diastole, naturaliter agitari, sive ille motus cerebro competat ex natura sui parenchymatis, seu communicetur per pulsus arteriarum, membranas cerebri ipsiusque substantiam perreptantium : Motus iste necessarius esse videtur ad circulationem sanguinis, ad spirituum animalium elaborationem, & denique ad illorum per nervosum genus in totum corpus propulsionem, aut, (si cui ita loqui lubet) irradiationem : Istum inquam cerebri motum, si impediatur & subsistat, ipsumque cerebrum quasi subsideat, dico causam esse principalem radicalem Apoplexiæ, seu Impotentiam hanc motus cerebri esse ipsum formale & Essentiam hujus morbi : omnes etenim effectus, omnia symptomata in apoplecticis concurrentia, surculi sunt istius pessimæ radice, ita quidem ut etiam omnes & singulæ concausæ ad Apoplexiæ efficiendam natæ, illam ipsam radicem respiciant, foveant, augeantque : Quod si dicas pro radice hujus mali, assignandum esse potius motum impeditum, unde spirituum motus & actio omnis tollitur, prout ex *Hippocrate* monuisse videtur *Pr. Martianus lib. 2. de Morbis versu 67.* Respondeo, quandoquidem cerebrum mentis principale est organum, spirituum animalium officina, nervorum demum prima radix, à quibus motus & externi sensus omnes dependent, equidem non video, cur non rectius in cerebro quam uspiam alibi apoplexiæ essentiam reposuerim, præcipuè cum omnis morbofa agendi impotentia, non in humoribus viventibus, (quale cerebrum)

rebrum) necessariò consistat. *F. Ignatius Thiermair. consil. med. lib. 2. cap. 2.*

Hic humor per os effluxerit] Affine est exemplum quod adducit Car. Piso, 1. c. de puero 12. annorum, qui circa solstitium hybernum, sine sensu ac motu derepente concidit, ac 12. morbi hora suffocatus est; hunc ait merum mucum, sed spumofum, cum anima per nares reddidisse, confer tim non stillatim, quomodo affectis pulmonibus aliquando excernitur, ut absit omnis suspicio è thorace manasse.

* *Ut cerebri moles disfluat & subsidat*] Ab ejusmodi cerebri dispositione omnimodam expectari debere functionum animalium abolitionem & mortem inevitabilem inficiari nemo potest: at cerebri illa depressione, ob illam atoniam necessario excitari veram apopl. nemo unquam dicet; nec enim inde orietur stertor, sed respiratio statim abolabitur, non secus quam aliæ functiones animales. *Bayle Tract. de Apopl. pag. 59.*

OBSERVATIO LXXXV.

Historia Apoplexiæ à cerebri subsidentia contingentis, ob tumorem cranii resectum.

Mulier Leidensis tumorem in dextra fincipitis parte gestavit externum: ablatus ille fuit Chirurgi periti celeri manu; & sine ullo gravioris mali metu tres dies effluxerunt: Sed quarto die, subitò invadente apoplexia, moriebatur, ut præ-

618 OBSERVATIONES

dixerat aliis motus similibusque exemplis
 Clar. Walæus: Quia in hujusmodi capitis
 tumoribus læditur pericranium: quumque
 hærentes matres internæ dilatantur, con-
 cidit cerebrum comprimitque ventricu-
 los. *Thomas Bartholinus cent. 4. histor.*
 86.

OBSERVATIO LXXXVI.

*A sanguine circa basin cerebri & rete mira-
 bile effuso, cum cerebelli
 syderatione.*

Quidam ictus à sclopeto concidit pro-
 tinus in terram &c. Videre fuit pro-
 pe plagæ locum, extimam cerebri mem-
 branam tum lividam, tum flaccidam, &
 non uno loco cruore atro obductam: cere-
 bellum vero planè syderatum &c. *Vide lib.*
6. de Vulneribus.

OBSERVATIO LXXXVII.

*Ab hydatibus circa temporales arterias, cere-
 bri flacciditate, &c.*

Puer præceps in caput ceciderat &c. ac
 postremò apoplexia enecatus: Detra-
 cta defuncti cute ex capite plurima effluxit
 aqua: circa temporales arterias hydatides
 repertæ

repertæ plurimæ &c. Aquæ tantillum in cerebro substantia planè flaccido &c. *Vide lib. 6. de Vulneribus.*

OBSERVATIO LXXXVIII.

Apoplexia citò interimens, cerebro omnino salvo & incolumi, solo vitio in Pulmonibus apparente.

SEnex Theologus, vir probus & pius, corpore obeso, nec non collo brevior & toroso præditus, diu invaletudinarius & vitam sedentariam agens, cacochymicam valde scorbuticam contraxerat: respirationi difficili & anhelosa & capitis gravitate & torpore insolito affectus, vix quicquam præterea laboris aut exercitii præstare poterat quàm quod quotidie è cubiculo ad sacellum iret & rediret: Quodam mane capellam paulo ante preces ingressus, dum genibus provolvitur, de repente percussus & mox ἀφ' ου & insensibilis factus in humum concidit; Illicò vero sublatus & vestibus exutus, lecto concalfacto imponitur: Ipse aliique Medici mox accersiti reperimus eum, non modo absque sensu, pulsu & respiratione, sed toto corpore frigentem & planè rigidum: nec ullis remediis, aliquandiu li-

cet diligentissimè adhibitis , ad vitam aut incalescentiam revocari potuit, unde suspicati sumus à primo ictu cordis pulsus penitus adhibitum fuisse, flammaque ejus extincta sanguinis statim omnem motum suppressum fuisse.

Postridie cadaver exanime satis & obri-
guisse visum, aperuimus, nihil dubitantes
quin affectus ita subito lethalis vestigia sa-
tis clara, intra ἐγκέφαλον relictæ, in con-
spectum prodirent: Verùm illic, aut in
alia quavis parte, morbi, licet atrocissimi,
ne vel umbra quædam supererat: vasa me-
ningas irrigantia sanguine mediocriter re-
pleta fuerunt, absque ulla tamen phlogosi
aut extravasatione: Cerebrum, cerebellum
& medulla oblongata, cum processibus eo-
rum omnibus & prominentiis, ubique fir-
ma & bene colorata, tum extra, tum in-
tus per totum apparebant: Nec serum nec
sanguis effusus ullibi intra eorum poros &
meatus, nec etiam intra ventriculos majores
coacervabatur: quinimo plexus Cho-
roides tum intra cerebri cavitatem, tum
pone cerebellum confiti, omni culpa im-
munes videbantur: adeo ut materies mor-
bifica, æque tenuis ac subtilis ac sunt spi-
ritus animales, quos affecerat, prorsus in-
conspicua maneret; ejusque illic præsen-
tiam tantummodo ab effectu arguere lice-
ret:

ret : Attamen ne alibi extra caput lateret illa, post singula τῇ ἐγκεφάλῳ contenta accuratius inspecta, ad Thoracem devenimus, ubi pulmones discolores & ichore spumoso per totum infarcti, respirationis difficilis & anhelosæ causam satis manifestò prodebant: Cor verò satis sanum ac firmum, obstructione quavis aut polyposis concretionibus immune prorsus existerat : porro nec in vicinia ejus, nec in aliis circumcirca visceribus, abscessus quispiam aut apostema, à cujus contactu aut fœtore cor opprimi, aut vitalis (si modò hoc possibile est) derepente suffocari potuit, reperiatur.

Quamobrem in hoc casu nihil aliud suspicari licuit, quàm spiritus animales intra cerebelli meditullium, consitos à particulis quibusdam malignis, sive narcoticis, sive aliàs infestis, subitò profligatos & quasi extinctos fuisse, proinde ut cordis, quasi primi in machina elateris, motu illico deficiente, statim cæteræ omnes functiones, earum impulsibus ademptis, prorsus cessarent. *Willisius Tract. de An. Brut. parte 2. c. 8. pag. 375.*

Pulmones discolores & ichore spumoso &c.]
 Quæ partes in hoc morbo afficiantur declarat *Hippocr. 2. de morb. 1. 6, Patitur autem hæc cum atra bilis ipsi commota fluxerit, maxime in partem in qua plurimæ sunt venæ, in collum, inquam, & pectus: deinde postridie sideratus fit & impotens, sanguine nimirum perfrigerato. Cerebrum*

622 OBSERVATIONES

brum affici & spiritibus destitui, ob sanguinis coagulationem satis intelligitur ex impotentia & abolitione functionum animalium; Stertorem vero & respirandi difficultatem ex eadem sanguinis coagulatione dependere agnovit *Hippocrates*: quippe observaverat in forti apopl. in qua magna est respirationis difficultas, venas in collo intumescere, unde rectè inferebat pulmonis venis capillaribus obstructis, sanguinem, ejus circuitu impedito, in venis jugularibus stagnare, & latiores pulmonum venas distendere, unde necessario sequitur bronchiorum angustia, ut in summa respirationis necessitate sufficiens aëris quantitas nequeat inspirari, nisi magno conatu thorax plurimum dilatetur, cum in moderata dilatatione ejus cavitatem impleant pulmones sanguine distenti. Ex quibus constat in apoplexia exquisita pulmones affici & sanguinea ipsorum vasa obstrui. *Bayle Tr. de Apopl. pag. 71.*

OBSERVATIO LXXXIX.

*In cujusdam quem Apoplexia extinxit
cystide fellea, decem calculi
reperi.*

ANno 1653. Aprilis 18. Castris Nob. D. Ferrand Apoplexia mortuus est, in cujus cystide fellea decem calculi nitescentes; coloris flavi subobscuri, & aliquomodo triangularis figuræ, fabæ magnitudinis reperi sunt, quorum duos ego in musæo meo curiositatum asservo, *Petrus Borellus cent. 3. observ. 22.*

An ea vesicæ felleæ obstructio Apoplexiæ causa esse potuit? In dubium enim revocatur num bilis eam concitare possit, Vide Notas ad caput 17. Sed quanquam hætenus deprehensa non sit apoplexia a bile genita, certum tamen naturam non semper bilem quotidie genitam ad ambitum expellere, sed sæpe ad alias partes, imò nobiles: *Sculetus* Armam. Chirurg. Observ. 18. ait se secuisse cadaver Nobiliss. Galli atrocissimis colli doloribus confecti, cujus colon intestinum cancro occulto affectum erat, procul dubio ab obstructione pori bilarii: cui, qua parte duodeno inseritur, insertus erat lapillus pisum æquans, natura bilem ad colon deponente: Idem ibidem ait Veneram Cancro uteri exulcerato interemptam fuisse, cujus cystis fellea à calculo insigni omnino obstructa fuerit.

OBSERVATIO XC.

Apoplexia à fulmine excitata.

§. 1. **P**Uellam vidimus in qua nullum ictus vestigium apparebat, circa dorsum duo tantum erant signa à summo ad imum pertracta, quæ à pyragra candenti facta videbantur: Intus nihil erat incommodi præterquam in una pulmonis pinnula, in cujus fine exustio quædam videbatur. *Brassavol. comm. ad lib. 1. Hipp. de vict. acut.*

§. 2. Anno 1581. Vesontione cùm campanarii contra tempestatem campanas pulsarent;

farent, quidam ex illis fulmine petitus interiit: Totum ejus corpus inspectum sine ullo vulnere & pellis integra apparuit: eo excepto quod collum denigratum nonnihil, & collare indusii scissum fuit: Ejus corpore aperto, præcipua viscera, cor, hep-
par & lien desiderata sunt, reliquis minutioribus intestinis fideratis: Iis qui ipsi adfuerant pedes tantum ambugi fuerunt:
Ex Observ. I. Gilberti. Medici Vesuntini.

A Fulmine induci posse apoplex. ait *Benev-
tius* de abd. cap. 23. qui patrem & filium uno & eodem momento, à fulmine tactos, apoplecti-
cos evasisse, iterumque integrè sanatos fuissere-
fert: hujus enim potentia tanta est ut humores cerebri commovere, hominesque attonitos red-
dere valeat. Narrat Hildanus cent. 3. Obs. 26. de quodam famulo fulmine icto & occiso, cui caput paulò post intumuit & nigrum evasit, unde graviter læsum fuisse cerebrum constat. Rarius tamen veram apoplexiam excitat, nam ut pluri-
mum, vel planè occidit, vel ita prostermit, ut colore faciei vivido deperdito, pulsuque & respi-
ratione prorsus ferè ablati, icti mortuis similes appareant.

OBSERVATIO XCI.

Fulmine icti & enecati Anatome.

CAsus hic accidit die 19. Maji 1666. Medleji, quod hinc uno milliari abest. Duo Scholares Collegii Waldhamensis, qui soli fuerant in scapha quadam à litore non pridem remota, Medleji ad redeundum domum, positi in capite scaphæ infelici ictu Tonitru aut Fulguris statim ex scapha in aquam excussi sunt: Alter eorum ita ictus est ut plane rigidus moreretur, & ex aqua post vix unius minuti moram (uti ex relatu acceptum) extractus, nullum vel vitæ vel sensus motusve indicium proderet: Simul atque ex aqua mortuus fuit extractus nihil remediorum inexpertum relictum est, sed frustra erant omnia: Quare postridie ejus diei in urbem sepulturæ causa delatus est, ubi Doctor Willisius, D. Mellingtonus, D. Lowerus & Ego accessimus, avidi lustrandi corpus mortuum, si forte in eo particularia nonnulla observanda venirent.

In universa ipsius cute nullum apparebat vulneris vestigium: Facies & collum nigra erant & livida: sed non in majore gradu quàm solet procedere ex sanguinis sedimento: In dextra colli parte macula quædam parva

parva nigricans , digitum unum longa ; quartam verò digiti partem lata , ad summum , nota ferro candenti inustæ haud ab-
similis conspiciebatur : Habebat & aliam paulò majorem , ut memini in altera , i. e. sinistra colli parte , infra autem : Directè intra , in latere pectoris sinistro , locus erat novem circiter digitos longus , & duos digitos latus , hic amplius , ibi minus qui erat adustus & durus ut corium igni duratum , colore rubro valdè sensibili , in nigrum vergente , cuti porcelli affati similis : In parte anteriore humeri sinistri aliam habebat similem maculam unius circiter solidi magnitudine , quæ tamen nigra & notabilis haud erat quàm illa quæ in collo apparebat : A vertice humeri dextri deorsum , versus dictam pectoris partem , erat tenuis linea similis cuti adustæ , quasi aliquid in eam juxta collum intrasset , & infra versus pectus delapsum ibi se laxasset & ad finem callis ampliorem campum aperuisset : Maxima pars globulorum Thoracis ejus ablata fuit ; collare fuit disruptum , Pileus mirè erat laceratus , non quidem exactè per cacumen , sed per latera pilei & extrema : à latere ejus erat foramen majus pugno ; quædam ejus partes omnino abruptæ , & inde undique hiatus sparsi erant , quasi pileus fuisset dissectus aut laceratus instrumento obtu-

obtuso; Et præter illos una aut duæ fissuræ aliæ erant, quæ non committebantur foramini in latere: In reliquo vestimento nullum casus istius vestigium cernere licuit, neque odorari odorem aliquem sulphureum: cujus rei causa fuerit, partim quod jam temporis nonnihil post casum elapsum esset, partim quod vestimenta statim aquam hauserint, in quam inciderat homo: Sequenti nocte tres Doctores supra memorati & Ego convenimus, & capitis apertionem fecimus, ut animadverteremus si quid in eo veniret, sed nullum contusionis indicium apparuit: cerebrum erat integrum & optimè constitutum; Nervi quoque erant integri, & nullo malo læsi: vasa cerebri plena & bene disposita, sic ut nihil extraordinarium in iis oculis nostris subjiceretur: Negandum quidem haud est aperturam illam factam ad lumen candelæ, non examinari potuisse pro votis, quamvis partem satis accuratè ob brevitatem temporis (mox enim humandum erat cadaver) lustraverimus. Sunt qui imaginantur vidisse fissuram quandam in cranio exiguam quique illud tenuerunt dum serra dissecebatur; asserunt ibi se quandam percepisse rupturam, seu dissonantiam in manibus, apparebatque in oculis simile quid, verum tantillum id fuit: Ad tempus dextrum ca-

pilli manifestè erant adusti, & inferior pars dextræ auris paulo nigrior partibus circumfitis, sed mollis, & fortassis illius causa tantùm fuit sanguinis sedimentum: Pars superior humeri sinistri & sinistra colli, facies etiam aliquanto nigriores apparebant reliquis partibus corporis, sed an illud evenit ex ictu rumpente collare, & inurente ei rotundam rubram maculam, aut tantùm ex sanguinis sedimento, non satis compertum habeo: attamen puto maxime fieri potuisse, ut tam caput quàm partem illam colli læserit prægrandis ictus, cum contusione insequente (videturque ita accidisse ex dilaceratione pilei & disruptione collaris, & fortassis ex fissura cranii) nullo tamen existente signo contusionis, quia per immediatè sequentem necem non liquerit sanguini, ad illam partem congregari ibidemque subsidere, (quod in contusionibus est causa nigredinis) ita ut non secus esset ac si corpori recens mortuo talis ictus inflictus esset, ubi non solet accidere tale symptoma contusionis postquam sanguinis circulatio desit.

Examinato itaque capite, Pectus quoque apertum est, & inventa adustio transfuisse penitus totam cutem, quæ in locis illis adustis dura erat, & quasi cornea ac contracta, sic ut non esset tam crassa ac
te-

tenera seu mollis cutis quæ circa istam erat; interim tamen sub cute nullum ejus rei erat vestigium: Musculi erant in situ suo naturali, neque quicquam ordinarii coloris amiserant (fortassis ob rationem jamjam memoratam de capite, collo & humero:). Tum sublato sterno, pulmones & cor coloris soliti nihil remiserant, neque quicquam alterationis prodebant:

Hæc igitur sunt quæ imprimis illo in casu sunt observata, quibus & hoc addo, noctu corpus multo magis tumidum fuisse quam mane, odoremque sparsisse penetrabilem & foetidum; id quod forte tribuendum æstui tempestatis & calori quem multitudo in conclavi effusa concitaverat. *Actorum Philosoph. Londinensium anni 1666 pag. 107.*

OBSERVATIO XCII.

Apoplexia Ischuriam sequuta, ob vitium renum calculis obsessorum, serum non excipientium.

§. I. **M** Atrona post sanguinis & materiæ purulentæ cum membranis mic- tum, urinæ suppressionem per 14. dies passa, Apoplectica interibat. Illi Ren dexter omnino defuerat; Alter materia sabulosa &

calculis undique oppletus. *Vide lib. 3. Tit. de urinis non natural.*

§. 2. In cadavere muliebri ex Apoplexia defuncto visus ren dexter atrophia correptus cum calculo in pelvi finistri: *Vide lib. 3. Tit. de Ischuria.*

OBSERVATIO XCIII.

* *In sectis apoplecticorum cadaveribus, sanguis concretus in ventriculis cordis, & in vasis sanguineis Pulmonum repertus.*

C Arolus Fracassatus Medicus Pisanus, in Dissertatione de cerebro refert, jubente Sereniss. magno Duce Etruriæ, ut Apoplexiæ causa inquireretur, sectis cadaveribus eorum qui hoc morbo moriebantur, se invenisse *sanguinem concretum* in ventriculis cordis, & in vasis sanguineis Pulmonum, eo modo quo solet concrecere cum aquæ fortes in venas infunduntur: variis autem modis fiunt ejusmodi concretiones pro varia aquarum fortium natura & sanguinis constitutione: alias enim totus sanguis in unam molem coagulatur, alias in moleculas concrecit, quæ nullam habent inter se cohæsionem: Quocunque modo fiant illæ sanguinis concretiones, necesse est vasorum sanguineorum ramos

capillares obstrui, spiritus extinguui, & supra memorata accidentia excitari si in cerebro & pulmonibus sanguis concreascit: Hic advertere oportet quod notat idem *Fracassatus*, venas ad quas aquæ fortes infusæ pertingunt, disrumpi, quod accidit partim, vel quia aciditatis afflatu ita constringuntur, ut quem continent sanguinem ægre complectantur, qui forte primo aquarum fortium appulsu, & in ipso coagulationis principio in molem majorem expanditur: vel quia denegato transitu sanguini impellenti & impulso, debiliores factæ venæ scinduntur à copia qua distenduntur. *Franc. Bayle Tract. de Apoplexia cap. vij.*

Sanguinem concretum) Veram Apoplexiæ causam attigisse Hippocratem Vir Clarissimus Tractatu dicto demonstrat, ex pluribus ejusdem locis, 4. de Diæta Acut. & 2. de morbis, *stationem* scil. sanguinis, *Quia*, ait, *dum sanguis non movetur, fieri non potest ut non etiam corpus quiescat ac torpeat*: Est enim (inquit vir Clariss.) sanguis primum caloris naturalis susceptivum in corpore animalium, à quo solo, & cum quo vivificus ille calor in partes omnes diffunditur: Nec solum motu suo circulari sanguis singulas partes perluens illis calorem impertit, & alimenti materiam suppeditat, sed etiam spiritus aliosque succos, ad varia munia obeunda necessarios dispensat, unde fit ut sanguinis motus non possit penitus cohiberi quin functiones omnes

statim intercipientur. At causa *stationis*? Eam assignat Hippocr. illius *corruptionem*, unde, inquit, *corrupto sanguine & spiritibus non potentibus naturales in ipso vias permeare perfrigerationes fiunt ex statione, vocis interceptio &c.* Per corruptionem autem intelligit Hippocr. illius mutationem, qua vel ipsi spiritus fiunt torpidiores, vel sanguinis particulæ magis quam antea inter se connexæ ac cohærentes spirituum motionibus obsistunt, coarctatisque poris iisdem viam præcludunt, unde fit ut sanguinis particulæ nec à jam genitis spiritibus in solitos concitentur motus, nec ex sanguine novi suscitentur spiritus. Ex Hippocr. itaque impotentix ad motum in Apoplexia, causa est coagulatio sanguinis, qua fit ut sanguis restagnet in vasis, illorum exilia oscula facile nequeat permeare, paucosque, ac tandem nullos ad functiones animales obeundas spiritus cerebro largiatur: Causam autem quæ sanguinis subitam coagulationem efficere potest, tradit Hippocr. 4. de diætâ acut. *Atram bilem, cum dolores præcesserint*, inquit, *atræ bilis, & acrium fluxionum affluxus fiunt*, Et paulo post, *unde corrupto sanguine, & spiritibus non potentibus naturales in ipso vias permeare, perfrigerationes fiunt ex statione &c.* Idem tradit 2. de morbis 61. Non modo autem ex symptomatis Apoplecticorum deducit Apopl. causam esse humorem melancholicum, aut atrabilarium subito commotum, coagulantem sanguinem cui commiscetur, ut coagulum in caseum cogit lac, in quo dissolvitur; Sed etiam ex eodem humore, cum à debita mediocritate deficit, futuram apopl. denuntiat: Sic aph. 56. 6. *in morbis atrabilaris periculosi decubitus, aut apoplexiam corporis, aut &c. significant.* Et aph.

40. 7. *Si lingua derepente incontinens fiat, aut pars aliqua corporis apoplectica, signum est melancholicum.* Et in coacis, *Sideratis si hæmorrhoides accidunt, utile est.* Evacuato scil. sanguine atrabilario. Et aphor. 57. 6. *Siderationes maxime fiunt ea ætate quæ est ab anno 40 ad 60.* Illa enim ætate melancholia obtinet dominatum, in qua necesse est sanguinem magis ad constitutionem melancholicam vergere quam reliquis: consumptis enim spiritibus, & partibus mollioribus sanguinis in prægressis ætatibus, sanguis fit biliosior fervidiorque ac acrior, tandemque ad acidum vergit, calore sensim deficiente, & acido olim volatili & maxime fugaci crassiore & magis fixo facto: Accidit enim sanguini fere idem quod vino, cujus calor in principio moderatus sensim effervescendo evadit intensior, sed qui spirituum dissipatione, aut facta quocumque modo illorum alteratione rursus remittit, cum vinum acorem contrahit: nec hic mutationum est terminus, acetum enim progressu temporis in liquorem aquosum & vappam mutatur: Summa vini senectus aut mors, est illa in vappam mutatio, in qua nil nisi cadaver vini superest, omnis virtutis & activitatis expers: verosimile est parem fieri mutationem in illorum sanguine qui solo senio contabescunt, aut è vita decedunt. Pro certo adeo & indubitato habebat Hippocr. solam melancholiam esse unicam proprie dictæ apoplexiæ causam, ut ex symptomatis apoplecticis inferat melancholiam, unde data occasio aphor. 40. 4. *Si subito lingua impotens fiat, aut pars aliqua corporis stupeat, signum est melancholicum:* Sola enim melancholia subito sanguinem & spiritus figendo potest subito ejusmodi affectiones producere: Demum epileptici facile in

apoplexiam incidunt, & observante *Martiano*, quæ paroxysmis epilepticis succedunt, eæ maxime lethales: At epilepsiæ vera causa, juxta *Hippocr.* est melancholia, & ex eodem melancholici fiunt facile Epileptici, & contra. Objicies, Apoplexiam & Epilepsiam eadem causa facere non potest, cum symptomata è diametro sint opposita. Respondeo idem in genere agens effectus diversos posse producere; 1. ratione virtutis majoris aut minoris. 2. ratione diversitatis patientis, 3. ratione aliorum quæ vel ad eundem effectum producendum concurrunt, vel ejusdem productionem impediunt, vel quacunque ratione in modo operandi agens determinant: Si humor melancholicus in capite commotus multus sit, & insigni polleat aciditate spectata quantitate & vi salis volatilis per sanguinem fusi; statim sanguinem figit, & impedita spirituum generatione, aut influxu eorum prohibito infert resolutionem; Si vero abundet quidem & sit acidior quam debeat esse secundum naturam, sed sales sanguinis volatiles sint quantitate & qualitate superiores; à quacunque causa humor melancholicus commoveatur in capite, vividior excitabitur effervescentia, quam consequetur vehementior spirituum impetus, & inordinatus eorum influxus in organa motus, & prout variæ contingent in hac effervescentia & humorum agitatione inordinationes, varia symptomata ægrum infestabunt: In utroque casu prout varii humores in sanguinis massam effunduntur, aut qui jam erant in ea contenti, in actum deducuntur, variæ apparent vicissitudines, ita ut aliquando apoplexia sit motibus convulsivis interpolata, & aliquando epilepticorum motus convulsivi in lethalem apoplexiam definant. *Videndum*

dum porro utrum melancholia possit pathognomonica Apoplexiæ symptomata producere? Præcipua melancholiæ qualitas, à qua potissimum ipsius activitas dependet, est aciditas, vi cujus, quando est modica, moderatam sanguini consistentiam largitur, immodicam vero, quando copia excedit, & aucta aciditate facta est acrior, maxime si conjunctam habeat austeritatem, aut acerbitatem, tunc enim vim insignem habet figendi sanguinem: Testatur enim experientia sanguinem affuso acido non modo extra vasa facilius concreescere, & quod ab ipso secretum est serum instar aquæ liquidum & limpidum affusione acidi pari modo coagulari, sed etiam intra vasa si acidi liquores infundantur, easdem excitari coagulationes. Cum itaque acida vim illam obtineant, manifestum est melancholiam, in aliqua parte collectam, & factam acidiores, si inde dimoveatur, & in massam sanguinis confluat, posse in illo coagulationem excitare, spirituum motum sufflaminare, eorumque generationem prohibere: Si illa melancholiæ acidioris collectio, & in sanguinem effusio, contingat in cerebro, necesse est in illo spirituum generationem & influxum minui aut omnino prohiberi, prout major aut minor fuerit humoris multitudo, major aut minor ejusdem aciditas aut austeritas: Ut autem modus quo illa collectio & effusio melancholiæ fieri potest in cerebro, aliquatenus, & quantum rei natura patitur, explicetur, animadvertendum cinereum cerebri corticem esse corpus glandulis minutissimis compactum, quæ ad id munus sunt destinatæ, ut è sanguine ad ipsas per arterias delato spiritus animales eliciant transfundantque in nervorum fibras, cujus rei certissima deducitur con-

jectura ex contextu fibrarum nervearum quæ ad ejusmodi glandulas desinunt; certissimum enim est spiritus influere in nervos per eorum extrema, & ex ea parte deduci in cujus substantiam sanguis copiosior affunditur, quæque apta est spiritus à sanguine separare, quod munus denegari non potest cerebri cortici, cum in toto reliquo corpore glandulæ sint destinatæ ad varios succos è sanguine separandos, prout varii sunt usus partium in quas ejusmodi succi deferuntur: Cum itaque munus cerebri sit inservire functionibus animalibus per spiritus animales, eos à memoratis glandulis corticis accipit, nec enim illos potest aliunde excipere, ut jam demonstratum est. Certius nihil est quam corpora glandulosa esse maxime apta ut in ipsis variorum humorum collectiones & corruptiones fiant; id enim manifeste deducitur ex vasorum in ipsis multitudine, exilitate, & complicatione, quibus omnibus fit, ut qui per illa vasa transcolantur humores in ipsis facile hæreant, & mora diuturna, pro varia partis natura, aut acquisititia dispositione, labem multiplicem contrahant, acelcant, concrecant, putrescant &c. Frequentes glandularum tumores adhuc à posteriori illud manifestum faciunt apud eos qui glandularum structuram ignorant: Si itaque cerebri glandulæ succi melancholici aciditate semel fuerint imbutæ, ipsis idem accidit quod vasis in quibus asservatum fuit acetum, quibus quodcunque infunditur acefcit: similiter qui in illis glandulis retinetur humor temporis progressu fit acidior ac tandem vel ob quantitatem exundans, vel insigni acrimonia sibi viam faciens, vel sanguinis agitatione, aut capitis concussione, aut aliter inde excussus, cum sanguini affunditur, ipsum

coagulat ac figit, stationem ipsius inducit, ut ait Hippocrates, ac tandem resolutionem corporis: fieri enim non potest, ait Hippocrates, cum sanguis non movetur, ut corpus non quiescat ac torpeat: Cum itaque acidior melancholia in capite in sanguinem influxerit, eos affectus necessario producit majores, minores, pro illius quantitate & aciditatis intensione *Idem*.

Sanguinem concretum in ventriculis cordis, & in vasis sanguineis pulmonum) sed quo fluet semel è suis sedibus dejecta melancholia? Per vias proculdubio consuetas, venas scilicet jugulares deferetur ad cor & pulmones, ibique similes efficiet sanguinis coagulationes, quibus variæ in vasis pulmonum sanguineis obstructiones fiant? Ex illis obstructionibus sequentur eorundem vasorum, saltem arteriarum oppletio ac distensio, & bronchiorum compressio ac angustia, ut aëris sufficiens quantitas nequeat inspirari, nisi magna fiat & cum magno conatu thoracis dilatatio. Difficiliore reddito sanguinis per pulmones transitu, is tardius fluit qui è jugularibus descendit, eas distendit, ac tandem ibi concrefcit: In ipsis etiam cordis ventriculis concretiones fiunt, & si sanguinis transitus omnino intercipiatur, vehementiore ejus impulsu aliquando vasa ruptur, ut in apoplecticis aliquando accidit.

Hinc patet quam bene Hippocrates ex abolitione functionum animalium, respiratione difficili, & ex venarum jugularium intumescencia, quæ observaverat in apoplecticis, pronuntiavit hunc morbum excitari cum bilis atra in capite commota fluxerit in eam partem in qua plurimæ sunt venæ, in collum, inquam, & pectus, &c. In forti autem apoplexia Respiratio fit cum vehementi conatu & magna thoracis dilatatione,

ægri enim inspirando totum thoracem tanta vi dilatant, ut scapulas elevent & necesse sit eos erigere ut melius spirent: Quod ad Respirationis necessitatem, eam nullam esse videri posset iis qui solum respirationis usum statuunt solam sanguinis refrigerationem, sed aliæ irritationis ad respirationem causæ hic possent assignari; unam aut alteram afferam, Pulmonum repletionem, tensionis & gravitatis sensum, quibus irritantur apoplectici ad respirationem, ea enim facilius redditur sanguinis transitus per pulmones ob mutatum vasorum situm, quo fit ut sanguis è dextro cordis ventriculo in pulmones, & e pulmonibus in sinistrum cordis ventriculum facilius exoneretur; quare in abolitione universalium functionum animalium conservatur sensus & motus partium respirationi inservientium: Ex dictis patet vitia respirationis, & magnitudinem læsionis in functionibus animalibus, designare an melancholia magis suas vires exerat in cerebro an in pulmone: Si enim universalis adsit resolutio, cum levi difficultate respirandi, indicatur cerebrum præcipue affici, nisi facultatis animalis abolitio se extendat ad thoracem, quod pulsus debilitas aliæque symptomata designabunt: Si vero magnus adsit stertor: significatur majorem in pulmonibus fieri sanguinis coagulationem quam in cerebro. *Idem.*

Solet concrefcere cum aquas fortes &c. Ideo quibusdam placet eximium illud arcanum, cujus ope Dom. Bil-animalis alicujus dissectionem, citrave guttæ sanguinis effusionem instituit, pendere à simili quapiam re infusa.

Aciditatis afflatu). Non tantum an humor melancholicus sit acidus, sed an revera detur talis in hepate genitus, à liene allectus

&c. incumbit probandum, *Vide scholia ad observ. 34.*

OBSERVATIO XCIV.

Apoplexia in qua sanguinis extravasatio visa est.

IUvenis temulentus, ictus vehementer in pectore, concidit repente attonitus, in terram, ceu fulmine consternatus, cum spiritu gravi, vomitu frequenti, voce suppressa, & spuma tam confertim ex ore emanante, ut intra paucas horas amitteret vitæ usuram.

Cujus inopinati eventus causa fuit, partim evidens calvariae rima, à casu exorta: partim verò frequens sanguis, effusus ubertim, cum suprâ, tum infra cerebri membranas. Sed pulmo habebat plurimas lividas maculas, adscribendas fortè, vel repentinae suffocationi; vel nicotianæ crebrius adsumptæ: qua planta dicebatur hic juvenis plus nimio fuisse delectatus.

Ad suffocationem quidem maculas hasce referre, suadebat, cum spumæ, tum livoris natura. Spuma quippe (juxta elegantissimum Actuarium) est spiritus, & humorum mixtio. Fitque in morbo attonito; vel ex destillante capitis pituita, per aërem rarefacta: vel ex spirituoso, oppressi

pressi pulmonis, vapore. Priorem spumam planè innoxiam declarat quottidianus spumosaë epilepsiaë reditus. Sed alterum lethalem, repentina apoplecticorum mors: orta proculdubio ex adempto spiritu; sine quo, ne momentum quidem subsistit homo. Cujus spumæ periculum propterea propositurus Cornelius Celsus, subjungit satis scitè: Neque is ad vitam redit, qui ex suspendio spumante ore detractus est. Quippe hanc spumam non producit pulmo, nisi summè laborans: sive à resolutione humidi, sibi, cordique insiti: sive à spiritibus, ob retentos vapores, impeditamque respirationem, adeò effervescentibus, ut in extremo dissolutionis metu sit calidum innatum. Quam luctam cùm designet hæc spuma; quid mirum eam utique prælagire ineluctabilem mortem? Inducitur enim post illam partibus obsessis, loco vividi caloris, obscurus ac luridus livor. Non secus ac à solis occasu tenebræ; & à flammæ suffocatione carbonis nigredo. Livor enim sequitur vel extinctionem; vel interceptionem spiritûs, ac caloris vitalis. Ac proinde non temerè Hippocrates, in Coacis, aph. 72.

Τὰ Πιλιδνὰ γινόμενα, ἐν πυρετῷ, σύντομον θανάτου σημαίνει.

Livida evenientia, in febre, brevem mortem significant.

Po-

Potuit itaque hæc repentina suffocatio, has quidem produxisse maculas: sed rariùs cùm occurrant in eorum pulmonibus, quos occidit morbus attonitus: & contra frequentius, in illis quibus Nicotiana fuit in delitiis. Non inconsultum fortassis erit, excutere hîc naturam illius fumi: qui aëri permixtus, & ore attractus, tam bene facit ad multorum palatum, ut eum præferant omnibus epulis; modò non & ipsi sanitati: quâ tamen humano generi nihil utilius.

Extra omnem itaque controversiæ aleam est, Nicotianam potui datam, tantùm adversari ventriculo, ac intestinis: quantum prodest humido, ac frigido cerebro. Sed dubitatur, utrum fumus ipsius offendat pulmones? calida quippe est planta; imò acris ac vellicans: sive natura, sive arte. Ex pulvere videlicet euphorbii, pyrethri, piperis, aliorumve acrium aromaticum, lucri causa, à fraudulentis, ac infidis mercatoribus, clanculùm, contortis ipsius foliis, insperfo. Quorum omnium vapore, verisimile est, non minùs offendi pulmones, quàm à raphani agrestis, ac piperis tritura, cerebrum sternutans.

Immodicus namque calor, ut exhaurit humidum radicale; sic obscurat nebulosus ipsius fumus, non parum, illustrem nostræ

nostræ vitæ spiritum: imò suffocat tam efficaciter calidum innatum, ut instar tabidorum (qui ex sententia Galeni, à siccitate consumuntur) planè extenuentur, cum tussi perenni, & infatigabili spiritûs difficultate. Quæ duo arguunt inextricabile, oppressi pulmonis vitium.

A quo equidem plurimos, qui dies, ac noctes cum hac Helena transegerant, vidi pessundatos. Moderata certè uti nullibi, sic neque hîc culpantur. Sed modum in hoc fumo si excesseris, defatigaberis à tussi, vitiabitur pulmo, emarcescet animus, & tandem consumetur corpus universum, vel lentè, si fueris integer, ac valens: vel celeriter, si quid vitii alibi sit in visceribus. Sicuti videre fuit in hoc ægro. Quem eò, proculdubio, citiùs strangulavit morbus attonitus; quo minùs potuerit reluctari, & spiritum ab interitu vindicare, exsuccus, ac maculosus pulmo. *Nicol. Tulp. Observ. Med. lib. I cap. 6.*

OBSERVATIO XCV.

*Mors subita ex ictu, uti conjectura tulit,
Epileptico, seu ex Apoplexia in qua
sanguis concretus, serum effusum
&c. in cerebro reperta.*

Nicolaus Schultheis Vir annor. 33. uxoratus, robustus, sanguineus, à prima pueritia convulsionibus vexatus, & ex hinc in latus sinistrum claudicans, d. Solis, qui erat 14. Martii, An. 1680. sub meridiem prata sua visurus exspatiavit & ampliùs non rediit; Inde quæsierunt ipsum consanguinei adusque decimam noctis, eadem die, & manè insequenti, sed incassum: Jacob Felgenhauer vicinus, quum eodem mane in prata sua se conferre vellet, fortè fortuna hætenus desideratum invenit, sed humi prostratum prope ponticulum, sub quo parvulus quidam decurrebat rivus, aqua ferè tum vacuus, capite in aquam immerso, magis tamen ad sinistram partem inclinante, ventre prono, pedibusque in altum sublatis, manu dextra sub ventre posita, & sinistra virgultum arctissimè tenente: Pone nares guttæ sanguinis aliquot conspiciebantur: Incertus quum spargeretur rumor, cui tamen fidem adeò facilem adhibere minus erat consultum,

tum, Magistratus Ampliff. iussit in mortis causam diligentius inquirere viros ad ejusmodi munia obeunda constitutos, quibus rogati, operam quam potuimus mutuam præstitimus. Mortuo foras elato, omnia probe sub examen fuere vocata, nulla tamen comparuerunt contusionis, vel ictus, vel vulnerum signa: nulla faciei tumiditas, nisi quòd labia tantillum intumuisse & livescere cum ipsa videbantur: striæ quoque sanguineæ, secundum dorsi spinam hujusque latera, multifariam dispersæ micabant: Operæ pretium hinc duximus, externis hisce vestigatis, in internam mortis tam repentinæ, si quæ forsan adestet, causam inquirere, quam in cerebro nos deprehensuros, primùm augurati fuimus: Cranio ergo remoto, sanguinis grumosi portio aliqua statim deprehensa fuit, cum glandulis juxta corpus falcatum minutis, seminis milii instar albicantibus, & inter ipsam duram matrem protuberantibus: Vasa sanguifera eleganter erant conspicua, turgida, livida, cortice cerebri gangrænati vel inflammati nihil exhibente, nisi quod flacciditatem qualemcunque conceperat: Ventriculi cerebri anteriores ampli satis, ichore copioso fuerunt referti: Compressione dictorum ventriculorum facta, ex tertio similis ichor uber-

uberrime emanavit: Circa occiput sanguinis grumosi portio idonea pariter hæsit: Et hisce sectioni finis fuit impositus, quamvis ut ad thoracis interanea lustranda pergerent, diligenter simus hortati, quò de suffocatione, quam sublecutam fuisse, non male suspicabamur, adhuc certiora indicia haurire possimus.

Timemus omnia, non modo quæ reprehendi palam, sed etiam quæ obscure cogitari possunt, rumore, fabulam, fictam, falsam perhorrescimus. Verba sunt Tullii Orat. pro T. A. Milone: Est sanè rumore falso nihil pejus, nihil cui vulgus fidem facilius adhibet, inprimis ubi specie veri vestitus accedit: Medici certè, si alibi, *πρόνοια* non vulgaris heic requiritur, qua iudicium suspendat tantisper, de casibus subitò evenientibus, funestis præprimis, qui malos interpretes præ aliis nanciscuntur, dum in rem præsentem ire liceat: Grave certè est, & memoratu longè dignissimum Hippocratis ad Medicos præceptum I. *περί δύσχημοσύνης* par. 2. *ἴδοι δὲ τις καὶ ἐπ' ἐσθῆτι, καὶ τῇσιν ἄλλοις περιγραφῆσι. κλῶ γὰρ ἔωσιν ὑπερφηφάνως κεκοσμημένοι πολὺ μᾶλλον φουκτέοι τοῖσι θεωμένοις ἐῖσι. τλὴν ὃ ἐναντικλῶ χρεῖῶδες σκοπέειν οἷς ἔδιδρακλὴ κατασχολῇ, ἔδὲ θεωρηγίη: ἐκ τε γὰρ θεωρολῆς καὶ τῆς ἐν ταύτῃ δύσχημοσύνης, καὶ ἀφελείας, ἔπρὸς θεωρηγίῳ πεφυκύνῃ, ἀλλὰ μᾶλλον πρὸς εὐδοξίῳ τότε σήνῃ, καὶ τὸ ἐν τῷ πρὸς ἐπαυτὸς Δρακείῳ οἷτε ἐκάστω σχήματι, τοιῦτοι, ἀδιάχυτοι, ἀπερίεργοι, πικροὶ πρὸς τὰς συναντησίας εὐθετοὶ πρὸς τὰς ἀπεκρίσιας, χαλεποὶ πρὸς τὰς ἀντιπρωσίας, πρὸς τὰς ὁμοιότητας εὐσοχοὶ καὶ ὁμιλητικοὶ, εὐκρητοὶ πρὸς ἀπαύλιας, πρὸς τὰ ἀναστασίας σιγητικοὶ, πρὸς τὰς ἀπα-*

σιγήσιας ἐνδυμηματικοὶ καὶ καρτετικοὶ; πρὸς τὴν καὶ
 εὐδοκίαν καὶ λημματικοὶ &c. cui utinam aures præbe-
 rent quicunque Artis Asclepiadeæ Magistri salu-
 tari cupiunt: alia verò longè quorundam regula
 est, qui seposita authoritate & gravitate Medici,
 apud sequiorem sexum Rhetoricam exercere
 amant, & Lenonum adinstar, affectata garruli-
 tate, ejus gratiam aucupantur, fabellis magis &
 amatoriiis discursibus morbis medelam quam arte
 parare satagentes; qui splendido vestitu & thra-
 sonico incessu, ecquid præclari hominis nomi-
 nisve subfit, vulgò persuadere nituntur, & ἰατρῶν
 φιλοσόφων ἰσοθέων consortio prorsus indigni, turpis
 lucelli causa, quod cum Imperatore illo ex lo-
 tio sibi parant, Agyrtarum & Charlatanorum,
 quos à sacris Apollineis graviter arcebant Vete-
 res, conventiculis adesse imò præesse malunt,
 rati satis gloriæ sibi accidere à malè sana plebe,
 si crumenæ multi auri: quo ipso etiam Pseudo-
 Medicos se esse, talesque de quibus Cous abini-
 tio c. §. profitentur, imò juris jurandi, quod
 præstari à veris Medicinæ Didascalis ubique so-
 let, parum tenaces: In vestitu sanè uti τὸ πρέπον
 omnino observandum est, ita in reliqua vita cæ-
 teræ, quarum modò Hipocrates meminit virtu-
 tes, inprimis verò τὸ καρτερικὸν πρὸς τὰς ἀπισιγησίας:
 Valet heic illud Poëtæ:

*Eximia est virtus præstare silentia rebus,
 E contra gravis est culpa tacenda loqui.*

Præcipuè autem in casu ancipiti, lingua men-
 tem ne præcurrat, addimus, & cultrum vel fer-
 rum, quo causæ sæpenumero deteguntur, qua-
 rum ignari præceps ac ineptum judiciū pluri-
 mi sæpiusculè ferunt: Viri de quo præsens histo-
 ria,

ria, amissio ac subita mors, multorum animos primum perculit, ansamque dedit pessima suspi-
candi; enim verò violentas manus ipsi illatas
fuisse plures crediderunt, fuitque hic ipse rumor
in causa, quare accuratius in singula inquiri
Proceres Amplissimi voluerint: Jam autem, ut
opinamur, cum nec ictus, nec contusionis ab
externo violento vestigia repererimus, in ean-
dem alii nobiscum descendunt sententiam, in
ipsis cerebri interioribus latuisse, quod genus
nervosum vellicare, spiritibusque in motu suo
nubeculam graviolem offundendo causa fuit,
cur machina confestim corrueret, cuius destruc-
tionem haud dubiè adjuvare potuit casus ipse,
quo ventre prono caput aquæ & arenæ immer-
gebatur, unde impedito magis musculorum tho-
racis motu, pabulique aërei libero comneatu
& expansione sanguis circa præcordia facilius
substitit, miserque suffocari necesse habuit, de
quo equidem labia faciesque livescentia, qualem
etiam spinæ dorsi latera ostenderunt, testimo-
nium perhibent, evidentius multò istud confir-
maturis, partibus pneumonicis, si ipsorum exa-
men aggredi licuisset. Virgultum verò, quod
alteri manui inclusum tenuit, insultum epilep-
ticum confirmat, cui ichor copiosus in ventri-
culis & circa medullam oblongatam stagnans,
sanguis item grumosus circa cerebellum hærens
ansam commodum suppeditavit: dicere verò
heic certi quid non audemus de cerebri flaccidi-
tate, an sensum istam acquisiverit, quod confir-
mare possent motus convulsivi, quibus in infan-
tia infestatus fuit, & quorum paroxysmos, le-
viores saltem, reliquo ætatis tractu, prorsus
non elusit, ceu domestici severius rogati diffiteri
omnino non potuerunt; an verò ab ultima de-

mum invasione morteque subsequente, illa fibris
 accesserit? Quicquid sit, confirmant ista nostram
 quam de Apoplexiæ causis superius admisimus
 sententiam, probatque sanguinis grumescens
 portio idonea, ichore uberrimo adjuncto, apo-
 plexiam rarò à nuda feri effusione & inundatio-
 ne oriri, utrumque verò sive obstruendo: sive
 comprimendo subitò, sive utroque modo agen-
 do malum hoc funestum inducere: Illustria sunt,
 quorum Celeberr. Platerus tum Pract. 1. 1. c. 2.
 tum 1. 1. Observat. scripta reliquit: *Quando inquit,*
pituita ventriculos cerebri subitò adimplet [ceum in
 nostro exemplo] *non obstruendo, cum spiritus a-*
animalis non in ipsis, sed in cerebri substantia undi-
que & nervis suam sedem habeat, nec per ventri-
culos transeat, sed eodem modo cerebri basin gra-
vando, apoplexiam quoque inducere potest: Quæ
tamen si humor ex illis descendens, nervorum
ductum sequatur, in paralyin potest desinere:
Hæc omnia sic se habere, in Caro & Apoplexia
mortuis, ex eo quod copiosus hic humor per ostium
illis effluerit, aliquando deprehendimus, ex sec-
tionem quoque diligenti, aperta crassa cerebri mem-
brana, in quibusdam copiosum humorem mox pro-
siliens, per capitis regionem ad thoracem usque
descendisse: Ipsam adeò cerebri substantiam in an-
quadam diffluxisse observavimus Monspeffuli, quæ
subitò apoplexia tacta expiravit: hujus calvariam
cum aperiremus, cerebrum illinc in meninge crassa,
hinc inde fluctuare deprehendimus: Quod & dis-
secta aperta quæ dicta dura matre instar liquoris
alicujus spissioris & albi pulvem referentis, per
faciem universam difflebat: Equidem resistunt
cerebri cortex, medullæque fibræ, externis feri
insultibus pro viribus, neque à quacunque ejus
exundatione ilicò franguntur: hoste verò identi-
 dem

dem ingruente, sibi que diutiùs sedem heic figente, tandem collabascere necesse habent, sive teneriores adhuc, ut in infantibus hydrocephalo graviore quandoque affectis, sive muneri suo diutius adhibitæ insuper juncta seri copix annorum serie, uti in senibus interdum accidere Anatomici nobiscum notarunt: Meminit quoque Excell. Carol. Sponius mortis subitanæ ex duplici causa *δολοφονέσθαι*, quarum alteram, ichor idem cerebrum, uno quod ajunt impetu, irrigans constituit, cujus historiam cum aliis à beatæ memoriæ Viro nobis communicatis exhibebimus: Prælustre verò est exemplum, & quod modo dicta apprimè confirmat, cujus copiam pro sua in nos benevolentia haud ita pridem nobis fecit Excellentiss. D. Jo. Conrad. Brunnerus, Med. D. & in Illustr. Academ. Heidelbergensi Prof. Anatom. Celeberrimus, Fautor & Amicus honoratissimus: Historiam integram, rariora utpote plura recludentem, operæ pretium faciemus heic apponere, *Mulier nostras, inquit aliùs temperamenti sanguinei, ante quinquennium gravem passa est insultum apoplecticum, cum annum ætatis 35. vix excessisset, ac octodecim liberos, & primo quidem puerperio trinos enixa fuisset: accitus statim venam secari, vesicatoria variis corporis partibus admoveri, frictions administrari, & quæcunque spirituum in organa sensuum influxum juvare poterant, sedulò perfici curavi. Die tandem septimo, purgante nervos quoque splanchnicos vellicavi &c. quibus tantum profeci, ut quæ ante loquelam amiserat, pedem brachiumque dextrum movere non poterat, balbutire & artus movere utcunque valuerit: tandem benedicente Deo integram horum usuram recuperavit, & ad munia sua rediit materfamilias:*

lias: superfuit tamen, ceu in his casibus accidere solet, nonnulla infirmitas lateris affecti. In actionibus principibus, nulla menda apparuit, præterquam quod tenax ante & ad rem attenta, negligenter nunc eandem habuerit. Ipsi vindemiis nuperis fortissima apoplexia tacta, subito cuncta fuit. Caput cultro meo cessit: miratus fuisses oppidò mecum, siquidem præsens fuisses, crus medullosum dextrum, quod minùs floridum ac firmitus quàm sinistrum, sed flaccidum, obscuri coloris & emarcidum apparuit, ac si atrophia laborasset. In ipsa ejusdem hemisphærii substantia tres inveni cavernulas, fuscas & subflavas, in quarum una alterave nonnihil humoris stagnavit, ceu glutine quodam iterum coadunatas: Hæc vitia jam olim facta & prædictorum symptomatum causam extitisse, facile colligere potui, & insigni cum voluptate contemplatus fui: Recentia autem sequentia notavi: uterque ventriculus, imò omnes cerebri cavitates, sanguine fluido, diluto factæ & opilatæ fuerunt: dexter ventriculus rimam ostendit, loco inter thalamum nervi optici, & corpus striatum intermedio, per quam sanguis in cerebri cavum effusus fuit: in ipso verò cerebri meditullio ejusdem lateris, amplum hiatus vi sanguinis impetuosè erumpentis factum, & in hoc sanguinem concretum ovi gallinacei magnitudine inveni: substantia cerebri circum circa latera, usque ad bifurcationem nervorum opticorum fissa ac disrupta fuit: Alibi arteriolas in medullari cerebri substantia ægritudine affectas conspexi, quæ tantam sanguinis vim fudisse mihi visæ fuerunt: sed & ad hoc, Vir sagacissime, attendi velim, si quæ nascatur occasio: nimirum aliquoties jam in lævibus aliàs ac perpolitis ventriculorum superficiebus, si morbo laborarit cerebrum,

observavi papillulas capitellorum acicularum magnitudine, instar perorum cutis frigore constrictorum prominulas, quas quidem laticis in cerebro scaturientis ductulos, quis tantum non hariolaretur, &c. Joh. Jacob. Harderus in Observat. Anatomico-Præctis quibus titulus Apiarium.

OBSERVATIO XCVI.

Ex ictu, casu, capitis contusio, cerebri abscessu, apoplexia &c.

ANno 1674. Mens. Januar. Molitor quidam transrhenanus, ubi prius Baccho aliquantum indulserat, de scalis ex alto decidit, domumque vectus, mox instar statuæ sine sensu & motu jacuit, vomuit enormiter & sanguinis per aures eruptionem passus est, vulnere in cranio nullo apparente, die postero hinc emigravit. Cranio ex artis præscripto remoto, sanguis inter ipsum & duram matrem copiosè in occipite extravasatus deprehendebatur, & tota sui mole cerebellum versus & spinalem medullam procumbere.

An. 1682. Mens. Novembr. è vivis excessit Artocreatarius quidam, qui aliquot septimanis ante, sclopeto inverso à maleferiato homine ictus, vulnus funestum incurrit, in anteriore & superiore cranii parte, quod ad tabulam secundam usque &

ultra pergebat : Biduo circiter ante obitum, dextri lateris, quod vulnere oppositum erat, paralyfi affectus fuit ; quam dein mors ipsa excepit : Quùm cranium removerent, hujus frustulum duræ matri infixum reppererunt, verùm citra ulteriores in cortice noxas : ad ventriculos autem progredientibus materia viridis, glutinosa multa, formati abscessus soboles, obviam illicò venit, ceu isthoc benevolè nobiscum communicavit Excellentiss. D. D. *Burcardus* Ἀυτοῦλης.

Appositè Hippoc. I. 2. προῤῥητ. XXII. τῶν ὃ ἐν κεφαλῇ τραυμάτων, θανατωδίστατος μὲν τὰ ἐς τὴν ἐγκέφαλον, οἷς καὶ προγέγραπται, δευτὰ ὃ καὶ τὰ τοιαῦτα πάντα ὁσέον ψιλὸν μέγαν ὁσέον ἐμποφλασμένον, ὁσέον κατεργαγός, ταῦτα ὃ πάντα θεινότερα γίνεται καὶ κατὰ ῥαφήν τε ὄντα, καὶ ἐν τῶν χωρίων αἰεὶ ἐν τοῖσιν ἀνωτάτως τῆς κεφαλῆς. πυνθανέσθαι ὃ χρὴ ἐπὶ πᾶσι τοῖσιν ἰξίοις λόγῳ τρώμασιν, ὡς ἔτι νεοτρωτοὶ αἱ πληγαὶ ἔωσιν, ἢ κατεπεσεν ἄνθρωπος, ἢ εἰ ἐκαράθη. ἄριστον γὰρ εἶναι, μήτε πυρετῆναι τὸ ἔλκεθ' ἐχούσα ἐν τῇ κεφαλῇ, μήθ' αἷμα ἐπαρρῶσαι αὐτῷ, μήτε φλεγμονὴν μηδ' ἅμα μηδερμίαν δαλῶν ἐπιγενέσθαι. Ex capitis vulneribus lethaliissima sunt, quæ ad cerebrum pertingunt, velut etiam antea scriptum est. Gravia sunt & hujusmodi omnia, os nudum magnum, os infractum, os diffractum &c. Caterùm in omnibus memorabilibus vulneribus interrogare oportet, an adhuc recentes sint plagæ; an conciderit homo, an sopore altiore prehensus fuerit. Optimum quidem est, neque febricitare eum qui ulcus habet in capite, neque sangu-

guinem ipsi erupisse, neque inflammationem, aut ullum aliquem dolorem accessisse. Non opus est prolixius in causas horum inquirere, cerebri teneram structuram, vasorumque per illud difforum multitudinem perspectam habenti, cum fibrarum nervearum cohorte, quibus læsis, ab irruentis humoris impetu, cohibito spiritus roriferi influxu, damnum ingens utique suboritur, quale sensit uterque supra memoratorum, alter quidem derepente, alter verò plusculis diebus post, adeò, ut aliquando benè habere & ad pristinam incolumitatem chirurgis rediturus videretur: uterque apoplecticus tandem decessit, à sanguine extravasato, cujus impetum in illo promovit casus terribilis, & in isto ictus sclopeti ope inflictus: Enim verò in confesso est sanguinem è valis suis gravius profilientem, cerebri substantiam sine noxa vix permeare, cum & medullares ductus facilè inde comprimantur, unde nubicula mox inducitur, & ab ejusdem acrimonia, quæ ubi moram necit, gravior evadit, fibrillæ nerveæ facillimè irritentur, atque hinc motibus epilepticis via sternatur: Meminit equidem Celeberr. Wepferus Exercit. d. loc. affect. in apoplex. Nobilis cujusdam Poloni, in quo citra apoplexiam aut aliam graviorum symptomatum colluviem, non solum intra cranium & duram matrem, sed & intra hanc & duram meningem, quin etiam in ipsam cerebri substantiam, innoxie effusus fuit, ast meritò inter rarissima talia ipso cum referimus: in molitore sanè vasa ita succussa fuere, ut osculis ipsorum protenus dehiscentibus, si non ruptis, sanguis impetuosè interiora occipitis petierit, ibidemque copia sua cerebellum & spinalem medullam compresserit; nec enim apoplexiam imminen-

654 OBSERVATIONES

tem casum produxisse arbitramur, cum sanus ante vixerit, nihilque incommodi in capite perpessus fuerit: Vini verò ingurgitationem, hinc prorsus non removemus, utpote quo sanguis primùm exæstuat, & vasa velociter cum aliqua distensione percurrit, unde erupturo viæ facilius aperiuntur & patulæ manent: in ebriosis autem huic ipsi fluxilitatem vitiosam, non rarò cum acredine inducit: Oscillorum dehiscientiam vehementem, comprobatur sanguinis ex auribus profluvium, non ex cavitate cranii per vias sive manifestas (quas tamen pauci hæcenus nòrunt) sive occultas, illuc delati, quoniam si tali exitu sanguis extra vasa profiliens potiri potuisset, omnibus actionibus animalibus confectim æger non fuisset defraudatus, utpote cum alias cranio perforato trepano, post casum vel ictum, levamen sanguine emanante percipere soleant, sed quod vascula intra aures eorumque canales, ex vehementi capitis, eaque iterata allisione disrupta fuerunt: Vomitus autem irritationi meningum, quam sanguis vel mora acrior redditus, peperit, jure adscribimus, ventriculi membrana nervea illis intimè compatiens: in artocreatario malum paulatim serpsit, quòd sanguis ictu profiliit quidem ex vasculo, sed vel mineri, vel quòd ilicò ruptum non est, unde gravia symptomata primùm suborta, cessante ulteriore sanguinis impetu, aliquando mitigabantur, dum gramescens & ferè omni suo numero collectus intra medullas interiores corticis subsistere, sensim putrescere & in abscessum transire cepit, tandemque copia & gravitate sui, fibrillas interiores s. medullares funiculos occupando, dextri præprimis lateris, eclipsin gravem induxit, ut moveri non potuerit, usque dum versus basin sese

fese effundendo, ceu materia purulenta in ventriculis horumque confinio reperta docuit, vita pariter ac motu miserum omnino orbavit: utrum vomuit nec ne, probè non recordamur, quamvis videri possit, dura meninge à cranii infixi frustulo titillata, vomitum abesse non posse; nunquam tamen pertinaciter vomuit, quòd interdum fibrillæ à spasmodica sui constrictione, in meningibus aliisvè his similibus quiescunt: ita biennium circiter est, à quo puerulus 6. circ. ann. cum circumcursitando per ædes nugaretur, ex improvìso in cellam satis profundam, de primo statim scalæ tramite cecidit, nullum ferè horum ampliùs attingens: accersiti Parentes cum misello attonitos offendimus, sanguine è nariibus effluente & vomitu qualicunque urgente: in capite gravioris contusionis nulla indicia, dolor verò per intervalla circa ventriculum infestabat, pulsus concitator naturali sed æqualis fuit, sitis nulla: venam idcirco tundere animus erat, sed reluctabantur Parentes, quòd juvenis esset maximè: quid periculi ex casu subsequi possit mox prædiximus, simulque ut ad sanguinis sive ex naribus, sive auribus eruptionem ut & vomitum attenderent iussimus: intereà quia ægrotus soporosi instar decumbebat, præscriptis decoct. vulnerar. & pulver. ex volatilibus, cum mixtura cochleat. propinanda, balsamo item serobiculo cordis illiniendo, capillos abradi curavimus & præmissa embrocatione ex ol. rosar. hyperic. & liq. C. C. succin. sacculo ex herbis nervinis in vino rubr. decoctis caput fovere: sub noctem autem pone aures vesicatoria applicuimus: Diebus inseqq. prima symptomata remiserant, puerque ad se rediit, conquestus tum de dolore circa perinæum, & mingendi difficultate:

te: urinas cùm inspiceremus, sanguinis grumosi tantillum in fundo notavimus; cui malo cùm tam externis ol. præcipuè amygd. dulc. & rosar. tum intern. emulsion. ex semin. card. bened. hyperic. aliisve cum aq. veron. & malv. parat. addit. ocul. cancr. succurrissemus, singula in laudabili statu versari Parentes arbitrabantur, unde nec ad medicamenta capienda, licèt sedulò hortaremur, impulerunt filiolum: ast paucis hinc elapsis diebus, in deterius labi, febrique quæ hætenus aberat, prehendi cepit, cum deliriis noctu primum, inde & interdiu magis magisque ingruentibus: Præscriptis medicamentis ex lege artis, quid funesti fœtus subesse suspicemur aperuimus, nec fefellit prognosis nostra, ingravuerunt enim vomitus & nausea, tandemque convulsivis motibus, tristi eheu adstantium spectaculo vitam finiit: In isto sanguinis ex vehementissimo casu è vasis in cerebrum prorupcionem contigisse (sectione enim ob muliercularum perfidiam prohibiti fuimus) cùm sopor qualiscunque, tum sanguinis è naribus profluvium, imprimis autem vomitus cruentus testari potuerunt, imò & grumuli urinis innatantes, quamvis enim musculorum abdominis cum suis tendinibus contusionem (utpote cùm super abdomen ceciderit) non inficiemur vomitum, & præprimis urinandi difficultatem fovere ac parere potuisse: hæc ipsa tamen excreta de succussione vasorum & vi illis illata testimonium perhibent, nec valdopere refragaremur, si quis vasi stomachico labem accidisse diceret, qua sanguinis tantillum dietim exstillârit, qui deinceps ibi putrescens motibus spasmodicis in ventriculo ansam præbuerit: modò sub finem cruenta rursum evomi vidissemus vel nigricantia: subsistimus ergo

go in fomite, quem cerebrum paulatim excepit, nervoso generi & inde toti corpusculo exitiosum, idque artis nostræ Cultoribus inculcatum cupimus, nusquam in capitis vulneribus securos nimium, Medicos Chirurgosvé esse debere, etiamsi appareant alcyonia. cum interea hostis ut plurimum exitium intus adaptet, quem ubi vires semel sumpsit, eliminare difficillimum est. Felicior hisce, Juvenis murarius, robustus, annorum circiter viginti, qui An. 1676. cum Parisiis versaremur, de tecto satis alto delapsus & hinc in nosodochium *la charité* dictum, vectus fuit. loquela aliquandiu destitutus, & neminem adstantium cognoscens, nihil comedens nec multum bibens, multum verò dormitans: V.S. celebrata ilicò in brachio dextro, eademque iterata, tandemque arteria pone aurem dextram tusa fuit feliciter, applicatis juxta capiti, cujus capillos ilicò abradebant, remediis necessariis, nulla contusione prorsus conspicua: in statu tali per quatrividuum ferè substitit, & quamvis primum adstantes intueri, oculisque circumvagari inciperet, nihil tamen loquebatur, sed instar trunci jacebat, cum pulsu valido & æquali, nullisque sanguinis extravasati indiciis usquam accidentibus: ut eleganter omnino Hippocrates fatetur sit l. 6. aphor. *ὁπόσοισιν ἂν σειῶν ὁ ἐγκέφαλος, τετέως ἀνάγκη ἀφώνως γενέσθαι παραχρῆμα*: Mirari tamen subit, mutos ejusmodi & attonitos fieri posse, citra gravius damnum, quod cerebrum accipiat: an dicendum tali in casu sanguinis nihil prorueret? solumque cerebrum succuti: at unde dormitant, loqui desistunt, & in sensibus motuque inertes sunt? idque non per unam alteramve horam, sed biduum, triduum, quatrividuum: quidni ergo ex arteriis paucioribus vel

levius

levius dehiscantibus, noxa quidem cerebro à sanguine suffundi dici possit; sed parciore copia qui hinc, imprimis ubi medicamentis suppetiæ tempestivè feruntur, ductus medullares, vel basin cerebri, pariter obruere & opprimere non valeat, sed cum aliqua sui parte discutiatur tum per oscula ductuum venosorum potissimum reforbeatur: Memoratu dignum est, quod ex Excellentiss. Thomæ Bartholini cent. 3 observ. Anat. refert laudatissimus Scafusientium Archiater Wepferus, de Juvene viginti circiter annorum, qui ab exploso sclopeto, velut fulmine ictus corruit, domumque sensu & motu privatus, delatus fuit, taliterque decubuit quindierum spatio: suspicio erat per nucham penetrasse pulverem urentem ad nervorum principium ob vocem interceptam & sensus omnes sublato, & propterea à Chirurgo perito vulnere convenientia remedio applicata fuere: exactis quinque diebus motus aliqua rediere indicia, ægerque os pro medicamento assumendo aperire, inde se erigere, fari, cœterasque actiones obire, paulatim cepit: quod autem cum Clariss. Observat. Authore non sentimus, à nuda scirrituum perturbatione gravia hæc symptomata pullulasse, vel hoc unicum efficit, quod cum natura sua spiritus agilis est, nec facilè subsistit, nisi causa intus hæreat, undulationem & influxum impediens, tum secretio ejus cum sanguine arterioso accedentis, isthoc dierum spatio impedita non fuerit; unde licet primi attoniti substitissent, recens tamen secreti influere in organa sensus motusve debuissent. *Idem ibidem.*

OBSERVATIO XCVII.

Apoplexia in qua cerebrum sero flavo inundatum.

Virgo cephalea immani afflictâ, inter medios cruciatus multum humoris flavî & tenuis naribus effluebat: suprema hieme, excretionē denegata, capite pejus habuit, in motus convulsivos cum stupore incidit, quæ ante tertium diem Apoplectica vitam deposuit.

Cerebro post mortem inspecto, humor flavus totam τῇ ἐγκεφάλῳ regionem latice flavo inundaverat.

Virgines & mulierculæ si juventutis tempore multa acetaria & acida ingurgitaverint, sæpe cum adoleverint, in immanes capitis dolores incidunt. Illa enim, ut crebro dixi, humores inspissant, adeo ut circulationi inepti sint: hinc obstructio, quæ in hac ægra cerebri regionem occupavit. Vascula lymphatica certè ruperunt; qui humor infundibulum pertransire nesciens, in cerebri cavitatibus stagnavit, adeò ut per nares exitum quæsiverit. Postea verò nimium crassescere incipiens, per nares exitus denegatus fuit: hinc intra cerebri mænia morari coactus, adeo corrosivus evasit, ut convulsiones pareret: cerebri fibris, hisce convulsionibus, ruptis, major lymphæ quantitas exprimi debuit, quæ cerebrum ita premit & obruit, ut apoplectica interierit. Apo-

plexia enim nihil aliud est quam cerebri paraly-
sis five ab obstructione intus facta, five à pressu-
ra rei cujusvis externæ. *Stephanus Blancardus in*
Anatomia Practica.

OBSERVATIO. XCVIII.

Apoplexia in qua Carotis dextra ossea &c.

BRuma sæviente, omnibusque nive ca-
nescentibus, Vir doctissimus atroci ca-
pitis dolore, juxta latus sinistrum vexaba-
tur; postea de doloribus abdominis quæstus,
apoplecticus lumina placida morte clausit.

Post Horam novissimam imo ventre dis-
secto, mesenterii glandula maxima, scir-
rhosa & exulcerata inventa est. Cranio ele-
vato, carotis dextra intra cranii mænia as-
cendens, prorsus ossea, & si dicere liceat,
petrosa fuit, cavitare vix permeabili. ar-
teria vertebralis dextra triplo major fuit,
quam ea oppositi lateris.

Arteriæ, cum primo ex obstructione paralyfi
laborent, cartilaginis formam induunt, & dein-
de osseæ redduntur, quod non rarò circa cor
contingit. fortasse ex dolore capitis atroci primo
convulsionibus obnoxia fuit, & ex convulsione
paralysis, & sic deinceps: tandem motu dilata-
tionis & contractionis deperdito, concrevit: eo-
dem fere modo ac arteriis & venæ umbilicali ac-
cidit, quæ post mortem cavitatem amittunt, &

ligamenti indolem acquirunt. mirum arteriam vertebralem dextram triplo majorem fuisse videtur, sed æger apoplecticus interiisset, si hæc non substituerat, quod carotis dextra adferre non potuerit; hinc sensim dilatata fuit.

Sed rogabit quis cur de sinistri capitis dolore quæstus fuit, cum dilatatio & concrefcentia à dextris erat? cui regero, quòd occlusa arteria carotide dextra, impetu vehementiori per sinistrum latus sanguis irrueret quam in dextrum, unde meatus & membranæ magis in hoc latere extendebantur quam in altero: postea vero eodem penu à vertebrali dextra prospecto, dolor sensim evanuit. Adhæc etiam, dolor primo forte totum *ἐγκέφαλον* occupavit, qui concrefcente arteria carotide in dextris desit, in sinistris vero perseveravit.

Obstructione cerebri postea laborans, apoplecticus interiit. Obstructionibus enim scatebat, nam cùm ad mesenterii glandulas perventum esset, ipsius glandula maxima scirrhusa & ulcerata fuit, quod sæpe pueris accidit, qui continuo fructibus horariis utuntur, unde chylus concrefcit & istas glandulas particulis caseosis obstruit. *Idem ibidem.*

OBSERVATIO XCIX.

Apoplexia post respirandi difficultatem, in qua splen putridus, pulmones lividi & purulenti, dexter cordis thalamus excoriatus, &c.

S Exagenaria admodum pinguis & deses, à quindecim annis difficultate spirandi

laboravit, quæ singulis diebus valde increbuit, idque potissimum cum gradus ascenderet. Postea ab aëre austrino & pluvioso corysam, genæ item dextræ, glandularumque intus contentarum inflammationem passa est. Mandibulæ ita coarctabantur, ut ægra non nisi potulenta quædam forbillaret. Ad tibiā sinistram sæpe Erysipelate affici solevit, quæ & quandoque exulcerabatur. Pulsus porro aderat inæqualis, & intermittens. Et quamvis genæ tumor detumuerat, mandibulæ nihilominus constrictæ manebant. Postea dexter oculus clausus apparuit, quod ex convulsione aut paralyfi factum; deinde Hemiplegia tacta, apoplectica interiit. Toto morbi decursu, perseverante dyspnæa tussis non adfuit, neque stertor, nisi duodecim horis ante obitum.

Præter splenem putridum, pulmones lividi, & lymphatico humore perfusi. Sinister pure multo & fætido refertus. Dexter cordis thalamus, intus non tantum excoriatus, sed & putridus & exulceratus, fibrisque carnosus, leviter tractando, in frustra secedentibus. Auricula dextra solito major, substantia carnosa, partim rubra, partim nigra, ad instar sanguinis concreti, quæ manibus ab invicem fricari non potuit, referta.

Sæpe asthmatici fiunt cachectici & hydropici. Recentis ulceris sanatio difficillima est, inveterati omnino impossibilis, nam ob pulmonum continuum motum, eorum substantia vasculosa magis laceratur, quàm sanatur. Sic ægra nostra longo tempore hac respirandi difficultate laborans, tandem cachectica facta est. Cachexia est succi vitiosi abundantia, qua ex ipso corporis habitu cognoscimus, hominem valedudinarium esse. Atque hinc multorum symptomatum fons & origo. Quia ei læsi pulmones sanati non sint, ideoque spirandi difficultas singulis diebus increbuit. Porro cum ascensu respiratio retardatur, se exinde pessimè habuit. Cælo quoque Austrino ac pluvioso, ob aëris crassitiem, minor sanguinis in pulmonibus accensio erat, unde suffocari videbatur: aëre enim sereno vividiores multo fumus quam nubiloso.

Ob motum salivæ in glandulis maxillari-
bus denegatum, maxillæ intumescentiæ,
quæ non raro gravedine laborantibus acci-
dit. Ex spasmo, & mandibularum coarctatio
& palpebrarum occlusio: imò ex cordis
convulsione pulsus inæqualis & inter-
mittens. Denique unica medullæ spinalis
parte obstructa, eodemque humore cere-
bro oblesso, primo in hemiplexiam, &
deinde in apoplexiam incidit.

Tussis perseverante morbo non adfuit: super hoc docet *Aphor.* 16. *Seet.* VII. à puris sputô tabes: quum vero sputum retentum fuerit, moriuntur. Ob virium imbecillitatem nempe & istarum partium paralyfin. Sed postea quidem rediit, ab humoris collecti copia, & paralyfi desinente: quæ viribus in totum deficientibus, obiit.

Non mirum, aperto cadavere, pulmones fuisse purulentos, & cor à færente pure intus erosum & exulceratum. Exinde enim sanguis evasit crassus, dextrum thalamum pervadere nequibat, hinc auriculæ distensio. Ab erosione fungosa quædam excrevit substantia, ut sæpe in ulceribus fit: cum enim fibræ læsæ non sistuntur medicamentis, immensum usque excrescunt, atque sic polypi generantur. *Idem ibidem.*

Nihil hic adfert Clar. Autor de Cerebri inspectione; verum quis non videt serum illud concrescibile quod in variis stagnavit visceribus, ac per salia, quibus scatet, in fluorem per moram longiorem evecta, acrimoniam intensiorem nactum, corrosivum quid induisse; unde non tantum obstructionibus creandis, sed etiam effusionibus faciendis aptum factum, postquam cerebri vasa opplevit, eadem facili negotio lacere potuit, sicque inundationes funestas parere; de quibus tamen per rescissionem non constitit: quia

quia cranium non est elevatum viscusque contentum inspectum.

O B S E R V A T I O C.

Polypo cordis laborans, apoplexia moritur.

OBtuso quidam ingenio, repentè apoplexia correptus vitæ usuram depōnit.

Cerebrum erat flaccidum. Meninges mucoso & valde tenaci humore perfusæ: imo ipse sinus tertius cum adhærentibus vasis istoc liquore turgebant. Ventriculi quoque eodem repleti.

In cordis sinistro thalamo polypus fuit ex viscida materia concretus.

Madebat etiam spinalis medulla liquore lymphatico.

Multum visciditatis hunc ægrum in sanguine habuisse videtur, quod ex cerebro per venas in cordis sinistrum ventriculum latum, columnis & fibris adhæsit, ac polypum retulit. Sic ab eadem causa cerebrum paralyti tactum in soporem apoplecticum incurrit, unde sæpe mors insequitur vel Paralysis. *Idem ibidem.*

*Historia morbi & sectionis Cadaveris, Viri
Clarissimi Marcelli Malpighii apoplexia
extincti facta Romæ Kalendis De-
cembris 1694. à Georgio Ba-
glivo Med. Doct.*

M Arcellus Malpighius an. ætatis 66, temperamenti ad siccum vergentis, mediocri corporis habitu & mediocri pariter staturâ præditus; cum per decûrsu antecendentium plurium annorum ob graves mentis applicationes obnoxius esset i. vomitibus & secessibus biliosis; exindè verò post horum suppressionem, palpitatio- nibus cordis, calculis renum & vesicæ, urinis cruentis, affectionibus podagricis; demum 25. Julii ann. 1694. præcedenti- bus severioribus curis & animi mæroribus, apoplexiâ correptus fuit, horâ fere meri- dianâ; accedentibus paralyfi totius dextri lateris corporis, torturâ oris, & oculi pa- riter dextri. Varia statim adhibuimus reme- dia, præsertim phlebotomiam in brachio sinistro (eam tamen, si aliorum Medicorum vota adfuissent, in ipso latere paralytico in- stituissimus, ut mihi est in usu, siquidem impeditus fluidorum circulus in paralytica parte, celerius non restituitur quam in ea-
dem

dem sanguinis missionem instituendo, ut ex legibus mechanices resistantiæ, & impulsus apertè constat) exinde vero cucurbitulas scarificatas scapulis; pulverem Cornachini, sinapismos plantis pedum, & alia quam plura spirituosa, cæphalica, & in apoplecticis specifica remedia; quorumque energiâ post 4. dies gravissimorum laborum, vaniloquii, capiplenii, & aliorum accidentium, liber evasit ab apoplexia, & paralyfi medietatis corporis. Nihilominus tamen, quoniam malorum latius serpendi mos est, observavimus in doctissimo Viro, quod ex antecedente morbo, memoria & ratiocinatio læsæ magna ex parte remanserint; in lachrymas quavis minima de causa solvebatur; inappetentiâ, indigestionibus ventriculi, & subultu musculorum afficiebatur; his denique aliisque symptomatis miserrime colluctatus fuit usque ad 29. diem mensis Novembris ejusdem anni; quo, circa horam matutinam post injectum consuetum clysterem, & exacerbatis post quinque antecedentes dies gravibus vertiginibus, cum affectione calculosa vesicæ, correptus fuit novo accidenti Apoplectico; quod adeò vehemens fuerat, ut irritis quibuslibet remediis post quatuor ab invasione horas, ultimum diem obierit.

Sectio Cadaveris.

Aperto cadavere observavi sinistram pulmonum partem aliquatenus flaccescentem ac lividam, præsertim circa posteriora ejusdem loca, quâ dorso respondet: Cor citra consuetum, erat mole suâ auctum & præcipue parietes sinistri ventriculi qui duorum digitorum latitudinem æquabant. Bilis in vesica fellea, valdè nigricabat. Ren sinister erat omni labe immunis; dexter è contra, quasi medietate minor sinistro observatus fuit; ejusque pelvis adeò dilatata, ut commodissime duos meos digitos eidem infererem; & ob nimiam hanc pelvis dilatationem eveniebat in doctissimo Viro, quod calculos in renibus genitos statim in vesicam delabi sentiret, & è vesica paulò post foris extrudi. In vesica urinaria parvus calculus aderat; qui 4. diebus ante invasionem ultimi accidentis apoplectici inibi descenderat, & descendendo vertigines illas ultimas exacerbavit; Reliqua denique viscera naturalia, erant omni labe immunia.

Aperto capite, & secto hinc indè dextro cerebri ventriculo, in ejus cavitate duas libras circiter sanguinis nigri, & grumosi extravasatas deprehendimus: quæ quidem præ-

præternaturalis evasatio sanguinis, recensetur communiter causa principalis hujus apoplexiæ. In sinistro cerebri ventriculo residebat aqua subflava ad pondus setquiunciae, eique intermixtæ erant minimæ arenulæ in mediocri quantitate. Vasa cerebri erant undiquaque varicosa. Universa dura mater, fortiter & citra consuetudinem adhærebat cranio. Atque hæc sunt summa eorum, quæ in cadavere dictissimi Viri observare mihi licuit ipsis Kalendis Decembris ann. 1694. Romæ.

Notatu dignum est quam observavimus proximis his duobus annis non solum Romæ, sed in plurimis quoque Italiæ Urbibus, magnam scilicet hominum partem apoplexiâ extinctam fuisse Annis 1694. & 1695. cujus equidem funesti morbi eventus adeò frequentes erant ut horrorem mortis cervicibus humanis, singulo fere momento impendentis universaliter incuterent. Epidemicæ hujus apoplexiæ causa peti merito poterit ab insueta aeris intemperie: æstas an. 1693. erat adeò exurens ut squallore & siccitate ferè omnia consumi viderentur; subingrediente an. 1694. frigora intensissima cœperunt: gelu & glacie omnia cooperiebantur præter consuetum Italiæ morem; Latium & Apulia, quæ rarissimè nivibus infestari solent, illo ann. uberrimè diffluebant, ut ferè ad cubiti altitudinem nives ascenderent; magnamque Animalibus necem attulerint. Quæ subsequuta est æstas multò ardentior fuit superiori, & per quinque ferè continuos menses nullæ unquam visæ pluvix; hæ autem

cœperunt postea, circa mensem Octobris ejusdem an. 1694. & continuarunt usque ad mensem Aprilis hujus an. 1695. tantâ equidem assiduitate ut post hominum memoriam visâ non fuerit tam ingens pluviarum abundantia; siquidem post 15. dies pluviarum continuarum, vix duo ferenitatis observabantur, quod brevi post ab uberioribus pluviis exigerentur; per hasce igitur infuetas annorum constitutiones sæviebant præfatæ Apoplexiæ: Quibus etiam occasionem dare poterant mœrores, & domesticæ cuilibet homini vexationes, ob calamitosissima hæc in quibus incidimus tempora, quibus per continuum septennium universa Europa bello adhuc concutitur crudelissimo, & vix post Orbem conditum audito; tot etenim Urbium vastationes & incendia; hominum tot millia cæsa, impedita prorsus commercia, pacis aditus fere præclusi; cuinam quæso horrorem mortis imò mortem ipsam non afferrent. Porro halitus maligni à tot terræmotibus (quibus ab an. 1688. usque adhuc concussa fuit Italia) excitati, fomitem hisce morbis suppeditare facilè poterant. An. 1688. primum tremuit Neapolis, quo tempore ipse illic degebam, sed exiguo prorsus vastissimæ illius Urbis damno; Oppida tantum quam plurima eidem convicina solo protinus æquata fuere. Biennio post, fortiss. iterum tremuit Neapolis; quo tempore tremuit etiam Beneventum ab eadem 4. milliariis circiter distans: Et paulo minus quam tota Urbs Beneventana solo exciderat. Per subsequentes deinde annos quamplures Italiæ Urbes tremuerunt; Ariminum & Ancona Urbes, ad oram Adriatici maris positæ terræ, motus vim & damna præ cæteris aliis maximo-pere sentierunt. An. elapso tremuerunt fortiter

Ca;

Calabria & Sicilia; & solo protinus æquata est Nobilis urbs Catania in Sicilia, cujus profecto Urbis nulla hodie cernuntur vestigia: Messana Urbs in ædificiis mulctata etiam fuit, & oppida quamplurima omnino exciderunt. Hoc antio tremuerunt Venetiæ [quod rarissimum est] Patavium & aliæ convicinæ ditionis Venetæ Urbes. Proximè elapso Junio, tremuit, & protinus solo excidit Balneoregium, sive Bagnarea Urbs provinciæ Patrimonii; quadragesimo circiter ab Urbe lapide distans; tremuerunt pariter Urbes aliæ eidem vicinæ, præ cæteris Viterbum: terra in pluribus locis aperta est: Et oppida fere decem, & amplius corruerunt omnino. Pestis invasit Apuliam ann. 1691. cum non exigua Urbium illarum strage. Totus Lombardiæ tractus bello ardet contra Gallos internecino. Hoc igitur & hujus generis alia iræ Dei flagella observata sunt proximis his annis quibus funestæ apoplexiæ sævierunt: & ad illarum majorem elucidationem, & complementum historiæ talia adnotasse oportuit, Tibique communicare Celeberrime Mangere. Vale interea & humanitate tua fovere ne desinas.

Tibi addictissimum Georgium Baglivum. *Datum Romæ 12. Julii 1695.*

Hæc ex communicatione prænominati Nobiliss. ac Præclariss. Viri Archiatri Pontificii dignissimi.

OBSERVATIO CII.

Apoplexia in qua vasa cerebri varicosæ. Serum effusum &c. reperta sunt.

Mulier quadragenaria boni corporis habitus, ac plethorica; subinde de doloribus capitis gravantibus conquerebatur, at non tantis ut inde aliquid finistrioris expectaretur; cùm aliquando capite inclinatô, igni pro cænâ parandâ accendendo incumberet, apoplexiâ validissima correpta est, & ab eadem, nihil proficientibus nostris remediis, post paucas horas sublata. Die subsequenti summô mane apertô cadavere, elevatôque craniô, reperiebamus cerebrum totum quantum serô sanguinolentô copiosissimè suffusum, vasa verò turgidiora. Omnibus suis partibus aliàs nobis sana visa est.

Vasorum turgescencia indeque enata feri effusio proculdubio ab obstructione aliquâ originem duxit; Sic videmus à ligatis venis indeque impedito sanguinis per arterias advecti regressu, serum in partes vicinas copiosè elabi. Obstructio autem nullis familiarior est quàm plethoricis, quia scilicet cùm circulatio sanguinis difficilius in iis peragatur, motusque ex arteriis in venas pigrior evadat, (eadem prorsus ratione qua videmus è pleniori vasculô liquorem non ita commode

mode effundi, quàm ex eo quod ex parte vacuum fuerit) aliquæ illius particulæ viscosiores facilè parietibus canaliculorum quos trajiciunt agglutinantur eosque tandem opplent. Quid itaque mirum si plethorici faciliùs in apoplexiam incurrant? Id etiam novit vulgus, homines carnosos, sanguine abundantiores, ac bene habitos morbo attonito maximè obnoxios pronuncians. Verùm quomodo sanguis, quomodo obstructio interceptionem ejus motus circularis faciens, commerciumque inter cor ac cerebrum interturbans, sit genuina Apoplexiæ causa, tam eleganter explicat Clariss. Justus Conradus Michaelis suo de morbo attonitò tractatu, ut ejus verba huc referre minime pigeat.

Quoniam igitur, inquit, evidenter in superioribus demonstratum est, errare omnes illos qui in cæno vitiosorum excrementitiorumque humorum vel ventriculos cerebri, vel Plexum ejus retiformem, vel Principium nervorum, vel quamcunque aliam partem obstruentium morantur, optandum omninò ut

*Tandem facessat cæcitas,
Quæ nosmet in præceps dux
Lapsos sinistris gressibus
Errore traxit devio.*

Velut Prudentius olim, alio licèt sensu, precabatur. Cum tamen ea de qua nobis sermo est Apoplexia ab humore aliquo ortum suum ducat, liquidò deprehendimus, culpam hujus mali nemini præterquàm soli sanguini jure posse deferri, non quidem isti qui jam obstruit, cùm ille sit pars morbi materialis; Sed huic qui tendit ad cerebrum, & in procinctu est ut obstruat.

San-

674 OBSERVATIONES

Sanguinem cùm dico, intelligo illam humorum miscellam, quæ & qualis in arteriis, venisque ceu alveis naturaliter continetur: non autem partem hujus miscellæ optimam, seu numeris suis omnibus absolutam, verèque ac solam alimentariam, quæ chymus propriè vocatur; & de qua Hippocrates I. 2. de morbis loquitur: ὅταν περὶ ἡ χεῖρα τῆτο πάσχωσαν ἐπιτάμῃ ἢ κεφαλῇ ἢ ἄλλο τε τῷ σώματι, τὸ αἷμα μέλαν ῥέει καὶ θολερὸν καὶ νοσῶδες καὶ τοὶ ἐδὲ αἷμα δίκαιον εἰπεῖν καὶ ἔνομα ἀλλ' ἐρυθρὸν καὶ εὐλκερὲς εἶναι. Cùm quis aut manum hoc patientem secuerit, aut caput, aut aliud quid corporis, sanguis niger fluit, & turbidus, & morbosus: quamvis neque sanguinem nominare fas sit, nisi qui ruber & sincerus effluit. Sic Plato in Timæo, ubi de animalium alimento: καλεῖται αἷμα νόμῳ σαρκῶν καὶ ζύμωσις τῷ σώματι, ὅθεν ὑπερόμματα ἕκαστα, πληροῖ τὴν κενεμένην βίαν, pro quibus eleganter Hofman: Sanguinem vocamus, qui pabulum est carnis & omnium corporis partium. Ab hoc enim irrigatis omnibus repletur id denudò quod dissipatum est: Sed in latitudine sua vocem accipio, prout etiam sanguis biliosior, ustior, crudior & serosior nomine sanguinis veniunt. Non enim necesse est, in artibus philosophica semper observetur ἀκρίβεια, sed dandum etiam est aliquid τρόπων ὑπιστάμενης gravissimas ob causas.

Hæc simplicissima est veritas, quam Galenus quoque; jam senior prudentiorque factus tandem cognovit, ideoque universalibus suis pronuntiatis non amplius ita pertinaciter inhæret, sed causæ in juvenilibus scriptis sæpius datæ duobus locis affluit aliam, sanguinem scilicet, dicitque homines propter redundantem sanguinem apoplexiâ corripì. Alter locus est 4. diæt. acut.

acut. 23. ὅταν ἐν αὐταῖς ὑπερπληρωθῶσι βαρυνθῆναι τε τὴν δύναμιν ἀνάγκη καὶ εἰς κίνδυνον ἀφικέσθαι τὴν ἐμφυτοῦ θερμοσίου, τῷ ἀποσβεσθῆναι, πνιγμῷ πᾶσι πλησίον πανθῶσαν ὑπὸ τῷ πλήθους, ἐπιληψίαι τε καὶ καὶ ἀποπληξίαι καὶ καρδιακαὶ συκοπαὶ γίνονται. δι' ἐν τῷ συμπτώματι κοινῇ τῆς ἀφονίας τὰ τοιαῦτα συμπτώματα ἐδήλωσε, venis igitur istis nimium repletis gravari facultatem necesse est, & in periculum extinctionis adduci calidum nativum, dum quid suffocationi simile patitur a copia sanguinis, fiuntque Epilepsiæ & Apoplexiæ & syncopæ cardiacæ. Per unum enim commune obmutescentiæ symptoma, ejusmodi symptomata declaravit. κατὰ τὴν αὐτὴν autem hîc, nihil aliud quam πληθύνειν sanguinis repletionem denotare, capite ab hoc secundo ordine vigesimo quinto docebitur.

Alter verò est l. de cur. per venæ sect. cap. 7. αἱ γὰρ ἀποπληξίαι κατὰ τῆτον γίνεται τὸν τρόπον, ἐπὶ τῷ ἀρχικῷ τῷ ζῶντι ῥέοντος αἵματος πολλῷ, apoplexiæ igitur hunc in modum fiunt, sanguine multo ad principium animalis ruente. Et paulò post dicit, plethoram facere ἀποπληξίας καὶ τὰς ῥήξεις τῶν φλεβῶν, morbos attonitos & ruptiones venarum. Unde sua desumpsisse videtur Turrifanus 2. comm. in art. Gal. 12. fol. m. 30. G. oppilatio venarum & arteriarum ex multitudine sanguinis absque grossitie, prohibet emanationem virtutis ad membra, ex quo est causa apoplexiæ & mortis, sicut Galenus dicit.

Hinc Ballonius l. 2. consil. p. m. 129. cùm sanguis multus est coercitus in cerebro, calefactus & propterea κατέχχυμα ipsius cerebri inflammans, hinc attonitus homo redditur. Quod in ebriis usu venire potest. Hinc Smerius in miscellaneis p. 601. ubi de duobus intestinis nobiscum natis vitæ nostræ hostibus ait: Quid damni

sanguis ipse defecatus & sincerus vitæ nostræ, inferre potest utpote cum naturæ nostræ conveniens & necessarius sit. Sanè quamplurimum, sit enim vel optimus, tametsi copiâ abundet: mox si firma sint vasa; aut caloris nativi oppressiōnem (sicut flammulæ ab oleo nimio accidit) aut apoplexiam, aut febres continentes intentat. Hinc Prosper Martianus comment. in 4. de diæt. acut. 47. cum nullo præcedente dolore & derepentè morbus (attonitus vel aphonía de qua loquitur) invadit, signum, est, ejus causam esse sanguinem solâ copiâ peccantem. Qui ante comm. in lib. 2. de morb. sect. 2. v. 64. apertè dixerat, apoplexiæ essentiam consistere in sanguinis statione. Idem autem sanguis qui sistitur, fitur & materia morbi evadit. Antea fuit causa antecedens.

Exemplum hujus rei evidentissimum præbebit juvenis pleni habitus, quem redundans capitis sanguis in subitam & gravem præcipitavit apoplexiam, apud Tulpium 1. Obser. Med. 7. & mulier quædam Byantina non nisi à magna sanguinis copia attonita facta: nec non aurifaber Lausannensis ex hæmorrhagiâ narium apoplexia correptus apud Fab. Hildanum 3. Observ. Chirug. 11. & 12.

Jam verò, si quædam apoplexia etiam secundum Galenum est a sanguine, alique humores, velut in superioribus est ostensum, heic non veniant in numerum causarum, quidni animosè dicam, omnem apoplexiam esse à sanguine? Sed ita est: Quia Galenus in falsa sua de ventriculis cerebri hypothesi veritatem semel deseruit, non ita facilè revertitur in viam; idemque contigit doctissimo Jacchino. Cum enim vidisset mulieres nonnullas otiosas & divites deficientibus men-

mensibus apoplexia correptas, quare ex hoc *φαينوμένην*, non indagavit veram morbi attoniti causam? An illam putavit satis esse investigatam? Nec Galenum posse falli? Haud aliam ob causam puto Forestum in amplissima sua praxi sedentem & commemorata Jacchini verba 10. Obs. 69. in scholiis malâ fide exscribentem hæc neglexisse. An ergo injuria est, eos cum Prudentio *περὶ σεφ. hymn. 10.* ita alloqui?

*Vos eruditos miror & doctos viros,
Perpensa vitæ quos gubernat regula;
Nescire vel divina vel mortalia
Quo jure consent.*

Quòd si cui rem ipsam *φαينوμένην* in microcosmo obviis nondum satis ob oculos posuisse videor, isti considerandum proponam illustrissimum exemplum è macrocosmo petatum, in quo tanquam in splendidissimo speculo veram morbi attoniti effigiem cernere licebit. Nam nemini amplius dubium fore censeo, hominem in se continere omnia quæ universus hic mundus amplissimo suo sinu coërcet, ut parvus mundus & universi exemplar ac epitome optimo jure dici possit, teste Laurentio l. 1. hist. anat. cap. 2. quod Macrobius 2. in Somn. Scip. 12. physicos antiquos constanter statuuisse refert & Galenus confirmat 3. us. part 10. aperte Aristoteles 1. hist. an. 15. *μάλιτα ἔν ἔχει διαρισμένα πρὸς τῆς χτιφύσιν τόπους τὰ ἄνω καὶ κάτω ἄνθρωπος τῶν ἄλλων ζῶοντα ὅτι τῇ ἄνω καὶ κάτω πρὸς τὰ ἑπικτὸς ἄνω καὶ κάτω τέταται*, superiores & inferiores partes in loca naturalia, maximè distinctas habet homo præ cæteris animalibus. Nam superiora & inferiora ei secundum Universi superius & inferius disposita

sunt. Quo prior Hermes Trismegistus ita clare: *ὥς τε τὸ πᾶν ἐκ ὑλικῶν καὶ νοητῶν συνέστηκεν, καὶ ὁ μὲν κόσμος πρῶτον, ὁ δὲ ἄνθρωπος δεύτερον ζῶον μετὰ τὴν κόσμον.* itaque universum ex materiali & intelligibili constitutum est: Et mundus primum, homo verò secundum animal post mundum; uti ad verbum vertit Patritius. 2. discuss. perip. 6. Nec aliud docuit Hippocr. lib. 1. de diæt. cap. 7. secundum Zwingerum: *ἐνὶ ᾧ λέγω πάντα διεκασμύσατο κατὰ τρόπον αὐτὸ ἑαυτῷ τὰ ἐν σώματι τὸ πῦρ, ἀπρὸ μίσησιν τῶ ὅλα μικρὰ πρὸς μεγάλα, καὶ μεγάλα πρὸς μικρὰ,* summam & publico sensu: Omnia quæ in corpore sunt, modò sibi convenienti digessit ignis ad universi imitationem, parva ad magna & magna ad parva.

Missis autem ambagibus, nemo nostrum ignorat duo esse in rerum universitate insigniora, & tam lucis splendore quàm operationis efficaciam omnia reliqua antecedentia, inque sacris paginis toties celebrata lumina, sol & luna. Solem qui nesciat aut ostendere non possit, nemo est: Quid sit, discat ex Petri Johannis Fabri Panchymico, qui non didicit ex naturæ libro, ille l. 2. c. 9. Solem sic describit: Sol nihil aliud est, quàm lumen ipsum creatum, in corpus solis compactum, è massa materiæ primæ, sursum à Creatore elevatum, & sublimatum, & in ea parte mundi, in qua lucere videmus, in unam massam solidam ac firmam luminis concretum, ut ibi luceat in æternum, lucemque suam infundat omnibus rebus mundi, ut inde lucem, vitam & esse habeant. Moses Gen. 1. vers. 16. eum vocat *φωστὴρα τὸν μέγαν εἰς ἀρχὰς τῆς ἡμέρας,* luminare magnum quod præest diei. Ad quæ verba Benedictus Arias Montanus in op. Reg. l. de arcan. serm. p. 76. Sol majus luminare, splen-

Splendore caloreque suo cætera omnia vincit, atque effectu ipso superat. Apud Hesiodum 2. Elp. 35. vocatur *σείρη ἀστὴρ*, illustris stella, quod candore, h. e. albedine illustri maximè niteat. Dictus autem est sol, quia solus ex omnibus sideribus est tantus: Vel quia cùm exortus est, obscuratis omnibus solus appareat, notante Cicerone 2. de nat. Deor.

Hujus tanta est necessitas, ut omnia de mundo sustulisse videatur, qui hunc sustulerit. Hinc optimè & verè à Platone in Theæteto pronunciatum est, sole stante omnia stare. Starent revera: Quis enim motus esset, tam superiorum quàm inferiorum? In cælo quidem nulla moveretur stella, sole immobili permanente: In terra autem nulla esset generationis & corruptionis vicissitudo, quæ jam perpetua est, ex qua omnia sublunaria conservantur ideoque medium inter planetas locum meritò obtinuit, ut omnibus mundi partibus vivificos suo radios ex æquo possit communicare; sine sole, inquit Faber loc. cit. nihil in natura existeret, unà siquidem cum luce, vita & esse infunduntur. Sol quotiescunque infrà horizontem deprimitur, & sese ad tempus occultat, mirum est quomodo omnia in toto illo horizonte languescant; si plantas respicis, videbis flores ipsos diversis omninò coloribus adeò variegatos, ut etiam pictores arte suâ imitari naturam nequeant, sole præsentē elegantissimè expansos & explicatos, firmissimo argumento, quod ab illo vitam & omnem pulchritudinem habeant; eò verò recedente, quasi præ dolore & tristitia prorsus contractos & languidos: sin animalia, haud minus videbis illa, ipso die quo solem possunt intueri, vividè & vegetè quasvis actiones naturæ ipsorum conformes obire, illò

verò recessò penitus collabi, & profundo pigroque somno obrui. Si quæris, quâ potestate sol hæc omnia queat efficere, respondebit sol Criticorum Salmasius l. de ann. Climactere p. 777. Nulla alia vis hoc præstat quàm caloris, qui principia unde omnia gignuntur, clausa referat, ac densa relaxat. Alia etiam quæ rariora sunt aut liquidiora, quàm ut quicquam gignere possint condensat, & desiccat. Quibus tutò licet acquiescere, rejectis vanis Astrologorum figmentis.

Ista Cicero proculdubio in oculis habuit. Cum in Somn. Scip. dicit quòd sol sit dux & princeps & moderator luminum reliquorum, mens mundi & temperatio, tantâ magnitudine, ut cuncta sua luce lustret & compleat: Quibus commentarium lepidissimum scripsit Macrobius l. 1. c. 20. ubi præterea testatur physicos solem vocasse cor cœli; quòd sol eadem operetur in cœlo, quæ cor in animalibus. Jure igitur, inquit, cor cœli dicitur, per quem fiunt omnia, quæ divina ratione fieri videmus. Est & hæc causa, propter quam jure cor cœli vocetur; quòd natura ignis semper in motu perpetuoque agitatu est. Solem autem ignis ætherei fontem dictum esse retulimus, hoc est ergo sol in æthere, quod in animali cor: cujus ista natura est, ne unquam cesset à motu: aut brevis ejus quocunque casu ab agitatione cessatio mox animal interimat.

Huic virtute, evidentia & celebritate proximus est *ὁς ἄλλος ἥλιος ἐλάττων*, veluti alius sol minor Aristoteli 4. gen. an. 10. dictus, & à lucendo; si Ciceronii 2. de nat. Deor. credimus, luna nominata; novissimum illud sidus, terrisque familiarissimum, omnium admirationem vincens & in tenebrarum remedium à natura repertum, ceu Plinius l. 2. c. 9. de illa verba facit. Gen. 1.

v. 16. Vocatur φαιήρ ἐλάχιστον εἰς ἀρχὰς τῆς νυκτός, luminare minus quod præest nocti. Ad quæ Arias Montanus l. de arcan. Serm. p. 77. dicit: Luna secundum à sole luminare est, mensium spatia cursu proprio definiens; hæc, quamvis evidenti lumine omni, nisi à sole illuminetur, careat, tamen virium efficaciam omnes reliquos planetas facile antecellit. Nam cum ob inæqualem materiæ dispositionem non possit evitari, quominus quædam terræ partes magis calefiant, rarefiant aut siccantur, quam debebant, præstò est luna quæ moderamen adferat, nimis calefacta refrigerando, rarefacta condensando, siccata humectando: Ita ut semper inter insigniora hæc luminaria contraria sit operatio; nisi illa à terra inter solem & lunam diametraliter interposita ad tempus intercipiatur, quod Philosophi Eclipsin vocare consueverunt.

Duo etiam sunt in Microcosmo luminaria insigniora, seu viscera nobiliora, cor & cerebrum illud necessitate, dignitate, virtute & eminentiâ omnia reliqua in toto corpore longo antecedit intervallo: Hoc autem isti omnino proximum est. Cor omnia perfecta animalia accepisse, etiam vulgus novit. Quamobrem? Non omnes hoc noverunt, etiam qui docti volunt videri; discere tamen illud potuissent ab Aristotele, qui 3. part. an. 7. prætorianâ voce exclamat: δεῖ γὰρ εἶναι τινὰ οἶον ἐσίαν, ἐν ᾗ κείσεται τῆς φύσεως τὸ ζωπυρῆν. καὶ τὸ σφύλακτον; ὥσπερ ἀκρόπολις ἔσται τῷ σώματι, oportet enim esse quemdam veluti focum, in quo naturæ ignis sit repositus, eumque bene munitum, ad instar corporis arcis. Quod aliquanto clarius effatus est Michæel Ephesius in comm. δεῖ γὰρ αὐτὴν εἶναι οἶον ἐσίαν καὶ εἰκημα καὶ τὸ ὅλον ἀκρόπολιν ἐν ᾗ ὥσπερ τις βασιλεὺς κείσεται τὸ τῆς φύσεως
V v 4 ζωπυ.

ἔαυτοῦ. Τὸτο δ' ἂν εἴη ἡ τὸ ἑμφύτον, ἡ ἡ αἰσθητικὴ ψυχὴ, oportet enim ipsum esse veluti focum, & domicilium, quin arcem, in qua tanquam Rex aliquis resideat naturæ ignis. Hic verò est vel calidum innatum, vel anima sensitiva.

Quid cor sit, satis prolixè explicant anatomici, unde petere potest, qui nullam habet ejus rei notitiam; situm in medio obtinuit thorace, ut arx regia in commodissimo sit loco, unde calorem & sanguinem in omnia corporis membra, tanquam clementissimus & munificentissimus rex possit effundere; ut suum quæque capiant demensum; quemadmodum enim non opus est, ut Rex simul præsens sit in omnibus regni partibus (quid enim hoc aliud esset quàm ex re finita facere infinitam) sed sufficit si in regno suis ubique præsens sit virtualiter, h. e. per ministros suos primarios; quemadmodum etiam sol corpore suo medio inter planetas, & si Copernico credimus, medio mundi loco constitutus, virtutem suam per radios ceu totidem ministros suis in omnes mundi angulos ablegat: Ita & anima in corde medio thoracis, imò hominis, loco, residens calorem & Spiritum, tanquam primarios suos Ministros, & tanquam radios suos in omnes corporis partes mittit, ad vivificandum, illustrandum & perficiendum omnia, quibus tantæ machinæ opus est, cuncta sua facere officia facit anima & proximè satellitio spirituum, ait Heurnius com. ad. 7. aph. 9. Nisi ergo sol iste toti corpori alluceat, & radios suos in omnes partes dispergat, nulla facit officium; sine corde enim cerebrum non potest memorare aut intelligere, oculus videre, auris audire, manus amplecti, pes progredi &c. ut rectè Schegkhus I. de Spir. ann. cap. 2. dixerit, corde quiescente

te quiescunt omnia. Eandem necessitatem respexit Philosophus, 4. animal. gen. 4. Cùm corde carens nullum unquam animal visum esse memoriæ prodidit καρδίαν μὴ ἐν εἶδέν τι ὥστε ἐγένετο ζῶον μὴ ἔχον.

Cùm autem de sole & corde jam dicta verbis elegantissimis velut in fasciculum collegerit Riolanus in comm. de circ. sang. statim in initio, non potui illa non exscribere, ne cui surgendum sit ad librum. Tanta est, *inquit*, majoris mundi & minoris, scil. hominis inter se similitudo, ut quicquid in majore mundo reperitur, id omne in minore deprehendatur. Sed præ cæteris admirabilis occurrit cordis ad solem analogia, mutatis ac invicem mutuatis nominibus, dum sol cor mundi dicitur, & vicissim cor sol hominis: Etenim cor æthereo calore situ medio, motu perpetuo, sanguinis & spirituum generatione, eorundem fluxu & irradiatione, exquisitè solis naturam æmulatur, imò superat, adeoque inter partes corporis, nulla observatur tanto artificio, tantoque apparatu exornata, ut principium ac domicilium vitæ in se contineret, tanquam primum vivens & ultimum moriens, atque fundamentum existeret omnium corporis partium.

Quam comparisonem dudum instituit Avicenna fen. 1. doct 6. Sum. 1. cap. 4. cor soli comparans & spiritum lumini ejus, quemadmodum, *inquit*, in majori mundo, sol implet totum cælum radiis; quibus ferventibus seu ferentibus ejus virtutes in materiam generabilium & corruptibilium est principium generationis, & corruptionis omnium eorum quæ in mundo sunt: Ita cor totum corpus implet spiritibus quasi radiis à se missis, quibus ferentibus ab eo

nes animæ potestates vivificat totum corpus, habendo omnes virtutes, quas membris appropriat, sicut manus architectonici vires architectonicas. Exterum cum hoc viscus toti corpori vitam & esse debuerit largiri pro perficiendo isto munere opus erat facturo spiritu calidissimo, & igneo: ille verò ea quæ ad τὸ εἶναι pertinent, nimirum ad sensum & motum præstandum, erat ineptus: Contrario utique opus erat momento, cerebro scil. quod haud secus quàm luna fervidissimos cordis spiritus sublevatos attemperaret; licet enim cerebrum omne nutrimentum omnesque vires suas à corde accipiat, tamen omnia reliqua corporis viscera propter spirituum illam contemperationem, & sensus motusque præstantias dignitate atque eminentiâ superat. Ut ut à corde vicissim superetur. Est enim viscus post cor nobilissimum atque animalitati familiarissimum, omnes in admirationem ducens, & ad sensum ἀντίθειαν à creatore efformatum.

Jam dudum illud docuerat naturæ genius Aristoteles. 2. part. an. 7. cujus ecce verba: ἐπεὶ ὅ ἀπαντα δίδται ἐναλίεως ῥοπῆς ἵνα τυγχάνῃ τῆς μετρίης καὶ μέσης διὰ ταύτην τὴν αἰτίαν πρῶτον τῆς καρδίας τόπον καὶ πῶς ἐν αὐτῇ θερμότητα μεμνηχάνηται τον ἐγκέφαλον ἢ φύσιν. Et paucis interjectis: ὁ μὲν ἐν ἐγκέφαλος αὐκρατον ποιεῖ τὴν ἐν τῇ καρδίᾳ θερμότητα καὶ ζέειν, quæ non quidem ad verbum, ad genuinum tamen sensum elegantissimè reddidit Hofmannus de. us. cerebr. cap. 2. postquam in rerum natura ita institutum est, ut unumquodque habeat opus contrario momento, quo perveniat ad mediocritatem naturæ cuique particulari amicam: Natura heic quoque fuit sui memor, fecitque cerebrum, ut cor ejusque calorem attemperet. deinde: usus igitur cerebri, in quibus est, propter cor est, ut

calorem ipsius ad temperiem quandam redigat.

Langius 1. épist 54. hoc ita effert: Cum in macrocosmo terra solis calore siccata & calefacta, solo ex aëre ventorum flatu refrigerari non posset: à natura in sublimi constituta est mediâ aëris regio gelida, quæ vapores de terra & undis in altum sublato, suo frigore in pruinam aut imbres congelaret: & harum aspergine terram irrigaret, & nocturno lunæ frigore refrigeraret: Ita quoque natura sapiens omnium & præcipuè in humani corporis fabrica architectrix, in capite cerebrum frigidum, veluti lunam in sublimi collocavit, ut alteratis suo frigore spiritibus per arterias cordis, veluti luna & mediâ aëris regio, solis æstum; sic quoque cordis fervorem in microcosmo temperaret.

Attemperatio illa, nunquam interrumpitur, sed perpetua est, nisi quando interveniens aliquod eam violenter intercipit. Hoc fit ab obstruente sanguine interposito, ne spiritus vitalis cerebro continuò communicetur, quemadmodum enim luna in Macrocosmo terra inter hanc & solem interpositâ, necessariò eclipsin patitur, h. e. lumine suo à sole accipiendo privatur, ita ut lucem, tenebrarum illud solatium, animalium generi præstare non possit, neque influxu suo sapientissimè à Creatore instituto generationem & mutationum vicissitudines obire: Ad eundem modum cerebrum in microcosmo sanguine inter hoc & cor interposito, quasi eclipsin patitur, h. e. omnibus suis operationibus privatur, ita ut omnia corporis membra lucis spiritus animalis indigentia extremis obruantur tenebris, cum neque oculus tuum videat, neque auris audiat, neque manus neque pes ullum faciat officium, & quod maximum est, ne ratio quidem ipsa tantum possit, ut ægritudinem suam cognoscat. O B-

OBSERVATIO CIII.

Apoplexia in quâ sanguis in dextro cerebri ventriculô repertus &c.

A Poplexia correptus fuit vir annorum 56. Post sex horas tota dextra pars corporis convellitur & contrahitur, sed præcipuè manus & pes: Sinistra verò pars paralytica evasit. Interea nihil loquebatur, sed sputum ex ore emittebat viscidum & copiosum. Secundâ die circa pectus maximam sensit concussionem; quâ die mortuus quasi strangulatus.

Sectô craniô invenimus substantiam cerebri sanam: In dextrô tamén ventriculô aderat magna sanguinis nigri & quasi purulenti, ac variegati extravasatio, & totus erat plenus hâc materiâ: Ipse quoque fundus dicti ventriculi erat erosus & veluti excavatus. In sinistrô ventriculô nihil novi apparuit. Pulmones observavimus nigros & flaccidos, ac in dextrô cordis ventriculô polypum.

Ab uxore accepimus virum hunc pluribus ante annis obnoxium fuisse vertigini, & pluribus ante mortem diebus de dolore & gravitate capitis multùm questum fuisse, pridieque hujus insultus apoplectici sanguinem è naribus erupisse. *Ex communicatione Excellen-
tiss. D. Georg. Baglivi Archiatri Pontificii &c.*

BERN-

B E R N. H E U T E

*Med. Doct. & Cons. Urbis Zwollanæ*C U R A T I O Maniæ certa, & sæpius a me
instituta.

TOtam descriptionem Maniæ quoad phænomena, causam proximam, remotam &c: hic proponere non est animus: de illis videri possunt Platerus, Riverius, Sylvius, Willisus, Musitanus, Dolaus, in sua Encyclopædia, & imprimis Cranenius & alii. Breviter tantum proponam meam Methodum in curando hoc morbo.

Ut sanguinis & spirituum animalium seu liquidi nervosi motus vehemens & irregularis minuatur, dentur opii crudi gr. ii . aq. fontanæ cochlear unum, digere super cineres calidos, & move spatula tam diu, donec opium sit solutum, addatur parum aquæ in locum, evaporatæ, & F: haustus, qui detur mane & vesperi.

Si dosis illa sit nimis parva, & nulla requies sequatur, adde tunc opii gr. i . Si adhuc nulla venit quies, adde adhuc opii gr. i . mane & vesperi, & hanc methodum institue, donec justa inveniaturs dosis. Ha-
bui

bui maniacos, quibus opii gr. xii, imo xv. pro una dosi exhibui, sed hoc sensim & pedetentim faciendum, & non pro prima vice.

Sic superiori modo calculum faciendo, portionem facio pro quadraginta vel sexaginta dosibus, & ne fæces incommodum faciant, colaturam instituo, & sic Ræ claræ cochlear unum mane & vesperi exhibeo.

Digestio instituitur in aq. fontan: vel aq. destillat: melissæ vel card: bened: & non in sp: vini, ut partes salinæ opii extrahantur, & sulphureæ relinquantur, quæ majorem in sanguine motum excitant.

Interim curandum, ut alvus sit aperta, post octo dies purgatio instituenda seq. pulvere.

R. pulv: rad: Jalapp: ʒß.

diagrid: gr: V. aut VI.

F: pulv:

qui mane detur, & vesperi cochlear unum Ræ superioris. Sequenti die iterum mane cochlear unum Ræ, & sic etiam vesperi. Hæc continuanda sunt per octo dies, & post hos dies detur vomitorium ex oxy-saccharo vomitorio, aut aq. benedicta Rulandi, aut tartaro Emetico, & vesperi de-

denuo cochlear Unum Ræ detur. Hæc methodus servanda est donec Patiens recipiat mentem sanam in corpore sano. Post tres vomitiones institutas Curationem plenam sæpe institui. In nonnullis absque vomitorio dato sanitas restituta est, sed hi sponte vomebant post Ræ usum.

Juvenibus & plethoricis sanguinem misi in brachio semel, aliquando bis vel ter. multi absq; venæ sectione a me curati sunt.

Quod ad disciplinam attinet, nunquam soli relinquuntur, sed in ædibus ad hanc rem accommodis collocari, & a Medico & a ministris prudentibus ita tractari debent, ut quodammodo semper, nempe aut monitis, increpatione, aut pænis subinde inflictis in officio suo atq; gestu, & moribus idoneis contineantur.

Et quidem pro sanandis Maniacis nihil efficax magis aut necessarium, quam ut illi quosdam quasi tortores usq; formident ac revereantur.

At vero asperior hujusmodi tractatio Maniacis non æque omnibus, sed maxime furiosis convenit.

Alii remissius insanientes, blanditiis sæpe & mitiori pharmacia sanantur. Si sponte medicinam sumere nolint, nares premantur & claudantur pollice & digitis, sic os aperire coguntur, mox in os apertum in-

infundatur cochlear unum Ræ, & si expuant, repetatur eadem dosis.

Sequitur diæta. Cibus fit liquidus, forbilis & humectans ex endivia, hordeo, rapis, carnibus vervecinis, commendantur legumina, fabæ & similia alimenta crassa, quæ minorem in sanguine motum faciunt, contra vitentur omnia acria tam acida quam alcalina, imprimis Cinnamomum, Caryophylli, nux moscata, macis. Potus fit Cerevisia tenuis, at vinum & spiritus vini vitentur. Somnus fit longior, isq; omni ratione provocandus. Alvus fit lubrica, vel natura vel arte. Amicorum moderata admittatur præsentia; inimici vel ignoti excludantur. Et denique vinculis, admonitionibus prudenter, pro re nata, erit regendus & compescendus.

F I N I S.

I N D E X

HISTORIARUM

Et

OBSERVATIONUM

Apoplexiam spectantium,

in hoc Tractatu occurrentium.

- I. **H**istoria viri 45. annorum ex nimio vini usu Apoplexiâ mortui. Pag: 1
- II. — mulieris septuagenariæ, ob grumum sanguinis in cerebro latentem &c. Apoplexiâ extinctæ. 5
- III. — mulieris sexagenariæ ex sero flavescente in ventriculis cerebri stagnante, & corde sanguine grumoso repleto &c. mortuæ. 10
- IV. — viri quinquaginta annorum ex sero pallidi coloris inter duram & piam matrem collecti &c. demortui. 14
- V. — viri 50. annorum vino dediti ex gravi casu Apoplectici. 294
- VI. — viri itidem ex gravi casu Cephalalgiam & post Apoplexiam incidentis. 303

I N D E X

- VII. Historia Juvenis, ex fracto per casum cranio Apoplectici. 305
- VIII. — Juvenis 26. annorum ex jactu lapidis in tempore sinistro Apoplectici. 306
- IX. — Militis in tempore dextro cæsim vulnerati, & ex ira iracundia accedente Apoplexia correpti. 308
- X. — somnambulonis ex alto ædium decidentis, cranio licet fisso membrisque omnibus conquassatis, tamen sanitati restituti. 311
- XI. — viri, qui tempore sinistro casu graviter alliso grumos sanguinis per nares excrevit &c. intra octiduum tamen restitutus est. 314
- XII. — Comitis de Pappenheim sclopeti globulo per altiore tempore partem trajecti, in cujus cadavere nihil sanguinis in Cava descendente & arteria aorta repertum. 316
- XIII. — viri 40. annorum ab arboris cadentis ramis in occipite læsi & inde Apoplectici. 318
- XIV. — Comitis de Reitnaw, annorum 39. ob sanguinis grumosi copiam in Thorace & corde Apoplectici. 320
- XV. — studiosi ense punctim infra or-

OBSERVATIONUM.

- orbitam finistri oculi vulnerati post
24. horas Apoplexia extincti. 330
- XVI. Historia mulieris vetulæ scopis in
tempore dextro fortiter percussæ & in-
de accedente iracundia Apoplecticæ. 334
- XVII. — viri septuagenarii Cæphalæa
& Cachexia laborantis indeque extincti.
338
- XVIII. — virginis 23. annorum ex
onere nimio in capite gestato Apoplecti-
ca evadentis. 358
- XIX. — mulieris 37. annorum ex sero
subcruento in ventriculis cerebri & occi-
pite &c. Apoplexia mortuæ. 375
- XX. — Juvenis 24. annorum nimio fri-
gore enecati. 384
- XXI. — Adolescentis 19. annorum ex
sero flavo & humore purulento in ven-
triculis cerebri collecto Apoplexia sub-
lati. 394

*Hucusque Historiæ Apoplecticorum
à WEPFERO traditæ.*

I N D E X
S E Q U U N T U R

Nunc

OBSERVATIONES

Et

H I S T O R I Æ

Aliorum

CELEBRIMUM MEDICORUM.

- I. **A** Poplexia ex hydrope cerebri. Pag. 427
II. — post quinquennium recurrens à sanguine extravasato cum capitis anato-
me. 435
III. Tortura oris spasmodico-Apoplectica,
ob senium valde periculosa in integrum
sublata. 443
IV. Calculi in cystide fellea reperti Apo-
plexiæ auctores. 445
V. Apoplexia fortissima cum Epilepsia de-
sperata feliciter curata.
VI. Apoplexia in senē curata. 451
VII. — bis curata, tertio rediens &
lethalis. 453
VIII. Apo-

OBSERVATIONUM.

VIII. Apoplexia lethalis ex scabie retro-
pulsâ. 457

IX. De Apoplecticorum Anatomie. 458

X. De Sanguine Apoplecticorum frigido.
ibid.

XI. Amuletum e cranio hominis violenta
morte peremti, adversus atrophiam pa-
raliticorum. 459

XII. Apoplexia lethalis ex bregmatis hia-
tus in septuagenaria majore coalescentia
oborta. 462

XIII. Deglutitio in Apoplectico ablata. 464

XIV. Apoplexia cum Epilepsia. 465

XV. A mensibus diu suppressis maxima
cordis palpitatio, tandem Cachexia,
Apoplexia & mors. 467

XVI. Aphonia rara. 468

XVII. Apoplexia ab ebrietate. *ibid.*

XIX. Excessus momentaneus Serenissimi
Ducis Saxo-Isnacensis Joh. Georgii con-
jecturaliter delineatus. 476

XX. De Apoplectico in Venere, extre-
misque infantum epilepticorum convul-
sionibus. 487

XXI. Verbera imminentis Apoplexiæ re-
mora. 489

XXII. Anatomie Apoplectici 50. annorum.
491

XXIII. Mulier quinquies Apoplexiam pas-
sa restituta. 497

I N D E X

- XXIV. Anatome Apoplexia defuncti. 499
- XXV. Tumor cranii Cephalalgiae, Guttæ
Serenæ & tandem Apoplexiæ causa lethali-
lis. 508
- XXVI. Apoplexia metastasi in crus finif-
trum soluta. 512
- XXVII. Somnolentia & membrorum stu-
por non semper paralyfin vel Apoplexiam
denunciant. 511
- XXVIII. Anatome Apoplectici 52. anno-
rum. 502
- XXIX. De Sene plusquam octogenario
Apoplexiæ proximo, convulsionibus
epilepticis vehementissimis tacto, ex in-
sperato sanitati restituto. 514
- XXX. Apoplexia tres dies perdurans. 515
- XXXI. — à casu. 516
- XXXII. Amuletum in Apoplexia. *ibid.*
- XXXIII. Præservativum in Apoplexia ex-
cellens. 517
- XXXIV. Cucurbitularum in Apoplexia
vis mira. *ibid.*
- XXXV. An & quomodo corpus in Apo-
plexia concutiendum. 519
- XXXVI. Apoplecticorum stertor unde ?
520
- XXXVII. Apoplexiæ stertor cur lethalis.
521
- XXXVIII. De mira virtute radicis ver-
basci antiapoplectica. *ibid.*
- XXXIX.

OBSERVATIONUM.

XXXIX. Medicatio viri 45. annorum
Apoplexia correpti. §24

XL. Apoplexia oborta occlusionem vasorum
quæ spiritum vitalem ad cerebrum vehunt,
scilicet concursus omnium crassæ menin-
gis sinuum, Torcular dicti. §42

XLI. Sanguis in Apoplecticis non solum
frigescit, sed etiam concrescit. §50

XLII. Apoplexia a grumo sanguinis in ca-
rotidibus hærente. §52

XLIII. Ab. Apoplexia accidentali qui ex-
tinguuntur iis extravatus sanguis, aut ab-
scessus mortis causa fuit. §53

XLIV. Apoplexia ab arteriæ Magnæ ori-
ficio summe dilatato & corde sanguine
distento. §58

XLV. — raro contigit ob sanguinem
crebro exclusum, frequentius ab immo-
dico illius excursu. §61

XLVI. — ictum capiti inflictum & ca-
sum sequuta, ob sanguinem per cerebri
anfractus & in ventriculos effusum ex dis-
rupto torculari aliisque vasis finitimis. §63

XLVII. — à sanguine ventriculos cere-
bri infarciante. §65

XLVIII. — à cerebri ventriculis con-
creto sanguine turgentibus, ex rupto
plexus choroidei vase expresso. §66

XLIX. — à sanguine effuso & concreto
in utroque cerebri ventriculo, plurimo

I N D E X

- fero cruento devoluto in tertium & quartum &c. 568
- L. Apoplexia à sanguine per cerebri gyros diffuso ex diffractis arteriosis vasis, caroticis & vertebralibus. 571
- LI. — ab atro sanguine cerebrum occupante. 573
- LII. — à repletis sanguine sinibus cerebri oborta. *ibid.*
- LIII. — à sanguine ventriculorum cerebri sinistrum replente. 577
- LIV. — à sanguine in cerebri basin effuso & concreto arterias retiformes & plexum choroideum premente. 578
- LV. — à sanguine in ventriculos cerebri illabente, ibique concreto. 579
- LVI. — à sanguine supra & infra membranas cerebri effuso. 580
- LVII. — à vasis cerebri & meningum sanguine turgidis, aqua limpida totam compagem inundante. *ibid.*
- LVIII. — vulnus sequuta, ab humore ventriculos cerebri replente & sanguine putrente circa os cuneiforme fractum. 581
- LIX. — sequuta fracturam laminæ secundæ cranii, integra prima. 582
- LX. — & paralyxis post vulnus capitis à cruoris copia infra cranium effusa. 582
- LXI. — à repletis sero ventriculis & san-

OBSERVATIONUM.

- sanguine obstruente processus spinalis medullæ. 583
- LXII. Apoplexia diuturnum capitis dolorem sequuta à sanguine circa cerebri basim effuso. 586
- LXIII. — meningum phlegmonem suppuratum secuta post gravem cephalalgiam. 586
- LXIV. — à viscido humore cerebrum opplente genita. 586
- LXV. — à pituitosis humoribus spinalis medullæ principium occupantibus. 593
- LXVI. — à pituita crassa & viscida quarti ventriculi foramen obstruente. 594
- LXVII. — à crasso & viscido humore ad retiformem contextum invento. 597
- LXVIII. Apoplectici caput, pectoris regio, stomachus, pulmones, materia pituitosa referta. 598
- LXIX. Apoplexia ob cerebrum pituita perfusum, ejus venarum ab eadem obstructionem, ventriculos sero repletos & Polypum cordis fibris adnatum. 600
- LXX. In plurimorum ab Apoplexia extinctorum cerebri aut cordis vasis repleta corpora viscida glutinosa, polypidicta. 602
- LXXI. In apoplectici sinistro cordis ventriculo pinguedo reperta. 603
- LXXII. Apoplexia ab humore aquoso per

I N D E X

- cerebri substantiam diffuso ventriculos replente cum sanguine atro & crasso in arteriis temporalibus. 604
- LXXIII. Apoplexia à feri & pituitæ copia in toto cerebro & ventriculis. 605
- LXXIV. — ab aqua limpida cerebri plicas implente & totam compagem inundante. 606
- LXXV. — levis à seroso humore in cerebro stagnante. *ibid.*
- LXXVI. — à feri ingenti copia inter cranium & duram meningem in falce & illius reduplicatione omnibusque cranii cavitatibus. 607
- LXXVII. — à seroso humore cerebri anfractus alluente & ventriculos replente. 610
- LXXVIII. — à plurima aqua cerebrum diluente. 610
- LXXIX. — ab abscessu seroso in cerebro. 611
- LXXX. — epilepsiam sequuta à sero acri in cerebro inter meninges & in ventriculis stagnante. *ibid.*
- LXXXI. — à vesicis rotundis aquosis, corpori calloso incumbentibus. 602
- LXXXII. — ab abscessu in dura matre disrupto cum corrosione meningis tenuis & corticis cerebri à pure inde manente. 613
- LXXXIII.

OBSERVATIONUM.

LXXXIII. Apoplexia a Tumore steatomatrico inter cerebrum & cerebellum. 614

LXXXIV. — à cerebri subsidentia, dissolutione & fluiditate ob pituitam ejus molam irrigantem. *ibid.*

LXXXV. Historia Apoplexiæ à cerebri subsidentia contingentis ob tumorem cranii resectum. 617

LXXXVI. Apoplexia à sanguine circa basin cerebri & rete mirabile effusio cum cerebelli syderatione. 618

LXXXVII. — ab hydatibus circa temporales arterias, cerebri flacciditate &c. *ibid.*

LXXXVIII. — cito interimens cerebro omnino salvo & incolumi, solo vitio in Pulmonibus apparente. 619

LXXXIX. In cujusdam quem Apoplexia extinxit, cistide fellea decem calculi reperi. 620

XC. Apoplexia à fulmine excitata. 623

XCI. Fulmine icti & enecati anatome. 625

XCII. Apoplexia Ischuriam sequuta ob vitium renum calculis obsessorum, serum non excipientium. 629

XCIII. In sectis Apoplecticorum cadaveribus sanguis concretus in ventriculis cordis & in vasis sanguineis Pulmonum reperi. 630

XCIV. Apoplexia in qua sanguinis extrav-

I N D E X

- vasatio visa est. 639
- XCV. Mors subita ex ictu Epileptico, seu ex Apoplexia, in qua sanguis concretus, serum effusum &c. in cerebro reperta. 643
- XCVI. Apoplexia ex ictu, capitis contusione, cerebri abscessu &c. 651
- XCVII. — in qua cerebrum sero flavo inundatum. 659
- XCVIII. — in qua carotis dextra offesa &c. 660
- XCIX. — post respirandi difficultatem in qua splen putridus pulmones lividi & purulenti, dexter cordis thalamus exco-riatus &c. 661
- C. Polypo cordis laborans Apoplexia moritur. 665
- CI. Historia morbi & sectionis cadaveris Viri Clarissimi Marcelli Malpighii, apoplexia extincti, facta Romæ ann. 1694. à Georgio Baglivo Med. D.
- CII. Apoplexia in qua vasa cerebri varicosa, serum effusum &c. reperta sunt. 672

A P P E N D I X

Bern. Heute, Med. D. & Conf. Urbis Zwollanæ Curatio Maniæ certa & sæpius instituta. 687

I N D E X

RERUM ET VERBORUM

Maxime notabilium,

*Itemque auctorum vel laudatorum vel
notatorum.*

A.

- A** Bsynthium inter ea numeranda quæ caput re-
plent. 235
- Acetaria & acida à foeminis juventutis tempore ni-
mium ingurgitata, cum adoleverunt immanes ca-
pitis dolores progignunt. 659
- Acidularum immoderatus usus causa apoplexiæ. 482
- Acidularum noxa ad promovendam Apoplexiam. 611
- Actiões animales magis quam vitales in strangulatis
pati probatur exemplo foeminæ suspensæ ad vitam
redeuntis. 167. 168. seq.
- Actiões animales voluntatis imperio non subjectæ à
cerebello dependent. 301
- Aër austrinus, frigidus & uliginosus sanguinem figit
& ad Apoplexiam disponit. 481
- Aëris temperies frequentioris Apoplexiæ in Italia cau-
sa. 669, 670
- Ætas senilis apoplexiæ obnoxia. 218
- Agitatio corporis in pituitosa & sanguinea apoplexia
improbata. 197
- Allium ex iis quæ caput replent. 235
- Amuletum in Apoplexia. 516. 517
- Anatome animalis à Dom. Bil, citra sanguinis effusio-
nem peracta. 638
- Anguillæ, serpentes, ranæ, quare adhuc satis diu post
evulsa corda vivant & actiones edant p. 23 & 24
- Animi motus nimii sero ebullitionem inducunt. 240
- Ani-

I N D E X.

- Anima humana non in cogitando sed in facultate cogitandi consistit 511. non semper cogitat. *ibid*
- Antimonium diaphoreticum singulare pulmonum remedium, non præparatum vero summum venenum. 598
- ³ Ἀπαληψις τῶν Φλεβῶν Hippocratis eadem cum Galeni διαθέσει Φλεγμονώδη. 156
- Aphonia rara ex Apoplexia. 468 alia 470
- ² Ἀποπληξία, unde hæc vox desumpta. 478
- Apoplexiæ definitio 545. causa proxima *ibid.* variæ ejusdem causæ. 554, 555
- Apoplexia, ad ejus essentiam non pertinet ut subito incidat. 269
- Apoplexia *Galeno* nunc acutus nunc chronicus morbus. *ibid*
- Apoplexiæ causa primitiva quæ? 481
- Apoplexia, ejus causa obstructio ventriculorum cerebri à pituita crassa & viscida à plerisque olim habitata. 20
- Apoplexiæ causa juxta *Hippocratem*. 151
- Apoplexiæ causæ vel sanguinis per arterias ad cerebrum affluxus denegatus, vel spiritus animalis effluxus ex cerebro & cerebello per nervos & spinalem medullam prohibitus, juxta *Wepferum*. 160
- Apoplexiæ causæ externæ. 192
- Apoplexiæ divisio in veram & spuriam. 572
- Apoplexia duplex pituitosa & sanguinea. 526, 599. earum discrimen. 528, 529. sanguinea periculosior. 551
- Apoplexia periodica. 242
- Apoplexiæ tres species probe distinguendæ. 584, 585
- Apoplexia à sanguine extravasato proveniens immedicabilis. 220, 221
- Apoplexia omnis à Melancholia juxta *Cardanum*. 352
- Apoplexia ex deauratione cum Mercurio. 277
- Apoplexia, contra insultus ejus & Epilepsiæ medicamentum egregium ex cranio humano. 469
- Apoplexia an ex compressione cerebri. 438
- Apo-

RERUM ET VERBORUM.

- Apoplexia fit interceptis viis cerebro cordique communibus. *ibid*
- Apoplexia est morbus hæreditarius. 522
- Apoplexiæ curandæ secretum in vomitoriis consistit. 451
- Apoplexiæ a sero vitioso imminentis signa 241. ejus exempla. 242. *seq.*
- Apoplexia & Lethargus à stagnante in ventriculis cerebri sero. 499
- Apoplexiæ obnoxii qui perpetuo otio torpent, obesi, cachectici, Asthmatici. 187
- Apoplecticorum variorum curatorum historiæ. 193, 194, 195
- Apoplecticorum stertor unde 520. cur lethalis. 521
- Apoplexia nascitur aut quia spiritus animalis exitu aut vitalis aditu ad cerebrum prohibetur. 573. 605
- Apoplexia, locus affectus in apopl. est medullosa cerebri & cerebelli substantia. 278
- Apoplexia non semper in cerebro quærenda sed & in vasis cordis. 559, 560
- Apoplexia quibus rebus differat à Comate, Caro, Lethargo, Epilepsia. 524
- Apoplectici difficulter à syncope cardiaca correptis distingui possunt. 23
- Apoplexiæ & Syncopæ discrimen. 186, 273
- Apoplexia qua re differat à lypothymia. 528
- Arteriæ carotidis internæ usus in cerebro p. 34. ejus sinuositas ubi duram matrem transit. 35, 36
- Arteriarum potius quam venarum obstructio apoplexiam parit. 559
- Afinos in Gallia dari negavit *Aristoteles*. 48
- Asthmatici sæpe fiunt cachectici & hydropici. 663
- Auditus, D. *Screta* dissertatio de auditu laudata. 405
- Avicenna* quas apoplexiæ causas quemque locum affectum adsignarit. 157, 158

B.

- B** Alneorum abusus quid produxerit in muliere. 444
- Balnei intempestivus usus causa apoplexiæ. 218, 482
- Bar-*

I N D E X

<i>Bartholinus</i> (<i>Thom.</i>) ejus liber de lacteis Thoracicis & Vasis lymphaticis.	73, 74
Bilis proventus ab Hepate, <i>Glyssonii</i> Angli inventum.	251
Bilis vesicula ex abundantia humoris nascitur.	507
Bilis in cavum intestinorum effusa an Colicæ causa sit dubitat <i>Wepferus</i> .	352
Bilis non sola, sed cum sero mixta Apoplexiam producit.	252
Bilis an causa apoplexiæ.	623
Bilis qua ratione in podagricis Apoplexiam producat.	448
<i>Burrhus</i> ex terra cemeteriorum destillata varia phantasmata excitavit.	461, 462
Biliaria vesicula ex pori biliarii ramulis bilem accipit.	355
Biliarii pori ramus à <i>wepfero</i> detectus.	355

C.

C æpe inter caput replentia.	275
Capitis anatome quomodo instituenda ad delenda vasa cerebri.	92. / <i>eq.</i>
Capitis diuturni dolores cui causæ adscribendi.	108, 109
Capitis levis allisio sæpe apoplexiæ causa.	218
Capitis vulnus mirabile in milite sanatum.	205, 206
Capitis vulnera periculosissima nec unquam parvipendenda.	657
Caput sagitta trajectum absque vitæ & virium jactura.	206, 207
Carotides arteriæ, unde nomen hoc nactæ.	162
Carotides internæ & vertebrales arteriæ quorsum sanguinem vehant.	109
Carotides ligatæ soporem afferunt.	192, 164
<i>Carpus</i> in sectione cerebri peritissimus.	137
Catalepsis quid sit 484. ejus exemplum.	485
Catoches cum apoplexia magna affinitas.	484
Cerebrum majori arteriarum copia repletur quam ul- lum aliud viscus.	76

RERUM ET VERBORUM.

Cerebrum est ex sanguine juxta Aristotel.	79. 80
Cerebrum a vasis sanguificis minoribus permeatur 84, 85. authores qui hoc agnoscant.	<i>ibid.</i>
Cerebrum immerito frigidum vocatur.	76
Cerebrum, bruta & aves eo exempto aliquandiu vivere possunt.	209
Cerebrum proximum est bullæ salienti in Embryone.	82
Cerebrum an ipsi motus aliquis sit.	40. 41. 616
Cerebri motum duplicem statuit <i>Riolanus</i> unum ad lunæ <i>Φάσεις</i> , alterum ab arteriis.	127
Cerebri officium.	684. 685
Cerebrum est porosum.	214
Cerebri vulnus in Symplicite demtis tribus cerebri drachmis à Veslingio sanatum.	208. 209
Cerebrum potest premi à tumoribus frigidis, calculis &c. ibi natis.	257
Cerebrum cum medulla spinali & nervis pars affecta in apoplexia.	479
Cerebrum, quare album ex mente <i>Riol.</i>	59
Cerebro, an cordi principatus præ reliquis membris debeatur.	162. 163
Cerebri & cordis cum Sole & Luna comparatio.	480
Cerebri subsidencia num fieri possit.	272. 273
Cerevisia crassa apoplexiam promovet.	481
Cibi qui apoplexiam producant.	481
Cibus & potus qualis debeat esse apoplexia tactorum.	541
Circulatio sanguinis æque in cerebro ac aliis partibus locum habet 90. <i>Marq. Slegelii</i> commentatio de hac re <i>ibid.</i> &	110
Colica à vino adulterato.	353
Colica purgantibus asperatur & difficilior redditur.	352. 353
Colica sæva solo decocti sassafras potu & abstinencia à vino curata.	354
Concussio corporis in Apoplexia an & quomodo peragenda,	519. 520

I N D E X

Cor, exempla quædam eorum qui corde exsecto actiones animales adhuc ediderint.	23
Cor calorem accipit à sanguine, non sanguis à corde.	74
Cordis officium.	682. 683
Cordis motus spirituum animalium ministerio perfici a <i>Willisio</i> & <i>Lowero</i> demonstratum est.	301
de Corde <i>Jacobi de Bek</i> dissertatio.	74
Corpus agit, non accidens.	67. 70
<i>Cortnummii</i> de morbo attonito liber laudatus.	480
Cranium, quò in loco ejus terebratio caute peragenda.	38
Cranium humanum quanta virtus in ipso sit.	461
Crocus inter ea quæ caput replent.	235
Cucurbitularum vis mira in Apoplexia.	517. seq.
Cuniculi soncho pasti acerrimam urinam excernunt.	328

D.

D Eglutitio per Apoplexiam ablata.	464
Dentium dolores à catharro orti amuleto ex corallo tolluntur.	517
<i>Διάθεσις φλεγμονώδης</i> Galeni quid sit 256. 257. unde proveniat.	273. 276

E.

E Brietas Apoplexiæ causa.	475. 476. 481
Epilepticorum spuma ab agitatione sanguinis in pulmone.	507
Epitaphia in Comitum Pappenheimium sclopeto per caput trajectum.	317. 318
Equi reti mirabili carent.	393
Excrementa in ventriculis cerebri reperta.	137. 138
Excrementa narium & oris non à cerebro proveniunt.	140. 142. 143

F.

F Ebris vulnera insigniora comitans quomodo prohiberi possit.	309
	Fe-

RERUM ET VERBORUM.

Febris interdum medela apoplexiæ.	570
Flagrorum usus salutaris in diversis morbis.	489
Fontanella capitis in adultis quandoque membranacea reperta.	467
Frictiones calidæ profunt in Apopl. pituitosa, in sanguinea vero obsunt.	535
Fulmen raro veram Apoplexiam excitat.	624

G.

G alenus, ejus sententia de causa Apoplexiæ.	20
<i>Galenus</i> arteriarum & venarum distributionem in cerebro agnovit.	112
Glandulæ in corpore fero secernendo inserviunt.	121, 122
Glandularum conglomeratarum oculi substratarum notitia cui debeat.	327
Glandulæ pituitariæ & pinguedinis cordis usus à <i>Lowero</i> indicatus.	352
Glandula pinealis, ejus usus in cerebro.	48, 49
Glandulæ pinealis variatio.	496

H.

H æmorrhagia consuetæ suppressæ, Apoplexia sæpe subsecuta est.	217
Hæmorrhagiæ narium suppressio causa apopl.	482
Hæmorrhoidum suppressio causa apopl.	482
<i>Harveus</i> inventor motus circularis sanguinis.	20
<i>Harvai</i> de motu cordis & sanguinis exercitationes quando prodierint.	151
<i>Harveius de Gener. animal.</i>	73
Hepar chylum neutiquam in sanguinem vertit.	73
Hepar phthisici profunde candicans à <i>Wepfero</i> reperi- tum.	356
Hepar quale corpus <i>Wepfero</i> visum.	573, 374
Herbarum virtutes appropriatæ.	523
<i>Holderi</i> de Elemento sermone & <i>Morlandi</i> de Tuba	Sten-

I N D E X

Stentorophonica Tractatus laudati.	402
Humor qui in ventriculis cerebri colligitur, videtur esse alicujus utilitatis nec mera pituita.	596
Hydrargyrum, vide <i>Mercurius</i> .	
Hydrocephali arte facti historia.	62, 63
Hydrocephalus in juvenca à Wepfero repertus	63.
item in cerebro bovino.	64
Hydrocephali historia 55. seq. alia 59. alia 60.	
in Hydrocephalis aqua interdum infrà ventriculos cere- bri stagnat, interdum exterius cerebrum premit.	61. seq.
in Hydrocephalo quare aquæ copia apoplexiam non producat.	588, 589. seq.
Hydrocephalus morbus boum frequens apud Sub-syl- vanos in Helvetia, ejusdemque curandi bubulco- rum methodus.	64, 370
Hydopes subitanei unde.	261
Hydrops pectoris, ejus symptomata.	262

I.

I ctericis lassitudo, capitis dolor & vertigo unde?	252
Icterus à bile.	252
Ictus sanguinis quid veteres per eum intellexerint.	565
Ira serum ebullire facit.	240
Ira & immoderata venus causæ Apoplexiæ.	482

K.

K Ircheri (<i>Athan.</i>) liber de Phonurgia notatur.	402. 403
--	-------------

L.

L Hyōū vox quid ap. Galenum significet.	114
Lien. neque sanguificat neque sanguinem peculiari qualitate induit 325. Eo exciso animalia satis com- mode supervivunt.	ibid.
	Lien

RERUM ET VERBORUM.

Lien nonnisi sanguinis diverticulum Wepfero creditur.	326
Lien geminus.	493, 496
Lotharingia Apoplecticorum ferax.	247
Lunæ radii Apoplexiam aliquando effecerunt.	238
Lunæ radiorum frigefaciendi facultas experimento quopiam probata.	238, 239
Lunæ effecta & operationes.	681
Lympha & serum validioribus exercitiis attenuatur.	351
Lympha ex artubus & partibus membranosis reflua à Bartholino primum detecta.	350

M.

M Alpighii apoplexia extincti historia.	666
Mania, quinam authores de ea videndi.	687
Maniacorum cibus & potus qualis esse debeant.	690
Mastix præservativum excellens in Apoplexia.	517
Medicamina varia in Apoplexia.	451. & seq.
Medicamina in Apoplexia adhibenda.	533, 534, 537, 538, 539, 540, 541
Melancholicus Humor communiter creditus, Wepfero est non-ens.	252
Melancholia est omnis Apoplexiæ causa juxta Cardanum.	252
Melancholia sola Hippocrati causa est apoplexia.	632, 633
Melancholiæ qualitas præcipua est aciditas.	635
Melancholia an possit pathognomonica Apoplexiæ symptomata producere.	635
Memoriam & Phantasiam diversas in cerebro sedes habere, sententia futilis.	69
Mensium suppressio, causa apopl.	482
Mercurius cerebro se insinuans qua ratione Apoplexiæ causa.	277, 482
Mercurii uncia binæ in cerebro mulieris repertæ.	278

I N D E X

- Mortuorum umbratilis resurrectio per Necromantiam
licitam præstari potest, juxta *Borellum*. 461
Motus cerebro adscribendus 616. ejus impotentia for-
male est & essentia Apoplexiæ. *ibid.*

N.

- N**arcotica immoderate sumta vel sola Apoplexiam
efficiunt. 230
Natta quid? 302
Naturæ in sanguinis distributione sapientia. 87
Nervi, eorum prima origo. 50, 51, 78
Nervi nulli per cerebri substantiam excurrunt. 78
Nervi spiritibus semper liberum transitum concedunt
eosque conservant, nisi premantur, aut corrodan-
tur, aut sphacelo enecentur. 349
Nicotiana vide *Tabacum*.
Nymannus primus ausus est negare Apoplexiam ve-
ram generari à spirituum animalium effluxu omni-
mode intercepta via. 223

O.

- O**bmutescentia sanguinis missione sola interdum tol-
litur. 567
ex Oculorum splendore falsum augurium pro salute
ægri. 504
Oculorum splendor in quibusdam defunctis. 504
Oculus, ex vehementiori ictu oculi quidam attoni-
tus corruit. 215
Opium nimium sumtum qua ratione Apoplexiam
producat. 231
Opium laudes & virtutes ex *Jac. Bont.* p. 232, 234. his-
torix quædam eorum qui eodem absque noxa ni-
mia dosi usi sunt. 233
Opium calidum est. 234
Opium, squomodo ejus usu Maniaci ad quietem sint
perducendi. 687, 688
Os

RERUM ET VERBORUM.

Os ethmoides humoribus haud pervium.	140, 141
Officulum corpori falciformi dimidiæ unciae longitudine accretum.	257, 258
Otii noxa.	237

P.

P ancreatis munus.	506
<i>Pecquet</i> inventor novi chyli ductus.	73
Peritonæum tunicorum simplicissimum credidit Galenus, sed est divisibilis.	505
Philosophandi methodus optima.	413. seq.
Pisces respiratione uti quidam asserunt.	166
Piscibus nimium vescentibus s. Ichthyophagis sanguis viscidior.	190
<i>Pisonis</i> (<i>Caroli</i>) aureus liber de Serosa colluvie.	226
Pituitosa corpora in corde quales morbos producant.	183, 184
Plethora per se sola non est causa apoplexiæ nec pituita.	570, 599. <i>ibid.</i>
Plethorici facilius in Apoplexiam incurrunt.	673
Pleuritis, in ea alteruter pulmonum lobus inflammatur.	384
Polypus cordis vastæ molis.	188
Polypus cordis ex acerbo in sanguine.	507
Polypi cordis aut pulmonis Apoplexiæ obnoxios reddunt.	602, 603, 665
Pori in cerebro non reperiundi.	55
Pororum ex frigore obflipatio multum potest in male affecto corpore.	504
Pressio æqualis nullum corpori detrimentum affert.	591
Pulmones obnoxii sunt tartaro s. calculo.	507
Pulmones in Apoplexia exquisita afficiuntur.	622
Pulsus usus juxta Galenum.	163

Q.

Qualitates sensibiles, ex iis vires & temperies rei
vix judicari debent. 76

R.

Respiratio, absque ea actiones animales aliquandiu
possunt persistere. 166 167

Respiratio quare in Apoplexia a sero vitioso pro-
veniente superstes sit. 249

Respiratio, ab ejus difficultate majori vel minori
æstimandus gradus Apoplexiæ. 525. cur remaneat
in apoplecticis. 529, 530

Rete mirabile, invenitur in brutis p. 24, 44. haud tamen
in Equis 393. ejus locus 24, 44, & p. 25. ejus descriptio
ibid. ejus usus p. 26, 44, 47. 393. an in homine invenia-
tur *ibid.* & p. 27. p. 493, 495. *Riolani* de eo sententia p.
27. quinam Anatomici illud in hominum cadaveri-
bus non invenerint p. 29. seqq. divisio arteriarum
in basi cerebri quibusdam rete mirabile dicitur. 72

S.

Sanguis stricte & late sumtus quid? 674

Sanguis, ejus motus Circularis à quo inventus. p.
20. nullum discrimen inter eum qui sursum &
deorsum fertur. p. 24

Sanguis, triplex substantia in eo animadvertitur. 250

Sanguinis arteriosi & venosi discrimen fictum. 73

Sanguis apoplecticorum frigidus. 458

Sanguis venosus in corde non fit vitalis. 72, 73

Sanguis venosus quomodo vitalitatem accipiat ex
Riolano. p. 70

Sanguinis motus interceptio genuina est Apoplexiæ
causa. 673. seq.

Sanguis arteriarum duræ matris quomodo ad sinum
ter-

R E R U M E T V E R B O R U M.

tertium perferatur.	P. 39, 40
Sanguinis ad cerebrum affluxus quibus rebus impediatur.	179
Sanguis quibus ex causis motu privetur.	152, 153
Sanguinis statio ab <i>Hippocrate</i> ceu vera Apoplexiæ causa tradita.	631
Sanguis extravasatus potius cerebrum spiritibus privando quam premendo Apoplexiam offert.	258
Sanguis concretus in apoplecticis.	485, 550
Sanguinis gutta cadens, plebeja opinio.	565
Sanguinis coagulationis causa atra bilis.	632
Sanguis grumofus, qua ratione dissolvendus & expellendus.	313
Sanguifera vasa non raro citra causam externam sua sponte se aperiunt.	211, 212
Sanguinem roris modo ad substantiam cerebri destillare, erronea <i>Riolani</i> sententia.	88, 89
Scabies retropulsa Apoplexiæ causa.	457
<i>Schneiderus</i> scripsit librum doctissimum de osse cribriformi ac sensu & organo odoratus.	58
Scorpii flagellorum genus.	490, 491
Senes cujus generis apoplexiæ maxime obnoxii sint.	276
Sensuum abolitionis in apoplexia causa.	227
Serum falsius sua sponte effervesceat.	240
Serum redundans si in vasis sanguiferis fermentescat, apoplexiam efficiet.	240
Serum & lymphæ quantitate & qualitate peccantia gravissimorum morborum causa fiunt.	350, 351
Serum falsius & acrius redditur salitorum ciborum, & aromatibus conditorum nimio usu.	261
Serum est tenuior pituita. 225. poros cerebri subito oppilare potest. ibid. est individuus sanguinis comes. 226. facile à sanguine separatur.	ibid.
Serum an cerebrum comprimere possit quantitate sua.	254, 255, 259, 274
Seri copia in capite unde proveniat.	275
Seri in ventriculis cerebri copia non semper Apoplexiæ	

I N D E X

Apoplexiæ sed longe aliorum morborum causa.	298,
	299
Sideratio quid?	484
Siderationes maxime fiunt ab anno 40 ad 60.	633
Sinapi semen inter ea quæ caput replent.	255
Sinuum crassiæ meningis usus.	107
Sinus quartus cerebri vena est.	119
Societas Regia Anglicana & Magni Ducalis Florentina laudantur.	419, 420
Solis effecta & operationes.	678, 679, 680
Solis & Lunæ illius cum corde, hujus cum cerebro comparatio instituta.	678. seqq.
Somni nimii præsertim à prandio noxa.	237, 238
Soni natura qua in re a natura luminis differat.	401
Sonus auribus haustus cum undulatione aquæ comparandus.	404
Spiritus naturâ sursum tendit, oblique & deorsum non nisi per vim agitur.	128
Spiritus ibi generari ubi fiat actio, quo sensu intelligendum.	67, 68
Spiritus animalis conflatur ex vitali p. 22. Spiritus animales non gignuntur in ventriculis cerebri p. 21. & seqq.	
Spiritus animales (vitales) quomodo animalitatem accipiant, juxta <i>Riolanum</i> .	p. 70, 71
Spirituum vitalium & animaliam discrimen, & authores qui hac de re scripserunt.	p. 72
Spiritus animalis à vitali distinctus an detur.	574, 575
Spiritus cujusunque generis frequentius & largius hausti Apoplexiam afferunt.	234, 235
Spongiosum quid sit.	53
Spuma est spiritus & humorum mixtio.	639. &
signum lethale in apoplecticis.	640
Sternutatoria in apopl. sanguinea lethifera.	535
Stomachus, Capite læso cur afficiatur, quæstio solutu difficilis.	337, 378. Vide <i>Ventriculus</i> .
<i>Sydere iæti</i> quinam <i>Hippocrati</i> vocentur.	154

RERUM ET VERBORUM

T.

- T**Abaci usus nimius Apoplexiæ obnoxium reddit.
 481. historia duorum mercatorum, exuctis 17.
 & 18. fistulis apoplecticorum instar concidentium.
 481, 482
 in Tabaci naturam inquiritur. 641, 642. est pulmo-
 nibus infestus. ibid.
 Tempestas Austrina post aquilonarem Apoplexiæ
 causa. 192
 Tempestas frigida ad apoplexiam promovendam
 apta. 238
 Terræ motus per Italiam ab ann. 1688. halitibus
 malignis variis morbis ansam dedere. 670
 Tincturæ traumaticæ probatæ descriptio. 315
 Torcular ex eo sanguis & spiritus juxta *Nymannum*
 cerebro communicantur. 542. refutatur. 543
 Trepanationis necessitas & usus in omni graviore
 casu. 495
 Tubarum stentorophonicarum vis in quibus rebus
 posita sit. 407
 Tumores in capite infantum quomodo dispellantur.
 313
 Tumor osseus spongiosus in bregmatis osse sinistro.
 508

V.

- V**Arolii & Spigelii de Ventriculis cerebri opinio.
 p. 52
 Vasa capillaria *Vesalius* oppugnat. 85, 86
 Venarum origo ubi? 115
 Venarum officium non est sanguificare. 114
 Venæ sectio apoplexiæ remedium. 193, 199. quando
 non conveniat. 200. quid efficiat. 202, 202
 Venæ sectio in apopl. sanguinea statim adhibenda.
 534. quando utilis, quando noxia. 577, 578
 Venæ sectio frequens remedium quidem melanco-
 liæ,

I N D E X

- liæ, sed ex altera parte causa apoplexiæ, juxta *Avicennam*. 205
- Ventriculi cerebri, cui usui ex Galeni & aliorum sententia inserviant. p. 21. & 22. p. 66. p. 135, 139.
- Riolani* opinio de iis. p. 41, 52. eorum descriptio. p. 42, 43
- Ventriculus tertius est sentina cerebri. p. 48, 55
- Ventriculus quartus cerebri, an spirituum animalium officina sit. 145, seqq.
- Ventriculi cum cerebro consensus. 337
- Ventriculus, in ejus cavum semper liquor aliquis exstillat. 347, 250
- Venus, exempla quorundam in usu veneris apoplexia extinctorum. 487, 488
- Verbasci radix est miræ virtutis anti-apoplecticæ. 521, 522, 523
- Verbera remedium apoplexiæ. p. 489, 491
- Vinum absinthites crebrius usurpatum apoplecticos facit. 481
- Vinum inter narcotica referendum. 233, 234
- Vinum qua ratione caput repleat. 255, 256
- Vina rubra caput petunt præ albo. 513
- Viscida, callosa, ac glutinosa corpora aut in corde, aut in cerebro, aut in utrisque apud apoplexia defunctos reperiuntur. 458
- Vox humana quo modo omnium optime intendatur, problema. 403
- Urina hydropotarum non minus multo sale turgida quam vinipotorum. 327, 328
- Urina cuniculorum post lactucam pastam acerrima. 328
- Urinæ suppressio diuturna morbi attoniti causa. 555
- Vulnera tenuibus intestinis inflicta periculosiora iis quæ crassis. 505

W.

W *Alai* (Joh.) Epist. de sanguinis motu, 80

F I N I S.





21/2
9
1

